

চুয়া-চন্দন

শ্রীশরদিন্দু বন্দ্যোপাধ্যায়

পি সি সরকার এণ্ড কোং লিঃ
কলিকাতা

দেড়টাক।

৬৫, নীতারাম ঘোষট্টাট, কলিকাতা। শ্রীকালী প্রেস হইতে শ্রীপরমানন্দ সিংহ
বায় কর্তৃক মুদ্রিত ও ১৮ শ্রামাচরণ দে ট্টাট, কলিকাতা, পি সি সরকার এণ্ড কোং
লিঃ হইতে শ্রীপ্রভাতচন্দ্র সরকার কর্তৃক প্রকাশিত।

ଛତ୍ରା-ଚନ୍ଦନ

সূচি

বাঘের বাচ্চা	১
রক্ত-খণ্ডোত	২৭
কর্তার কীর্তি	৪৩
রক্ত-সন্ধ্যা	৫২
মরণ-ভোমরা	১০১
চুয়া-চন্দন	১১৭

বাঘের বাচ্ছা

পুনা গ্রাম হইতে প্রায় সাত-আট ক্রোশ দক্ষিণ পশ্চিম দিকে উপত্যকা হইতে বহু উর্দ্ধে গিরিসঙ্কটের ভিতর দিয়া দুইজন সওয়াব মিন্নাভিমুখে অবতরণ করিতেছিল। চারিদিকেই উচ্চনীচ ছোটবড় পাহাড়ের শ্রেণী,—যেন কতকগুলো অতিকায় কুস্তীর পরস্পর ঘেঁষাঘেঁষি হইয়া তাল পাকাইয়া এই হেমন্ত অপরাহ্নের সোনালী রৌদ্রে শুইয়া আছে। তাহারি মধ্যে পিপীলিকার মত দুইটি প্রাণী সূর্য্যের দিকে পশ্চাৎ করিয়া ক্রমশঃ দীর্ঘায়মান ছায়া সন্মুখে ফেলিয়া ধীরে ধীরে নামিয়া আসিতেছিল।

এখান হইতে উপত্যকা দৃষ্টিগোচর নয়, পথেরও কোনো চিহ্ন কোথাও বিদ্যমান নাই। চতুর্দিকে কেবল উল্লঙ্গ ককঁশ পাহাড়, মাঝে মাঝে দুই একটা খন্দারূতি কটকগুহ। এই সকল চিহ্ন ছাড়া পথিককে বহুদূরস্থ জনপদে পরিচালিত করিবার কোনো নিদর্শন নাই,—অনাভিজ্ঞ ব্যক্তির পক্ষে এরূপ স্থানে দিকব্রান্ত হইবার সম্ভাবনা অত্যন্ত অধিক।

অস্বারোহী দুইজন যে পথ দিয়া নামিতেছিল তাহাকে পথ বলা চলে না, বর্গার জল চূড়া হইতে নামিবার সময় পর্তগাত্রে যে উপলপিচ্ছিল প্রণালী রচনা করে এ সেইরূপ একটি প্রণালী, পাহাড়ের শীর্ষ হইতে প্রায় ঋজুরেখায় পাদমূল পর্য্যন্ত নামিয়া গিয়াছে।

সওয়াব দুইজন ঘোড়ার বরা ছাড়িয়া দিয়া পরস্পর বাক্যালোপ করিতে করিতে চলিয়াছিল, খর্ব্বদেহ রোমশ পাহাড়ী ঘোড়া স্বেচ্ছামত সেই ঢালু বিপজ্জনক পথে সাবধানে অবতরণ করিতেছিল। এই স্থানে পথ এত বেশী ঢালু যে একবার অশ্বের পদখলন হইলে আরোহীর মৃত্যু অনিবার্য্য। কিন্তু সেদিকে আরোহীদের দৃষ্টি নাই।

আরোহীদের মধ্যে একজন প্রাচীন বয়স্ক; মাথার চুল ও গৌণ পাকা, বর্ণ এত বয়সেও তপ্তকাঞ্চনের ত্যায়। কপালের একপ্রান্ত হইতে

অন্য প্রান্ত পৰ্য্যন্ত খেত-চন্দনের দুইটি রেখা বোধ করি জরাজনিত ললাট রেখাকে চাকিয়া দাঁটাছে। মস্তকে শুভ্র কার্পাসবস্ত্রের উষ্ণীষ; দেহে তুলট আঙুরাখার ফাঁকে বামস্কন্ধের উপর উপবীতের একাংশ দেখা যাইতেছে। চোপে মুখে একটি দৃঢ় অচঞ্চল বুদ্ধির প্রভা। দোঁপলেই বুঝা যায় ইনি একজন শাস্ত্রাধ্যায়ী অভিজাত বংশীয় ব্রাহ্মণ। ইহার হস্তে কোনো অস্ত্র নাই, কিন্তু যেরূপ স্বচ্ছন্দ নিশ্চিন্তার সহিত অবতরণ-শীল অশ্ব পৃষ্ঠে অটল হইয়া বসিয়া আছেন তাহাতে মনে হয় কেবল ব্রহ্মবিদ্যার অত্মশীলন করিয়াই ইনি জীবন অতিবাহিত করেন নাই।

দ্বিতীয় আরোহীটি ইহার সম্পূর্ণ বিপরীত। বয়স বোধকরি ষোল বৎসরও অতিক্রম করে নাই; দেহের বর্ণ শ্যাম কিন্তু মুখের গঠন অতিশয় ধারালো। দুদধ সদৃশ মুখের মধ্যস্থলে শ্বেদচক্ষুর মত নাসিকা এই অল্প বয়সেই তাহার মুখে শিকারীর মত একটা শাণিত তীব্রতা আনিয়া দিয়াছে। চক্ষু দুটি বড় বড়, চক্ষুতারকা নিবিড় কৃষ্ণবর্ণ; বালকস্বলভ চঞ্চলতা সত্ত্বেও দৃষ্টি অতিশয় তীক্ষ্ণ ও মর্মভেদী। ওষ্ঠের উপর ও চিবুকের নিম্নে ঈষন্মাত্র রোমরেখা দেখা দিয়াছে, তাহাও বর্ণের সলিলতার জগ্গ স্পষ্ট প্রতীয়মান নয়। জ্র-যুগল সূক্ষ্ম ও দূরপ্রসারিত। সহসা এই বালকের মুখ দেখিলে একটা অপূর্ব বিভ্রম জন্মে, মনে হয় যেন একখানা তীক্ষ্ণধার বাকা কুপাণ সূর্য্যালোকে ঝক ঝক করিতেছে।

মুখ হইতে দৃষ্টি নানাইয়া দেহের প্রতি চাহিলে কিন্তু আরো চমক লাগে। মুখের মত দেহের সৌষ্ঠব নাই, প্রস্থের তুলনায় দৈর্ঘ্যে দেহ অত্যন্ত গর্ভ। প্রথমেই মনে হয়, অতিশয় বলশালী। কটি হইতে পায়ের শুঁড়তোলা নাগরা জুতা পর্য্যন্ত প্রাণসার অথচ ক্ষীণ, মৃগচরণের মত যেন অতি দ্রুত দৌড়িবার জগ্গই সৃষ্ট হইয়াছে।

কিন্তু কটি হইতে উর্দ্ধে দেহ ক্রমশঃ প্রশস্ত হইয়া বক্ষস্থল একপ বিশাল আয়তন ধারণ করিয়াছে যে বিস্মিত হইতে হয়। আরো অদ্ভুত তাহার দুই বাহু ; আজাহুলস্থিত বলিলেও যথেষ্ট হয়না, সন্দেহ হয় ঘোড়ার পিঠে বসিয়া হাত বাড়াইলে মাটি হইতে উপলব্ধ তুলিয়া লইতে পারে। তাহার উপর যেমন সুপুষ্ট তেমনি পেশীবহুল ; দুই বাহু দিয়া কাহাকেও সবলে জড়াইয়া ধরিলে তাহার পঙ্কর ভাঙিয়া যাওয়া অসম্ভব নয়।

এই বালক হাসিতে হাসিতে চতুর্দিকে চঞ্চল চক্ষে দৃষ্টিপাত করিতে করিতে নামিতেছিল। ঘোড়ার রেকাব নাই, লাল রেশমের জরিমোড়া মোটা লাগামও ছাড়িয়া দিয়াছে, অথচ কবলের জিনের উপর এমন ভাবে বসিয়া আছে যেন সে আর ঘোড়া পৃথক নয়—কোনো ক্রমেই তাহাদের বিচ্ছিন্ন করা যাইবে না। বামহস্তে আগাগোড়া লোহার ভারী বল্লমটা এমনি অবহেলা ভরে ধরিয়া আছে যেন পাগড়ীর উপর খেলাচ্ছিলে রোপিত শুকপুচ্ছটার চেয়েও সেটা হালকা।

ঘোড়া দুইটি পাহাড়ের পাদমূলে আসিয়া দাঁড়াইল। সম্মুখে প্রায় পঞ্চাশ গজ দূরে আর একটা পাহাড় আরম্ভ হইয়াছে, এবার, সেইটাতে চড়িতে হইবে। সূর্য্য পিছনের উচ্চ পাহাড়ের চূড়া স্পর্শ করিল, শীঘ্রই তাহার আড়ালে ঢাকা পড়িবে।

বালক চতুর্দিকে চাহিয়া যেন প্রাণশক্তির আতিশয্য বশতঃই উচ্চকণ্ঠে হাসিয়া উঠিল, তারপর বলিল,—‘দাদো, প্রতিধ্বনি শুনবে ? হোয়া হো হো হো হো ! চুপ ! এইবার শোনো !’

কয়েক মুহূর্ত্ত পরেই • তিনদিক হইতে ভৌতিক শব্দ কিরিয়া আসিল—হোয়া ! হো হো হো !

বালক অঙ্গুলি নির্দেশ করিয়া উত্তর 'দিকের একটা উচ্চ পর্বতশৃঙ্গ দেখাইয়া বলিল,—‘ঐটে সব চেয়ে দূরে! আগুয়াজ ফিরে আসতে কত দেরী হল দেখলে? চোখে দেখে কিন্তু বোঝা যায়না কোনটা কাছে কোনটা দূরে। অন্ধকার রাত্রে পথ হারিয়ে গেলে প্রতিধ্বনি ভারি কাজে লাগে—না দাদো?’

বৃদ্ধ মুহূহাস্তে উত্তর করিলেন,—‘তা লাগে। কিন্তু অন্ধকার রাত্রে এরকম যায়গায় পথ হারিয়ে যাবার তোমার কোনো সম্ভাবনা আছে কি?’

বালক বলিল,—‘তা নেই। তুমি আমার চোখ বেঁধে দাও, দেখ আমি ঠিক পুনায় ফিরে যেতে পারব।’

বৃদ্ধ বলিলেন,—‘সে আমি জানি। লেখাপড়ার দিকে তোমার একেবারে মন নেই, কেবল দিবারাত্রি পাহাড়ে জঙ্গলে ঘুরে বেড়াতে পেলোই ভাল থাকো। তোমার বাবা যখন আমার কাছে কৈফিয়ৎ চাইবেন তখন যে আমি কি কৈফিয়ৎ দেব তা জানি না।’

বালকের মুখে একটা ছুষ্ঠামির হাসি খেলিয়া গেল, সে বৃদ্ধের দিকে আড়চোখে কটাক্ষপাত করিয়া বলিল,—‘আচ্ছা দাদো, ‘আলিফ’ ভাল না ‘অ’ ভাল? বাঁ দিক থেকে ডান দিকে লেখা স্মৃতিধে না ডান দিক থেকে বাঁ দিকে?’

বৃদ্ধ বিরক্ত হইয়া বলিলেন,—‘সে তুমি বুঝতে পারবে না। ষোলো বছর বয়স হল এখনো নিজের নাম সহি করতে শিখলে না। তোমার লেখাপড়ার চেষ্টা করাই বৃথা!—কিন্তু শিকারের দিকেও ত তোমার মন নেই দেখতে পাই। আজ সারাদিন ঘুরে একটা খরগোসও মারতে পারলে না।’

বালক, আক্ষেপে হস্ত উৎক্ষিপ্ত করিয়া বলিল,—‘খরগোস আমি মারতে পারি না, আমার ভারি মায়্যা হয়। ঐটুকু জানোয়ার, তার

ওপর হিংসার লেশ তার শরীরে নেই—খালি প্রাণপণে পালাতে জানে।’

বুদ্ধ জিজ্ঞাসা করিলেন,—‘তবে কোন জানোয়ার মারতে চাঁও শুনি—বাঘ!’

উৎসাহপ্রদীপ্ত চক্ষে কিশোর বলিল,—‘হাঁ বাঘ। এ পাহাড়ে বাঘ পাওয়া যায় না দাদো?’

বুদ্ধ মাথা নাড়িয়া বলিলেন,—‘না। শুনেছি আরো দক্ষিণে পাহাড়ের গুহায় বাঘ আছে। কিন্তু তুমি বাঘ মারবে কি করে?’

কিশোর বলিল,—‘কেন, এই বল্লম দিয়ে মারব। মাটিতে সামনা-সামনি দাঁড়িয়ে মারব।’

‘ভয় করবে না?’

‘ভয়!’ বালকের উচ্চহাস্য আবার চারিদিকে প্রতিধ্বনি তুলিল—‘আচ্ছা দাদো, ভয় জিনিষটা কি আমাকে বুঝিয়ে বলতে পারো? সকলের মুখেই ওই কথাটা শুনেতে পাই কিন্তু ওটা যে কি পদার্থ তা বুঝতে পারি না। ভয় কি ক্ষুধার মত একটা প্রবৃত্তি?’

দাদো বলিলেন,—‘ভয় কি তা বুঝতে পারবে যেদিন প্রথম যুদ্ধে নামবে, যেদিন হাতিয়ারবন্দ শত্রুকে সামনে দেখতে পাবে।’

বালক কি একটা বলিতে গেল কিন্তু পরক্ষণেই নিজেকে সম্বরণ করিয়া লইয়া চুপ করিয়া ভাবিতে লাগিল।

দাদো বলিলেন,—‘আমি বড় বড় বীরের মুখে শুনেছি যে তাঁরাও প্রথমে শত্রুর সম্মুখান হয়ে ভয় পেয়েছেন। এতে লজ্জার বিষয় কিছু নেই; সেই ভয়কে জয় করাই প্রকৃত বীরত্ব।’

সূর্য্য গিরিশৃঙ্গের অন্তরালে অদৃশ্য হইল, সঙ্গে সঙ্গে নিম্নভূমির উপর একটা ছায়াবৃক্ষ যবনিকা পড়িয়া গেল। শুধু উর্দ্ধে নগ্ন গিরিকূট এবং

আরো উজ্জ্বল নীল আকাশে একথণ্ড মেঘ সিন্দূরবর্ণ ধারণ করিয়া জলিতে লাগিল।

দাদো নিজের অশ্রু সম্মুখে চালিত করিয়া কহিলেন,—‘আর দেবী নয়। সন্ধ্যা হয়ে আসছে, এখনো দুটো পাহাড় পার হতে বাকী। পূনা পৌছতে রাত হ’য়ে যাবে।’

বালক তাঁহার অস্থগামী হইয়া বলিল,—‘তা হলেই বা, আমি তোমাকে পথ দেখিয়ে ঠিক নিয়ে যাব।’

দাদো বলিলেন,—‘রাত্রে এসব পাহাড়-পর্বত নিরাপদ নয়। শোনোনি, এদিকের গায়ে-বস্তুতে আজকাল প্রায় লুঠ-তরাজ হচ্ছে?’

বালক ভারি বিশ্বয় প্রকাশ করিয়া বলিল,—‘তাই নাকি? কৈ আমি ত শুনিনি। কারা লুঠ-তরাজ করছে?’

দাদো বলিলেন,—‘তা কেউ জানেনা। বোধহয় এই দিকের বুনো পাহাড়ী মাওলীরা ডাকাতি করছে। বিজাপুর এলাকার তিনটে বড় বড় গ্রাম গত চারমাসের মধ্যে লুঠ হয়ে গেছে। শুনতে পাই তাদের সর্দার একজন ছোকরা, লোহার সাজোয়া আর মুখোশ পরে ঘোড়ায় চড়ে লুঠেরাগুলোকে ডাকাতি করতে নিয়ে যায়। ছোঁড়াটা নাকি ভয়ঙ্কর কালো বেঁটে আর জোয়ান।’

বালক তাহার হাতের বলমটা খেলাচ্ছিলে ঘুরাইতে ঘুরাইতে তাচ্ছিল্যভরে জিজ্ঞাসা করিল,—‘তাই নাকি? তুমি এত কথা কোথা থেকে জানলে দাদো?’

দাদো পাহাড়ে ঘোড়া চড়াইতে চড়াইতে বলিলেন,—‘ও অঞ্চলের দেশমুখরা দরবারে নালিশ করতে এসেছিল। স্তানের বিশ্বাস ডাকাতের সর্দার পুনার লোক।’

দাদোর পশ্চাতে বালকও পাহাড়ে উঠিতে উঠিতে জিজ্ঞাসা করিল,—
'তোমরা দরবার থেকে কি ব্যবস্থা করলে?'

দাদো বলিলেন,—'কিছু করা হয়নি। দেশমুখদের তোমার বাবার কাছে বিজাপুরে পাঠিয়ে দিয়েছি।'

বালক পশ্চাতে থাকিয়া মিটিমিটি হাসিতেছিল, দাদো তাহা দেখিতে পাইলেন না। কিছুক্ষণ কোনো কথা হইল না।

পাহাড়ের পিঠের উপর উঠিয়া দুইতনে ক্ষণকাল পাশাপাশি দাঁড়াইলেন। এখানে আবার সূর্য্যাকিরণ আসিয়া বালকের বল্লমের ফলায় ঘন আগুন ধরাইয়া দিল।

সম্মুখের পাহাড়তলীতে তখন ঘোর-ঘোর হইয়া আসিয়াছে, নীচের দিকে দৃষ্টিপাত করিয়া বালক বলিল,—'আচ্ছা দাদো, এখন যদি আমাদের ডাকাতে আক্রমণ করে তুমি কি কর?'

দাদো ক্ষিপ্ৰদৃষ্টিতে একবার চতুর্দিকে চাহিয়া বলিলেন,—'কি আর করি! তাদের সঙ্গে লড়াই করি।'

'তারা যদি পঞ্চাশজন হয়?'

'তা হলেও লড়ি।'

বালক বলিল,—'কিন্তু সে যে ভারী বোকামি হবে দাদো। পঞ্চাশজনের সঙ্গে লড়াই করে তুমি পারবে কেন?'

দাদো বলিলেন,—'তাতে কি! নাহর লড়াই করতে করতে মরব।'

বালক বিস্মিত হইয়া বলিল,—'কিন্তু এরকম মরে লাভ কি দাদো?'
তারপর মাথা নাড়িয়া বলিল,—'আমি কিন্তু লড়ি না, তীরের মত এই ধার বেয়ে পালাই। ঐত জোংর পালাই যে ডাকাতের বর্শা আমাকে ছুঁতেও পারবেনা।'

ক্ষুদ্র বিশ্বয়ে দাদো বলিলেন,—‘ক্ষত্রিয়ের ছেলে, তুমি, দুঃখমনের সামনে থেকে পালাবে ? এই না বলছিলে, ভয় কাকে বলে জানো না !’

বালক বলিল,—‘ভয় ! পালানোর সঙ্গে ভয়ের সম্পর্ক কি ? পালাবো কারণ পালালেই আমার সুবিধা হবে, পরে ডাকাতদের জন্ম করতে পারব। আর লড়ে যদি মরেই যাই তাহলে ত ডাকাতদের জিং হল !’

দাদো মাথা নাড়িয়া বলিলেন,—‘না না, এসব শিক্ষা তুমি কোথা থেকে পাচ্ছ ? না লড়ে পালিষ্টে যাওয়া ভয়ঙ্কর কাপুরুষতা। যে বীর সে কখনো পালায় না। রাজপুত বীরদের গল্প শোনোনি ?’

বালক বলিল,—‘রাজপুতদের গল্প শুনে আমার গা জ্বালা করে। তারা শুধু লড়াই করতে পারে, বুদ্ধি এতটুকু নেই। যিনি যতবড় বীর তিনি ততবড় বোকা !’

দাদো খোঁচা দিয়া বলিলেন,—‘তুমিও ত রাজপুত ! মায়ের দিক থেকে তোমার গায়েও ত যদুবংশের রক্ত আছে !’

বালক সবেগে শিরঃসঞ্চালন করিয়া বলিল,—‘না আমি রাজপুত হইতে চাই না, আমি মারাঠী !’ বালকের ললাট মেঘাচ্ছন্ন হইয়া উঠিল কিন্তু পরক্ষণেই সে হাসিয়া উঠিয়া বলিল,—‘আচ্ছা দাদো, তোমার কাছে ত বড় বড় যুদ্ধের গল্প শুনেছি কিন্তু একটা কথা কিছুতেই বুঝতে পারি না। সম্মুখ যুদ্ধ করবার মানে কি ?’

দাদো সহসা এ প্রশ্নের উত্তর দিতে পারিলেন না। শেষে বলিলেন,—‘সম্মুখ যুদ্ধ মানে সামনা সামনি শক্তি পরীক্ষা। যার শক্তি বেগী সেই জিতবে !’

‘আর যার শক্তি কম সে যদি চালাকি করে জিতে যায় !’

‘সে ত আর ধর্মযুদ্ধ হল না !’

‘নাইবা হল ! যুদ্ধে হার জিতই ত আসল—ধর্মযুদ্ধ হল কি না তা দেখে লাভ কি ?’

• দাদো অনেকক্ষণ বালকের জিজ্ঞাসা মুখের দিকে চাহিয়া রহিলেন, শেষে দুঃখিতভাবে ঘাড় নাড়িয়া বিড় বিড় করিয়া বলিলেন,—‘বাপের স্বভাব ষোল আনা পেয়েছে, তেমনি ধর্ম আর হুঁসিয়ার—সর্বদাই লাভ লোকসানের দিকে নজর । আর শুধু বাপ কেন, বংশটাই ধর্ম ! মালোজী ভৌস্লে যদি চালাকি করে যত্নবংশের মেয়ে ঘরে না আনতে পারত তাহলে ভৌস্লে বংশকে চিন্ত কে ? আর শাহুই বা এতবড় জায়গীরদার হত কোথা থেকে ?’

পলকের মধ্যে বালকের সংশয়প্রসূর্ণ মুখভাবের পরিবর্তন হইল । বালোকোচিত কৌতূহলে দাদোর নিকটে সরিয়া গিয়া সাহুসকণ্ঠে বলিল,—‘দাদো, তুমি যে আমার মা’র বিয়ের গল্প বলবে বলেছিলে, কৈ বললে না ? বল না, দাদো, কি করে ঠাকুর্দা যত্নবংশী মেয়ে ঘরে আনলেন ।’

এই সময় নিম্নের ছায়াচ্ছন্ন প্রদোষাঙ্ককার হইতে গাভীর হাস্যরস ভাসিয়া আসিল । বালক সচকিত হইয়া বলিয়া উঠিল,—‘ঐ শোনো দেওরামের গরু ঘরে ফিরে এল । চল চল দাদো; আর দেবী নয় ; সমস্তদিন ঘুরে ঘুরে ভারি ক্ষিদে পেয়ে গেছে—এতক্ষণ তা লক্ষাই করিনি । দেওরামের মেয়ে হুন্নার সঙ্গে সেই যে সকালবেলা তেতুলবনের ধারে দেখা হয়েছিল, সে বলেছিল ফেরবার সময় তাজা দুধ খাওয়াবে । জয় ভবানী ।’

বালক দুই পা দিয়া ঘোড়ার পেট চাপিয়া ধরিতেই ঘোড়া লাফাইয়া সম্মুখদিকে অগ্রসর হইল । আঁকিয়া ঝাঁকিয়া পার্বত্য হরিণের মত পাখর হইতে পাখরের উপর ধাপে ধাপে লাফাইয়া পড়িয়া বিদ্যুৎবেগে নীচের দিকে অদৃশ্য হইল ।

দাদো বালকের উচ্চকণ্ঠস্বর দূর হইতে শুনিতো পাইলেন,—‘চলে এস দাদো, দেওরামের ঘর ঝর্ণাতলার টালের উত্তর দিকে কুলগাছের জঙ্গলের মধ্যে ; যদি খুঁজে না পাও হাঁক দিও—হুন্না এসে পথ দেখিয়ে নিয়ে যাবে।’

বুদ্ধ পরিত অবতরণ করিয়া বদরীবনের মধ্যে যখন দেওরামের কুটির অঙ্গনে পৌঁছিলেন তখন দেখিলেন একটি বারো-তেরো বছরের মাওলী চাষার মেয়ে একটা ক্ষুদ্রকায় গাভীকে দোহনের চেষ্টা করিতেছে এবং বালক ঘোড়া ছাড়িয়া দিয়া অদূরে দাঁড়াইয়া সকৌতুকে সেই দৃশ্য দেখিতেছে। গাভীটা বোধ হয় অপরিচিত ব্যক্তি ও ঘোড়া দেখিয়া ভয় পাইয়াছে তাই কিছুতেই স্থির হইয়া দাঁড়াইয়া ছুন্ধ দোহন করিতে দিতেছে না, চেষ্টা করিবামাত্র সরিয়া সরিয়া যাইতেছে।

মেয়েটি বিব্রত হইয়া বলিল,—‘তুমি ওর শিংছুটা একবার ধর না, নইলে বজ্জাত গরু কিছুতেই ছুঁতে দেবেনা।’

বালক গরুর শিং ধরিবার কোনো চেষ্টা না করিয়া তামাসা করিয়া বলিল,—‘তুই কেমন মাওলার মেয়ে—গাঈ ছুঁতে জানিস না ? দাঁড়া, বিশ্বাসকে বলে দেব সে আর তোকে বিয়ে করবে না।’

ক্ষুদ্র লজ্জায় হুন্না এতটুকু হইয়া গিয়া বলিল,—‘তোমার ঘোড়া দেখেই ত আজ ও অমন করছে নইলে আমিহি ত রোজ ছুই।’

বালক মুকুন্দিয়ানা দেখাইয়া বলিল,—‘হ্যাঁ ছুই ! আর বড়াই করতে হবে না। দে আমায় ঘটি আমি ছুয়ে দিচ্ছি।’

হুন্না বলিল,—‘তুমি পারবে না। আমি আর বাবা ছাড়া কেউ ওকে ছুঁতে পারে না। তোমাকে ও এখনি ফেলে দেবে।’

বালকের আত্মাভিমানে ভীষণ আঘাত লাগিল, সে তর্জ্জন করিয়া বলিল,—‘কি ! ফেলে দেবে ! দেখি ত কেমন তোর গরু। দে ঘটি।’

ভুন্নর হাত হইতে জোর করিয়া ঘটি কাড়িয়া লইয়া বালক দুধ দোহন করিতে বসিল। গরুটা ঘাড় বাঁকাইয়া একবার দোহনকারীকে দেখিয়া লইয়া চক্রাকারে ঘুরিতে আরম্ভ করিল। কিন্তু বালকও ছাড়িবার পাত্র নয়, ঘটি লইয়া মুখে নানাপ্রকার প্রীতিহৃৎক শব্দ করিতে করিতে তাহার পশ্চাতে ঘুরিতে লাগিল। অবশেষে কি মনে করিয়া গাভীটা দাঁড়াইয়া পড়িল। তখন বালক সন্তুর্ণণে তাহার দেহে হাত বুলাইয়া দিয়া গাভীর পশ্চাদিকে বসিয়া দুই জাম্বুর মধ্যে ভাঙটি ধরিয়া যেমন গাভীর উদ্বসের দিকে হাত বাড়াইয়াছে, অমন গাভী এক চরণ তুলিয়া তাহাকে এরূপ সবেগে পদাঘাত করিল যে বালক ভাঙ সমেত চিং হইয়া মাটিতে পড়িয়া গেল।

ভুন্নর কলকণ্ঠে উচ্ছ্বাস করিয়া উঠিল। গাভীটা যেন কণ্ঠব্যাক্ষ্ম সূচাক্রমে সম্পন্ন করিয়া স্থির হইয়া দাঁড়াইয়া রোমন্থন করিতে লাগিল।

বৃদ্ধ দাদো অশ্ব হইতে অবতরণ করিয়া বালকের কাছে আসিয়া জিজ্ঞাসা করিলেন,—‘লেগেছে নাকি?’

বালক অঙ্গের ধূলা ঝাড়িতে ঝাড়িতে উঠিয়া দাঁড়াইয়া বলিল,—‘গরু নয়—ঘোড়া। গরু কখনো অমন চাট ছোঁড়ে? নে ভুন্নর তোর ঘটি, আমি ঘোড়ার দুধ খেতে চাই না। বাড়ী চলুম।’

বালক অশ্বপৃষ্ঠে উঠিতে যায় দেখিয়া ভুন্নর মিনতি করিয়া বলিল,—‘আর একটু দাঁড়াও না, বাবা এল বলে। বড্ড ক্ষিদে পেয়েছে বলছিলে—ঘরে বাজুরার রুটি আছে এনে দেব?’

বালক বলিল,—‘না তোর রুটি দুধ কিছু খেতে চাইনা। আমি চলুম।’

এমন সময় কুটির পশ্চাতের ঘন ঝোপের ভিতর হইতে দুইটি লোক বাহির হইয়া আসিল। একজন খর্বকায় বৃষস্কন্ধ মধ্যবয়স্ক লোক, অপরটি

পঁচিশ চাক্ষুশ বছর বয়সের দৃঢ় শরীর যুবা। হাতের বল্লম কুটীরের গায়ে ছোলাইয়া রাখিয়া মধ্যবয়সী লোকটি দ্রুতপদে আসিয়া বালকের ঘোড়ার রাশ ধরিল। বালক তখন ঘোড়ার উপর চড়িয়া বসিয়াছে, লোকটি সাম্মান্য নিম্নকণ্ঠে বলিল,—‘রাজা, ঘোড়া থেকে নামো, দুধ না খেয়ে যেতে পারে না।’

যুবকটিও এতক্ষণে সসম্মত হাশ্চাঙ্গাসিত মুখে নিকটে আসিয়া দাঁড়াইয়াছিল। বালক একলক্ষে ঘোড়া হইতে নামিয়া দৌড়িয়া গিয়া হুম্মার চুলের মুঠি ধরিল, তাহাকে চুল ধরিয়া টানিতে টানিতে যুবকের সম্মুখে লইয়া গিয়া প্রায় তাহার বকের উপর ফেলিয়া দিয়া বলিল,—‘এই নে বিশুয়া, এটাকে তুই ঘরে নিয়ে যা, তোর সঙ্গে ওর বিয়ে দিলুম। যদি বজ্জাতি করে, খুব পিটবি। আর ওই হতভাগা গরুটাকেও তুই নিয়ে যা, ওটা হল তোর বিয়ের যোতুক।’

হুম্মা বালকের হাত ছাড়াইয়া কুটীরের ভিতর পলাইয়া গেল। বিশুয়া হাসিতে হাসিতে হেঁট হইয়া বালকের পদস্পর্শ করিয়া বলিল,—‘তুমি যখন দিলে রাজা তখন আর আমার ভাবনা কি! এবার ঘোড়ার পিঠে তুলে ওকে ঘরে নিয়ে যাব। কি বল দেওরাম?’

দেওরাম গম্ভীর ভাবে একটু হাসিয়া বলিল,—‘তা যাস্। রাজা যখন তোর হাতে হুম্মাকে দিয়েই দিয়েছে তখন আর আমি কি বলব? আর, আমি হুম্মার মন জানি, সেও তোকেই বিয়ে করতে চায়।’

এই সময় হুম্মার হাসিমুখ কুটীরের ভিতর হইতে পলকের জ্ঞপ্ত দেখা গেল। সে সশব্দে কুটীর দ্বার বন্ধ করিয়া দিল।

দেওরাম ভূপতিত ঘটিটা তুলিয়া লইয়া ঝুঙ্ক দৌঁধনে প্রবৃত্ত হইল। ‘গাভীটা, এবার আর কোনো আপত্তি করিল না।’

বৃদ্ধ দাদো এতক্ষণ অদূরে দাঁড়াইয়া ইহাদের কথাবার্তা শুনিতে ছিলেন। তাহার মুখে সংশয় ও সন্দেহের ছায়া ঘনীভূত হইতেছিল। এই নির্জন বনের মধ্যে একটিমাত্র কুটীর তাহার, অধিবাসী এই ভীমকায় দেওরাম। ইহারা কে এবং বালকের সহিত ইহাদের পরিচয় হইল কিরূপে ?

তিনি অগ্রসর হইয়া বিশুয়াকে জিজ্ঞাসা করিলেন, ‘তোমরা একে চিন্লে কি করে ?’

নিমেষের জ্ঞা বিশুয়া ও বালকের চোখে চোখে একটা ইঙ্গিত খেলিয়া গেল। বিশুয়ার মুখ ভাবলেশহীন হইয়া গেল, সে কিছুক্ষণ নীরব থাকিয়া বলিল, ‘দরবারে গুঁকে দেখেছি, উনি জাগীরদারের ছেলে।’

বৃদ্ধ সন্দিগ্ধভাবে পুনশ্চ প্রশ্ন করিলেন,—‘তোমরা গুঁকে রাজা বলে ডাকছ কেন ?’

বিশুয়া কোনো উত্তর খুঁজিয়া পাইল না ; দুহুদোহন করিতে করিতে দেওরাম জবাব দিল,—‘জাগীরদারের ছেলে, উনিই একদিন মালিক হবেন তাই রাজা বলে ডাকি।’

দাদো উত্তরে সন্তুষ্ট হইলেন না, বলিলেন,—‘ইনি জায়গীরদারের মেজো ছেলে তাও জান না ? সে যাক—’ বালকের দিকে ফিরিয়া জিজ্ঞাসা করিলেন,—‘কিন্তু তুমি এদের চিন্লে কি করে জিজ্ঞাসা করি ?’

বালক অত্যন্ত সরলভাবে উত্তর করিল,—‘শিকার করতে এসে এদের সঙ্গে ভাব হয়েছে দাদো। তুমি ত আর প্রত্যেকবার আমার সঙ্গে আসো না তাই জানো না। কতবার শিকার করে ফেরবার মুখে দেওরামের জোয়ারী কুটি খেয়েছি—দেওরাম আমাকে ভারি যত্ন করে।’

দাদো বালকের ছলনামূলক মুখের দিকে ক্রিয়াকাল তীক্ষ্ণ দৃষ্টিতে তাকাইয়া থাকিয়া শুধু কহিলেন,—‘হু।’ মনে মনে ভাবিলেন,—তোমার গতিবিধির উপর এখন হইতে একটু বিশেষ লক্ষ্য রাখিতে হইবে। ব্যাপার ঠিক বুঝা যাইতেছে না।

দারোহী ছফের পাত্র আনিয়া দেওরাম বালকের হাতে দিল। বালক জিজ্ঞাসা করিল,—‘দাদো, তুমি পাবে না?’

দাদো কহিলেন,—‘না তুমি খাও। আমার এখনো আফ্রিক বাকী।’

ছফপাত্র ছুই হস্তে ধরিয়া বালক অদূরে একটি শিলাথণ্ডের উপর গিয়া বসিল। দেওরামও তাহার অনুবর্তী হইয়া পাশে গিয়া দাঁড়াইল। এক চুমুক ছফ পান করিয়া বালক অশ্রুমনস্কভাবে আকাশের দিকে তাকাইয়া নিম্নস্বরে বলিল,—‘পরশু অমাবস্তা।’

দেওরামও অলসভাবে উদ্ধে দৃষ্টি করিয়া অশ্রুটস্বরে বলিল,—‘হু। লোক সব তৈরী আছে। কোথায় থাকতে হবে?’

‘রাফসমুখো গুহার মধ্যে। আমি দেড় পহর রাত্রে আসিব। পাঁচশ জনের বেশী লোক যেন না হয়।’

‘বেশ। এবার কোনদিকে যাওয়া হবে?’

‘উত্তর দিকে। দক্ষিণে আর নয়, সেদিকে বড় হৈ চৈ হয়েছে। দরবার পর্য্যন্ত খবর গেছে।’

দাদো তাহাদের দিকে লক্ষ্য করিতেছেন দেখিয়া দেওরাম প্রকাণ্ড একটা হাই তুলিয়া অপেক্ষাকৃত উচ্চকণ্ঠে বলিল,—‘আচ্ছা। হরিণ কিন্তু এ দিকে পাওয়া যায় না।’

বালক বাকী ছফটুকু নিঃশেষে পান করিয়া উঠিয়া দাঁড়াইয়া সহজভাবে বলিল,—‘আজ তা হলে চলুন দেওরাম। লুন্নার বিয়ের দিন

আমাকে খবর দিও—আমি দাদাকে নিয়ে আসব। দাদো একজন ভারী শাস্ত্রজ্ঞ পণ্ডিত জানো ত? উনিই হুম্মার বিয়ে দেবেন।’

ঘোড়ার পিঠে একলাফে উঠিয়া বালক বলিল,—‘আর যদি হারান ছানা পাও, পুনায় নিয়ে যেও। আর দেবী করব না, রাত হয়ে এল। দাদোর আবার ভারি ডাকাতের ভয়!’

বিশুয়া ও দেওরাম দাঁড়াইয়া রহিল, অস্বারোহী দুইজনে বদরীকানন পার হইয়া ঝর্ণার সঞ্চিত অগভীর ক্ষুদ্র জলাশয়ের পাশ দিয়া আবার পাহাড়ে উঠিতে আরম্ভ করিলেন। এইটি শেষ পাহাড়—ইহার পরই উপত্যকা। কিছুক্ষণ কোনো কথা হইল না, দুইজনেই স্ব স্ব চিন্তায় মগ্ন। এদিকে অন্ধকার গাঢ় হইয়া আসিতেছে। ঘোড়া দুটি সতর্কভাবে পর্বতগাত্র আরোহণ করিতেছে।

ঠঠাং চমক ভাঙিয়া বালক দাদোর দিকে দৃষ্টিপাত করিল, দেখিল দাদো তাহারই মুখের প্রতি সন্দেহাকুল চক্ষে চাহিয়া আছেন। বালক অপ্রতিভ হইয়া পড়িল, তারপর জোর করিয়া হাসিয়া বলিল,—‘কি দেখছ দাদো? এবার আমার মা’র বিয়ের গল্প বল।’

বৃদ্ধ দীর্ঘশ্বাস মোচন করিয়া কিয়ৎকাল নিস্তব্ধ হইয়া রহিলেন, আপনার মনে বলিলেন—‘বংশের ধারা বদলান যায় না; বাঘের বাচ্ছা বাঘই হয়, শূগল হয় না—ঈশ্বরের এই বিধান। কে জানে, হয় ত এর মধ্যে মঙ্গলেরই বীজ নিহিত আছে।’

বালক তাঁহাকে দীর্ঘকাল চিন্তা করিবার অবকাশ না দিয়া পুনশ্চ কহিল,—‘বল না দাদো!’

দাদো আবার একটি দীর্ঘশ্বাস ফেলিয়া বলিতে আরম্ভ করিলেন,—‘গল্প অতি সামান্যই। কিন্তু তোমার ঠাকুর্দা মালোজী ভোঁস্লে যে কি রকম চতুর ছিলেন, এই গল্প থেকে তার পরিচয় পাওয়া যায়।

‘তোমার মাতুলবংশের মত এতবড় বিখ্যাত যশস্বী বংশ দাক্ষিণাত্যে খুব অল্পই আছে। আজ থেকে নয়, চারশ’ বছর আগে আলাউদ্দিন খিলজির আমল থেকে দেবগিরির যত্নবংশের নাম দাক্ষিণাত্যের পাথরে পাথরে তলোয়ার দিয়ে খোদাই হয়ে আসছে।

‘অতীতের কোন যুগে এই যত্নবংশ রাজপুতনা থেকে এসে দেওগিরিতে রাজ্য প্রতিষ্ঠা করেছিলেন সে কাহিনী লুপ্ত হয়ে গেছে। দেওগিরির রাজ্যও আর নেই।’ কিন্তু বীরত্বে ধর্মনিষ্ঠায় মহানুভবতায় এই বংশ আজ পর্যন্ত হিন্দুমাত্রেরই আদর্শ হয়ে আছে।

‘এ হেন বংশে তোমার দাদামশায় লখুজী যত্নরাও একজন পরাক্রমশালী মহাতেজস্বী পুরুষ ছিলেন। দশ হাজার সিপাহী নিত্য তাঁর রুটি খেত। বিজাপুর গোলকুণ্ডা তাকে যমের মত ভয় করত, আমেদনগর রাজ্যের তিনি ছিলেন প্রধান স্তম্ভ। মালিক অম্বর যদি তাঁর সঙ্গে কপটাচারিতা না করত—কিন্তু সে অন্য কথা। এখন আসল গল্পটা বলি।

‘সে আজ বহুদিনের ঘটনা, তখন আমার বয়স দশ এগারো বছরের বেশী নয়। কিন্তু সেদিনকার প্রত্যেক ঘটনাটি স্পষ্ট মনে আছে। সেদিন ছিল ফাস্তুনী পৌর্ণমাসী, রাজপুতদের একটা মস্ত উৎসবের দিন। দাক্ষিণাত্যে দোলপূর্ণিমার দিন আবীর খেলার প্রথা এই যত্নবংশই প্রচার করেছিলেন। সেদিন দেশের সমস্ত গণ্যমান্ত লোক, এমন কি বিজাপুর গোলকুণ্ডা আমেদনগর দরবারের বড় বড় হিন্দু আমীর-ওমরা এসে লখুজীর কেল্লার মত বিশাল ইমারতে জমা হতেন। সমস্ত রাত্রিদিন ব্যাপী উৎসব চলত, ফাগ্‌ রঙ্‌ এবং সুরার শ্রোত বয়ে যেত।

‘সেবার লখুজীর প্রকাণ্ড প্রাসাদের দরবার ঘরে মজলিস বসেছে। মেঝের উপর পার্শী গালিচা পাতা, তার উপর অনেকে বসেছেন ; দরবার

লোকে লোকারণ্য। সিপাহী থেকে সর্দার পর্যন্ত সকলের অবাধ যাতায়াত। সামান্য সৈনিক পাঁচহাজারী সর্দারের মুখে আবীর মাথিয়ে দিচ্ছে, মসবদার সিপাহীকে মাটিতে ফেলে তার মুখে মদ ঢেলে দিচ্ছে। হাসির হররা ছুটছে! ছোট বড় উচ্চনীচ কোনো প্রভেদ নেই, এই একদিনের জন্ত সকলে সমান। সবাই আমোদে মত্ত।

‘সভার মাঝখানে মস্তবড় একটা চাঁদির থালায় আবীর স্তূপীকৃত রয়েছে, সেই থালা ঘিরে প্রধান প্রধান অতিথিরা বসেছেন। পানদান গুলাবপাশ আতরদান চারিদিকে ছড়ানো রয়েছে।—স্বয়ং লখুজী এখানে আসীন; তোমার ঠাকুর্দা মালোজীও আছেন। মালোজী তখন লখুজীর অল্পগৃহীত একজন সামান্য সর্দার মাত্র। কিন্তু তাঁর কূটবুদ্ধি ও রণনৈপুণ্যের জন্ত লখুজী তাঁকে ভারি স্নেহ করতেন। তাই মালোজীও সাহস করে এই সভায় এসে বসেছেন। সকলের মুখেই আবীরের প্রলেপ, দেহের বস্ত্র এবং মিরজাহী রঙে রক্তবর্ণ, চক্ষু ঢুলুঢুলু। এখানে গানের মজলিস বসেছে; আরো অনেক লোক চারিদিকে ঘিরে দাঁড়িয়ে গান শুনছে এবং মজা দেখছে।

‘গান গাইছেন আমেদনগরের একজন বুড়ো ওমরা—তাঁর নাম ভুলে গেছি। মস্ত ওস্তাদ বলে তাঁর খ্যাতি ছিল। গড়গড়া টানতে টানতে হঠাৎ তিনি বসন্তরাগের এক তান মারলেন—সুরের ধমকে পাকা গৌফ থেকে একরাশ আবীর উড়ে গেল। তোমার ঠাকুর্দা মালোজী সারঙ্গী কোলে করে ওস্তাদের পিছনে বসে ছিলেন, তিনি সঙ্গে সঙ্গে সঙ্গত আরম্ভ করলেন। লখুজী নিজে মৃদং বাজাতে লাগলেন।

‘গান থামলে প্রশংসাস্রব্ধিনির একটা ঝড় বয়ে গেল, লখুজী পাখোয়াজ ফেলে প্রায় এক তোলা অম্বুরী আতর পলিত কেশ গায়কের গৌফে

মাথিয়ে দিয়ে দাড়ি ধরে নেড়ে দিয়ে বলেন,—‘কংল্ কিয়া বিবি !
আর ঝুঁকটা ফস্মাও ।’

‘বুদ্ধ দন্তহীন হাসি হেসে চোখ ঠেঁরে আবার গান ধরলেন,—
‘চোলিমে ছিপাউ কৈসে ঘোবনা মোরি ।’

‘বিরাট হাসির একটা হল্লা পড়ে গেল । লখুজী ওস্তাদকে কোলে
তুলে নিয়ে নৃত্য স্বরু করে দিলেন ।—কি আনন্দের দিনই গিয়েছে ; এখন
সব স্বপ্ন বলে মনে হয় ।’


দাদো একটা দীর্ঘনিশ্বাস ফেলিলেন ।

ঘোড়া দুইটি ইতিমধ্যে পর্ত পার হইয়া উপত্যকায় নামিয়া
আসিয়াছে কিন্তু পথ এখনো শিলা-সঙ্কুল । আশে-পাশে মাটি
ফাটিয়া বড় বড় খাদ রচনা করিয়াছে । শুষ্ক পয়ঃপ্রণালীর মত এই
খাদগুলি অন্ধকারে বড়ই বিপজ্জনক, ঘোড়া একবার পা ফস্কাইয়া উহার
মধ্যে পড়িলে কোথায় অন্তর্হিত হইবে তাহার স্থিরতা নাই । এদিকে
দিবার দীপ্তিও সম্পূর্ণ নিভিয়া গিয়াছে, কেবল সম্মুখে বহুদূরে পুনার
দীপগুলি মিটমিট করিয়া জ্বলিতেছে ।

বালক একাগ্রমনে গল্প শুনিতেছিল, দাদো থামিতেই সাগ্রহে গলা
বাড়াইয়া বলিল, ‘তারপর ?’

দাদো বলিলেন,—‘হুঁসিয়ার হয়ে পথ চল, রাস্তা বড় খারাপ ।’
তারপর গল্প আরম্ভ করিলেন,—‘দু’টি ছোট ছোট ছেলে-মেয়ে এই
দরবার ঘরের চারিদিকে খেলা করে বেড়াচ্ছিল, দু’জনেরই লাল বেনারসী
চেলীর জোড় পরা, কানে কুণ্ডল হাতে বালা গলায় হার । ছেলেটির
বয়স পাঁচ বছর আর মেয়েটির তিন ।

‘এদের দিকে কারো দৃষ্টি ছিল না, এরা নিজের মনে ঘরময় খেলে
বেড়াচ্ছিল । কখন এক সময় মেয়েটি দূর থেকে ছেলেটিকে দেখতে



পেয়ে তার সামনে এসে দাঁড়াল, গম্ভীর মুখে ছেলেটির আপাদমস্তক দেখে নিয়ে আধো আধো ভাষায় প্রশ্ন করলে,—‘তুমি কে?’

• ‘ছেলেটিও মেয়েটির দিকে গম্ভীরভাবে তাকিয়ে বললে,—‘আমি শাহ্। আমি তীর ছুঁতে পারি। তুমি কে?’

‘মেয়েটির হুই চক্ষু সম্মুখে ভরে উঠল, সে ফুলের মত ঠোঁট দুটি খুলে কিছুক্ষণ চেয়ে থেকে আস্তে আস্তে বললে,—‘আমি দিদা।’ তারপর একটু ভেবে আবার বললে,—‘আমার বাবাও তীর ছুঁতে পারে।’

‘অতঃপর এই বীর এবং বীরকন্যার মধ্যে ভাব হতে বেশী দেবী হল না। শাহ্ গিয়ে মেয়েটির গলা জড়িয়ে নিলে, মেয়েটিও শাহ্‌র কোমর জড়িয়ে ধরলে। এইভাবে তারা অনেকক্ষণ দরবার-ঘরের চারিদিকে ঘুরে বেড়াতে লাগল। তাদের মধ্যে চুপিচুপি কি কথা হল তারাই জানে। খুব সম্ভব শাহ্ তার অসামান্য শৌর্য বীর্ঘ্যের কথা খুব ফলাও করে ব্যাখ্যা করে মেয়েটির ছোট প্রাণটুকু জয় করে নিচ্ছিল। আর মেয়েটিও বোধ হয় নিঃসংশয় সহানুভূতি এবং প্রশংসা দ্বারা শাহ্‌র বীর-হৃদয় সম্পূর্ণ বশীভূত করে ফেলছিল।

‘এদিকে গানের মজলিশ তখন ঢিলে হয়ে এসেছে; বৃদ্ধ গায়ক তিন পাত্র গুলাবী সরবত খেয়ে কিংখাপের তাকিয়া হেলান দিয়ে বসে ইঁপাচ্ছেন,—এমন সময় এই দুটি ছেলেমেয়ে গলা-জড়াজড়ি করে তাদের নান্দখানে গিয়ে দাঁড়াল। এতগুলো লোক চারিপাশে বসে আছে কিন্তু সেদিকে তাদের ভ্রক্ষেপ নেই, নিজেদের কথাতেই তারা মশগুল। বৈঠকে ধারা বসেছিলেন সকলের মুগ্ধদৃষ্টি একসঙ্গে তাদের উপর গিয়ে পড়ল। এ কি অপরূপ আবির্ভাব! আজ দোলের দিনে সত্যি কি বন্দাবন লীলা তাঁদের চোখের সামনে অভিনীত হচ্ছে? সকলে চোখ

মুছে দেখলেন,—তাইত ! ছেলেটির বর্ণ নবজলধরশ্রাম আর মেয়েটি বিদ্যামততার মত গোরী !

‘মেয়েটির হঠাৎ কি খেয়াল হল, সে আতর দানে তার ছোট্ট চাঁপার কলির মত আঙুল ডুবিয়ে শাহর নাকের নিচে আঙুলটি বুলিয়ে দিলে । শাহও আদর-আপ্যায়নে কম যাবার পাত্র নয়, সে চাঁদির থালা থেকে এক মুঠি আবীর তুলে নিয়ে সম্বন্ধে মেয়েটির মুখে কপালে মাখিয়ে দিলে ।

‘সকলে আনন্দে জয়ধ্বনি করে উঠলেন,—রাধা-গোবিন্দজী কি জয় !

‘লখুজী আর মালোজী ছাড়া আর কেউ জানতেন না এ ছেলেমেয়ে দুটি কে ? লখুজী উচ্চহাস্য করে উঠলেন, তারপর দুটিকে কাছে টেনে নিয়ে নিজের কোলে বসিয়ে বললেন,—‘রাধাগোবিন্দজী নয়, এরা আমার মেয়ে আর মালোজীর ছেলে । বন্ধুগণ, এহুটির বিয়ে হলে কেমন মানায় বলুন ত ?’

‘লখুজী পরিহাসচ্ছলেই কথাটা বলেছিলেন, তাছাড়া গুলাবী সরবতের নেশাও অল্পবিস্তর ছিল । তাঁর কথা শুনে সকলে হেসে উঠলেন ; কিন্তু মালোজী ভোঁসলে তৎক্ষণাৎ লাফিয়ে উঠে করজোড়ে সকলকে বললেন,—‘মহাশয়গণ আপনারা সাক্ষী থাকুন, লখুজী তাঁর কণ্ঠ্যকে আমার পুত্রের সঙ্গে বাগ্‌দস্ত করলেন ।’

‘সকলে অবাক হয়ে রইলেন, লখুজীর নেশা ছুটে গেল । তাঁর মুখ আবীর প্রলেপের ভিতর থেকে ক্রোধে কালো হয়ে উঠল । তাঁর মেয়েকে—দেবগিরির রাজবংশের মেয়েকে যে মালোজীর মত একজন সামান্য প্রাণী নিজের পুত্রবধূ করবার স্পর্ধা করতে পারে এ তাঁর কল্পনারও অতীত । কিন্তু তবু কথাটা যে তাঁর মুখ থেকেই বেরিয়ে গেছে একথাও অস্বীকার করা চলে না । মালোজীর দিকে কটমট করে চেয়ে লখুজী

বল্লেন,—‘মালোজী, তুমি পাগলের মত কথা বলছ। আমার মেয়ে রাজার ঘরে পড়বে।’

‘মালোজী পূর্ববৎ জোড়করে বল্লেন,—‘আমার ছেলে আপনার মেয়ের মুখে আবীর দিয়েছে, আপনার মেয়ে আমার ছেলের মুখে আতর দিয়েছে, তারপর আপনি তাদের কোলে নিয়ে যা বলেছেন তা উপস্থিত সকলেই শুনেছেন। ধর্ম্মতঃ আপনার মেয়ে আমার ছেলের বাগদত্তা। এখন যদি আপনি সে কথা প্রত্যাহার করতে চান, করুন, আমার আপত্তি নেই।’

‘ক্রোধে লখুজী আসন ছেড়ে লাফিয়ে উঠলেন, কিন্তু মুখ দিয়ে তাঁর কথা বেরুল না। একবার সকলের মুখের দিকে তাকিয়ে দেখলেন কিন্তু তাঁদের মনোভাব বুঝতেও বিলম্ব হল না; সকলেই নীরবে মালোজীর কথার সমর্থন করছেন। লখুজী নিজের মেয়েকে কোলে তুলে নিয়ে ঝড়ের মত অন্তঃপুরে চলে গেলেন।

‘মালোজীও ছেলে নিয়ে ঘরে ফিরে এলেন। চারদিকে রাষ্ট্র হয়ে গেল যে লখুজীর মেয়ে প্রকাশ দরবারে মালোজীর ছেলের বাগদত্তা হয়েছে। কথাটা অবশ্য বেশী দিন চাপা থাকত না, প্রকাশ হয়ে পড়তই; কিন্তু এমনি তোমার ঠাকুরদার উচ্চম আর তৎপরতা যে সপ্তাহ মধ্যে মহারাষ্ট্রের সর্বত্র এই স্মসংবাদ প্রচার হয়ে পড়ল, জনপ্রাণীরও জানতে বাকী রইল না।

‘লখুজী নিশ্চল ক্রোধে ফুলতে লাগলেন। মালোজীর সঙ্গে তাঁর ঝগড়া হয়ে গেল, এমন কি মুখ দেখাদেখি পর্য্যন্ত বন্ধ হয়ে গেল। তিনি প্রতিজ্ঞা করলেন মালোজীর মত ধড়িবাঁজ অকৃতজ্ঞ লোককে আর তিনি কোনো সাহায্য করবেন না, বরং তার যাতে অনিষ্ট হয় সেই চেষ্টাই করবেন।

‘তাঁর প্রতিজ্ঞা কিন্তু রইল না। যতই বছরের পর বছর কেটে যেতে লাগল ততই তিনি বুঝতে পারলেন চতুর মালোজী তাঁকে কি বিষম ঝাঁদে ফেলেছে। তিনি বুঝলেন অগুত্র মেয়ের বিয়ে দিলে মেয়ে স্ত্রী হবে না, যত তার বয়স বাড়ছে শাহ ছাড়া আর কেউ যে তার স্বামী হতে পারে না এ ধারণা তার মনে ততই দৃঢ় হচ্ছে। তাছাড়া অগ্নের বাগ্‌দত্তা মেয়ে কেউ জেনে শুনে বিয়ে করতে চায় না, ছুঁচাটে ঘরানা ঘরে সম্বন্ধ করতে গিয়ে লজ্জা পেয়ে লখুজীকে ফিরে আসতে হল। শেষ পর্যন্ত তিনি দেখলেন শাহ ছাড়া জিজার গতি নেই।

‘এইভাবে নয় দশ বছর কেটে গেছে। মালোজী কপালের জোরে এবং বুদ্ধিবলে খুব উন্নতি করেছেন, বিষয়-সম্পত্তিও হয়েছে। লখুজীর বিষেষ ও অনিচ্ছা ক্রমেই কমে আসতে লাগল তারপর একদিন মালজীকে নিজের বাড়ীতে ডেকে পাঠিয়ে তাকে আলিঙ্গন করে বলেন,— ‘ভাই, আমারই ভুল ; জিজাকে তুমি তোমার ছেলের জন্তে নিয়ে যাও।’

‘ব্যাস, আর কি ! এইখানেই গল্প শেষ। মালোজীর মতলব সিদ্ধ হল, মহা ধুমধাম করে তোমার বাপের সঙ্গে তোমার মা’র বিয়ে হয়ে গেল। তখন তোমার মা’র বয়স তেরো বৎসর আর শাহর পনেরো। বিয়ের রাতে তোমার মা’র গর্বোজ্জ্বল হাসিভরা মুখ আমার আজও মনে আছে।

‘তবে একথা ঠিক যে জন্মান্তরের সম্বন্ধ না হলে এত বাধা বিঘ্ন অতিক্রম করে এতবড় সামাজিক পার্থক্য লঙ্ঘন করে এ বিয়ে কখনই হতে পারত না। তোমার মা-বাবা পূর্বজন্মেও স্বামী-স্ত্রী ছিলেন।’

বুদ্ধ দাদো মৌন হইলেন। কিছুক্ষণ কোন কথা হইল না, দুইজনে নীরবে চলিলেন। অন্ধকার তখন বেশ গাঢ় হইয়াছে, পাশের লোকও

স্পষ্ট দেখা যায় না। দাদো লক্ষ্য করিয়া দেখিলেন, বালক ছুই কর যুক্ত করিয়া ললাটে ঠেকাইয়া বারম্বার কাহার উদ্দেশ্যে নমস্কার করিতেছে। দাদো কথা কহিলেন না, অপূর্ব আবেগভরে তাঁহার শরীর রোমাঞ্চিত হইয়া উঠিল।

কিয়ংকাল পরে একটি দীর্ঘনিশ্বাস তাগ করিয়া অর্দ্ধশুটস্বরে বালক বলিল,—‘কি সুন্দর গল্প! আমার মা’র মত এমন মা এ পৃথিবীতে আর কারো নেই—না দাদো?’

দাদো সংযতকণ্ঠে বলিলেন,—‘না। তোমার মায়ের মত এমন অসামান্য নারী আর কোথাও নেই। সেই তিন বছর বয়স থেকে আজ পর্যন্ত দেখে আসছি, এমনটি আর দেখিনি।’

পূর্ণ হৃদয় লইয়া ছুইজনে নীরব রহিলেন। ক্রমে পুনর আলোক নিকটবর্তী হইতে লাগিল, পথ সমতল ও অনুদঘাত হইল। অশ্রুদয় আশু গৃহে পৌছিবার আশায় দ্রুতবেগে চলিতে আরম্ভ করিল।

পুনা পৌছিতে যখন পাদক্ৰোশ মাত্র বাকী আছে তখন কে একজন সম্মুখের অন্ধকার হইতে উচ্চকণ্ঠে হাঁকিল,—‘হো শিক্ষা হো! হো দাদো জী!’

বালক শিক্ষা চমকিয়া উঠিয়া সানন্দে চীৎকার করিয়া উঠিল,—‘তানা! তানা!’ তারপর তীরবেগে সম্মুখে ঘোড়া ছুটাইয়া দিল।

অন্ধকারে তানাজী মালেশ্বর ঘোড়ার উপর বসিয়া ছিল, শিক্ষা প্রায় তাহার ঘাড়ের উপর গিয়া পড়িল।

তানাজী তিরস্কারের স্বরে বলিল,—‘আজ কি আর বাড়ী ফিরিতে হবে না? কোথায় ছিগে এতক্ষণ? মা কত ভাবছেন, শেষে আর থাকতে না পেরে আমাকে পাঠালেন।’

শিৰা ঘোড়ার উপর হইতেই তানাজীর গলা জড়াইয়া ধরিয়া বলিল,
—‘মা কোথায় রে তানা?’

তানাজী বলিল,—‘কোথায় আবার—বাড়ীতে! দোর গোড়ায়
দাঁড়িয়ে পথের পানে চেয়ে আছেন। তোমার এত দেৱী হল কেন?’
গলা খাটো করিয়া বলিল,—‘দেওরামের সঙ্গে দেখা হল নাকি?
ওদিকের কি খবর? কবে?’

শিৰা অন্তমনস্কভাবে বলিল,—‘খবর ভাল। অমাবস্তার রাত্রে সব
ঠিক হয়েছে।—চল তানা, শিগ্গির বাড়ী যাই। মাকে সমস্তদিন
দেখিনি—ভারি মন-কেমন করছে।’

তুই কিশোর বন্ধু তখন নীড়-প্রতিগামী পাখীর মত দ্রুতবেগে গৃহের
দিকে অগ্রসর হইল।

বৃদ্ধ দাদোজী কোণু বহদুর পশ্চাতে পড়িয়া রহিলেন।

রক্ত-খড়োত

সন্ধ্যার সময় প্রাত্যহিক অভ্যাসমত গুটিকয়েক সভা ক্লাবঘরের মধ্যে সমবেত হইয়াছিলাম।

বরদা সিগারেটের ক্ষুদ্র শেবাংশটুকুতে লম্বা একটা স্থখটান দিয়া সেটা সবত্রে ঘ্যাশ-ট্রের উপর রাখিয়া দিল। তারপর আস্তে আস্তে ধোঁয়া ছাড়িতে ছাড়িতে বলিল,—ভূতের গল্প তোমরা অনেকেই শুনেছ, কিন্তু ভূতের মুখে ভূতের গল্প কেউ শুনেছ কি ?

অমূল্য এক কোণে বসিয়া একখানি সচিত্র খিলাতী মাসিকপত্রের পাতা উন্টাইতেছিল। বলিল,—অসম্ভব একটা কিছু বরদার বলাই চাই।

বরদা বলিল,—আপাতদৃষ্টিতে ঘটনাটা অসম্ভব ব'লে মনে হ'তে পারে বটে, কিন্তু বাস্তবিক তা নয়। তবে বলি শোন—

অমূল্য তাড়াতাড়ি বলিয়া উঠিল,—না, না, আজ যে আমাদের সাহিত্য-সভার অধিবেশন। অতুল, তোমার 'সাহিত্যেবস্তুতত্ত্ব' প্রবন্ধটা তাহ'লে—

কৃষী বলিল,—কাল হবে। বস্তুতত্ত্বের চেয়ে বড় জিনিষ আজ এসে পড়েছেন। বরদা, তোমার গল্প আরম্ভ হোক।

অমূল্য অস্থির হইয়া বলিল,—আজ তাহ'লে বরদার কতকগুলো মিথ্যে কথা শুনেই সন্ধ্যাবেলাটা কাটাতে হবে ?

প্রশান্তকণ্ঠে বরদা বলিল,—কথাটা শুনে তারপর সত্যিমিথ্যে বিচার করা উচিত। তাহ'লে আরম্ভ করি। গত বৎসর—

অমূল্যর নামারম্ভ হইতে একটা সশব্দ দীর্ঘশ্বাস বাহির হইল।

বরদা বলিল,—গত বৎসর আমার প্ল্যাঞ্জেটে ভূত নামাবার সখ হইয়াছিল, বোধ হয় তোমাদের মনে আছে। যারা জানে-শোনে তাদের

পক্ষে ভূত-নামানো অতি সহজ ব্যাপার। দরকারী আসবাবের মধ্যে কেবল একটি তেপায়া টেবিল!

অমূল্য বিড় বিড় করিয়া বলিল,—আর একটি গুলিখোর।

বরদা ওদিকে কর্ণপাত না করিয়া বলিতে লাগিল,—একদিন একটা ছোট দেখে তেপায়া টেবিল যোগাড় করে সন্ধ্যার পর আমাদের তেতালার সেই নিরিবিলি ঘরটায় বসে গেলুম—আমি, আমার বউ, আর পেঁচো—

অমূল্য বলিল,—এই বয়স থেকেই ছোট ভাইটির মাথা খাওয়া হচ্ছে কেন? বউয়ের কথা না হয় ছেড়ে দিই, কারণ যেদিন তোমার সঙ্গে বিয়ে হয়েছে সেদিনই তার যা হবার হয়ে গেছে—

বরদা বলিল,—পেঁচোকে নেবার কারণ তিন জনের কমে চক্র হয় না। তাছাড়া সে ছেলেমানুষ, স্ত্রেরাং মিডিয়ম হবার উপযুক্ত। সে যাক, মেঝের উপর টেবিল ঘিরে ত বসা গেল—কিন্তু ভাবনা হ'ল কাকে ডাকি! ভূত ত আর একটা-আধটি নয়, পৃথিবীর আরম্ভ থেকে আজ পর্যন্ত যত লোকের ঈশ্বরপ্রাপ্তি ঘটেছে সকলের দাবি সমান। এখন কাকে ফেলে কাকে ডাকি।

কিছুক্ষণ চুপ করিয়া থাকিয়া বরদা বলিল,—আমাদের স্বভাবকে চেন ত—জুনিয়র উকিল? তার ভগিনীপতি স্বরেশবাবু হাওয়া বদলাতে এসে গত শীতকালে নিউমোনিয়ায় মারা যান, বোধ হয় তোমাদের স্মরণ আছে। অমূল্য, তুমি ত পোড়াতে গিছলে। হঠাৎ সেই স্বরেশবাবুকে মনে পড়ে গেল। তখন তিনজনে, আলোটা কমিয়ে দিয়ে টেবিলের উপর আঙুলে আঙুল ঠেকিয়ে স্বরেশবাবুর ধ্যান স্মৃতি করে দিলুম। বেশীক্ষণ নয় ভাই, মিনিট-পাঁচেক চোখ বুজে থাকবার পর চোখ চেয়ে দেখি পাঁচুটা কেমন যেন জ্বলজ্বল হয়ে গেছে,—কশ বেয়ে নাল গড়াচ্ছে,

চোখ শিবনেত্র, বিজ্র বিজ্র করে কি বক্ছে ! 'কি রে !' বলে তাকে একটা ঠেলা দিলুম—কাত হয়ে পড়ে গেল ! বউ ত 'বাবাগো' ব'লে আমাকে খুব ঠেসে জড়িয়ে ধরলে ।

জ্বী বলিল,—বস্তুতন্ত্র এসে পড়ছে । এবার আসল গল্পটা আরম্ভ হোক ।

বরদা বলিল,—বুঝলুম ভূতের আবির্ভাব হয়েছে । পেঁচোকে অনেক প্রশ্ন করলুম, কিন্তু সে জড়িয়ে জড়িয়ে কি' যে উত্তর দিলে বোঝা গেল না । বড়ই মুস্কিল । তখন আমার মাথায় এক ধ্বঙ্কি গজাল । কাগজ পেনসিল এনে পেঁচোর হাতে ধরিয়ে দিলুম । পেনসিল হাতে পেয়ে পেঁচো সটান উঠে বসল । উঠে বসে লিখতে আরম্ভ করে দিলে । সে এক আশ্চর্য্য ব্যাপার ! পেঁচোর চোখ বন্ধ, মুখ দিয়ে নাল গড়াচ্ছে, আর প্রাণপণে কাগজের ওপর লিখে যাচ্ছে ।

পকেট হইতে একতাড়া কাগজ বাহির করিয়া বলিল,—আবার হাতের লেখা দেখে অবাক হয়ে যাবে, দস্তুরমত পাকা হাতের লেখা । কে বলবে যে পেঁচো লিখেছে ?

অমূল্য লেখাটা তদারক করিয়া বলিল,—পেঁচো লিখেছে কেউ বলবে না বটে, কিন্তু তোমার লেখা ব'লে অনেকেরই সন্দেহ হতে পারে ।

বরদা বলিল,—এই লেখা হাতে পাবার পর আমি স্তূভাষের বাড়ি গিয়েছিলুম । স্বরেশবাবুর পুরোণো একখানা চিঠির সঙ্গে মিলিয়ে দেখলুম অবিকল তাঁর হাতের লেখা । বিশ্বাস না হয় তোমরা যাচিয়ে দেখতে পার ।

অমূল্য বলিল,—অবশ্য দেখব ।

জ্বী বলিল,—সে থাক্ । এখন তুমি কি বলতে চাও যে ঐ কাগজের তাড়াটা স্বরেশবাবুর প্রেতাত্মার জবানবন্দী ?

বরদা বলিল,—এটা হচ্ছে তাঁর মৃত্যুর ইতিহাস। পুরোপুরি সত্যি কি না সে-কথা কেউ বলতে পারে না, কিন্তু গোড়ার খানিকটা যে সত্যি তা স্ভাষ সেদিন স্বীকার করেছিল।

এইবার তবে আসল গল্পটা শোন—এই বলিয়া বরদা কাগজের তাড়াটা তুলিয়া লইয়া পড়িতে আরম্ভ করিল।

ঝাঁহারা মুন্সের সহরের সহিত পরিচিত তাঁহারা জানেন যে উক্ত শহরে ‘পিপর-পাঁতি’ নামক যে বিখ্যাত বীথিপথ আছে, তাহার পশ্চিম প্রান্তে গঙ্গার কূলে মুসলমানদের একটি অতি প্রাচীন গোরস্থান আছে। বোধ করি এই গোরস্থানের সব গোরগুলিই শতাধিক বর্ষের পুরাতন। স্থানটি অনাদৃত। কাঁটাগাছ ও জঙ্গলের ফাঁকে ফাঁকে অস্থিপঞ্জর প্রকট করিয়া এই কবরগুলি কোনও রকমে নিজেদের অস্তিত্ব বজায় রাখিয়াছে।

এই গোরস্থানের এক কোণে একটি কষ্টিপাথরের গোর আছে। এই গোরটি সম্বন্ধে সহরে অনেক ভুতুড়ে গল্প প্রচলিত ছিল। এই-সব আজগুবি গল্প শুনিয়া আমি কোতূহলী হইয়া উঠিয়াছিলাম। আমার জ্যেষ্ঠ শ্যালক বলিলেন যে, গোরটা সজীব। পঞ্চাশ বৎসর পূর্বে না-কি এক সাহেব ঐ গোর লক্ষ্য করিয়া গুলি ছুঁড়িয়াছিল। গুলির আঘাতে পাথর ফাটিয়া ঝলকে ঝলকে রক্ত উঠিয়াছিল; সে রক্তের দাগ এখনও মিলায় নাই, গোরের গায়ে তেমন শুকাইয়া গড়াইয়া আছে। আর, যে নাস্তিক সাহেব গুলি করিয়াছিল সেও প্রাণে বাঁচে নাই, সেই রাত্রেই ভয়ঙ্কর ভাবে তার মৃত্যু হইয়াছিল।

একদিন শীতের সন্ধ্যায় শ্যালককে সঙ্গে লইয়া গোরটি দেখিতে গেলাম। শ্যালক আমারই সমবয়সী, প্রেত-যোনিতে অটল বিশ্বাস। আমি কিছুদিন যাবৎ মুন্সেরে আসিয়া শ্যালক-মন্দিরেই বায়ুপরিবর্তন করিতেছিলাম। সঙ্গে স্ত্রী ছিলেন।

গোরস্থানের নিকটে গিয়া দেখিলাম স্থানটি কাঁটা গাছের বশ্মে প্রায় ভূর্ত্ত হইয়া আছে। অনেক যত্নে অনেক সাবধানে পা ফেলিয়া এবং কাপড়চোপড় বাঁচাইয়া সেই ভূতুড়ে গোরটির সম্মুখীন হইলাম। কাল পাথরের গোর, আপাতদৃষ্টিতে ভৌতিকই কিছুই চোখে পড়িল না।

হঠাৎ, যখন আমরা গোরটির একেবারে নিকটে আসিয়া পৌছিয়াছি, তখন সেই কাল পাথরের উপর শায়িত আরও কাল একটা জন্তু, বোধ হয় আমাদের পদশব্দে জাগিয়া উঠিয়া, একবার আমাদের মুখের উপর তাহার চক্ষু দুটা মেলিয়া ধরিয়া, আন্তে আন্তে গোরের অন্তরালে মিলাইয়া গেল।

দেখিলাম একটা কুকুর। রং কুচকুচে কাল, শরীর যে হিসাবে লম্বা সে হিসাবে উঁচু নয়—পা-গুলা ঠাঁকা ঠাঁকা এবং অত্যন্ত খর্ব্ব। কিন্তু সবচেয়ে ভয়াবহ তাহার চক্ষু দুটা—হৃদয়ে রঙের সহিত ঈষৎ রক্তাভ এবং মণিহীন। পলক ফেলিলে মনে হয় যেন অন্ধকার রাত্রে খণ্ডোত জ্বলিতেছে।

শালক বলিলেন—লোকে বলে ওই কুকুরটাই সাহেবের টুটি ছিঁড়ে মেরে ফেলেছিল।

আমি বলিলাম,—পঞ্চাশ বছর আগে? কিন্তু কুকুরটাকে ত অত প্রাচীন বলে বোধ হ'ল না।

আমরা কবরটার একেবারে পাশে গিয়া দাঁড়াইলাম। দেখিলাম কুকুরটা যেখানে শুইয়াছিল ঠিক সেই স্থানে পাথরের খানিকটা চটা উঠিয়া গিয়াছে এবং তাহারই চারি পাশে লাল রঙের একটা পদার্থ শুকাইয়া আছে—হঠাৎ রক্ত বলিয়া ভ্রম হয়। যেন ঐ কুকুরটা সমাধির রক্তাক্ত ক্ষতটাকে বুক দিয়া আগলাইয়া থাকে।

শালক জিজ্ঞাসা করিলেন,—কি রকম বোধ হচ্ছে?

আমি বলিলাম,—আশ্চর্য্য বটে । আমার মনে হয় খুব গরম একটা বাতুর্দিয়ে এই পাথরে আঘাত করা হয়েছিল তাতেই এই রকম হয়েছে ।

আমার মন্তব্য শুনিয়া শ্যালক আধ্যাত্মিকভাবে একটু হাসিলেন । বলিলেন, ‘তা হবে ।’ কিন্তু তাহা বে একেবারেই হইতে পারে না তাহা তাঁহার কণ্ঠস্বরের ভঙ্গীতে বেশ বুঝা গেল ।

কোনও একটা তর্কাতর্কীণ বিষয়ের আলোচনায় নানুধ মগন উচ্চাঙ্গের হাসি হাসিয়া এমন ভাব দেখায় যেন অপর পক্ষের সঙ্গে তর্ক করাটাই ছেলেমানুষী, তখন অপর পক্ষের মনে রাগ হওয়া স্বাভাবিক । আমারও একটু রাগ হইল । কিন্তু যে-লোক তর্ক করিতে অসম্মত তাহাকে প্রত্যক্ষ প্রমাণ দ্বারা বুঝাইয়া দেওয়া ছাড়া অণু পথ নাই । তাই আমি বলিলাম,—আচ্ছা এক কাজ করা যাক, আমার মাথায় একটা প্ল্যান এসেছে । এই পাথরটা ভেঙেই দেখা যাক না, বালকে বালকে রক্ত বেরোয় কি না । প্রত্যক্ষের বড় ত আর প্রমাণ নেই—

নিকটেই একখণ্ড পাথর পড়িয়া ছিল, আমি সেটা তুলিয়া লইয়া গোরে আঘাত করিতে উত্তত হইয়াছি এমন সময় সেই কুকুরটা কোথা হইতে ছুটিয়া আসিয়া একটা বিশ্রী রকমের চীৎকার করিয়া উঠিল এবং সমস্ত দাঁত বাহির করিয়া অত্যন্ত হিংস্রভাবে আমাকে শাসাইয়া দিল ।

শ্যালক আমার হাত পরিয়া টানিতে টানিতে বলিলেন,—চলে এস, চলে এস । কি যে তোমার পাগলামি—

কুকুরটার আকস্মিক আবির্ভাবে আমার শ্যালক মহাশয় যতটুকু অভিত্ত হইয়া পড়িয়াছিলেন বাস্তবিকপক্ষে আমি ততটা হই নাই ।

অথচ একটা হিংস্র কুকুরকে অথবা ঘাটানো বিশেষ যুক্তির কাজ নয় । তাই পরীক্ষা-কার্য্য অসম্পূর্ণ রাখিয়া আমরা যখন গৃহে ফিরিয়া আসিলাম

তখন তুমুল তর্ক বাধিয়া গিয়াছে ; কুকুরের জীবনের স্বাভাবিক দৈর্ঘ্য সম্বন্ধে বিজ্ঞানের শাণিত যুক্তিগুলি শ্যালকের কুসংস্কারের বশের উপর আঁড়াইয়া পড়িয়া ভগ্নোদ্যমে ফিরিয়া আসিতেছে ।

বাড়ি ফিরিতেই আমার শালাজ এবং যাহার সম্পর্কে শালার সহিত সঙ্গ তিহি আসিয়া যুদ্ধে যোগ দিলেন ।

দুজনেই নবীনা, বিদুষী—প্রতীচের আলোক তাঁহাদের চোখে সোনার কাঠি স্পর্শ করাইয়াছে—তাঁহারা আসিয়াই আমার পক্ষে যোগদান করিলেন । শ্যালক বেচারীর বশ্য তীক্ষ্ণ অস্বাভাব্যে একেবারে ক্ষত-বিক্ষত হইয়া উঠিল ।

তর্কে যে ব্যক্তি হারে তাহার জিদ বাড়িয়া যায় । যুক্তির দিকে তখন আর তাহার ভ্রক্ষেপ থাকে না । শ্যালক শেষে চটিয়া উঠিয়া বলিলেন,—মান্তে না চাও মেনো না । কিন্তু দুপুর রাত্রে একলা ঐ জায়গায় যেতে পারে এমন লোক ত কোথাও দেখি না ।

শালাজ উৎসাহদীপ্ত চক্ষে কহিলেন,—আচ্ছা, এমন লোক যদি পাওয়া যায় যে যেতে পারে, তাহ'লে ত মান্বে যে তোমার ভৃত গুপ্ত তোমার ঘাড়েই ভর ক'রে আছে—আর কোথাও তার অস্তিত্ব নেই ?

শ্যালক গাঙ্গীর্ষ্য অবলম্বন করিয়া কহিলেন,—একলা রাত্রে সেখানে যেতে পারে এত সাহস কারুর নেই ; আর যদি-বা কেউ যায়, সে যে ফিরে আসবে এমন কোনও সম্ভাবনা দেখি না ।

আমি বলিলাম,—সকলের সাহস এবং সম্ভাবনা সমান নয় । আমি যেতে প্রস্তুত আছি ।

শ্যালক অতি বিষ্ময়ে কিছুক্ষণ নির্বাক থাকিয়া বলিলেন,—তুমি—প্রস্তুত আছ ? রাত্রি বারটার সময় একলা—

তাঁহার মুখে আর কথা সরিল না ।

আমি হাসিয়া বলিলাম,—নিশ্চয় । খোঁটার দেশে বেশী দিন থাকিনি বলেই বোধ হয় আমার সে সাহসটুকু আছে । তাহ'লে আজই ভাল । আজ বোধ হয় অমাবস্যা । শাস্ত্র অনুসারে রাজ্যের ভূতপ্রেত দৈত্যদান। আজ সবাই এই মর্ত্যভূমিতে ফিরে এসে দিগ্‌দিকে নৃত্য ক'রে বেড়াবেন । অতএব এ সুরোগ ছাড়া অনুচিত ।

শ্রালক ভীত চক্ষে চাহিয়া বলিলেন,—গোয়ার্তুমি ক'রো না সুরেশ, ভারি খারাপ জায়গা । এ সব বিষয়ে তোমার অভিজ্ঞতা নেই—

তীব্র হাস্তোচ্ছ্বসিত কণ্ঠে শালাজের নিকট হইতে প্রতিবাদ আসিল,—ভয় পাবেন না সুরেশবাবু, আপনার জন্ত একটা খুব ভাল প্রাইজ ঠিক করে রাখলুম । আপনি জয় ক'রে ফিরে এলেই এ বাড়ির কোনও এক মহিলা তাঁর বিশ্বাসের রক্তিমরাগে আপনার কপালে লাল টিকা পরিয়ে দেবেন । ভূতজয়ী বীরের সেই হবে রাজটিকা ।

আমি উৎসাহ দেখাইয়া বলিলাম,—লোভ ক্রমেই বেড়ে যাচ্ছে । মহিলাটি কে শুনি ?

তিনি হাসিয়া বলিলেন,—তাঁর সঙ্গে কারুর তুলনাই হয় না ।—বলিয়া আমার গৃহিণীর দিকে কটাক্ষপাত করিলেন ।

আমি একটা নিঃশ্বাস ফেলিয়া বলিলাম,—ঐ জাতীয় প্রাইজ যদিও আমার ভাগ্যে খুব দুলভ নয়, (গৃহিণী জনান্তিকে,—আঃ,—কি বকছ—দাদা রয়েছেন) তবু অধিকের প্রতি আমার বিরাগ নেই । তাহ'লে চুক্তি পাকা হয়ে গেল—আজ রাত্রেই যাব । কিন্তু আমি যে সত্যি সত্যিই কবরের কাছে গিয়েছি, এদিক-ওদিক ঘুরে বাড়ি ফিরে আসিনি, এ কথা শেষকালে আপনাদের বিশ্বাস হবে ত ?

শালাজ অতি দূরদর্শিনী, বলিলেন,—আপনার মুখের কথা আমরা বিশ্বাস করব নিশ্চয়, কিন্তু ঠাঁকে বিশ্বাস করানো দরকার তিনিই হয়ত

করবেন না। অতএব আপনাকে একটি কাজ করতে হবে। খড়ি দিয়ে গোরের ওপর নিজের নাম লিখে আসতে হবে।

• ‘তথাস্তু,’ গৃহিণীর দিকে ফিরিয়া বলিলাম,—তোমার দাদার প্রেততত্ত্বের মাথায় বজ্রাঘাত ক’রে দিয়ে আসা যাক—কি বল ?

অল্প দ্বিধাজড়িত হাসি ভিন্ন আর কোন জবাব পাওয়া গেল না।

শ্রালক বলিলেন,—ফাজলামি ছাড়। আমি তোমাকে কিছুতেই যেতে দিতে পারি না।

শ্রালকের কথা শুনিলাম না। কারণ অনেক ক্ষেত্রে অগ্রসর হওয়া যত সহজ, পশ্চাৎপদ হওয়া তত সহজ নয়।

রাত্রি সাড়ে এগারটার সময় গরম জামায় আপাদমস্তক আবৃত করিয়া একটা কড়া গোছের বর্ম্মা চুরুট ধরাইয়া বাহির হইলাম। এতক্ষণে গৃহিণীর মুখ ফুটিল। প্রতীচ্য বিজ্ঞায় জলাঞ্জলি দিয়া বলিলেন,—থাক, গিয়ে কাজ নেই।

আমি হাসিয়া উঠিলাম,—পাগল ! ভাই বোন্ ছদ্মনকার ধাত একই রকম দেখছি।

শ্রালক নিরতিশয় ক্ষুব্ধস্বরে কহিলেন,—তুমি এমন একগুঁয়ে জান্লে কোন্ শালা তর্ক করত।

*

*

*

*

এমন বিস্ত্রী অন্ধকার বোধ করি আর কখনও ভোগ করি নাই। একটা গুরুভার পদার্থের মত অন্ধকার যেন চারিদিকে চাপিয়া বসিয়া আছে। পথ চলিতে চলিতে পদে পদে মনে হয় বুঝি পরমুহূর্তেই একচাপ অন্ধকারে ঠোকর লাগিয়া হুমড়ি খাইয়া পড়িয়া যাইব।

চুরুটে লম্বা লম্বাষ্টান মারিয়া মনে প্রফুল্লতা ও উৎসাহ সঞ্চয় করিতে লাগিলাম। সমস্ত ইন্দ্রিয়গুলি অজ্ঞাতসারে এমন সতর্ক ও সন্দিগ্ধ হইয়া

উঠিল যে নিজের পদধ্বনি শুনিয়া নিজেই চমকিয়া উঠিলাম, মনে হইল ক' যেন চুপি চুপি পিছন হইতে আমার অত্যন্ত কাছে আসিয়া পড়িয়াছে।

কিন্তু তথাপি অর্কারণে ভয় পাইবার পাত্র আমি নহি। মনে মনে বেশ বুঝিতে পারিলাম দ্বিপ্রহর রাত্রির এই অন্ধকার, এই স্তব্ধতা, এই বিজনতা সকলে মিলিয়া আমার আন্তরিক সাহসকে একটা দুশ্ছেদ্য ষড়যন্ত্রের জালে ধীরে ধীরে জড়াইয়া ফেলিবার চেষ্টা করিতেছে। একটা অলৌকিক নারী যেন আমার চেতনাকে আচ্ছন্ন করিয়া ফেলিতেছে। মাকড়সা যেমন শিকারকে প্রথমে সূক্ষ্ম তন্তুর সহস্র পাকে জড়াইয়া পরে ধীরে ধীরে জীর্ণ করিয়া ফেলে, তেমনি এই অদৃশ্য শক্তি আমার সহজ সত্তাকে ক্রমে ক্রমে অভিভূত করিয়া ফেলিতেছে।

ক্রমে 'পিপর-পাতি' রাস্তার পূর্বপ্রান্তে আসিয়া পড়িলাম। ইহারই অপর প্রান্তে কবরস্থান। রাস্তার দুইপাশে বড় বড় গাছ, মাথার উপর বহু উর্দ্ধে তাহাদের শাখাপ্রশাখা মিলিয়াছে। অন্ধকার আরও জমাট বাঁধিয়া আসিল।

হঠাৎ ঘাড়ের কাছে ঠাণ্ডা নিঃশ্বাসের মত একটা স্পর্শ পাইলাম। শরীরের সমস্ত রোম শক্ত হইয়া দাঁড়াইয়া উঠিল। পরক্ষণেই একটা খুব লঘু পদার্থ পিঠের উপর দিয়া খড়্ খড়্ শব্দে নীচে গড়াইয়া পড়িল। বুঝিলাম ভয় পাইবার মত কিছু নয়, মাথার উপর যে ঘনপল্লব শাখাগুলি আলিঙ্গনকে নিবিড় বিচ্ছেদবিহীন করিয়া রাখিয়াছে তাহারই একটি শুষ্ক পাতা ঝরিয়া পড়িয়াছে। আরামের নিঃশ্বাস ফেলিয়া চলিতে লাগিলাম।

লম্বা টানের চোটে চুকটটা প্রায় শেষ হইয়া আসিয়াছিল। অল্প সময়ে হইলে ফেলিয়া দিতাম, কিন্তু আজ সেটারে কিছুতেই ছাড়িতে পারিলাম না। তাহার অগ্নিদীপ্ত প্রান্তটুকুতে যেন একটু প্রাণের সংস্রব

ছিল। এই নিঃসঙ্গ অন্ধকারের মধ্যে আমার সমস্ত অন্তরাঙ্গা যখন সঙ্গীর জন্ত ব্যাকুল হইয়া উঠিতেছিল, তখন ওই ক্ষীণ রশ্মিটুকুই জীবন্ত সঙ্গীর মত প্রাণের মধ্যে ভরসা জাগাইয়া রাখিয়াছিল। ওটাকে ফেলিয়া দিলে যে অনেকখানি সাহসও চলিয়া যাইবে তাহা বেশ বুঝিতেছিলাম।

কিন্তু ক্রমে যখন আঙুল পুড়িতে লাগিল তখন সেটাকে ফেলিয়া দিতেই হইল। একবার বেশ ভাল করিয়া টানিয়া লইয়া সম্মুখের দিকে কিছু দূরে ফেলিয়া দিলাম।

ফেলিয়া দিবামাত্র মনে হইল, যে-আঙুল ছুটা দিয়া চুকট ধরিয়াছিলাম তাহাদের মধ্যে কোনও ছিদ্র পাইয়া থানিকটা ঠাণ্ডা বাতাস শরীরের মধ্যে ঢুকিয়া পড়িল। আমার দৃষ্টি ছিল নিষ্কিন্ত চুকটটার উপর—সেটা মাটিতে পড়িবামাত্র আগুন ছিটকাইয়া উঠিল। তারপর এক আশ্চর্য ব্যাপার ঘটিল। ছিটকানো আগুনটা মধ্যপথে ছুটা আকৃতি ধরিয়া পাশাপাশি একসঙ্গে নড়িতে আরম্ভ করিল। মাটি হইতে প্রায় একহাত উপরে থাকিয়া পরস্পরের চারি আঙুল ব্যবধানে এই ক্ষুদ্র অগ্নিগোলক ছুটা একজোড়া লাল জোনাকির মত সম্মুখ দিকে চলিতে আরম্ভ করিল এবং মাঝে মাঝে মিটমিট করিতে লাগিল।

আমার মাথা বোধ হয় গরম হইয়া উঠিয়াছিল। কি জানি কেন আমার ধারণা জন্মিল যে, ওই মিটমিট করা অগ্নিক্ষুদ্র ছুটা আর কিছুই নয়, ছুটা চক্ষু, আমার পানে তাকাইয়া আছে, এবং এই চক্ষু ছুটার পশ্চাতে একটা খর্বাকৃতি কুকুরের কালো রং যে অন্ধকারে মিশাইয়া আছে তাহা যেন মনে মনে স্পষ্ট অনুভব করিলাম।

চলিতে চলিতে কখন দাঁড়াইয়া পড়িয়াছিলাম লক্ষ্য করি নাই, চক্ষু ছুটাও সম্মুখে কিছুদূরে দাঁড়াইল। তারপর কতক্ষণ যে নিম্পলকভাবে আমার মুখের দিকে দৃষ্টি ব্যাদান করিয়া রহিল জানি না, মনে হইল

বহুক্ষণ পরে সেই চক্ষুর পলক পড়িল। তখন সেটা আবার চলিতে আরম্ভ করিল। আমিও পশ্চাৎ পশ্চাৎ চলিলাম। দেহের উপর তখন কোনও অধিকারই নাই। থপ্পে বিভীষিকার সম্মুখ হইতে পলাইবার ক্ষমতা যেমন লুপ্ত হইয়া যায়, আমিও তেমন নিতান্ত নিরুপায়ভাবে ওই চক্ষুর পশ্চাদ্ভর্তা হইলাম। স্বাধীন ইচ্ছা তখন একেবারে জড়ত্বপ্রাপ্ত হইয়াছে, আছে কেবল সমস্ত চেতনাব্যাপী দিগ্বিদিক জ্ঞানশূন্য ভয়।

কতক্ষণ এই অগ্নিচক্ষুমান আমাকে তাহার আকর্ষণ প্রভাবে টানিয়া লইয়া গিয়াছিল আমার ধারণা নাই। একবার চেতনার অন্তরতম প্রদেশে যেন ক্ষীণ অনুভূতির ছায়া পড়িয়াছিল যে পাকা রাজপথ দিয়া চলিতেছি না; আর একবার মনে হইয়াছিল বুঝি একটা গাছের মোটা শিকড়ে ঠোকর খাইলাম। কিন্তু সে-সব আমার ইন্দ্রিয় উপলব্ধির বাহিরে।

হঠাৎ একটা বড় রকমের ঠোকর খাইলাম। এটা বেশ স্মরণ আছে। তারপর হুমড়ি খাইয়া পড়িয়াই নীচের দিকে গড়াইতে সুরু করিলাম। কোথায় পড়িতেছি কোনও ধারণাই ছিল না; অন্ধকারে দেখাও অসম্ভব। কিন্তু এই পতন যে অনন্তকাল ধরিয়া চলিতে থাকিবে এবং পতনের লক্ষ্যও যে একটা অভলম্পর্শ স্থানে লুকাইয়া আছে তাহা মনের মধ্যে বদ্ধমূল হইয়া গেল। অথচ কি নিদারুণ সেই পতন! গড়াইতে গড়াইতে এক ধাপ হইতে অল্প ধাপে পড়িতেছিলাম এবং প্রত্যেক স্তরে অবরোহণের সঙ্গে সঙ্গে দেহের অস্থিগুলি যেন একবার করিয়া ভাঙিয়া যাইতেছিল।

এই অবরোহণের শেষ ধাপে যখন আসিয়া পৌঁছিলাম তখন জ্ঞান বিশেষ ছিল না, কিন্তু একটা অনন্ত যন্ত্রণার পথ যে অতিক্রম করিয়া আসিয়াছি তাহা সমস্ত শরীর দিয়া অনুভব করিতে লাগিলাম।

অনেকক্ষণ পরে চক্ষু মেলিলাম। সেই দেখ্যেই না চক্ষু ছুটা আমার মুখের অন্তিম নিকটেই ঝুঁকিয়া পড়িয়া কি যেন নিরীক্ষণ করিতেছে।

দেহের রক্ত ত জল হইয়া গিয়াছিলই, এবার তাহা একেবারে বরফ হইয়া গেল। একটা অসহ শীতের শিহরণ সমস্ত দেহটাকে যেন ঝাঁকানি দিয়া গেল। তারপর আর কিছু মনে নাই।

সূর্য্যোদয়ের কিছু পূর্বে জ্ঞান হইল। কলাকার রাত্রি যে স্বাভাবিকভাবে কাটে নাই এই চিন্তা লইয়া চক্ষু মেলিলাম। ঘাসের উপর শুইয়া আছি দেখিয়া তাড়াতাড়ি উঠিতে গেলাম—উঃ! গায়ে দারুণ বেদনা। আবার শুইয়া পড়িলাম। তখন ক্রমশঃ সব মনে পড়িল। ঘাড় না নাড়িয়া যতদূর সাধ্য দেখিয়া বুঝিলাম, ‘পিপরপাতি’ রাস্তার পাশে পাশে কেল্লার বে শুক গড়খাই গিয়াছে তাহারই তলদেশে বাবল। গাছের ঝোপের মধ্যে পড়িয়া আছি।

সূর্য্য উঠিল। এখানে সমস্ত দিন পড়িয়া থাকিলেও কেহ সন্ধান পাইবে না ইহা স্থির। শরীরে ত নড়িবার শক্তি নাই। প্রচণ্ড এক হেঁচকা মারিয়া উঠিয়া দাঁড়াইলাম; চক্ষু হইতে আরম্ভ করিয়া দেহের সমস্ত রোম বেদনায় টন্ টন্ করিয়া উঠিল। কিন্তু বাড়ি গিয়া পৌঁছিতেই হইবে। অসীম বলে মৃতপ্রায় দেহটাকে টানিতে টানিতে কি করিয়া বাড়ীতে পৌঁছিলাম তাহা প্রকাশ করিবার আমার সাধ্য নাই। বাড়ী যাইতেই সকলে চারিদিক হইতে ছুটিয়া আসিল এবং উৎকণ্ঠিত প্রশ্নে ‘আমার ক্ষীণ চেতনা আবার লুপ্ত করিয়া দিবার যোগাড় করিল। শালক সকলকে সরাইয়া দিয়া আমাকে একটা ইজিচেয়ারে বসাইয়া ব্যগ্রভাবে জিজ্ঞাসা করিলেন,—সারা রাত কোথায় ছিলে? * আমরা সকলে তোমার জন্তে—

উত্তর দিতে গেলাম, কিন্তু কি ভয়ানক! গলার স্বর একেবারে বন্ধ হইয়া গিয়াছে। প্রাণপণ চেষ্টা করিয়া একটা কথাও উচ্চারণ করিতে পারিলাম না। শালক আমাকে দুধ ও ব্রাণ্ডি খাওয়াইয়া ডাক্তার ডাকিতে গেলেন।”

ডাক্তার যখন আসিলেন তখন বিছানায় শুইয়া আছি—ভয়ানক কম্প দিয়া জ্বর আসিতেছে। স্ত্রী ও শালাজ মলিন মুখে মাথার শিয়রে বসিয়া আছেন।

ডাক্তার পরীক্ষা করিয়া বলিলেন,—দুটো লাম্পস্‌ই গ্যাফেক্ট করেছে—নিউমোনিয়া।

তারপর আবার অচেতন হইয়া পড়িলাম।

* * * *

ঘুম ভাঙিয়া দেখি শরীর বেশ ঝরঝরে হইয়া গিয়াছে—কোথাও কোনও গ্লানি নাই।

কে একজর পিছন হইতে জিজ্ঞাসা করিল,—কেমন বোধ হচ্ছে ?

ফিরিয়া দেখি বিনোদ,—আমার ছেলেবেলার ফুলের বন্ধু। অনেক দিন পরে তাহাকে দেখিয়া বড় আনন্দ হইল। বলিলাম,—বেশ ভালই বোধ হচ্ছে ভাই। বৃকের ওপর যে একটা ভার চাপানো ছিল সেটা আর টের পাচ্ছি না।

বিনোদ মুহূ হাসিয়া বলিল,—প্রথমটা ঐ রকম বোধ হয় বটে। আমার যখন কলেরা হয়—

হঠাৎ মনে পড়িয়া গেল—তাই ত। বিনোদ ত আজ দশ বৎসর হইল কলেরায় মরিয়াছে ; আমি স্বহস্তে তাহাকে দাহ করিয়াছি। তবে সে এখানে আসিল কি করিয়া ! মহাবিশ্বয়ে জিজ্ঞাসা করিলাম,—বিনোদ, তুমি ত বেঁচে নেই—তুমি ত অনেক দিন মারা গেছ !

বিনোদ আসিয়া আমার দুই হাত ধরিল। কিছুক্ষণ আমার মুখের দিকে চাহিয়া থাকিয়া আস্তে আস্তে বলিল,—তুমিও আর বেঁচে নেই বন্ধু !

କର୍ତ୍ତାର କୀର୍ତ୍ତି

বর্ধমান জেলার ধনী ও বনিয়াদী জমিদার বাবু হৃষীকেশ রায় তাঁহার জ্যেষ্ঠ পুত্র হেমন্তকে বাড়ী হইতে দূর করিয়া দিয়াছিলেন। ইহার কারণ, সে তাঁহার মনোনীতা পাত্রীকে উপেক্ষা করিয়া একটি আই-এ পাস করা মেয়েকে নিজে পছন্দ করিয়া বিবাহ করিয়াছিল।

ভয় নাই, ইহা পিতুরোধপীড়িত হেমন্তের হৃদয়শার কৰুণ কাহিনী নয়। হেমন্তকে শেষ পর্য্যন্ত অর্থাভাবে স্ত্রীপুত্রকে পথে বসাইয়া উদ্বন্ধনে প্রাণত্যাগ করিতে হয় নাই। বিবাহের পূর্বেই সে কলিকাতার একটা বড় কলেজে অধ্যাপনার কাজ পাইয়াছিল; তাহা ছাড়া পরীক্ষার কাগজ দেখিয়া ও ঘরে বসিয়া শিক্ষকতা করিয়াও যথেষ্ট উপার্জন করিত। সুতরাং পিতা তাজাপুত্র করিয়া ঘরের বাহির করিয়া দিলেও, অর্থের দিক দিয়া অন্তত তাহার কোনো ক্লেশ হয় নাই।

হৃষীকেশ বাবুর মত বদরাগী অগ্নিশর্মা লোক আজকালকার দিনে বড়-একটা দেখা যায় না। পুরাকালে বদ-মেজাজী বলিয়া দুর্বাসা মুনির একটা অপবাদ ছিল বটে, কিন্তু তিনিও অকারণে কাহাকেও অভিসম্পাত দিয়াছিলেন বলিয়া আমাদের জানা নাই। হৃষীকেশবাবুর কারণ-অকারণের বালাই ছিল না, তিনি সর্বদাই চটিয়া থাকিতেন। শুনা যায়, সন্তের বৎসর বয়সে তাঁহার একবার টাইফয়েড হয়, সারিয়া উঠিয়া তিনি তেঁতুলের অম্ল দিয়া ভাত খাইবার ইচ্ছা জ্ঞাপন করেন। ডাক্তারের আদেশে তাঁহার সে ইচ্ছা পূর্ণ হইল না, ফলে সেই যে তিনি চটিয়া গিয়াছিলেন সে-রাগ তাঁহার এখনও পড়ে নাই। একাদিক্রমে এত বৎসর রাগিয়া থাকার ফলে তাঁহার গৌপ সমস্ত পাকিয়া গিয়াছিল এবং মাথার সম্মুখ দিকে চুল উঠিয়া পরিস্কার ও চিক্ণ হইয়া গিয়াছিল। চক্ষু দুটি সর্বদাই কষায়িত হইয়া থাকিত।

রাগের মাত্রা বাড়িয়া গেলে তিনি ঘরের আসবাব-পত্র ভাঙিতে আরম্ভ করিতেন। বাড়ির ভঙ্গপ্রবণ জিনিসগুলি প্রায় শেষ করিয়া আনিয়াছিলেন, এমন সময় একদিন 'দৈবক্রমে' হাতের কাছে একটা কাচের গ্লাস পাইয়া প্রথমেই সেটা ভাঙিয়া ফেলিলেন। ইহাতে ইন্দ্রজালের মত কাজ হইল। কাচ-ভাঙার শব্দে কর্তার অর্ধেক রাগ পড়িয়া গেল—সেদিন আর তিনি অণু কিছু ভাঙিলেন না। অতঃপর তাঁহার রাগের মাত্রা চড়িয়া গেলেই বাড়ীর যে কেহ একটা কাচের গেলাস তাঁহার হাতে ধরাইয়া দিয়া সবেগে গ্রহণ করিত। তিনি সেটা মেঝেয় আছড়াইয়া ভাঙিয়া ফেলিতেন। এই অভিনব উপায়ে বাড়ির টেবিল, চেয়ার, আয়না, ঝাড় ইত্যাদি দামী আসবাব অনেকগুলি রক্ষা পাইয়াছিল।

দুই মাস অন্তর কলিকাতা হইতে এক গ্রোস করিয়া নূতন কাচের গেলাস আনান হইত। তাহাতেই কোনো রকমে কাজ চলিয়া গাইত।

রাগ যখন কম থাকিত তখন তিনি তাঁহার খাসবেয়ার। গয়ারানকে 'শ্যারকা বাচ্চা' না বলিয়া শ্রেফ 'হারামজাদা' বলিয়া ডাকিতেন। তখন বাহিরের গোমস্তা হইতে ভিতরে গৃহিণী পর্যন্ত স্বস্তির নিশ্বাস ফেলিয়া বাঁচিতেন।

দুই বৎসর পূর্বে হেমন্ত যখন জানাইল যে, সে পিতৃনির্ব্বাচিতা কলাবতী নাম্নী একাদশবর্ষীয়া মেয়েটিকে বিবাহ করিবে না, পরন্তু বেথুন কলেজের একটি অষ্টাদশী মাতৃহীনা কুমারীকে বধুরূপে মনোনীত করিয়াছে তখন কর্তা দ্রুতপরম্পরায় তেইশটা গেলাস ভাঙিয়া ফেলিলেন। কিন্তু তাহাতেও যখন ক্রোধ প্রশমিত হইল না তখন তিনি হেমন্তের ঘরে ঢুকিয়া একখানা ছয় ফুট লম্বা ভিনীসিয় আয়না পদাঘাত ভাঙিয়া ফেলিয়া দ্বারের দিকে অঙ্গুলি নির্দেশপূর্ব্বক ঘোর গর্জনে কহিলেন, 'বেরিয়ে যা

এখনি আমার বাড়ি থেকে, এককাপড়ে বেরিয়ে যা। তোর মত শূয়ারের মুখ দেখতে চাই না।' বলিয়া হেষ্টিংসের মত একটা শব্দ করিলেন।

হেমন্ত সেই যে এককাপড়ে বাহির হইয়া গেল, তাহার পর আজ পর্যন্ত পিতৃভবনে পদার্পণ করে নাই।

হেমন্তর বিবাহের সমস্ত ঠিক হইয়াই ছিল,—তাহার মাসীর বাড়ী হইতে বিবাহ হইবে। বিবাহের দিন-দুই পূর্বে গৃহিণী কাঁপিতে কাঁপিতে কর্তার নিকট গিয়া বলিলেন, 'আমি কালীঘাট যাব—মানত আছে। শিশিরের সঙ্গে আমায় পাঠিয়ে দাও।'

রাগী হইলেও হৃষীকেশবাবু অত্যন্ত কটবুদ্ধি : গৃহিণীর আর্জি শুনিয়া তিনি হেষ্টিংসের নিকট শব্দ করিলেন, কটমট করিয়া তাকাইয়া বলিলেন, 'মানত আছে, শিশিরের সঙ্গে পাঠিয়ে দাও! চালাকি! আচ্ছা, আমিই সঙ্গে করে নিয়ে যাচ্ছি। দেখি কেমন কালীঘাটের মানত!—গয় শূয়ারকা বাচ্চা কোথায় গেল—'

গৃহিণী চক্ষে অঞ্চল দিয়া দ্রুতপদে প্রস্থান করিলেন। গয়া দ্বারের বাহিরে এক গেলাস সরবৎ হাতে লইয়া দাঁড়াইয়াছিল, ঘরে ঢুকিয়া কর্তার হাতে দিতেই তিনি সেটা দেয়ালে মারিয়া ভাঙিয়া ফেলিলেন, স-গজ্জনে বলিলেন, 'মানোজারকে ডাক।'

মানোজার আসিলে তাহাকে জুকুম দিলেন,—'পিড়কি আর সদর দেউড়িতে চারটে করে খোঁটা দারোয়ান বস। বড়ী না পালায়!—আর গয়া হারামজাদা তামাক দিয়ে যাক।' হারামজাদা শুনিয়া সকলে বুঝিল গৃহিণীর চক্রান্ত ধরিয়া ফেলিয়া কর্তা মনে মনে খুশী হইয়া উঠিয়াছেন।

গৃহিণীর কালীঘাটে পূজা দিতে যাওয়া হইল না। ওদিকে হেমন্তর বিবাহ হইয়া গেল।

ইহার পর দুই বৎসর কাটিয়াছে। গৃহিণী বাড়ির মধ্যে কর্তার নজরবন্দী আছেন, একদিনের জন্তও কোথাও যাইতে পান নাই। এমন কি ভগিনীপতির অতবড় অসুখেও তাঁহাকে বোনের বাড়ি যাইতে দেওয়া হয় নাই। কিন্তু শিশিরকে বাড়ীর মধ্যে অন্তরীণ রাখা শক্ত। সে কলেজে পড়ে তাই বাধ্য হইয়া তাহাকে কলিকাতায় মাসীর বাড়ী থাকিতে দেওয়া হইয়াছে। বা হোক, জ্বীকেশবাবু তাহাকে ডাকিয়া শাসাইয়া দিয়াছেন যে কোনদিন যদি সে হেমন্তর বাড়ীতে যায়কিংবা তাহার সহিত বাক্যলাপ করে তাহা হইলে তাহাকেও তিনি ত্যাজ্যপুত্র করিয়া বাড়ী হইতে দূর করিয়া দিবেন।

কিন্তু সম্প্রতি কয়েকদিন হইতে বাড়ির মধ্যে ভিতরে ভিতরে কি-একটা ষড়যন্ত্র চলিতেছে কর্তা তাহা বেশ বুঝিতে পারিয়াছেন। গত শনিবার শিশির আসিয়াছিল, সে মা'র কানে ফুন্ ফুন্ করিয়া কি বলিয়া গেল সেই অবধি গৃহিণী অতিশয় চঞ্চল ও বিমনা হইয়া বেড়াইতেন। গৃহকর্মে তাঁহার মন নাই; একদিন ক্রন্দনরত অবস্থায় কর্তার কাছে ধরা পড়িয়া গিয়াছেন। কিন্তু বহু উৎপীড়ন ও তর্জন করিয়াও কর্তা ভিতরের কথা কিছুই বাহির করিতে পারেন নাই। তাঁহার সকল প্রশ্নই গৃহিণী উদাস মৌনরত অবলম্বন করিয়া সহ্য করিয়াছেন। তাহাতে আর কিছু না হোক, বাড়িতে কাচের গেলাসের সংখ্যা ভয়ানক দ্রুত কমিয়া আসিতেছে।

একে ত এইরূপ অবস্থা, তাহার উপর আজ সকালে উঠিয়াই কর্তা একেবারে সপ্তমে চড়িয়া গিয়াছেন। হতভাগ্য সরকার সকালবেলা হুকুম লইতে আসিয়া কর্তার সম্মুখেই হাঁচিয়া ফেলিয়াছিল। আর যায় কোথা? কর্তা একেবারে হুঙ্কার দিয়া উঠিলেন,—‘বেয়াদব, উল্লুক কোথাকার! এত বড় আত্মপক্ষ! গয়া শূয়ারকা বাচ্ছা কোথায় গেল?’

সরকার ত প্রাণ লইয়া পলায়ন করিল কিন্তু কর্তার সে রাগ সমস্ত দিনে পড়িল না ! আজ কি-না সন্ধ্যার সময় আবার শিশির আসিল । নিজের বসিবার ঘর হইতে তাহার গলার আওয়াজ শুনিতে পাইয়া কর্তা তাহাকে ডাকিয়া পাঠাইলেন । শিশির ঘরে ঢুকিতেই তিনি আরম্ভ করিলেন—
‘তুই হেমন্তর বাড়িতে যাস্ ? সত্যি বথা বন্ হতভাগা, নইলে আজ তোকে মেরেই খুন করব ।’

কুড়ি বছরের ছেলে শিশির পিতার মুখের পানে হতভয় হইয়া তাকাইয়া রহিল, তাঁহার প্রশ্নের হাঁ-না কোনো উত্তরই দিতে পারিল না ।

হৃষীকেশবাবু তাঁহার কণ্ঠস্বর তারা গ্রামের ধৈবতে তুলিয়া বলিলেন,—
‘কার হুকুমে তুই সেখানে গিয়েছিলি রে পাজি, নচ্ছার ! কি বলেছিলাম তোকে আমি ! আমার হুকুম হুকুম নয়, বটে ?’

শিশির গৌজ হইয়া দাঁড়াইয়া রহিল । হৃষীকেশবাবু এক পদাঘাতে জলন্ত কলিকাস্ত্র গড়গড়াটা দূরে ফেলিয়া দিয়া বলিলেন,—‘কি করতে তুই গিয়েছিলি সেখানে বন্ আমাকে ! আজ তোরাই একদিন কি আমারই একদিন ! নিজের মা’র কাছে এসে ফিস্ ফিস্ ক’রে কি বলেছিস্ ? বন্ শিগ্গীর হতভাগা, নইলে গাছে বেঁধে তোরা গায়ে জলবিছুটি দেওয়াখ ।’

শিশির ভিতরে ভিতরে মরিয়া হইয়া উঠিল । সে দু-হাত শক্তভাবে মুঠি করিয়া বলিল,—‘আমি এখন থেকে দাদা বৌদিদির কাছেই থাকব ঠিক করেছি । আর—আর মাকেও তাঁদের কাছে নিয়ে যাব ।’

হৃষীকেশবাবু একেবারে লাকাইয়া দাঁড়াইয়া উঠিলেন, ‘কী, এত বড় আশ্পর্দা !’

শিশির গৌ-জুরে বলিয়া চলিল,—‘আমাকে থাকতেই হবে,—বৌদিদির শরীর খারাপ, তাঁর-তাঁর—ছেলে হবে—’

হৃষীকেশ আবার চীংকার করিবার জন্তু হাঁ করিয়াছিলেন, সেই অবস্থাতই হঠাৎ বসিয়া পড়িলেন! সংবাদটা পরিপাক করিতে মিনিট-খানেক সময় লাগিল, তারপর পুনশ্চ গর্জ্জন ছাড়িলেন,—‘ছেলে হবে ত তোর কি রে শূয়ার।’

শিশির বলিল,—‘দাদা সমস্ত দিন বাড়ি থাকেন না, বৌদি একলা, তাই আমাকে থাকতে হবে। আর মাকেও—’

‘বেয়োও! বেয়োও! এইদণ্ডে আমার বাড়ি থেকে দূর হ—
নইলে চাব্কে লাগু করে দেব। শূয়ার পাজি বোস্টেটে কোথাকার! যাবিনে? গয়া শূয়ারকা বাচ্ছা কোথায় গেল, নিয়ে আয় আমার হান্টার—’

শিশির আর অপেক্ষা করিল না, যেমন আসিয়াছিল তেমনি বাহির হইয়া গেল। মা’র সহিত সাক্ষাৎ পর্য্যন্ত করা হইল না।

সমস্ত রাত্রি হৃষীকেশ বাড়িময় দাপাইয়া বেড়াইলেন। সেদিন আর ভয়ে কেহ তাঁহার কাছে গেলাস লইয়াও অগ্রসর হইতে পারিল না।

পরদিন বেলা নয়টার সময় স্নানাহার করিয়া তিনি ম্যানেজারকে ডাকিয়া পাঠাইলেন, বলিলেন, ‘আমি কলকাতায় যাচ্ছি, সন্ধ্যা নাগাদ ফিরব। তুমি সাবধানে থেকো—গিন্নী না পালায়।’ আর শিশির লক্ষীছাড়া যদি বাড়ি ঢুকতে চায় মেয়ে তাড়াবে।—গাড়ী যুততে বল।’

ম্যানেজার ভয়ে ভয়ে বলিলেন,—‘মোর্টর-কোম্পানীর এজেন্টকে আজ ডেকেছিলেন, সে এসেছে। তাকে—’

হৃষীকেশবাবু বলিলেন, ‘তাকে চুলোয় যেতে বল। আমি কলকাতায় যাচ্ছি, নিজে দেখে মোটর কিন্বে। গাড়ী যুততে বল।’ বলিয়া চেক বহিখানা পকেটে পুরিলেন।

ম্যানেজার ‘যে আজ্ঞে’ বলিয়া প্রস্থান করিলেন।

গাড়ীতে ষ্টেশনে যাইতে যাইতে হৃষীকেশ নিজের মনে গর্জিতে লাগিলেন,—‘কি আশ্চর্য! আমার সঙ্গে চালাকি! দেখে সেব। আমার বো—আমার নাতি! আমি হৃষীকেশ রায়—দেখে নেব কে কি করতে পারে।’

বেলা প্রায় দেড়টার সময় একখানা বাক্সকে নূতন ফিয়েট গাড়ী কলিকাতায় প্রফেসর হেমন্ত রায়ের বাড়ির সম্মুখে আসিয়া দাঁড়াইল। গাড়ীর আরোহী গলা বাড়াইয়া দেখিলেন, ছোট্ট স্বদৃশ্য বাড়িখানি, চারি ধারে একটুখানি সঙ্কীর্ণ ঘাসের বেঠনী; সামনে লোহার ফটক বন্ধ।

হেমাধ্বনি করিয়া হৃষীকেশবাবু গাড়ী হইতে নামিলেন। ফটক খুলিয়া সম্মুখের বন্ধ দরজায় সজোরে কড়া নাড়িলেন। একটা ছোকরা গোছের চাকর দ্বার খুলিয়া সম্মুখে কষায়িত-নেত্র বৃদ্ধ ও তাঁহার পিছনে একখানি দামী নূতন মোটরকার দেখিয়া সসন্ত্রমে জিজ্ঞাসা করিল,—‘কি চাই বাবু?’

হৃষীকেশবাবু উত্তর না দিয়া ভিতরে প্রবেশ করিলেন। চাকরটা বলিল,—‘বাবু বাড়ি নেই, কলেজে গেছেন। তাঁর ক্ষিরতে দেবী আছে।’

হৃষীকেশ কর্ণপাত না করিয়া ভিতরের দিকে চলিলেন। চাকরটা এই অদ্ভুত বৃদ্ধের আচরণ দেখিয়া তাড়াতাড়ি তাঁহার সম্মুখের পথ আগলাইয়া রুদ্ধস্বরে কহিল, ‘ওদিকে কোথায় চলেছেন! ওটা অন্দরমহল। বাবু বাড়ি নেই এসময় আপনি কি চান? আপনার নাম কি?’

হৃষীকেশ শুধু একটি হেমাধ্বনি করিয়া চাকরটার কর্ণধারণপূর্বক

একধারে সরাইয়া দিলেন। তারপর সম্মুখের সিঁড়ি দিয়া গট্ গট্ করিয়া উপরের উঠিতে লাগিলেন।

উপরের একটা ঘরে তখন মেঝের উপর মাদুর বিছাইয়া পা ছড়াইয়া বসিয়া প্রতিমা ভেল্ভেটের জুতার কাপড়ে রেশমের ফুল তুলিতেছিল। ক্রশাকী স্নন্দরী, বুদ্ধির বিভায় মুখখানি জলজল, চুলগুলি পিঠের উপর ছড়ানো, নূতন সৌভাগ্যের কোনো লক্ষণই এখনও দেহে প্রকাশ পায় নাই; তাহাকে দেখিলেই মন-খুশী হইয়া উঠে। তাহার হাঁটুর কাছে মাথা রাখিয়া শিশির কড়িকাঠের দিকে চোখ তুলিয়া লম্বা ভাবে শুইয়া ছিল। গতকল্য বাবার সহিত যে ব্যাপার ঘটয়া গিয়াছে তাহা বৌদিদিকে বলা যাইতে পারে কি-না, সে মনে মনে তাহাই গবেষণা করিতেছিল। কিছুক্ষণ ভাবিয়া সে স্থির করিল—না, বলিয়া কাজ নাই! বৌদিদি ছুখ পাইবেন মাত্র, আর কোন ফল হইবে না। দাদাকে চুপি চুপি এক সময় বলিলেই হইবে।

বৌদিদির সন্তান-সন্তানবনার কথা গত সপ্তাহে দাদার মুখে শুনিয়া শিশির আপনা হইতে ছুটিয়া মা'র কাছে গিয়াছিল। মাও শুনিয়া আনন্দে ও আশঙ্কায় অতিশয় চঞ্চল হইয়া উঠিয়াছিলেন। কিন্তু কর্তার রোষ-বহি ডিঙাইয়া কিছু করিতে সাহস করেন নাই। গতকল্য শিশির দৃঢ়প্রতিজ্ঞ হইয়া আবার বাড়ি গিয়াছিল—যেমন করিয়াই হউক মাকে লইয়া আসিবে। তারপরেই সেই বিভ্রাট! মা'র সঙ্গে শিশির দেখা পর্য্যন্ত করিতে পাইল না।

এই কথাটাই মনের মধ্যে তোলাপাড়া করিতে করিতে শিশির বলিল, ‘আচ্ছা বৌদি, মা যদি এখন কোনো রকমে হঠাৎ এসে পড়েন?’

সম্মুখের দেয়ালে শঙ্কর ও শাশুড়ীর এন্‌লাজ করা ফটোগ্রাফ টাঙানো ছিল। সেই দিকে চোখ তুলিয়া কিছুক্ষণ শাশুড়ীর ছবির দিকে চাহিয়া

থাকিয়া একটি ক্ষুদ্র নিশ্বাস ত্যাগ করিয়া প্রতিমা বলিল,—‘তা যদি হত ঠাকুরপো—’

‘শিশির সহসা কল্পহুয়ে ভর দিয়া উঠিয়া বলিল,—‘আচ্ছা’, মাকে যদি চুরি করে নিয়ে আসি—বাবা কিছু টের না পান?’

জিভ কাটিয়া প্রতিমা বলিল,—‘বাপ রে! তাহলে কি আর রক্ষে থাকবে। বাবা তাহলে কাউকে আস্ত রাখবেন না।’

বস্তুত, চোখে না দেখিলেও শ্বশুরের সম্বন্ধে কোনো কথাই প্রতিমার অজ্ঞাত ছিল না। তাহাকে বিবাহ করার ফলেই যে স্বামীর সহিত শ্বশুরের এমন বিচ্ছেদ ঘটিয়াছিল তাহা সে বিবাহের সময় হইতেই জানে। হেমন্ত অবশ্য কোনোদিন এসম্বন্ধে তাহাকে কোন কথা বলে নাই, কিন্তু শ্বশুরঘরের জন্ত সর্বদাই প্রতিমার প্রাণ কাঁদিতে থাকিত। রাগী হউন কিন্তু শ্বশুর যে কখনই মন্দ লোক নহেন ইহা তাহার দৃঢ়বিশ্বাস ছিল। শ্বশুর-স্বাশুড়ীর আদরে বঞ্চিত হইয়া এই মেয়েটি যে মনের মধ্যে কতখানি বেদনা পোষণ করিয়া রাখিয়াছিল তাহা তাহার স্বামীও কোনদিন জানিতে পারেন নাই। অত্যন্ত বুদ্ধিমতী বলিয়া সে ও-ভাব কখনও ইঙ্গিতেও প্রকাশ করে নাই, পাছে স্বামী উদ্ভিগ্ন হন।

শিশির আবার কড়িকাঠের দিকে চাহিয়া শুইয়াছিল, প্রতিমা ছলছল চক্ষে বলিল,—‘আমার ভাগ্যে সে কি আর হবে ঠাকুরপো। বাবা-মাকে আমি এজন্মে চোখে দেখতে পাব না।’ বলিয়া একটা উচ্ছ্বাসিত দীর্ঘশ্বাস ত্যাগ করিল।

এমন সময় নীচে হ্রেষাধ্বনির মত শব্দ শুনিয়া শিশির তড়াক করিয়া উঠিয়া বসিল। এ শব্দ ত ভুল হইবার নয়! সে প্রতিমার কানের কাছে মুখ লইয়া গিয়া বলিল—‘বাবা! বাবা এসেছেন!’ বলিয়াই একলাফে পাশের ঘরে ঢুকিয়া ভিতর হইতে দরজা বন্ধ করিয়া দিল।

প্রতিমার মুখ সাদা হইয়া গেল, বুক টিব্ টিব্ করিয়া উঠিল। সে উঠিয়া দাঁড়াইয়া মাথায় আঁচল টানিয়া দিতেই হৃষীকেশবাবু ঘরের মধ্যে আসিয়া দাঁড়াইলেন। প্রতিমাকে আপাদমস্তক নিরীক্ষণ করিয়া বজ্রগম্ভীরস্বরে কহিলেন, ‘আমার নাম শ্রীহৃষীকেশ রায়। আমি বর্দ্ধমান থেকে আসছি।’—বলিয়া একটা চেয়ার টানিয়া লইয়া তাহাতে উপবেশন করিলেন।

এইখানে প্রতিমা একটু অভিনয় করিল। মনে যে ভয়ের সঞ্চার হইয়াছিল তাহা জের করিয়া চাপিয়া সে সচকিতে ফিরিয়া মুখের ঘোমটা সরাইয়া দিল। বিশ্বয়-আনন্দ-ভক্তি-লজ্জা-মিশ্রিত চক্ষে হৃষীকেশবাবুর মুখের দিকে এক মুহূর্ত্ত চাহিয়া থাকিয়া অর্দ্ধশুট স্বরে উচ্চারণ করিল—‘বাবা!’ তারপর গলায় আঁচল দিয়া তাঁহার পায়ের উপর মাথা রাখিয়া প্রণাম করিল।

অগ্ন্যুদ্গারী ভিস্মভিষ্যাসের মাথার উপর উত্তর-মেরুর সমস্ত বরফ চাপাইয়া দিলে কি ফল হয় বলিতে পারি না, হৃষীকেশবাবুরও মুখের কোনো ভাব-পরিবর্তন দেখা গেল না। তিনি ক্ষীণভাবে একটু হ্রেষাধ্বনি করিয়া বলিলেন, ‘তুমিই আমার পুত্রবধু? তোমার নাম কি?’

‘আমার নাম প্রতিমা’ বলিয়া সে তাঁহার পায়ের কাছেই বসিয়া পড়িল। এইটুকু অভিনয় করিয়াই তাহার উরুছুটা খর-খর করিয়া কাঁপিতেছিল।

হৃষীকেশবাবু চাহিয়া দেখিলেন—হাঁ নাম সার্থক বটে। বধুর মুখ দেখিলে চোখ জুড়াইয়া যায়। শুনিয়াছিলেন বধু আই-এ পাস, কিন্তু কই তাহার আচরণে বিজ্ঞাভিমানের কোনো চিহ্নই ত নাই। তিনি এক দর্পিতা তীক্ষ্ণভাষিণী যুবতী মনে মনে কল্পনা করিয়া রাখিয়াছিলেন। কিন্তু এ কি? হৃষীকেশবাবু মনে মনে একবার হ্রেষাধ্বনি করিলেন, কিন্তু তাহা পুত্রদের উদ্দেশে। হতভাগারা তাঁহাকে বলে নাই কেন

প্রতিমা শব্দের মুখের দিকে একবার চাহিয়া, উঠিয়া দাঁড়াইয়া যুদ্ধকণ্ঠে বলিল, ‘আপনি বড় ঘেমেছেন, জামাটা খুলে ফেললে হ’ত না বাবা!’

হাতপাখা আনিয়া সে বাতাস করিবার উপক্রম করিতেই হৃষীকেশবাবু বলিয়া উঠিলেন, ‘থাক থাক, তোমায় আর কষ্ট করতে হবে না মা। আমি নিজেই বাতাস খাচ্ছি,’ বলিয়া ফেলিয়াই হৃষীকেশবাবু একেবারে স্তম্ভিত হইয়া গেলেন। এ ধরণের কথা গত তেত্রিশ বৎসরের মধ্যে তাহার মুখ দিয়া একবারও বাহির হয় নাই।

পাশের ঘরের দরজায় কান লাগাইয়া শিশির নিম্পন্দ বক্ষে এতক্ষণ স্তম্ভিত ছিল; এবার সে পা টিপিয়া টিপিয়া সরিয়া গিয়া দেয়ালে-টাড়ানো রামকৃষ্ণ পরমহংসদেবের ছবির সম্মুখে দাঁড়াইয়া প্রাণপণে দুর্গানাম জপ করিতে লাগিল।

হৃষীকেশবাবু গায়ের জামা খুলিয়া মাছরের উপর বসিলেন, পাখার হাওয়া থাইতে থাইতে জিজ্ঞাসা করিলেন, ‘সে শয়তানটা ফিরবে কখন? তোমাকে বুঝি এই রকম একলা ফেলে রেখে যায়?’

চোখের জল ও মুখের হাসি একসঙ্গে নিরুদ্ধ করিয়া প্রতিমা নিরুত্তরে বসিয়া রহিল।

হৃষীকেশবাবু গলা একপর্দা চড়াইয়া দিয়া বলিলেন, ‘ষ্টুপিড বদ্‌মায়েস সব! শিশিরটাকেও বাড়ি থেকে দূর করে দিয়েছি। এমন বোঁ আমার কাছ থেকে লুকিয়ে রেখেছিল। আজই আমি তোমাকে বাড়ি নিয়ে যাব, দেখি কোন্ ব্যাটা কি করতে পারে।’

শব্দের মুখের দিকে চাহিয়া প্রতিমা আর অশ্রু সংবরণ করিতে পারিল না, ঝর ঝর করিয়া কাঁদিয়া ফেলিল। হৃষীকেশবাবু তাহাকে কোলের কাছে টানিয়া আনিয়া নিজের থানের খুঁট দিয়া তাহার চোখ মুছাইয়া দিয়া সগর্জনে কহিলেন,—‘কৈদো না। আমি এই হেমন্তটাকে দেখে নেব।

সব ঐ ছোড়ার শয়তানী—আমি বুঝেছি। গিল্লিও এর মধ্যে আছেন। আমাকে এতদিন বলেনি কেন? ষড়যন্ত্র! যত-সব চোর বোম্বেটের দল নইলে এই বৌকে আমি দু-বচ্ছর বাইরে ফেলে রাখি?’

প্রতিমা শব্দরের কোলের উপর উপুড় হইয়া পড়িয়া রুদ্ধস্বরে বলিল,—
‘বাবা, আমাকে বাড়িতে মা’র কাছে নিয়ে চলুন।’

‘যাবই ত। এখনি নিয়ে যাব। আমি হুশীকেশ রায়, আমি কি কারক তোয়াকা রাখি?’ জামাটা গায়ে দিতে দিতে পুনরায় বলিলেন,—
‘তোমায় নিয়ে যাব ন’লে নতুন মোটর কিনে নিয়ে একেবারে এসেছি। ট্রেনে ত আর তোমার যাওয়া হ’তে পারে না।’

হুশীকেশ উঠিয়া দাঁড়াইলেন। প্রতিমা থতমত ভাবে একবার ঢোক গিলিয়া বলিল,—‘এফুনি? কিন্তু বাবা—’

হুশীকেশবাবু চড়া স্বরে বলিলেন, ‘কিন্তু কি? সেই রাঙ্গেলটার অভ্যুত্থান নিয়ে তবে তোমাকে নিয়ে যেতে হবে? (হেঁষাধ্বনি করিলেন) আমি এই তোমাকে নিয়ে চললাম, ওদের যদি ক্ষমতা থাকে মোকদ্দমা করুক গিয়ে।’

প্রতিমা আর দ্বিধাক্তি করিল না, যেমন ছিল তেমনি বেশে শব্দরের সঙ্গে নামিয়া চলিল।

সদর দরজা পর্য্যন্ত গিয়া হুশীকেশবাবু থমকিয়া দাঁড়াইয়া পড়িলেন। উদ্বিগ্নভাবে পুত্রবধূর দিকে তাকাইয়া কহিলেন, ‘কিন্তু শুনেছিলাম—ঐ শিশির হতভাগা বলছিল যে তুমি নাকি—তোমার নাকি—? কোনো ভয়ের কারণ নেই ত মা? মোটরে প্রায় ষাট মাইল যেতে হবে। যদি কষ্ট হয়—যদি কোনোরকম—’

আরক্ত মুখ কোনোমতে ঘোমটায় ঢাকিয়া প্রতিমা তাড়াতাড়ি গাড়িতে গিয়া উঠিল।

তিনটার সময় হেমন্ত বাড়ি ফিরিতেই শিশির ছুটিয়া গিয়া তাহাকে জড়াইয়া ধরিয়া বলিল,—‘দাদা, বাবা এসেছিলেন, বৌদিকে বাড়ি নিয়ে গেছেন। ব’লে গেছেন আমাদের ক্ষমতা থাকে ত যেন মোকদ্দমা করি।’ বলিয়া উচ্চৈঃস্বরে হাসিয়া উঠিল।

ভাইয়ের কাছে সমস্ত আত্মোপাস্ত শুনিয়া হেমন্ত স্মিতমুখে বলিল, ‘সব ত তুই-ই করলি। এখন আমি কি করব উপদেশ দে।’

অতঃপর দুই ভায়ে আধঘণ্টা ধরিয়া পরামর্শ করিয়া বিকাল পাঁচটার গাড়ীতে বর্ধমান রওনা হইল।

রাত্রি আটটার সময় বৌমার তত্ত্বাবধান করিবার জন্ত অন্দরে প্রবেশ করিয়া কর্তা দেখিলেন দুই ভাই হেমন্ত ও শিশির মায়ের ঘরের মেঝেয় আহারে বসিয়াছে। গৃহিণী সম্মুখে বসিয়া থাওয়াইতেছেন এবং নববধূ একথানা রেকাবি হস্তে দ্বারের পাশে দাঁড়াইয়া আছে। জয়ীকেশবাবু ভীষণ ভ্রুকুটি করিয়া কহিলেন,—‘এ ছোটোকে কে বাড়ি ঢুকতে দিলে? নিশ্চয় থিড়কী দিয়ে ঢুকেছে! হু—আম্পর্ক! এখনি ওদের বেরিয়ে বেতে বল।’

হেমন্ত ও শিশির কথা কহিল না, হেঁটমুখে আহার করিতে লাগিল। গৃহিণী বলিলেন,—‘কেন যাবে—যাবে না। আর যায় যদি, বৌমাকে নিয়ে যাবে। আমিও যাব। দেখি তুমি কি করে আটকাও!’

জয়ীকেশবাবু কটমট করিয়া তাকাইয়া বলিলেন,—‘হু’। ভারি আম্পর্ক হয়েছে। ‘আচ্ছা,’ এখন কিছু বলছি না, বৌমার শরীর খারাপ, কিন্তু এর পরে—। বৌমা তুমি শোও গে যাও, হতভাগাদের আর

‘পরিবেশন করতে হবে না।’ বলিয়া মধ্যম রকমের একটা ছেঁষাধনি করিয়া তিউনি গ্রস্থান করিলেন।

কিছুক্ষণ পরে ‘বৈঠকখানা’ হইতে কঠোর গলা শুনা গেল,—‘গয়া হতভাগা কোথায় গেল, তামাক দিয়ে যাক্।’

গয়ারামের এতবড় সৌভাগ্য জীবনে কখনও হয় নাই। সে নববধূ ঠাকুরাণীর পায়ের কাছে ঢিব করিয়া একটা গড় করিয়া বাহিরে ছুটিল।

হেমন্ত ও শিশির মায়ের মুখের দিকে চাহিয়া হাসিল। গৃহিণী ‘নাথের জল মুছিয়া ভাঙা গলায় বলিলেন, ‘যাও বৌমা তোমার স্বস্তর ছকুম দিয়ে গেলেন, আজকের মত শুয়ে পড়গে মা, কাল তখন ওদের পরিবেশন ক’রে থাইও।’

রক্ত-সন্ধ্যা।

মানুষের সহজ সাধারণ বৈচিত্র্যহীন জীবনযাত্রার মাঝখানে ভূমিকম্পের মত এমন এক একটা ঘটনা ঘটয়া যায় যে, পারিপার্শ্বিক অবস্থার সঠিক তুলনা করিয়া সেটাকে একটা অসম্ভব অঘটন বলিয়া মনে হয়। সে গল্পটা আজ বলিতে বসিয়াছি, সেটাও একদিন এমনই অকস্মাৎ অপ্রত্যাশিতভাবে আমার জীবনে আসিয়া হাজির হইয়াছিল। যদিও শুধু দর্শক হিসাবে ছাড়া এ গল্পের সঙ্গে আমার কোনও সংশ্রব নাই, তবু ইহা আমার মনের উপর এমন একটা গভীর দাগ কাটিয়া দিয়াছে—যাহা বোধ করি, জীবনের শেষ দিন পর্যন্ত মুছবে না।

যে লোকটার কাহিনী আজ লিপিবদ্ধ করিতে বসিয়াছি, আজ সাত দিন হইল সে হাইকোর্টের রায় মাথায় করিয়া পরলোকে যাত্রা করিয়াছে। স্মরণে রাখা সাক্ষীসাবুদ উপস্থিত করিবার আমার আর উপায় নাই। তবে সংবাদ পত্রের নথি হইতে এবং আসামীর বিচারের সময় সাক্ষীদের মুখে যে যে কথা এই গল্পে কাজে আসিতে পারে, তাহা প্রয়োজনমত ব্যবহার করিব। বিশ্বাস আমি কাহাকেও করিতে বলি না এবং নিছক গাজা বলিয়া ঠাহারা উড়াইয়া দিতে চাহেন, তাঁহাদের বিরুদ্ধে আমার কোন নালিশ নাই। আমি শুধু এইটুকুই ভাবি যে, সে লোকটা মরিবার পূর্বে নিজের দোষ-ক্ষালনের বিন্দুমাত্র চেষ্টা না করিয়াও এতগুলি অনাবশ্যক মিথ্যা কথা বলিয়া গেল কেন?

এই সময় দৈনিক সংবাদপত্র ‘কালকেতুতে, এই ঘটনার যে বিবরণ বাহির হইয়াছিল, তাহাই সর্বোগ্রহে উদ্ধৃত করিয়া দিতেছি :—

“গতকল্য বেলা প্রায় সাড়ে নয়টার সময় কলিকাতার দুর্গাচরণ ব্যানার্জীর লেনে এক কষাইয়ের দোকানে ভীষণ হত্যাকাণ্ড সম্বটিত হইয়া গিয়াছে। দোকানের মালিক গোলাম-কাদের অল্প দিনের শ্রায় যথারীতি মাংস বিক্রয় করিতেছিল। দোকানে কয়েকজন ফিরঙ্গী ও মুসলমান

খরিদার উপস্থিত ছিল। এমন সময় একজন অপরিচিত ফিরঙ্গী দোকানে প্রবেশ করিয়া কিছু গোমাংস খরিদ করিতে চাহে। তাহাকে ... যাই দোকানদার গোলাম-কাদের ভীষণ চীৎকার করিয়া মাংস কাটা ছুরি হস্তে তাহার উপর লাফাইয়া পড়ে এবং নৃশংসভাবে তাহার বুকে, পেটে, মুখে ছুরিকাঘাত করিতে থাকে। আক্রান্ত ব্যক্তি মাটিতে পড়িয়া যায়, তখন গোলাম-কাদের তাহার বুকের উপর বসিয়া এক একবার ছুরিকাঘাতের সঙ্গে সঙ্গে বলিতে থাকে,—‘ভান্সো-ডা-গামা, এই আমার স্ত্রীর জন্ত—এই আমার কন্যার জন্ত—এই আমার বৃদ্ধ পিতার জন্ত।’ দোকানে যাহারা ছিল সকলেই এই লোমহর্ষণ কাণ্ড দেখিয়া দ্রুত পলায়ন করিয়া পুলিশে খবর দেয়। পুলিশ আসিয়া যখন গোলাম-কাদেরকে গ্রেপ্তার করিল, তখনও সে মৃত দেহের উপর ছুরী চালাইতেছে ও পূর্ববৎ বকিতেছে।

সন্দেহ হয় যে, গোলাম-কাদের হঠাৎ পাগল হইয়া গিয়াছে। কারণ, হত ব্যক্তির সহিত পূর্ব হইতে তাহার পরিচয় ছিল বলিয়া জানা যাইতেছে না এবং তাহার স্ত্রী, কন্যা বা বৃদ্ধ পিতা কেহই বর্তমান নাই। অনুসন্ধানে জানা গিয়াছে যে, গোলাম-কাদের প্রায় পনের বৎসর পূর্বে বিপত্নীক হইয়াছিল। তাহার স্ত্রী এক মৃত কন্যা প্রসব করিয়া মৃত্যুমুখে পতিত হয়। তাহার পর সে আর বিবাহ করে নাই।

পুলিশ-তদন্তে বাহির হইয়াছে যে, হত ব্যক্তি গোয়া হইতে নবাগত এক জন পর্তুগীজ ফিরঙ্গি ব্যবসায় উপলক্ষে কয়েকদিন পূর্বে কলিকাতায় আসিয়া এক ক্ষুদ্র হোটেলে বাস করিতেছিল। তাহার নাম গেব্রিয়েল ডিরোজা।

গোলাম কাদের এখন হাজতে আছে। ডিরোজার লাস পরীক্ষার জন্ত ইমপাতালে প্রেরিত হইয়াছে।”

ঘটনাস্থলের খুব কাছেই আমার বাড়ী এবং অনেকদিন হইতে এই

গোলাম-কাদের লোকটার সহিত আমার মুখচেনাচিনি ছিল বলিয়াই ব্যাপারটা বেশী করিয়া আনাকে আকৃষ্ট করিয়াছিল। তাহা ছাড়া আর একটি জিনিস আমার কোঁতুহল উদ্ভিক্ত করিয়াছিল, সেটা ভাস্কো-ডা-গামার নাম। ছেলেবেলা হইতেই আমি ইতিহাসের ভক্ত, তাই ইঠাং কষাইখানার হত্যাকাণ্ডের মধ্যে এই ইতিহাস-প্রসিদ্ধ নামটা উঠিয়া পড়ায় আমার মন সচকিত ও উত্তেজিত হইয়া উঠিয়াছিল। ‘ভাস্কো-ডা-গামা’ সাধারণ প্রচলিত নাম নহে; একজন অশিক্ষিত মুসলমান কষাইয়ের মুখে এ নাম এমন অবস্থায় উচ্চারিত হইতে দেখিয়া কোন্ এক গুপ্ত ‘রোমান্সের’ গন্ধে আমার মনটা ভরিয়া উঠিয়াছিল। কি অদ্ভুত রহস্য এই বিশী হত্যাকাণ্ডের অন্তরালে প্রচ্ছন্ন হইয়া আছে? কে এই গেব্রিয়েল ডিরোজা—যাহাকে হত্যাকারী ভাস্কো-ডা-গামা বলিয়া সম্বোধন করিল? সত্যিই কি ইহা কেবলমাত্র এক বাতুলের দায়িত্বহীন প্রলাপ?

তা সে যাহাই হউক, কোঁতুহল আমার এতই বাড়িয়া গিয়াছিল যে, যে দিন এই মোকদ্দমা করোনারের কোর্টে উঠিল, সেদিন আমি একটু সকাল সকাল আদালতে গিয়া হাজির হইলাম। করোনার তখনও উপস্থিত হন নাই; কিন্তু আসামীকে আনা হইয়াছে। চারিদিকে পুলিশ গিশ্-গিশ্ করিতেছে। আসামীর হাতে হাতকড়া—একটি টুলের উপর চুপ করিয়া বসিয়া আছে। আমাকে দেখিয়া সে চিনিতে পারিল এবং হাত তুলিয়া সেলাম করিল। পাগলের লক্ষণ কিছুই দেখিলাম না, নিতান্ত সহজ মানুষের মত চেহারা। মুখে ভয় বা উৎকর্ষার কোনও চিহ্নই নাই। দেখিয়া কে বলিবে, এই লোকটাই দুইদিন আগে এমন নির্দয়ভাবে আর একটা লোককে হত্যা করিয়াছে।

করোনার আসিয়া পড়িলেন। তখন কাজ আরম্ভ হইল। প্রথমেই ডাক্তার আসিয়া এজাহার দিলেন। তিনি বলিলেন, লাসের গায়ে সর্পশুক্র

সাতারটি ছুরিকাঘাত পাওয়া গিয়াছে। এই সাতারটির মধ্যে কোন্টী মৃত্যুর কারণ, বলা শক্ত। কারণ, সবগুলিই সমান সাংঘাতিক।

ডাক্তারের জবানবন্দি শেষ হইলে জর্জ ম্যাথুস নামক একজন দেশী খৃষ্টানকে সাক্ষী ডাকা হইল। অত্যাশ্চর্য্য সওয়াল জবাবের পর সাক্ষী কহিল,—“আমি গত দশ বৎসর প্রায় প্রত্যহ গোলাম-কাদেরের দোকানে মাংস কিনিয়াছি। কিন্তু কোনও দিন তাহার এক্রপ ভাব দেখি নাই। সে স্বভাবতঃ বেশ শান্ত শিষ্ট লোক।”

প্রশ্ন—আপনার কি মনে হয়, সে যেসময় হত ব্যক্তিকে আক্রমণ করে, সে সময় সে স্বাভাবিক অবস্থায় ছিলনা ?

উত্তর—হতব্যক্তি দোকানে প্রবেশ করিবার আগে পর্য্যন্ত সে স্বাভাবিক অবস্থায় ছিল—আমাদের সঙ্গে সহজভাবে কথাবাত্তা কহিতেছিল। কিন্তু ডিরোজাকে দেখিয়াই একেবারে যেন পাগল হইয়া গেল।

প্রশ্ন—আপনার কি বোধ হয়, আসামী হত ব্যক্তিকে পূর্ক হইতে চিনিত ?

উত্তর—হ্যাঁ। কিন্তু তাহার আসল নাম না বলিয়া ভাস্কো-ডা-গামা বলিয়া ডাকিয়াছিল।

প্রশ্ন—ডিরোজা আক্রান্ত হইয়া কোন কথা বলিয়াছিল ?

উত্তর—না।

প্রশ্ন—আসামী মদ বা অস্ত্র কোনও নেশা করে, আপনি জানেন ?

উত্তর—আমি কখনও তাহাকে নেশা করিতে বা মাতাল হইতে দেখি নাই।

প্রশ্ন—আসামীর ভাবে ইঙ্গিতে কি আপনার বোধ হইয়াছিল যে, সে 'প্রতিহিংসা চরিতার্থ' করিবার জন্য ডিরোজাকে খুন করিতেছে ?

উত্তর—হাঁ। তাহার কথায় ও মুখের ভাবে আমার মনে হইয়াছিল যে, ডিরোজা পূর্বে তাহার স্ত্রী কথা ও রক্ত পিতার উপর কোনও অত্যাচার করিয়া থাকিবে।

জজ্জ' ম্যাথুসের পরে আরও কয়েকজন সাক্ষী প্রায় ঐ মর্মে এজেহার দিবার পর পুলিশের ডেপুটি কমিশনার এজেহার দিতে উঠিলেন। তিনি বলিলেন যে, গোয়া হইতে খবর পাইয়াছেন যে, ডিরোজা সেখানকার এক জন ক্ষুদ্র ব্যবসায়ী, জাতিতে ফিরিঙ্গি পৰ্তুগীজ্,—বয়স বিয়াল্লিশ বৎসর। সে পূর্বে কখনও গোয়া ছাড়িয়া অত্র য়াই নাই—জীবনে এই প্রথম কলিকাতায় পদার্পণ করিয়াছিল। আসামী সম্বন্ধে ডেপুটী কমিশনার বলিলেন,—আসামীর আত্মীয়-স্বজন স্ত্রী-পুত্র পরিবার কেহ নাই, অন্তঃসন্ধান জানা গিয়াছে যে, গত ত্রিশ বৎসরের মধ্যে সে কলিকাতা ছাড়িয়া কোথাও যায় নাই। তাহার বয়স অন্ত্যমান সাতচল্লিশ বৎসর। স্বতরাং ডিরোজার সহিত তাহার যে পূর্বে কখনও দেখা-সাক্ষাৎ হইয়াছিল, তাহা সম্ভব বলিয়া বোধ হইতেছে না।

আসামী এতক্ষণ চুপ করিয়া দাঁড়াইয়াছিল। এবার সে কথা কহিল; বলিল, 'ভা-গামাকে আমি অনেকবার দেখিয়াছি।'

মূহূর্ত্তমধ্যে ঘর একেবারে নিস্তব্ধ হইয়া গেল। করোনার ডেপুটী কমিশনারকে চুপ করিতে ইঙ্গিত করিয়া আসামীকে জিজ্ঞাসা করিলেন,—
'তুমি ডিরোজাকে পূর্বে হইতে জান ?'

আসামী।—ডিরোজাকে আমি কখনও দেখি নাই—আমি ভাস্কো-ভা-গামাকে চিনি। ভাস্কো-ভা-গামা ছদ্মবেশে আমার দোকানে মাংস কিনিতে আসিয়াছিল।

করোনার তীক্ষ্ণ দৃষ্টিতে আসামীর দিকে চাহিয়া বলিলেন,—'আচ্ছা' ভাস্কো-ভা-গামাকে তুমি কোথায় দেখিয়াছ ?'

আসানী কহিল,—‘প্রথম দেখি কালিকটের বন্দরে—শেষ দেখি সমুদ্রের বুকের উপর—’ এই পর্য্যন্ত বলিয়া আসামী হঠাৎ থামিয়া গেল। দেখিলাম, তাহার মুখ-চোখ লাল হইয়া উঠিয়াছে, মুখ দিয়া কথা বাহির হইতেছে না। সে অবরুদ্ধকণ্ঠে একবার ‘ইয়া খোদা’ বলিয়া দুই হাতে মুখ গুঁজিয়া বসিয়া পড়িল—আর কোনও কথা বলিল না।

তারপর করোনার যথাসময় রায় দিলেন যে, “ক্ষণিক উন্নততার বশে গোলাম-কাদের ডিরোজাকে খুন করিয়াছে।”

কোর্ট হইতে যখন বাহিরে রাস্তায় আসিয়া দাঁড়াইলাম, তখন আমার মাথার ভিতর ঝাঁ-ঝাঁ করিতেছে। ‘কালিকট’ ‘সমুদ্রের বুকের উপর’ আসামী এ সব কি বলিল? আরও কত কথা, না জানি কোন্ অপূর্ণ কাহিনী এই মূখ নিরঙ্কর কসাই গোলাম-কাদেরের বুকের মধ্যে লুকানো আছে। কারণ, সে যে পাগলামীর ভাগ করিতেছে না, তাহা নিঃসন্দেহ। কোনও কথা বা কাজই তাহার পাগলের মত নহে। অথচ দুই একটা অসংলগ্ন কথার ভিতর দিয়া অতীতের পর্দার একটা কোণ তুলিয়া ধরিয়া এ কি এক আশ্চর্য রূপকথার ইঙ্গিত দিয়া গেল!

ইহার পর গোলাম-কাদেরের ভাগ্যে যাহা যাহা ঘটিয়াছিল, তাহা বিস্তারিতভাবে বলিবার কোনও প্রয়োজন দেখিতেছি না। দায়রা-সোপর্দ হইয়া মামলা হাইকোর্টে উঠিলে হাইকোর্টের জজবাহাদুর গোলাম-কাদেরকে একমাস ডাক্তারের নজরবন্দীতে থাকিবার হুকুম দিলেন। এক মাস পরে ডাক্তারের রিপোর্ট আসিল—গোলাম-কাদের সুস্থ সহজ, মানুষ, পাগলামীর চিহ্নমাত্র তাহার মধ্যে নাই। তার পর বিচার। বিচারে গোলাম-কাদের নির্জের উকীলের পরামর্শ অগ্রাহ করিয়া স্পষ্ট ভাষায় বলিল,—“আমি খুন করিয়াছি, সে জন্য বিন্দুমাত্র

হুংখিত বা অহুতপ্ত নই। আবার যদি তাহার সহিত দেখা হয়, আবার তাহাকে এমনই ভাবে হত্যা করিব।” হাইকোর্ট নিরুপায় হইয়া তাহার ফাঁসীর হুকুম দিলেন।

আমি শেষ পর্য্যন্ত আদালতে উপস্থিত ছিলাম। গোলাম-কাদেরের জীবননাট্যে বিচারের অঙ্কটা শেষ হইয়া গেলে একটা নিশ্বাস ফেলিয়া বাহিরে আসিয়া দাঁড়াইলাম। বিচারে তাহার মুক্তির প্রত্যাশা কোন দিনই করি নাই, কিন্তু তবু অকারণে মনটা অত্যন্ত খারাপ হইয়া গেল। বুকের নিভৃত স্থানে যেন একটা সংশয় লাগিয়াই রহিল, যে, এ স্তবিচার হইল না, কোথায় যেন কি একটা অত্যন্ত জরুরী প্রমাণ বাদ পড়িয়া গেল।

এই সব নানা কথা ভাবিতেছি, এমন সময় কয়েক জন পুলিশের লোক আসামীকে বাহিরে লইয়া আসিল। আমি গোলাম-কাদেরের মুখের দিকে চাহিতেই সে ইসারা করিয়া আমাকে কাছে ডাকিল। তারপর গলা নামাইয়া বলিল, “বাবুজী আপনি আমার মকদ্দমার স্বরূপ হইতে শেষ পর্য্যন্ত আছেন, তাহা আমি দেখিয়াছি। আমি ত চলিলাম, আমার একটি শেষ আর্জি আছে—একবার জেলে আমার সঙ্গে সাক্ষাৎ করিবেন, আমার কিছু বলিবার আছে।”

আমি বলিলাম, “নিশ্চয় করিব।”

গোলাম-কাদের হাতকড়া-বাঁধা দুই হাত তুলিয়া আমাকে সেলাম করিয়া জেলের গাড়ীতে চড়িয়া চলিয়া গেল।

তার পর কি করিয়া কর্তৃপক্ষের অনুমতি লইয়া জেলে তাহার সহিত দেখা করিলাম, সে বিবৃতি এখানে অনাবশ্যক। শুধু কন্ডেমন্ড আসামীর কক্ষে বসিয়া মৃত্যুর ‘দুই দিন’ পূর্বে সে আমাকে যে গল্প বলিয়াছিল, তাহাই বাংলাভাষায় অনূদিত করিয়া আনুপূর্ব্বিক উদ্ধৃত করিতেছি।

গোলাম-কাদের বলিল, “বাবুজী, আমার এই কাহিনী আপনি বিশ্বাস করুন আর নাই করুন, আমি যে পাগল নই আমার এই কথাটি আপনি অবিশ্বাস করিবেন না। সত্য কথা বলিতে কি, আমার কাছেও ইহা এক অদ্ভুত ব্যাপার। আমি কিতাব পড়ি নাই, আজীবন মাংস বিক্রয় করিয়াছি। গল্প বানাইয়া বলিবার শক্তি আমার নাই। যাহা আজ বলিব, তাহা আমি নিজে প্রত্যক্ষ করিয়াছি বলিয়াই বলিব। অথচ এ সকল ঘটনা আমার—এই গোলাম-কাদেরের জীবনে যে ঘটে নাই, তাহাও নিশ্চিত। আপনাকে কেমন করিয়া বুঝাইব জানি না, আমি মুর্থ লোক। শুধু এইটুকু বলিতে পারি যে, ইহা আজিকার ঘটনা নয়, বহু বহু যুগের পুরাতন।

তবে স্মরণ হইতেই কথাটা বলি। পনের-ষোল বৎসর পূর্বে আমার স্ত্রী এক কণ্ঠা প্রসব করিতে গিয়া মারা যায়, মেয়েটিও মারা গেল। কি করিয়া জানি না, আমার মনের মধ্যে বন্ধমূল হইয়া গেল যে, কোনও দুঃখময় আমার স্ত্রী-কণ্ঠাকে নিষ্ঠুরভাবে হত্যা করিয়াছে। শোকের অপেক্ষা ক্রোধ ও প্রতিহিংসায় আমার অন্তঃকরণ অধিক পূর্ণ হইয়া উঠিল; সর্বদাই মনে হইত, যদি সেই অজ্ঞাত দুঃখময়টাকে পাই, তাহা হইলে তাহার প্রতি অঙ্গ ছিঁড়িয়া ছিঁড়িয়া ইহার প্রতিশোধ লই।

এই ভাবে কিছুদিন কাটিবার পর ক্রমে বুঝিতে পারিলাম যে, ইহা আমার ভ্রান্তি—সত্যের উপর ইহার কোনও প্রতিষ্ঠা নাই। তার পর যত দিন কাটিতে লাগিল, আস্তে আস্তে শোক এবং ক্রোধ দুই ভুলিতে লাগিলাম। কিন্তু আর বিবাহ করিতে পারিলাম না। শেষ পর্য্যন্ত হয় ত জীবনটা আমার এমনই সহজভাবে কাটিয়া যাইত, যদি না সে দিন অতঃক্ষেপে সেই লোকটা আমার দোকানে পদার্পণ করিত।

উনিয়াছি, মানুষ জলে ডুবিবে তাহার বিগত জীবনের সমস্ত ঘটনা

ছবির মত চোখের পর্দার উপর দেখিতে পায়। এই লোকটাকে দেখিবামাত্র আমারও ঠিক তাহাই হইল। এক মুহূর্তের মধ্যে চিনিয়া লইলাম—এই সেই নুশংস রাক্ষস, যে আমার স্ত্রী-কন্যা এবং পিতাকে হত্যা করিয়াছিল। ছবিত মত সে সকল দৃশ্য আমার চোখের উপর জাগিয়া উঠিল। মজ্জমান জাহাজের উপর সেই মরণোন্মুখ অসহায় যাত্রীদের হাহাকার কাণে বাজিতে লাগিল। ভাস্কো-ডা-গামার সেই ক্রুর হাসি আবার দেখিতে পাইলাম।

আমার জঙ্ঘমােহবর হত্যার কারণ খুঁজিতেছিলেন, কৈফিয়ৎ চাহিতেছিলেন। বাবুজী, আমি কি কৈফিয়ৎ দিব, আর দিলেই বা তাহা বৃদ্ধিত কে ?

আপনি হয় ত বুঝিবেন। আপনার চোখে মুখে আমি তাহার পরিচয় পাইয়াছিলাম, তাই আপনাকে এই কষ্ট দিয়াছি। ইহাতে ফল কিছু হইবে না জানি কিন্তু আমার হৃদয়ভার লাঘব হইবে ; এ ছাড়া আমার অন্ত সার্থ্য নাই।

আমার এই কশাট-জীবনের ইতিহাসটা এখানেই শেষ করিতেছি। এবার যাহার কথা আরম্ভ করিব, তাহার নাম মির্জা দাউদ বিন্ গোলাম সিদ্দীকী। আমিই যে এই মির্জা দাউদ, তাহা এখন ভুলিয়া যান। মনে করুন, ইহা আর কাহারও জীবনের কাহিনী।

*

*

*

কালিকটের নাম আপনি শুনিয়া থাকিবেন। মালাবার উপকূলে অতি সুন্দর মহার্ঘ মণিখণ্ডের মত একটি ক্ষুদ্র নগর। মোরগের ডাক যতদূর শুনা যায়, "ততদূর" তাহার নগর-সীমানা। নগরের পশ্চাতে ছোট ছোট পাহাড় উপত্যকা, কঙ্করপূর্ণ সমতল ক্ষেত্র, এবং তাহার পশ্চাতে

অব্রভেদী পশ্চিমঘাট সমস্ত পৃথিবী হইতে যেন এই স্থানটুকুকে পৃথক করিয়া ঘিরিয়া রাখিয়াছে সম্মুখে অপার সমুদ্র ভিন্ন কালিকটে প্রবেশ বা নিষ্কর্ষণের অল্প স্বগম পথ নাই। এই সমুদ্রপথে অসংখ্য বাণিজ্যতরণী কালিকটের বন্দরে প্রবেশ করে, আবার পাল তুলিয়া সমুদ্রে বিলীন হইয়া যায়। কালিকট যেন পৃথিবীর সমগ্র বণিক-সমাজের মোসাক্ষিগৃহ।

পীতবর্ণ চৈনিক, তাম্রবর্ণ বাঙালী, লোহিতবর্ণ পারসীক ও কৃষ্ণবর্ণ মূর—সকলেই কালিকটের পথে সমান দর্পে পা ফেলিয়া চলে, কেহ কাহারও অপেক্ষা হীন নহে। চীন হইতে লাক্ষা, দারুশিল্প ; বঙ্গ হইতে গজদন্ত ; মলয়দ্বীপ হইতে চন্দন ; বঙ্গ হইতে ক্ষৌম পটুবস্ত্র, মলমল, ব্যাঘ্রচর্ম ; চম্পা ও মগধ হইতে চামর, কস্তুরী, চাকুকেশরার পুষ্পবীজ ; দাক্ষিণাত্য হইতে অগুরু, কপূর, দারুচিনি ; লঙ্কা হইতে মুক্তা আসিয়া কালিকটে স্তূপীভূত হয়। পশ্চিম হইতে তুরস্ক, পারসীক, আরব ও মূর সওদাগর তাহাই স্বর্ণের বিনিময়ে ক্রয় করিয়া জাহাজে তুলিয়া, কেহ বা পারস্যোপসাগরের ভিতর দিয়া ইউফ্রাটেস্ নদের মোহনায় উপস্থিত হয়, কেহ বা লোহিত সাগরের উত্তরপ্রান্তে নীলনদের সন্নিকটে গিয়া তরণী ভিড়ায়। তথা হইতে প্রাচীর পণ্য সমগ্র পাশ্চাত্যপথে ছড়াইয়া পড়ে। কালিকটের রাজা 'সামরী' বাণিজ্যতরণীর শুদ্ধ আদায় করিয়া রাজ্যের ব্যয়ভার নির্বাহ করেন। রাজকোষ সর্বদা স্বর্ণ-মণিমাণিক্যে পূর্ণ। রাজ্যে কোথাও দৈন্য নাই, অশান্তি নাই, অসন্তোষ নাই, ইতর-ভদ্ৰ সকলেই স্থখী।

মির্জা দাউদ এই কালিকটের এক জন সম্ভ্রান্ত বাবসায়ী। তাঁহার ঐকুশখানি বাণিজ্যতরী আছে,—হোয়ংহো হইতে নীলনদের প্রান্ত পয্যন্ত তাহাদের গতিবিধি। যখন এই তরণী সকল শুভ্র পাল তুলিয়া শ্রেণীবদ্ধ

ভাবে সমুদ্রযাত্রায় বাহিত হয়, তখন মনে হয়, রাজহংসশ্রেণী পক্ষবিস্তার করিয়া নীল আকাশে ভাসিয়া চলিয়াছে।

মির্জাদাউদ জাতিতে মূর। কালিকটে তাঁহার শ্বেত-প্রস্তরের প্রাসাদ—মূরপ্রথায় নিম্নিত। সুদূর মরক্কো দেশে এখনও তাঁহার বৃদ্ধ পিতা বর্তমান : কিন্তু তিনি কালিকটকেই মাতৃভূমিতে বরণ করিয়াছেন। অনেক বৈদেশিক সওদাগরই একরূপ করিয়া থাকেন। মির্জা দাউদ ধর্ম্মে মুসলমান হইলেও একপত্নীক। সম্প্রতি চৌত্রিশ বৎসর বয়সে প্রথমে একটি কন্যা জন্মিয়াছে। কন্যার জন্মদিনে মির্জা দাউদ এক মহাশ্র তোলা স্বর্ণ বিতরণ করিয়াছেন—তার পর তাঁহার গৃহে সম্ভ্রাহবাপী উৎসব চলিয়াছিল। নগরে পল্ল পল্ল পড়িয়া গিয়াছিল।

বস্তুতঃ মির্জা দাউদের মত সর্বজনপ্রিয় বহু-সম্মানিত ব্যক্তি নগরে আর দ্বিতীয় নাই। উচ্চ-নীচ, ধনি-নিধনি সকলেই তাঁহাকে শ্রদ্ধা ও সম্মান করে। স্বয়ং রাজা সামরী তাঁহাকে বক্রুর মধ্যে গণ্য করেন। এ দিকে ব্যবসায়ে দিন দিন অধিক অর্থাগম হইতেছে। মাস্তুম পৃথিবীতে যাহা কিছু পাইলে স্থখী হয়, কিছুই তাঁহার অভাব নাই।

এক দিন গ্রীষ্মের সায়াকে পশ্চিম দিগ্ধলয় রঞ্জিত করিয়া সূর্য্যাস্ত হইতেছে। সমুদ্রের জল যতদূর দৃষ্টি যায়, রাঙা হইয়া টলটল করিতেছে। দূর লাক্ষাদ্বীপ হইতে স্নগন্ধ বহন করিয়া স্নিগ্ধ বায়ু বহিতে আরম্ভ করিয়াছে। আকাশ মেঘ-নিম্মুক্ত।

সমস্ত দিন গরম ভোগ করিয়া নগরের নরনারী শীতল বায়ু সেবন করিবার জন্য এই সময় বন্দরের ঘাটে আসিয়া জমিয়াছে। বহুদূর পথান্ত বিস্তীর্ণ অর্ধচন্দ্রাকৃতি ঘাট—বড় বড় চতুষ্কোণ পাথর দিয়া বাঁধান। পাথরের উপর সারি সারি জাহাজ বাঁধবার লোহার কড়া। জোয়ারের সময় সমুদ্রের জল উক্ত ঘাটের কানায় কানায় ভরিয়া উঠে, আবার ভাটার সময় সিক্ত

বালুকারাশি মধ্যে রাখিয়া দূরে সরিয়া যায়। এই ঘাটই নগরের কৰ্মক্ষেত্র। ক্রয়-বিক্রয়, দরদস্তুর, আমোদ-প্রমোদ সমস্তই এই স্থানে অনুষ্ঠিত হয়। তাই সকল সময় এখানে মানুষের ভিড়।

সে সময় ঘাটে একটিও নবাগত কিস্বা বহির্গামী বানিজ্যতরী ছিল না। কাজকৰ্ম কিছু শিথিল। নাগরিকগণ নানা বিচিত্র বেশ পরিধান করিয়া কেহ সঙ্গীক সপুত্রকন্যা পদচারণ করিতেছে, কেহ উচ্চৈঃস্বরে গান ধরিয়াছে। চঞ্চলগতি কিশোরগণ ছুটাছুটি করিয়া খেলা করিতেছে; আবার কেহ বা ঘাট হইতে সমুদ্রের জলে লাফাইয়া পড়িয়া সন্তরণ করিতেছে।

চীনদেশীয় এক বাজীকর নানা প্রকার অদ্ভুত খেলা দেখাইতেছে। জনতার মধ্য হইতে মাঝে মাঝে উচ্চ হাসির রোল উঠিতেছে।

বাজীকর একজন স্থলকায় প্রোট সিংহলীকে ধরিয়া তাহার কানের মধ্যে দৃষ্টিপাত করিয়া বলিল, ‘তোমার মাথার মধ্যে ২৫৬টি পাথরের হুড়ি রহিয়াছে, বলত বাহির করিয়া দিই।’ অমনিই জমতা সোল্লাসে চীৎকার করিয়া উঠিল, ‘বাহির কর, বাহির কর।’ তখন বাজীকর ক্ষিপ্ৰহস্তে ক্ষুদ্র চিম্টা দিয়া তাহার কর্ণ হইতে স্থপারীর মত বড় বড় অসংখ্য পাথর বাহির করিয়া মাটিতে স্তূপীভূত করিল। প্রোট সিংহলী বিস্ময়ে বিহ্বল হইয়া চক্ষু বিস্ফারিত করিয়া তাহা দেখিতে লাগিল। ভারি হাসির একটা ধুম পড়িয়া গেল। একজন পরিহাস করিয়া বলিল,— ‘শেঠ, তোমার মাথা যে এত নিরেট, তাহা জানিতাম না।’

ক্রমে সূর্য্য অস্তমিত হইল। সমুদ্রের গায়ে সীসার রং লাগিল। দিগন্তরেখার যে স্থানটায় সূর্য্য অস্ত গিয়াছিল, তাহাকে কেন্দ্র করিয়া সন্ধ্যার রক্তিমভা ধীরে ধীরে সঙ্কুচিত হইয়া আসিতে লাগিল।

এমন সময় দূর সমুদ্রবক্ষে সেই রক্তমাভার সম্মুখে তিনটি কৃষ্ণবর্ণের ছায়া আবির্ভূত হইল। সকলে দেখিল, তিনখানি জাহাজ বন্দরের মধ্যে প্রবেশ করিতেছে।

তখন, জাহাজ কোথা হইতে আসিতেছে, কাহার জাহাজ, ইহা লইয়া ঘাটের দর্শকদিগের মধ্যে তর্ক চলিতে লাগিল। কেহ বলিল, আরবী জাহাজ, কেহ বলিল চীনা। কিন্তু অন্ধকার ঘনাইয়া আসিতেছিল—কোন দেশীয় জাহাজ, নিশ্চয়রূপে কিছু বুঝা গেল না।

মির্জা দাউদ ঘাটে ছিলেন। তিনি বহুক্ষণ একদৃষ্টে সেই জাহাজ তিনটির প্রতি চাহিয়া রহিলেন। ক্রমে তাঁহার মূখে উদ্বেগের চিহ্ন দেখা দিল। তিনি অশ্রুটস্বরে কহিলেন,—‘পুর্ন্তু গীজ জাহাজ!—কিন্তু ফিরিঙ্গি কোন্ পথে আসিল?’

তার পর গগন প্রান্তে দিবা-দীপ্তি নিভিয়া যাইবার সঙ্গে সঙ্গে তিনটি জীর্ণ সিদ্ধবিশ্বস্ত ক্ষুদ্র পোত ছিন্ন পাল নামাইয়া কালিকটের বন্দরে আসিয়া ভিড়িল।

পরদিন প্রভাতে সূর্যোদয়ের সঙ্গে সঙ্গে মির্জা দাউদ বন্দরে উপস্থিত হইলেন। দেখিলেন—কয়েকজন বিদেশীকে ঘিরিয়া ভারী ভিড় জমিয়া গিয়াছে। ফিরিঙ্গিগণ অপরিচিত ভাষায় কি বলিতেছে, কেহই বুঝিতেছে না এবং প্রত্যুত্তরে নানা দেশীয় ভাষায় তাহাদের প্রশ্ন করিতেছে। মির্জা দাউদ ভিড় ঠেলিয়া তাহাদের সম্মুখীন হইলেন। তাঁহাকে আসিতে দেখিয়া সকলে সম্মানে পথ ছাড়িয়া দিল।

আগন্তুকদিগের মধ্যে একজন বলিল,—‘এখানে পোর্্তুগীজ ভাষা বুঝে, এমন কেহ কি নাই? আমি জামোরিণের সহিত সাক্ষাৎ করিতে চাই—দোভাষী খুজিতেছি।’

মির্জা দাউদ দেখিলেন, বক্তা শালপ্রাণ্ড বিশালদেহ এক পুরুষ।

তপ্ত কাঞ্চনের ত্রায় বর্ণ, দীর্ঘ স্বর্ণাভ কেশ এবং হ্রস্ব সূচ্যগ্র শ্মশ্রুমণ্ডিত মুখমণ্ডল। উদ্বীর্ণ সোণার জরীর কাজ করা অতি মূল্যবান্ মখমলের অঙ্গরঙ্গা, কটি হইতে 'জানু পর্য্যন্ত ঐ মখমলের জাঙ্গিয়া এবং জানু হইতে নিম্নে পদদ্বয় চর্ম্মনির্ম্মিত থাকে আবৃত। মস্তকে টুপীর উপর কঙ্কপত্র বক্রভাবে অবস্থিত; এই পুরুষের সহিত অণু পাঁচ ছয় জন যাহারা রহিয়াছে, তাহারাও প্রায় অনুরূপ বেশধারী। সকলের কটিবন্ধে তরবারি।

মির্জা দাউদ এই প্রধান পুরুষের আপাদ-মস্তক নিরীক্ষণ করিয়া গম্ভীর স্বরে কহিলেন,—‘আমি পোর্্তুগীজ ভাষা বুঝি।’

নবাগত কিছুক্ষণ স্থিরদৃষ্টিতে মির্জা দাউদের মুখের প্রতি চাহিয় রহিল। তাহার মুখ অন্ধকার হইল। সে ধীরে ধীরে কহিল,—‘তুমি দেখিতেছি মূর!’

এই তিনটি শব্দের অন্তর্নিহিত যে সূতীক্ষ্ণ ঘৃণা, তাহা মির্জা দাউদকে বিদ্ধ করিল। তিনিও মনোগত বিদ্বেষ গোপন করিবার চেষ্টা না করিয়া কহিলেন ‘হাঁ, আমি মূর। তোমরা দেখিতেছি পোর্্তুগীজ—জলদস্থ্য : তোমাদের সহিত পরিচয় আমার প্রথম নহে, কিন্তু ফিরিঙ্গির সঙ্গে আমাদের সম্ভাব নাই।’

এতক্ষণে দ্বিতীয় একজন পোর্্তুগীজ কথা কহিল। তাহার বয়স অল্প, উদ্বীর্ণ কণ্ঠে বলিল,—‘মূর-কুকুরের সহিত আমরা সম্ভাব রাখি না—মূরের উচ্ছেদ করাই আমাদের ধর্ম্ম।’

নিমেষ মধ্যে মির্জা দাউদের কটি হইতে ছুরিকা বাহির হইয়া আসিল, দুই চক্ষু জলিয়া উঠিল। কিন্তু পরক্ষণেই আগন্তুকদিগের প্রধান ব্যক্তি হাঁত তুলিয়া তাহাকে নিরস্ত করিল। বিনীতস্বরে কহিল,—‘মহাশয়, আমার এই স্পর্ধিত সঙ্গীকে ক্ষমা করুন। আপনি মূর এবং আমরা

পোর্তুগীজ বটে ; কিন্তু আমরা উভয়েই ব্যবসায়ী, জলদস্যু নহি। অগত্যা যাই হোক, এখানে আমার সহিত আপনাদের বিবাদ নাই। বরঞ্চ আপনার ক্ষমতা লাভ করিলেই আমরা কৃতার্থ হইব।’ তারপর নিজ সম্মুখ দিকে ফিরিয়া বলিল,—‘পেড্রো, আর কখনও যদি তোমার মুখে একুপ কথা শুনিতে পাই, তোমার প্রত্যেক অস্থি চাকায় ভাঙ্গিয়া তারপর ডালকুন্ডা দিয়া খাওয়াইব।’

ভয়ে পেড্রোর মুখ পীতবর্ণ হইয়া গেল। কিন্তু তথাপি সে কম্পিত বিদ্রোহের কণ্ঠে কহিল,—‘আমি সত্য কথা বলিতে ভয় করি না। মরমাত্রই আমাদের ঘৃণার পাত্র। আপনি নিজেও ত মরকে—’তাহার কথা শেষ হইবার পূর্বেই প্রথম ব্যক্তি বিদ্যাতের মত দুই হাত বাড়াইয়া তাহার কণ্ঠ চাপিয়া ধরিল। বজ্রমুষ্টিতে নিঃশব্দে কিছুক্ষণ তাহার কণ্ঠনালী চাপিয়া থাকিবার পর ছাড়িয়া দিতেই পেড্রো হতজ্ঞান হইয়া মাটিতে পড়িয়া গেল। তাহার প্রতি আর দৃকপাত না করিয়া প্রথম ব্যক্তি মির্জা দাউদের দিকে ফিরিয়া ঈষৎ হাস্তে কহিল,—‘মিথ্যাবাদীর দণ্ডদান ধার্মিকের কর্তব্য। এখন দয়া করিয়া আমার সহিত জামোরিণের নিকট গিয়া আমার নিবেদন তাঁহাকে বুঝাইয়া দিলে আপনার নিকট চিরকৃতজ্ঞ রহিব।’ বলিয়া মাথার টুপী খুলিয়া আভূমি লুষ্ঠিত করিয়া অভিবাদন করিল। দর্শকবৃন্দ—যাহারা পোর্তুগীজ ভাষা বুঝিল না, তাহারা অবাক হইয়া এই তুর্কোদ্য অভিনয় দেখিতে লাগিল।

মির্জা দাউদ আগন্তকের মিষ্টবাক্যে ভুলিলেন না, অটল হইয়া দাঁড়াইয়া রহিলেন। শেষে ধীরে ধীরে কহিলেন, ‘ফিরিঙ্গি’ তুমি অতি ধূর্ত। কি জন্ত সামরীর রাজ্যে আসিয়াছ, সত্য বল।’

‘বাণিজ্য করিতে।’

‘খুষ্টান, আমি তোমাদের চিনি। কলহ তোমাদের ব্যবসায়, লোভ

তোমাদের ধর্ম, পরশ্রীকাতরতা তোমাদের স্বভাব। এ রাজ্যে কলহ-বিদ্বেষ নাই—হিন্দু, বৌদ্ধ, মুসলমান, হিব্রু নির্বিবাদে শান্তিতে ব্যবসায় বাণিজ্য করিতেছে। সত্য বল, তোমরা কি উদ্দেশ্যে এই হিন্দু পদার্পণ করিয়াছ?’

ফিরিঙ্গির মুখ রক্তহীন হইয়া গেল। শুধু তাহার চক্ষুযুগল জ্বলন্ত অঙ্গারের মত নিষ্ফল ক্রোধ ও হিংসা বিকীর্ণ করিতে লাগিল। কিন্তু পরক্ষণেই আপনাকে সম্বরণ করিয়া কণ্ঠবিলম্বিত স্ববর্ণ-ক্লেশ হস্তে তুলিয়া বলিল, ‘এই ক্লেশ স্পর্শ করিয়া সত্য করিতেছি—সকলের সহিত সম্ভাব রাখিয়া বাণিজ্য করা বাতীত আমাদের আর অন্য উদ্দেশ্য নাই!’

ক্ষণকাল নিশ্চেষ্টে তাহার মুখের উপর দৃষ্টি নিবদ্ধ রাখিয়া মির্জা দাউদ কহিলেন, ‘তোমার কথা বিশ্বাস করিলাম। চল, সামরীর প্রাসাদে তোমাদের লইয়া যাই।’

তখন বিদেশীরা মির্জা দাউদের অনুসরণ করিয়া রাজ-প্রাসাদ অভিমুখে চলিল। পেড়োর সংজ্ঞাহীন দেহ ঘাটের পাথরের উপর মৃতবৎ পড়িয়া রহিল।

প্রাসাদে উপস্থিত হইয়া সামরীর সম্মুখে নতজান্ন হইয়া, তাঁহার বস্ত্রপ্রান্ত চূষন করিয়া পোর্তুগীজ বণিকদিগের অধিনায়ক বলিল, ‘আমার নাম ভাস্কো-ডা-গামা—আমি পোর্তুগালের রাজদূত। আপনার নিকট কালিকটে বাণিজ্য করিবার অনুমতি প্রার্থনা করিতেছি।’ এই বলিয়া পোর্তুগাল-রাজ-প্রেরিত মহার্ষি উপঢৌকন সকল সামরীর সম্মুখে স্থাপন করিতে সঙ্গিগণকে ইঙ্গিত করিল।

* * * *

মুখে যাহাই বলুন, সন্দেহ এবং অবিশ্বাস মির্জা দাউদের অন্তর হইতে দূর হইল না। তিনি ফিরিঙ্গিকে পূর্ব হইতেই চিনিতেন—মুরমাঞেই

চিনিত। স্বদেশে বহু সংঘর্ষের ভিতর দিয়া এই পরিচয় ঘনিষ্ঠ হইয়াছিল। তাহারা জানিত যে ফিরিঙ্গি অতিশয় অর্থলিপ্সু ও ভোগলুক্ষ। ইহাদের জন্মভূমি অর্থপ্রসূ নহে : তাই অম্লের জগু ইহাদিগকে দৈহিক ও মানসিক কঠোরতার মধ্যে জীবনযাপন করিতে হয় বটে, কিন্তু এই জগুই ইহারা অপেক্ষাকৃত ধনী মুসলমানদিগকে অত্যন্ত ঈর্ষা করে। পরের উন্নতি ইহাদের চক্ষুশূল। কোথাও একবার ধনরত্ন-ঐশ্ব্যের সন্ধান পাইলে ইহাদের লালসা ও ক্ষুধা এত উগ্র, নিশ্চয় হইয়া উঠে যে, কোনও মতে সেখানে প্রবেশ লাভ করিয়া নিজেকে একবার ভালরূপে প্রতিষ্ঠিত করিতে পারিলে শত্রুমিত্রনিষ্কিচারে সকলের উপর দুর্ব্বিনীত বাহুবল, স্পর্ধা ও জুলুম প্রকাশ করিতে থাকে। ইহারা নিরতিশয় কলহপ্রিয় ও যুদ্ধনিপুণ। স্বার্থরক্ষার জগু এমন কাজ নাই যাহা ইহারা পারে না এবং স্বজাতির স্বার্থবর্দ্ধনের জগু প্রাণ পর্য্যন্ত উৎসর্গ করিতে ইহারা তিলমাত্র কুণ্ঠিত নহে।

পোর্্তুগাল হইতে সমুদ্রপথে আফ্রিকা প্রদক্ষিণ করিয়া আজ পর্য্যন্ত কেহ ভারতবর্ষে আসে নাই, এ পথ এতদিন অজ্ঞাত ছিল। ভাস্কো-ডা-গামা সেই পথ ইউরোপীয়দের জগু উন্মুক্ত করিয়া দিয়া বহু নূতন সম্ভাবনা ও দুর্ভাবনার সৃষ্টি করিল। সম্প্রতি ভাস্কো-ডা-গামার উদ্দেশ্য নিশ্চয়ভাবে বুঝা যায় না। অথচ উদ্ধৃত ও কটুভাষী পেড্রোর কঠরোদ্যম করিয়া সে যে একটা গুঢ় অভিপ্রায় গোপন করিয়া গেল, তাহাও বুঝিতে নিজের দাঁড়দের বিলম্ব হইল না। শঙ্কা ও সংশয়ের মধ্যে তাঁহার মন আচ্ছন্ন হইয়া রহিল।

পোর্্তুগীজগণ কালিকটে বাস করিতে লাগিল এবং দিন দিন নূতন পণ্যে তরঙ্গী পূর্ণ করিতে লাগিল। অতি অপদার্থ পণ্য দ্বিগুণ চতুগুণ মূল্য দিয়া কিনিতে লাগিল। ইহাতে নির্য্যোধ ব্যবসায়ীরা যতই উৎফুল্ল হউক না কেন, মিঞ্জা দাঁড়দের ত্রায় বহুদর্শী শ্রেষ্ঠদের মনে সন্দেহ ততই

ঘনীভূত হইয়া উঠিল। উচিত মূল্যের অধিক মূল্য দিয়া পণ্য ক্রয় করা ব্যবসায়ীর স্বভাব নহে, অথচ নবাগতরা ব্যবসায়ী বা নিকোঁধ নহে। এ ক্ষেত্রে বানিজ্য ছলমাত্র, অতঃ কোনও দুর্ভিক্ষ তাহাদের অন্তরে প্রজ্জ্বল আছে, ইহা অনুমান করিয়া বিচক্ষণ ব্যবসায়ীদের চিন্তা ও উৎকর্ষার অবধি রহিল না।

এইরূপে কিছুকাল বিগত হইল। কালিকটের জীবন প্রবাহ পূর্ববৎ প্রশান্তভাবে চলিতে লাগিল। একদিন শরৎকালে মেঘমাজ্জিত আকাশে শুভ্র পাল উড়াইয়া দুইটি জাহাজ বন্দরে প্রবেশ করিল। সঙ্গে সঙ্গে নগরে রাষ্ট্র হইয়া গেল যে, বঙ্গদেশ হইতে প্রভাকর শ্রেষ্ঠীর নৌকা আসিতেছে। প্রভাকর শেঠ অতি প্রসিদ্ধ বণিক—প্রতি বৎসর এই সময় লক্ষাধিক মুদ্রার বস্তাদি পণ্য বহন করিয়া তাহার তরণী কালিকটে উপস্থিত হয়। কাশ্মীরের শাল, বারাণসীর চেলী, কোশেয় পটু, বাঙালার মলমল কিনিবার জন্ত কালিকটের সুওদাগর-সমাজে হুড়াহুড়ি পড়িয়া যায়। এত সুন্দর এবং এত মূল্যবান বস্তু কেহই আনিতে পারে না, সে জন্ত প্রভাকরের এত খ্যাতি।

প্রভাকরের নৌকা ঘাটে লাগিবার পূর্বেই নগরের বড় বড় ব্যবসায়ীরা ঘাটে সমবেত হইয়াছিলেন। প্রভাকর নৌকার উপর দাঁড়াইয়া পরিচিত সকলকে নমস্কার-সম্ভাষনাদি করিতে লাগিল। সে অতিশয় বাকপটু ও রহস্যপ্রিয়, এতন্ত সকলেই তাহাকে ভালবাসিত।

হিক্র মুশা ইব্রাহিম তাহাকে ডাকিয়া বলিলেন: ‘প্রভাকর, এবার তোমার দেবী দেখিয়া আমরা ভাবিয়াছিলাম বুঝি আর আসিলে না—পথে তোমাদের সুন্দরবনের কুমীর তোমাকে পেটে পুরিয়াছে।’

প্রভাকর হাসিয়া বলিল, ‘মুশা সাহেব, পেটে পুরিলেও কুমীর আমাকে হজম করিতে পারিত না;—এই যে মিজ্জা সাহেব! আদাব আদাব

—শরীর-গতিক সব ভাল ত? এবার আপনার ফরমানী জিনিষ সমস্ত আনিয়াছি, কত লইতে পারেন দেখিব। আপনার কোমরে তলোয়ার-পানি নূতন দেখিতেছি, ডামাস্কাশের বুঝি? আমরা কিন্তু এক যোড়া চাই—গোড়েশ্বরের কাছে বাক্যদত্ত হইয়া আছি। ভাল কথা, পথে আসিতে শ্রীখণ্ডের নিকট আপনার যবদ্বীপ যাত্রী জাহাজের সঙ্গে দেখা হইয়াছিল—খবর সব ভাল। হায়দার মুস্তাফা যে, ইতিমধ্যে কয়টি সাদি করিলেন? এবার কিন্তু ইম্পাহানী আঙ্গুরের রস না খাওয়াইলে বড়ই অন্তায় হইবে।—জাম্বো, শাঁখালুর মত দাঁত বাহির করিয়া হাসিস না—দড়িটা ধর।’

নৌকা বাঁধা হইলে প্রভাকর ঘাটে নামিয়া সকলের সহিত আলিঙ্গনাদি করিল। তখন মির্জা দাউদ জিজ্ঞাসা করিলেন, ‘প্রভাকর, কি কি সওদা আনিলে?’

প্রভাকর বলিল, ‘এবার যে মলমল আনিয়াছি, মির্জা সাহেব, তেমন মলমল আজ পর্য্যন্ত কখনও চোখে দেখেন নাই। মাকড়শার জালের চেয়েও নরম, কাশফুলের চেয়েও হাল্কা—মুঠির মধ্যে দেড়শ গজ কাপড় ধরা যায়। কিন্তু এক খান কাপড়ের দাম পাঁচ তোলা সোনা, তার কমে দিতে পারিব না। কোচিনে চার তোলা পর্য্যন্ত দিতে চাহিয়াছিল—আমি লই নাই। শেষে কি লোকসান দিয়া ঘরে ফিরিব? শেঠ্‌নী তাহা হইলে আমার মুখ দেখিবে না।’

মির্জা দাউদ হাসিয়া বলিলেন, ‘তা না দেখুক। তোমার মুখ না দেখিলেও শেঠ্‌নীর কোনও লোকসান হইবে না।—এখন তোমার সওদা দেখাও।’

প্রভাকর বলিল, ‘বলেন কি মির্জা সাহেব, লোকসান হইবে না? শেঠ্‌নীর এখন যৌবনকাল, কাঁচা বয়েস; এখন স্বামীর মুগ্ধদর্শন না

করিলে জাবন-যৌবন সমস্তই লোকসান হইয়া বাইবে যে!—ভাল কথা, গতবারে শুনিয়াছিলাম, আপনার বিবি-সাহেবা না কি অসুস্থ। ত কোনও শুভ সংবাদ আছে না কি?

মিজ্জা দাউদ বলিলেন,—‘খোদার দয়ায় একটি মেয়ে হইয়াছে—’

প্রভাকর বলিল,—‘এত বড় আনন্দের সংবাদ এতক্ষণ চাপিয়া রাখিয়াছিলেন! আমাদের দেশে বলে, মেয়ে হইলে পিতার পরমায় বৃদ্ধি হয়। তাহা হইলে আজ রাত্রে আপনার দৌলতখানায় আমার নিমন্ত্রণ রহিল। দেশে কুকুটাদি ভোজনের স্তবিধা হয় না—ছুজ্জাপা ও বটে, আর ব্রাহ্মণগুলি বড়ই গগুগোল করে।—ও বাবা, এটি আবার কে? মিজ্জা সাহেব? এ রকম পোষাক-পরিচ্ছদ ত কখনও দেখি নাই। ইহারা কোথা হইতে আসিল?’

মিজ্জা দাউদ ফিরিয়া দেখিলেন, ভাস্কো-ডা-গামা দুই জন সহচর সঙ্গে সেই দিকে আসিতেছে। ইতিমধ্যে কালিকটের পথে ঘাটে দুই জনের দেখা-সাক্ষাৎ ঘটয়াছে বটে, কিন্তু কোন পক্ষেই সৌহার্দ বন্ধনের আগ্রহ দেখা যায় নাই। বরঞ্চ উভয়ে উভয়কে বথাসম্ভব এড়াইয়া চলিয়াছে।

প্রভাকরের প্রশ্নের উত্তরে মিজ্জা দাউদ কহিলেন, ‘ইহারা পোর্তুগীজ। ক্রমে পরিচয় পাইবে।’

ইত্যবসরে প্রভাকরের নোকা হইতে পণ্যসামগ্রী সকল পরিদর্শনের জন্ত ঘাটে নামানো হইতেছিল। সওদাগররা ভিড় করিয়া তাহাই দেখিতেছিলেন। মিজ্জা দাউদও সেই সঙ্গে যোগ দিলেন। অগ্নাদিক হইতে ভাস্কো-ডা-গামাও আসিয়া মিলিত হইল।

মলমলের নমুনা দেখিয়া মিজ্জা দাউদ কহিলেন, ‘অতি উৎকৃষ্ট মলমল। প্রভাকর, এ জিনিষ কত আনিয়াছ?’

প্রভাকর সগর্বে বলিল, ‘পূরা এক জাহাজ।’

দাউদ কহিলেন, ‘ভাল, আমি এক জাহাজই লইলাম। দরদামের কথা আজ রাত্রে স্থির হইবে।’

ভাস্কো-ডা-গামা এরূপ অপূর্ণ সূক্ষ্ম মলমল পূর্বে কখনও দেখে নাই। বস্তুতঃ এত মহাৰ্ষ মলমল পারস্য দেশ ভিন্ন অত্র কোথাও যাইত না। পোর্তুগাল, স্পেন, ফ্রান্স প্রভৃতি পাশ্চাত্যদেশে যাহা যাইত, তাহা অপেক্ষাকৃত নিকৃষ্ট শ্রেণীর মলমল। ডা-গামার অন্তর লুকু হইয়া উঠিল। পোপ এবং রাজা ইমানুয়েলকে নজর দিতে হইলে ইহা অপেক্ষা উৎকৃষ্ট বস্তু আর কি আছে! সে বলিল, ‘এ মলমল আমি কিনিব।’

মিজ্জা দাউদ হাসিয়া বলিলেন, ‘আর উপায় নাই। এই মলমল আমি কিনিয়াছি।’

ডা-গামা প্রভাকরের দিকে ফিরিয়া বলিল, ‘আমি অধিক মূল্য দিব।’

মিজ্জা দাউদ বলিলেন, ‘অধিক মূল্য দিলেও পাইবে না— এ মলমল এখন আমার।’

ডা-গামা সে দিকে কর্ণপাত না করিয়া প্রভাকরকে লক্ষ্য করিয়া কহিল, ‘আমি দ্বিগুণ মূল্য দিব।’

মিজ্জা দাউদ বিরক্ত হইয়া বলিলেন, ‘শতগুণ দিলেও আর পাইবে না।’

ডা-গামা বিহ্বাদ্বেগে মিজ্জা দাউদের দিকে ফিরিল। ‘কৰ্কশকণ্ঠে কহিল, ‘মূর, চুপ কর—আমি নালের মালিকের সহিত কথা কহিতেছি।’

প্রভাকর বুদ্ধিমান, মিজ্জা দাউদ তাহার পুরাতন খরিদার, অথচ এই ব্যক্তিকে সে চেনেও না। সে বলিল, ‘উনিই এখন নালের মালিক, আমি কেহ নই। উনি যদি আপনাকে বিক্রয় করিতে ইচ্ছা করেন, করিতে পারেন।’

ডা-গামার অশিষ্ট কথায় কিন্তু মির্জা দাউদের মুখ ক্রোধে কৃষ্ণবর্ণ হইয়া উঠিয়াছিল! তিনি তিক্তকণ্ঠে কহিলেন, ‘ডা-গামা, পূর্বেও বুঝিয়াছিলাম, কিন্তু আজ তোর প্রকৃত স্বরূপ ধরা পড়িল। ব্যবসায় তোর ভাণসাত্র, তুই তস্কর। নচেৎ অল্পচিত মূল্য দিয়া বাণিজ্য নষ্ট করিবি কেন?’

আহত ব্যাঘ্রের মত গজ্জন করিয়া ভাস্কো-ডা-গামা নিজ কটি হইতে তরবারি বাহির করিল। দন্তে দন্তে ঘর্ষণ করিয়া ক্রোধকষাইত নেন্ত্রে কহিল, ‘স্পদ্ধিত মূর, আজ তোর রক্তে তরবারির কলঙ্ক দ্ব্যোত করিব।’

মির্জা দাউদও তরবারি নিষ্কোষিত করিয়া কহিলেন, ‘বর্বর ফিরিঙ্গি, আজ তোকে জাহান্নমে পাঠাইব।’

মুহূর্ত্তমধ্যে ব্যগ্র জনতা চতুর্দিকে সরিয়া গিয়া মধ্যে বৃত্তাকৃতি স্থান যুযুৎসুদের জগ্ন ছাড়িয়া দিল। শান্তিপূর্ণ বাণিজ্যকেন্দ্র হইলেও এক্ষণে ব্যাপার কালিকটে একান্ত বিরল নহে। কলহ যখন তরবারি পর্য্যন্ত পৌছায়, তখন তাহা ভঞ্জন করিবার প্রয়াস যে শুধু নিফল নহে, অত্যন্ত বিপজ্জনক, তাহা কাহারও অবিদিত ছিল না। তাই সকলে সরিয়া দাঁড়াইয়া অস্ত্র দ্বারা উভয় পক্ষকে বিবাদের মীমাংসা করিবার সুবিধা করিয়া দিল।

ভাস্কো-ডা-গামা ও মির্জা দাউদ প্রথম দৃষ্টিবিনিময়েই পরস্পরকে যে বিষদৃষ্টিতে দেখিয়াছিলেন, সেই বিষ উভয়ের অন্তরে সঞ্চিত হইয়া আজ সামান্য স্ত্র হরিয়া ছুনিবার বিরোধরূপে আত্মপ্রকাশ করিল। এ কলহ যে এক জন না মরিলে নিবৃত্ত হইবে না, তাহা উভয়েই মনে মনে বুঝিলেন।

নিস্তক জনতার কেন্দ্রস্থলে অসিধারী দুই জন দাঁড়াইলেন। ভাস্কো-ডা-গামা বিশালকায়, প্রস্তরের মত কঠিন, হস্তীর মত বলশালী। মির্জা দাউদ অপেক্ষাকৃত কৃশ ও খর্ব্ব; কিন্তু বিষধর কালসর্পের মত

ক্ষিপ্ৰ তেজস্বী ও প্রাণসার। ভাস্কো-ডা-গামার তরবারি বেত্রবৎ ঝজ্জু, তীক্ষ্ণাগ্র; মিঞ্জাঁ দাউদের তরবারি ঈষৎ বক্র ও ক্ষুরধার। নগ্ন কৃপাণ-হস্তে ক্ষণকালের জন্য দুইজন পরস্পরকে নিরীক্ষণ করিয়া লইলেন। তারপর ঝড়েব মত তরবারিকে অগ্রবর্তী করিয়া ভাস্কো-ডা-গামা আক্রমণ করিল।

কিন্তু ডা-গামার তরবারি মিঞ্জাঁ দাউদের অঙ্গ স্পর্শ করিবার পূর্বেই তিনি ক্ষিপ্ৰহস্তে নিজ তরবারি দ্বারা তাহা অপসারিত করিয়া সরিয়া দাড়াইলেন এবং পরক্ষণেই তাঁহার বক্র অসি বিদ্যাতের মত একবার ডা-গামার জাহ্নু দংশন করিয়া ফিরিয়া আসিল। ডা-গামা পিছু হটিয়া আত্মরক্ষা করিবার চেষ্টা করিল, কিন্তু পারিল না। তাহার জাহ্নুর চর্মাবরণ ধীরে ধীরে রক্তে ভিজিয়া উঠিল।

ডা-গামা সে দিকে দ্রক্ষেপ করিল না; কিন্তু সাবধান হইল। সংযত ও সতর্কভাবে অসিচালনা করিতে লাগিল। সে বুঝিল যে, বিপক্ষকে অবজ্ঞা করিলে চলিবে না। মিঞ্জাঁ দাউদের অসি কৌশল অসাধারণ, তাঁহার সম্মুখে দ্বিতীয়বার ভুল করিলে আর তাহা সংশোধনের অবকাশ থাকিবে না।

এ দিকে মিঞ্জাঁ দাউদও বুঝিলেন যে ডা-গামা অসি-কৌশলে তাঁহার সমতুল্য—কিন্তু তাঁহার অপেক্ষা দ্বিগুণ বলশালী। আবার সে তাঁহার মত ক্ষিপ্ৰগামী ও লঘুদেহ নহে বটে, কিন্তু তাহার তরবারি ঝজ্জু এবং দীর্ঘ—মিঞ্জাঁ দাউদের তরবারি বক্র এবং থর্ক। তাঁহাদের যুদ্ধরীতিও সম্পূর্ণ পৃথক। এ ক্ষেত্রে, মিঞ্জাঁ দাউদ দেখিলেন, ডা-গামার জয়ের সম্ভাবনাই অধিক। মিঞ্জাঁ দাউদ অত্যন্ত সাবধানে যুদ্ধ করিতে লাগিলেন।

সর্প এবং নকুলের যুদ্ধে যেমন উভয়ে উভয়ের চক্ষুতে চক্ষু নিবদ্ধ রাখিয়া

পরস্পরকে প্রদক্ষিণ করিতে থাকে এবং স্ত্রযোগ পাইবামাত্র তীরবেগে আক্রমণ করিয়া আবার স্বস্থানে ফিরিয়া আসে, ডা-গামা ও মিঞ্জাঁ দাউদও সেইরূপে যুদ্ধ করিতে লাগিলেন। অস্ত্রে অস্ত্রে প্রতিকূদ্ধ হইয়া মুহূর্ত্তঃ বনংকার উঠিতে লাগিল, চঞ্চল অসিফলকে সূর্য্যাকিরণ পড়িয়া তড়িৎরেখার মত জ্বলিয়া উঠিতে লাগিল। নিম্পন্দ জনবৃহৎ সহস্রচক্ষু হইয়া এই অদ্ভুত যুদ্ধ দেখিতে লাগিল।

যুদ্ধের সঙ্গে সঙ্গে মিঞ্জাঁ দাউদ বাক্যশূলে ডা-গামাকে বিদ্ধ করিতে লাগিলেন ;—‘ফিরিঙ্গি দস্তা, চাহিয়া দেখ, তোরা রক্ত নালুকের রক্তের মত লাল নয়, শয়তানের রক্তের মত নীল ! খৃষ্টান কুত্তা, এখনও ক্ষমা প্রার্থনা কর— তোরা প্রাণ ভিক্ষা দিব !’ ডা-গামা কোনও উত্তর না দিয়া নিঃশব্দে যুদ্ধ করিতে লাগিল। শ্লেষ করিয়া মিঞ্জাঁ দাউদ যে তাহার ধৈর্য্যচ্যুতি ঘটাইবার চেষ্টা করিতেছেন, চতুর গা-ডামা তাহা বুঝিয়া ছিল।

যুদ্ধ ক্রমে আরও প্রথর ও তীব্র হইয়া উঠিল। দুই যোদ্ধারই ঘন ঘন শ্বাস বহিল। সর্বাঙ্গে ঘাম ঝরিতে লাগিল। কিন্তু উভয়েই যেন এক অদৃশ্য বশ্মে আচ্ছাদিত। ডা-গামার তরবারি বার বার মিঞ্জাঁ দাউদের কণ্ঠের নিকট হইতে, বক্ষের নিকট হইতে ব্যর্থ হইয়া ফিরিয়া গেল, মিঞ্জাঁ দাউদের অসি ডা-গামাকে ঘিরিয়া একঝাঁক ক্রুদ্ধ মৌমাছির মত গুঞ্জন করিয়া ফিরিতে লাগিল, কিন্তু কোথাও হল ফুটাইতে পারিল না।

সহসা এক সময় গা-ডামা সভয়ে দেখিল যে সে ঘুরিতে ঘুরিতে একবারে ঘাটের কিনারায় আসিয়া দাঁড়াইয়াছে, আর এক পা পিছাইলেই সমুদ্রের জলে পড়িয়া যাইবে। মিঞ্জাঁ দাউদ তাহার মুখের ভাব দেখিয়া উচ্চহাস্য করিয়া উঠিলেন। বিদ্রূপ-বিষাক্ত কণ্ঠে কহিলেন;—‘ফিরিঙ্গি;

আজ তোকে ঐ সমুদ্রের জলে চুবাইব। তারপর মরা ইচ্ছার মত তোর রাজা ইমানুয়েলের কাছে তোকে বথ শিশু পাঠাইয়া দিব।’

এতক্ষণে মিঞ্জা দাউদ যাহা চাহিতেছিলেন তাহাই হইল—ভাস্কো-ডা-গামা দৈখ্য হারাইল। উন্নত বগুমহিষের মত গজ্জ্বল করিয়া অসি উদ্ধে উত্তোলন করিয়া সে মিঞ্জা দাউদকে আক্রমণ করিল। ইচ্ছা করিলে মিঞ্জা দাউদ অনায়াসে ডা-গামাকে বধ করিতে পারিতেন; কিন্তু তাহা না করিয়া তিনি তরবারির উন্টা পিঠ দিয়া ডা-গামার দক্ষিণ মুষ্টিতে দারুণ আঘাত করিলেন, সঙ্গে সঙ্গে তাহার তরবারি হস্তমুক্ত হইয়া উদ্ধে উৎক্ষিপ্ত হইয়া দূরে গিয়া পড়িল। অকস্মাৎ অস্ত্রহীন হইয়া ডা-গামা থমকিয়া দাঁড়াইয়া পড়িল।

ডা-গামার দুই জন সহচর এতক্ষণ সকলের সঙ্গে দাঁড়াইয়া যুদ্ধ দেখিতে ছিল। প্রভুর অপ্রত্যাশিত বিপৎপাতে তাহারা সাহায্য করিতে অগ্রসর হইল। কিন্তু দুই পদ অগ্রসর হইবার পূর্বেই, অতি বিশাল-কলেবর নিকষকৃষ্ণ হাবশী জাম্বো মাস্তুলের গ্নায় দুই হস্ত বাহির করিয়া তাহাদের কেশ ধরিয়া ফিরাইয়া আনিল এবং নিরতিশয় শুল্ল দুইপাটি দন্ত বিনিষ্কাশ করিয়া যাহা বলিল, তাহার একটি বর্ণও তাহারা বুঝিতে না পারিলেও জাম্বোর ননোগত অভিপ্রায় অনুধাবন করিতে তাহাদের বিন্দুমাত্র ক্রেশ হইল না।

মিঞ্জা দাউদ তরবারির ধার ডা-গামার কণ্ঠে স্থাপন করিয়া কহিলেন, ‘ডা-গামা, নতজানু হ, নহিলে তোকে বধ করিব।’

ডা-গামা নতজানু হইল না—বাহুদ্বয়ে বক্ষ নিবদ্ধ করিয়া বিকৃতমুখে হাস্য করিয়া কহিল,—‘মূর, নিরস্তুকে হত্যা করা তোদের স্বভাব বটে।’

মিঞ্জা দাউদ কিয়ৎকাল চিন্তা করিয়া কহিলেন,—‘ভাল, তোকে ছাড়িয়া দিব—কিন্তু প্রতিজ্ঞা কর—’

ডা-গামা কহিল,—‘আমি কোন প্রতিজ্ঞা করিব না, তোর যাহা ইচ্ছা কর।’

মির্জা দাউদ বলিলেন, ‘শপথ কর যে, আজ হইতে সপ্তাহ মধ্যে সদলবলে এ দেশ ছাড়িয়া যাইবি, আর কখনও ফিরিবি না।’

ডা-গামা উচ্ছ্বাস করিয়া উঠিল, কহিল,—‘মূর, তুই অতি নির্বোধ ! আমি শপথ করিব না, আমাকে বধ কর। আমার রক্তে কালিকটের মাটি ভিজিলে হিন্দে ইম্যানুয়েলের জয়ধ্বজা সহজে রোপিত হইবে।’

মির্জা দাউদ হাস্ত করিয়া কহিলেন,—‘এতদিনে নিজ মুখে নিজের অভিপ্রায় ব্যক্ত করিলি। কিন্তু তাহা হইতে দিব না। ইম্যানুয়েলের জয়ধ্বজা কালিকোট রোপিত হইবে না। কালিকট চিরদিন পৃথিবীর সমস্ত জাতির মিলন ক্ষেত্র হইয়া থাকিবে। প্রতিজ্ঞা কর নচেৎ—’

ডা-গামা জ্রুটি করিয়া কহিল,—‘নচেৎ ?’

‘নচেৎ পোর্ভুগালে ফিরিয়া যাইতে একটি প্রাণীও জীবিত রাখিব না। তোদের আহাজ পূড়াইয়া এই একশত ব্রিশ জন লোককে কাটিয়া সমুদ্রের জলে ভাসাইয়া দিব।’

ডা-গামা স্তব্ধ হইয়া দাঁড়াইয়া রহিল। কোন উত্তর দিল না।

মির্জা দাউদ পুনশ্চ কহিলেন,—‘ডা-গামা, এখনও শপথ কর—তোর ধর্মের উপর বিশ্বাস করিয়া ছাড়িয়া দিব।—ভাবিয়া দেখ, তোরা মরিলে কে তোর দেশবাসী ভিক্ষুকদের পথ দেখাইয়া লইয়া আসিবে ?’

ডা-গামা অবরুদ্ধ কণ্ঠে কহিল,—‘শপথ করিতেছি—’

মির্জা দাউদ কহিলেন,—‘তোদের যেম্বর জননী মেরীর নামে শপথ কর।’

ডা-গামা তখন কম্পিত ক্রোধ-জজ্বরিত কণ্ঠে শপথ করিল যে সপ্তাহ মধ্যে

এ দেশ ছাড়িয়া চলিয়া যাইবে এবং আর কখনও ভারত ভূমির উপর পদার্পণ করিবে না।

‘ডা-গামাকে ছাড়িয়া দিয়া মিঞ্জা দাউদ ও আরও প্রধান প্রধান নাগরিকগণ সামরীর সহিত সাক্ষাৎ করিলেন। সমস্ত বিবরণ আত্মোপাস্ত শুনিয়া সামরী कहিলেন,—‘যত দিন উহারা আমার রাজ্যের কোনও প্রকাশ্য অনিষ্ট না করিতেছে, তত দিন শুধু সন্দেহের উপর নির্ভর করিয়া আমি উহাদিগকে রাজ্য হইতে বিতাড়িত করিতে পারি না। তবে কেহ যদি তোমাদের ব্যক্তিগত অনিষ্ট করিয়া থাকে, তোমরা প্রতিশোধ লইতে পার, আমি বাধাদিব না।’

সকলে সামরীকে বুঝাইবার চেষ্টা করিলেন যে, ইহারা অত্যন্ত কটবুদ্ধি ও যুদ্ধনিপুণ, তাহাদের কামান, বন্দুক, গোলাগুলী আছে; স্বযোগ পাইলেই তাহারা বাহুবলে এই সোনার রাজ্য অপূর্ণ অমরাবতী গ্রাস করিবে।

সামরী হাসিয়া উত্তর করিলেন, ‘আমার সৈন্যবল নাই সত্য, কিন্তু এই সামরী বংশ পঞ্চদশ শতাব্দী ধরিয়া এই মসলন্দে রাজত্ব করিতেছে—কেহ তাহাকে রাজ্যভ্রষ্ট করে নাই। আমার সিংহাসন স্তশাসন ও জনপ্রিয়তার উপর প্রতিষ্ঠিত। উহারা আমার কি করিতে পারে?’

সকলে নিরাশ হইয়া ফিরিয়া গেলেন।

সপ্তাহ পরে স্বর্ণপত্রে লিখিত সামরীর সন্ধিলিপি মস্তকে ধারণ করিয়া ভাস্কো-ডা-গামা অহুচরসহ জাহাজে উঠিল।

মিঞ্জা দাউদ বন্দর হইতে ডাকিয়া বলিলেন,—‘ডা-গামা শপথ স্বরণ রাখিও।’

একটা ক্রুর হাস্য ডা-গামার মুখের উপর খোলয়া গেল, মিঞ্জা দাউদের

প্রতি স্থিরদৃষ্টি রাখিয়া সে বলিল,—‘মিজ্জাঁ দাউদ, আবার আমাদের সাক্ষাৎ হইবে।’

মিজ্জাঁ দাউদ হাসিয়া উত্তর দিলেন,—‘সম্ভব নয়। আদ্বি মুসলমান,—বেহেশ্তে যাইব।’ ডা-গামা ছই চক্ষুতে অগ্নিবর্ণ করিয়া কহিল,—‘ঈহজন্মেই আবার আমাদের সাক্ষাৎ হইবে।’

তারপর ধীরে ধীরে তাহার তিনটি জাহাজ বন্দরের বাহির হইয়া গেল।

চারি বৎসর অতীত হইয়াছে। এই চারি বৎসরে যাহা যাহা ঘটিয়াছে, তাহা এই কাহিনীর অন্তর্গত না হইলেও সংক্ষেপে বর্ণিত হইল। ভাস্কা-ডা-গামা কালিকট ত্যাগ করিবার ছই বৎসর পরে আবার পোর্তুগীজ জাহাজ ভারতবর্ষে আসিল। এবার পোর্তুগীজদের অধিনায়ক আল্ভারেজ কেরার নামক একজন পাদ্রী এবং তাঁহার অধীনে নয়খানি জাহাজ। পাদ্রী আল্ভারেজ কালিকট বন্দরে প্রবেশ করিয়াই জাহাজ হইতে নগরের উপর গোলাবর্ষণ আরম্ভ করিলেন। ফলে বহু নাগরিকের প্রাণনাশ হইল, অনেকে আহত হইল এবং কয়েকটি অট্টালিকা চূর্ণ হইয়া গেল। এইরূপে রাজা-প্রজার মনে ভীতি ও কর্তব্যজ্ঞান সঞ্চারিত করিয়া পোর্তুগীজরা আবার ভারত ভূমিতে পদার্পণ করিল। রাজা সামরী আগন্তুকদিগকে সম্মান দেখাইলেন ও তাহাদের বাসের জন্ত নগরের বাহিরে ভূমিদান করিয়া কুঠিনির্মানের অনুমতি দিলেন। কিন্তু পোর্তুগীজদিগের এই অহেতুক জিঘাংসা ও নিষ্ঠুরতায় কালিকটের জনসাধারণের মন তাহাদের বিরুদ্ধে ঘূর্ণা ও বিদ্বেষে পূর্ণ হইয়া উঠিল।

তারপর কলহ বাদিতে বিলম্ব হইল না। দাস্তিক বিদেশীদের প্রতি যাহাদের ব্যক্তিগত বিদ্বেষ জন্মিয়াছিল, তাহারা রূগড়া বাধাইয়া রক্তপাত করিতে লাগিল। পোর্ভু গীজরাও জবাব দিল। ক্রমে ভিতরে বাহিরে আগুন জলিয়া উঠিল। একদিন নাগরিকগণ পোর্ভু গীজদিগের কুঠিতে অগ্নিসংযোগ করিয়া সত্তর জন ফিরিঙ্গিকে হত্যা করিল। অবশিষ্ট পলাইয়া জাহাজে উঠিল এবং জাহাজ হইতে গোলা মারিয়া নগরের এক অংশে আগুন লাগাইয়া দিল। তার পর সেই যে তাহারা কালিকট ছাড়িয়া গেল, দুই বৎসরের মধ্যে আর ফিরিয়া আসিল না।

কালিকটের রাজা-প্রজা নিশ্বাস ফেলিয়া ভাবিল—আপদ দূর হইয়াছে, আর ফিরিবে না।

শেষোক্ত ঘটনার বৎসরের পরে মির্জা দাউদ স্বী-কতা লইয়া তাঁহার জন্মভূমি মরক্কো দেশে গেলেন। সেখানে কিছু দিন অবস্থানের পর বুদ্ধ পিতাকে সঙ্গে লইয়া মক্কাশরীফ দর্শন করিলেন। তারপর তীর্থ-দর্শন শেষ করিয়া সকলে মিলিয়া কালিকটে প্রত্যাবর্তন করিতেছিলেন।

কথা ছিল, মক্কাশরীফ হইতে মির্জা দাউদ কালিকটে আসিবেন, তাঁহার পিতা মোরোক্কো দেশে ফিরিয়া যাইবেন। কিন্তু পিতা স্থবির ও জরাগ্রস্থ হইয়া পড়িয়াছেন—অদিকদিন পরনায়ু নাই। পুনরায় মোরোক্কো যাইবার স্বযোগ হয় ত শীঘ্র হইবে না, ততদিন পিতা বাঁচিবেন কি না, এই সকল বিবেচনা করিয়া মির্জা দাউদ তাঁহাকে ছাড়িলেন না, নিজের সঙ্গে কালিকট লইয়া চলিলেন। বুদ্ধ ও ইদের চাঁদের মত সুন্দর ক্ষুদ্র নাতিনীটিকে দেখিয়া ভুলিয়াছিলেন—তিনিও বিশেষ আপত্তি করিলেন না।

মক্কাশরীফ দর্শনের সময় কালিকটের কয়েক জন সম্ভ্রান্ত ব্যক্তির সহিত মির্জা দাউদের সাক্ষাৎ হইয়াছিল। তিনি তাঁহাদের বলিলেন, ‘আপনারা

ও কালিকটে ফিরিতেছেন—আমার জাহাজেই চলুন।’ তাঁহারা আনন্দিত হইয়া সপরিবারে মিঞ্জা দাউদের জাহাজে আশ্রয় লইলেন।

মক্কা হইতে কালিফট তিন মাসের পথ। জাহাজ যথা সময়ে আরব উপকূল ছাড়িয়া লোহিত সাগর পার হইল। ক্রমে পারস্য উপসাগর উত্তীর্ণ হইয়া ভারত সমুদ্রে আসিয়া পড়িল।

মহাসাগরের বুকের উপর বায়ু-বর্ষুলিত পালের ভরে মিঞ্জা দাউদের তরণী দক্ষিণাভিমুখে চলিয়াছে। চারিদিকে অতল জল ছলিতেছে ফুলিতেছে—লক্ষকোটিগুণে বিচূর্ণিত দর্পণের মত রবিকরে প্রতিফলিত হইতেছে। পূর্ণ দিগন্তরেখা অখণ্ডভাবে তরণীকে চারিদিকে বেষ্টন করিয়া আছে। কেবল বহুদূরে পূর্বচক্রবালে মেঘের মত কচ্ছভূমির তটবনানী ঈষন্মাত্র দেখা যাইতেছে।

জাহাজে যে অভিজ্ঞ আড়কাঠি আছে, সে বলিয়াছে যে বায়ুর দিক এবং গতি পরিবর্তিত না হইলে অষ্টাহমধ্যে কালিকটে পৌছানো যাইবে। আশু যাত্রাশেষ কল্পনা করিয়া আরোহীরা সকলেই হ্রষ্ট হইয়া উঠিয়াছেন।

সে দিন শুক্রবার, সূর্য্য ক্রমে মধ্যগগন অতিক্রম করিয়া পশ্চিমে চলিয়া পড়িল। জাহাজের বিস্তৃত ছাদের উপর মিঞ্জা দাউদ, তাঁহার পিতা ও আর আর পুরুষগণ দ্বিপ্রহরিক নমাজ প্রায় শেষ করিয়াছেন। জাহাজের নিয়ামক সম্মুখে স্থিরদৃষ্টি করিয়া হালের নিকট নিশ্চলভাবে দাঁড়াইয়া আছে। চারিদিক নিস্তব্ধ, শুধু তরণীর বেগবিদীর্ণ জলরাশি ফেন-হাস্তে কল্কল শব্দ করিতেছে।

এমন সময় আকাশ-বাতাস প্রকম্পিত করিয়া মেগাগজ্জ্বলের গ্রায় ভীষণ শব্দে সকলে চমকিত হইয়া দেখিলেন, পশ্চাৎ হইতে পাঁচখানা ফিরঙ্গি জাহাজ সমস্ত পাল তলিয়া দিয়া এবং সঙ্গে সঙ্গে অগণ্য দাঁড় বাহিয়া যেন বহুপদবিশিষ্ট অতিকায় জলজন্তুর মত ছুটিয়া আসিতেছে। অতর্কিতে এত

নিকটে আসিয়া পড়িয়াছে যে, জাহাজের মানুষগুলোকে পর্যন্ত স্পষ্ট দেখা যাইতেছে। এই আকস্মিক দৃশ্য দেখিয়া সকলেই নৃদ্ধিভ্রষ্টের মত সেই দিকে নিশ্চলকভাবে তাকাইয়া রহিলেন।

বিস্মিত হইবার মত দৃশ্য বটে। দুই দণ্ড পূর্বেও চতুর্দিকে কোথাও একটা ভেলা পর্যন্ত ছিল না। মহা সমুদ্রের কোন্ অতল গুহা হইতে এই পাচটা ভীষণ দৈত্য বাহির হইয়া আসিল? মির্জা দাউদের মন বলিল, আজ আর রক্ষা নাই। কামান দাগিয়া ইহার নিজ আগমনবার্তা ঘোষণা করিয়াছে—আজ তাহারা দয়ানাদ দেখাইবে না। মৃতের রক্তে হিংসা চরিতার্থ করিবার আজ তাহাদের স্বযোগ মিলিয়াছে।

এরূপ ঘটনা প্রতীচ্যগের সমুদ্রবক্ষে পূর্বে কখনও ঘটে নাই। স্মরণাতীত কাল হইতে এই পথে শত শত তরণী অবাধে যাতায়াত করিয়াছে। চীন হইতে কাম্পীয় হ্রদ পর্যন্ত কেহ কখন চিংগিসকা বা বোসেটের নাম পর্যন্ত শুনে নাই। স্থলপথ অপেক্ষা জলপথ অধিক নিরাপদ ছিল বলিয়াই জলবাণিজ্য এত প্রসার লাভ করিয়াছিল। কিন্তু আজ যুগযুগান্তরের বাহিতপণ্য অব্যাহত পথে স্বার্থান্ধ ফিরিঙ্গি তাহার অগ্নি-অস্ত্র লইয়া পথরুদ্ধ করিয়া দাঁড়াইল।

কিন্তু যুদ্ধদান করা মির্জা দাউদের পক্ষে অসম্ভব। তাঁহার জাহাজ তীর্থযাত্রীর জাহাজ, তাহাতে বাকদ-গোলা কিছুই নাই। আছে কেবল কতকগুলি অসহায় যুদ্ধানভিজ্ঞ ধর্মপরায়ণ তীর্থযাত্রী এবং তদপেক্ষাও অসহায় কতকগুলি নারী ও শিশু। এরূপ অবস্থায় পাঁচখানা রণপোতের সঙ্গে যুদ্ধ করা বাতুলতা ভিন্ন আর কিছুই নহে। এক উপায় পলায়ন। কিন্তু মির্জা দাউদের জাহাজ কেবল পালের ভরে চলে—বিপক্ষের পাল দাঁড় হই আছে। এ ক্ষেত্রে পলায়নও সাধ্যাতীত।

মির্জা দাউদ ক্ষণকাল স্তব্ধভাবে চিন্তা করিলেন। একবার আকাশের

দিকে দৃষ্টি করিলেন। আকাশ নির্ধ্বংস—বেলা প্রায় তৃতীয় প্রহর। রাত্রি হইতে বিলম্ব আছে। তিনি নাবিককে ডাকিয়া সমস্ত পাল তুলিয়া প্রাণপণে জাহাজ ছুটাইতে আজ্ঞা দিলেন !

কিন্তু এই আজ্ঞা পালিত হইতে না হইতে জলদস্যুদিগের পাঁচখানা জাহাজ হইতে একসঙ্গে কামান ডাকিল। একটা গোলা বড় পালের ভিতর ছিদ্র করিয়া জাহাজের পরপারে গিয়া সমুদ্রগর্ভে প্রবেশ করিল, অগ্নিগুলা জাহাজের চারিদিকে জলের উপর পড়িল। কোনটাই কিন্তু জাহাজকে গুরুতর জখম করিতে পারিল না।

জাহাজের পুরুষ যাত্রীদের মুখ শুকাইল। নিম্ন হইতে ভীত শিশু ও নারীগণের আর্তস্বর ও ক্রন্দন উঠিল। দন্তে দন্তে চাপিয়া মির্জা দাউদ নাবিকদের হুকুম দিলেন,—‘যতক্ষণ পারো, জাহাজ চালাও, ফিরিঙ্গি দস্যুর হাতে ধরা দিব না।’

এমন সময় মির্জা দাউদের চারি বৎসরের কন্যা হাঁপাইতে হাঁপাইতে উপরে উঠিয়া আসিয়া পিতার জাম্বু জড়াইয়া ধরিল। বলিল, ‘বাবা না তোমাকে ডাকছেন।’ বলিয়া পিতার মুখের দিকে চোখ তুলিয়াই উঠেঃস্বরে কাঁদিয়া উঠিল, ‘বাবা, আমার বড় ভয় করছে।’

মির্জা দাউদ কন্যাকে দুই হাতে তুলিয়া বুকে চাপিয়া ধরিলেন। তাহার কাণে কাণে কহিলেন ‘হারুণা, কাঁদিস না। তুই মূরের কন্যা—তোর কিসের ভয় ? আজ আমরা সকলে একসঙ্গে বেহেস্তে যাইব।’

কন্যাকে পিতার ক্রোড়ে দিয়া মির্জা দাউদ নীচে নামিয়া গেলেন। সম্মুখেই আবুল-নয়না দ্বীর সহিত সাক্ষাৎ হইল।

নিজ কটি হইতে ক্ষুদ্র মাণিক্যখচিত ছুরিকা পত্নীর হস্তে দিয়া সংযত কণ্ঠে কহিলেন,—‘শালহা, বোধ হয় আজ অন্তিমকাল উপস্থিত হইয়াছে। বোম্বটে জাহাজ পিছু লইয়াছে। যদি উহারা এ জাহাজে পদার্পণ করে,

এ ছুরী নিজের উপর ব্যবহার করিও। তার পূর্বে কিছু করিও না। আর অত্যাগত স্ত্রীলোকদের আশ্বাস দিও, অকারণে ভয় না পায়! চলিলাম।’ এই বলিয়া মুহূর্তকালের জন্ত পত্নীর মস্তক বক্ষে চাপিয়া ধরিয়া মির্জা দাউদ উপরে ফিরিয়া গেলেন।

উপরে উঠিয়া দেখিলেন, এই অল্পকাল মধ্যে দম্ভজাহাজগুলি অন্ধচন্দ্রাকারে তাঁহাদিগকে ঘিরিয়া ফেলিয়াছে। এত নিকটে আসিয়া পড়িয়াছে যে, তাহাদের কণ্ঠস্বর পর্য্যন্ত স্পষ্ট শুনা যাইতেছে। মির্জা দাউদ দেখিলেন, প্রত্যেক জাহাজ হইতে কামানের মুখ তাঁহাদের প্রতি লক্ষ্য করিয়া আছে। এত নিকট হইতে এবার আর লক্ষ্যভ্রষ্ট হইবে না।

মির্জা দাউদের পিতা আসিয়া বলিলেন, ‘দাউদ, আর উপায় নাই। ধরা না দিলে জাহাজডুবি হইয়া মরিতে হইবে।’

মির্জা দাউদ কহিলেন, ‘ধরা দিলেও নিশ্চয় মরিতে হইবে, তাহার অপেক্ষা ডুবিয়া মরাই শ্রেয়।’

পিতা বলিলেন, ‘সে কথা ঠিক। কিন্তু সঙ্গে শিশু ও স্ত্রীলোক রহিয়াছে। তাহাদের রক্ষা করিবার চেষ্টা করা উচিত নহে কি?’

মির্জা দাউদ ক্রিয়াকাল চিন্তা করিয়া কহিলেন, ‘কিন্তু দম্ভেরা শিশু ও নারীদের দয়া করিবে কি? বরঞ্চ—’

পিতা কহিলেন, ‘ফিরিঙ্গি অর্থলোভী, অর্থের বিনিময়ে তাহাদের ছাড়িয়া দিতে পারে।’

অত্যাগত পুরুষগণও বুদ্ধের বাক্য সমর্থন করিলেন। মির্জা দাউদ তখন কহিলেন, ‘ভাল, চেষ্টা করিয়া দেখা যাক।’

ঠিক এই সময় একখান্না জাহাজ হইতে আবার কামান দাগিল। এবার গোলার আঘাতে প্রকাণ্ড মাস্তুল পাল শুক মড়মড় শব্দে ভাঙ্গিয়া পড়িল এবং সঙ্গে সঙ্গে শুপু পীকৃত পালের কাপড়ে আগুন লাগিয়া গেল।

রমণীরা এতক্ষণ পর্যন্ত আবরু রক্ষা করিয়া জাহাজের খোলের মধ্যেই ছিল, কিন্তু এবার আর লজ্জার বাধা মানিল না। সন্তানবতীরা সন্তান কোলে লইয়া, বাহুদের সন্তান নাই—তাহারা যে যেমন ভাবে ছিল, উঠে-স্বরে কাঁদিতে কাঁদিতে উপরে উঠিয়া আসিল। সকলেই ভয় বিঘ্নল। কেহ উচ্চমুখী নতজানু হইয়া ঈশ্বরের নিকট প্রাণের আকুল আবেদন জানাইতে লাগিল, কেহ শিশু-সন্তানকে দুই হাতে উচ্চ তুলিয়া পরিয়া জলদস্যুদিগকে দেখাইয়া তাহাদের রূপা আকর্ষণের চেষ্টা করিতে লাগিল।

এ দিকে পালের আগুন ক্রমে বাড়িয়া উঠিয়া জাহাজময় ব্যাপ্ত হইবার উপক্রম করিল। পুরুষগণ তখন সমুদ্র হইতে জল তুলিয়া অগ্নিনির্বাপনের চেষ্টা করিতে লাগিলেন। বহু কষ্টে অনেক জল ঢালিবার পর অগ্নি নির্বাপিত হইল। তখনকার মত জাহাজ রক্ষা পাইল।

একথানা ফিরিঙ্গি জাহাজ মির্জা দাউদের জাহাজের একবারে পাশে আসিয়া পড়িয়াছিল। মধ্যে মাত্র একশত গজের ব্যবধান। কামান দুরাইয়া তাহারা আবার গোলা ছুঁড়িবার উদ্যোগ করিতেছিল। তখন মির্জা দাউদ উচ্চকণ্ঠে তাহাদিগকে ডাকিয়া কহিলেন,—‘গোলা ছুঁড়িও না—আমরা আত্মদমর্পণ করিতেছি!’

কামান ছাড়িয়া তাহারা উল্লাসধ্বনি করিয়া উঠিল। তাহাদের মধ্যে একজন—বোম্ব হয়, সেই প্রধান নাবিক—কহিল,—‘তোমাদের জাহাজে যত অস্ত্র আছে, জলে ফেলিয়া দাও—নহিলে কামান ছুঁড়িব।’

মির্জা দাউদ কহিলেন,—‘আমাদের সঙ্গে কোনও অস্ত্র নাই। ইহা তীর্থযাত্রীর জাহাজ। বাহা কিছু ধনরত্ন সঙ্গে আছে, দিতেছি—আমাদের ছাড়িয়া দাও।’

এইরূপ কথাবর্তা হইতেছে, এমন সময় আক্রমণকারী জাহাজের ভিতর

হইতে এক জন পুরুষ উপরে উঠিয়া আসিল। অতি মহার্ঘ বেশভূষায় সজ্জিত বিশালদেহ এক পুরুষ। তাহাকে দেখিয়া মির্জা দাউদের বৃকের রক্ত সহসা যেন শুক হইয়া গেল। চিনিপ্তেন—ভাস্কো-ডা-গামা। তাহার মুখের উপর কৃষ্ণ কাল-সর্পের মত হিংসা যেন কুণ্ডলিত হইয়া আছে। মির্জা দাউদকে দেখিয়া ভাস্কো-ডা-গামা হাসিল! মাথার কঙ্কপত্রযুক্ত টুপি খুলিয়া তাহা আভূমি সঞ্চারিত করিয়া বলিল, মির্জা দাউদ, সুপ্রভাত! স্বরণ আছে, বলিয়াছিলাম আবার দেখা হইবে? মির্জা দাউদের মুখ দিয়া সহসা কথা বাহির হইল না। ভাস্কো-ডা-গামা তখন পূর্বোক্ত প্রধান নাবিকের দিকে ফিরিয়া কঠোর কণ্ঠে কহিল,—কাপ্তেন, কামান নীরব কেন? আমার লক্ষ্য কি ভুলিয়া গিয়াছে?’ ভীত কাপ্তেন বলিল,—‘প্রভু, উহার দনরত্ন দিয়া পরিত্রাণের আর্জী করিতেছে।’

ছুই জাহাজ ক্রমে আর ও নিকটবর্তী হইতেছিল। ডা-গামা আবার মির্জা দাউদের দিকে ফিরিয়া শ্বেবতীক্ষ কণ্ঠে কহিল, ‘মূর, দনরত্ন দিয়া প্রাণভিক্ষা চাও?’

মির্জা দাউদ কহিলেন, ‘নিজের প্রাণভিক্ষা চাহিনা! আমাদের সর্বস্ব লইয়া বৃদ্ধ, নারী ও শিশুদের ছাড়িয়া দাও।’

ডা-গামা শত্রুর লাঞ্জন্যের মিষ্ট রস অল্প অল্প করিয়া পান করিতে লাগিল, কহিল,—‘বৃদ্ধ, নারী ও শিশুদের ছাড়িয়া দিব? শকিত্ব তাহাতে আমাদের লাভ? বরঞ্চ তোমরা যুবতী নারীদের আমাদের নিকট পাঠাইয়া দিয়া পুরুষগণ প্রাণ বাঁচাইতে পার। আমাদের জাহাজে স্ত্রীলোকের কিছু প্রয়োজন হইয়াছে। আমার নিজের জন্ত নয়—খালাসীদের জন্ত। ‘আমার নারীতে কচি নাই।’

ক্রোধে অপমানে মির্জা দাউদের মুখ বিবর্ণ হইয়া গেল।

বুঝিলেন, ডা-গামা তাঁহাকে লইয়া খেলা করিতেছে। অতি কষ্টে আশ্বদমন করিয়া কহিলেন, ‘ডা-গামা, তোমার প্রস্তাবের উত্তর দিতে ঘুণা হইতেছে। যদি অভিকৃটি হয়, আমাদের সহিত যাহা মূল্যবান সামগ্রী ও স্বর্ণ রৌপ্য আছে, তাহা লইয়া আমাদের নিকৃতি দাও। নতুবা কিছুই পাইবেনা। ‘ডা-গামা ভ্রুকৃটি করিয়া কহিল,’ কিছুই পাইব না তার অর্থ?’

মিজ্জা দাউদ কহিলেন, ‘তার অর্থ—জোর করিলে আমাদের নারিয়া ফেলিতে পারিবে, কিন্তু কিছু লাভ করিতে পারিবে না। যদি আমার জাহাজে চড়াও করিবার চেষ্টা কর, তত্ত্বা খুলিয়া জাহাজ ডুবাইয়া দিব।’

মিজ্জা দাউদের কথা শুনিয়া ডা-গামার ভ্রুকৃটি গভীরতর হইল, সে নতমুখে চিন্তা করিতে লাগিল।

এদিকে জাহাজের মাস্তুল ভাঙ্গিয়া বাওয়ায় মিজ্জা দাউদ পক্ষে নিবন্ধ হস্তীর মত চলচ্ছক্তিহীন। ফিরিঙ্গির পাচখানা জাহাজ দীরে দীরে তিন দিক হইতে ঘিরিয়া আরও নিকটবর্তী হইতে লাগিল।

মিজ্জা দাউদ অধীর হইয়া কহিলেন, ‘ডা-গামা, যাহা করিবে, শীঘ্র কর। আমাদের সহিত বারশত তোলা সোনা আছে—আরও অগ্ন্যান্ত মহার্ঘ বস্তু আছে; যদি পাইতে ইচ্ছা কর, শীঘ্র বল। অধিক বিলম্ব করিলে সব হারাইবে।’

ডা-গামা বলিল,—‘রমণীদের দিবে না?’

মিজ্জা দাউদ গজ্জিয়া উঠিলেন;—‘না, দিব না। আমরা স্ত্রী-কন্যার ব্যবসা করি না।’

ডা-গামা কহিল,—‘মূর, এখনও তোমার স্পর্ধা কামল না!—ভাল,

অর্থই নইব। তোমার জাহাজে যাহা কিছু আছে, ভেলায় করিয়া আমার জাহাজে পাঠাও।’

‘যাহা কিছু আছে, পাইলে ছাড়িয়া দিবে?’

‘দিব।’

তোমাকে বিশ্বাস কি?’

‘আমি মিথ্যা কথা বলি না।’

‘মিথ্যাচারি, শপথ করিয়াছিলে কখনও হিন্দে পদার্পণ করিবে না তাহার কি হইল?’

ডা-গামা হমসিয়া বলিল,—‘এখনও হিন্দে পদার্পণ করি নাই।’

মির্জা দাউদ তখন অত্যাশ্রয় সকলের সহিত পরামর্শ করিলেন। সকলেই কহিলেন, উহাদের কবলে যখন পড়িয়াছি, তখন উহাদের কথায় বিশ্বাস করা ভিন্ন উপায় নাই। অগত্যা মির্জা দাউদ সম্মত হইলেন।

তখন এক ভেলা প্রস্তুত করিয়া তাহারই উপর যাহা কিছু ছিল, এমন কি, নারীগণের অলঙ্কার পর্যন্ত তুলিয়া ডা-গামার জাহাজে পৌছাইয়া দেওয়া হইল। •

ডা-গামা জিজ্ঞাসা করিল,—‘তোমাদের আর কিছু নাই?’

‘না।’

‘আবার জিজ্ঞাসা করিতেছি—নারীদের দিবে না?’

অসহ ক্রোধে মির্জা দাউদের বাকবন্ধ হইয়া গেল। শুধু তাঁহার চক্ষুর্দ্বয় অগ্নিশিখার মত জ্বলিতে লাগিল।

ভাস্কো-ডা-গামা কালকূটের মত হাসিল। বলিল,—‘ভাল, তোমাদের যেক্রপ অভিরুচি।’ তারপর কাপ্তেনের দিকে ফিরিয়া

বলিল,—‘কাশ্বেন, গোলা মারিয়া উহাদের জাহাজে আগুন লাগাইয়া দাও। আজ মুসলমান কুকুরগুলোকে পুড়াইয়া মারিব।’

মির্জা দাউদ চীৎকার করিয়া উঠিলেন,—‘শঠ! বিশ্বাসঘাতক! মিথ্যাবাদী শয়তান!’

ডা-গামা কহিল,—‘মির্জা দাউদ, তোর প্রাণরক্ষা করিতে পারে, এত অর্থ পৃথিবীতে নাই। তবে তুই তোর স্ত্রীর বিনিময়ে এখনও প্রাণরক্ষা করিতে পারিস। তোর স্ত্রীকে আমি বাদী করিয়া রাখিব।’

মির্জা দাউদ উন্নতের মত গর্জন করিতে লাগিলেন,—‘শয়তান! শয়তান!’

জাহাজে ভীষণ কোলাহল উঠিল। নর-নারী সকলে পাগলের মত চারিদিকে ছুটাছুটি করিতে লাগিল। সকলেই যেন এই অভিশপ্ত জাহাজ হইতে পলাইবার চেষ্টা করিতেছে। চতুর্দিক হইতে আর্তবব উঠিল,—‘রক্ষা কর! দয়া কর! প্রাণ বাঁচাও!’

এই আকুল প্রার্থনার জবাব আসিল। সহসা শিলাবৃষ্টির মত জাহাজের উপর বন্দুকের গুলী পড়িতে লাগিল। কেহ হত, কেহ আহত হইয়া পড়িতে লাগিল। মৃত্যুর বিভীষিকা যেন ভীষণতর রূপ ধরিয়া দেখা দিল।

মির্জা দাউদের পিতা ক্ষুদ্র হারুণাকে বক্ষে লইয়া কাঁপিতে কাঁপিতে পুত্রের পাশে আসিয়া দাঁড়াইলেন। স্থলিত কণ্ঠে একবার শুধু ডাকিলেন ; —‘দাউদ!’

হৃদম আবেগে মির্জা দাউদ এক সূক্ষ্ম পিতা ও কন্যাকে জড়াইয়া ধরিলেন। এমন সময় লাজলজ্জা বিসর্জন দিয়া শীলোহা আসিয়া স্বামীর হস্ত ধরিয়া দাঁড়াইলেন।

মির্জা দাউদ বাপ্পাচ্ছন্ন চোখে একবার তিন জনের মুখের দিকে চাহিলেন। তারপর অবকৃত্ত স্বরে কহিলেন,—‘পিতা, ঈশ্বর কি নাই?’

সহসা হারুণা ক্ষুদ্র একটা কাতরোক্তি করিয়া এগাইয়া পড়িল। দ্রুত কণ্ঠকে নিজের ক্রোড়ে লইয়া মির্জা দাউদ দেখিলেন, তাহার দেহে প্রাণ নাই। নিষ্ঠুর গুলী তাহার বক্ষে প্রবেশ করিয়াছে।

তারপর দ্রুত অল্পক্ৰমে স্ত্রী ও পিতা গুলীর আঘাতে মাটিতে পড়িয়া গিয়া মরণ-যন্ত্রণায় ছট্‌ফট্‌ করিতে লাগিলেন। ভান্ডো-ডা-গামা তখন স্বয়ং ধূমায়িত বন্দুক হাতে করিয়া পিশাচের মত উচ্চ হাসি হাসিতেছে।

সূর্য্য তখন পশ্চিম দিগন্তরেখা স্পর্শ করিয়াছে। আকাশ এবং সমুদ্র তপ্তরক্তের মত রাঙা হইয়া উঠিয়াছে। সাগরবক্ষে সূর্য্যাস্ত হইতেছে।

এইবার পাচখানা জাহাজ হইতে এককালে কামান ডাকিল। নেলার সংঘাতে শীতান্ত বুদ্ধের মত মির্জা দাউদের জাহাজখানা কাঁপিয়া উঠিল। পালের কাপড়ে দপ করিয়া আবার আগুন জলিয়া উঠিল। দীরে দীরে টলিতে টলিতে জাহাজ নিমজ্জিত হইতে লাগিল। আবার কামান গর্জ্জিল। এবার জাহাজের সম্মুখদিকটা ছিন্নভিন্ন হইয়া উড়িয়া গেল। কল্কল্‌ শব্দে জল ঢুকিতে লাগিল।

তারপর নিমেষের মধ্যে সমস্ত শেষ হইয়া গেল। আরোহীদের মিলিত কণ্ঠ হইতে এক মহা হাহাকার-ধ্বনি উঠিল। জনন্ত জাহাজ অকস্মাৎ জীবিতবৎ সোজা দাঁড়াইয়া উঠিল; তারপর সবেগে সমুদ্রগর্ভে প্রবেশ করিল। যাত্রীদের উদ্ধোখিত কণ্ঠস্বর সহসা স্তব্ধ হইয়া গেল। মুহূর্তপূর্বে যেখানে জাহাজ ছিল, সেখানে আবর্তিত তরঙ্গশীর্ষ জলরাশি ক্রীড়া করিতে লাগিল।

ফিরিঙ্গি জাহাজগুলি চিত্রাপিতবৎ স্তব্ধ হইয়া দাঁড়াইয়া রহিল।
প্রায়াক্ষকারে তাহাদিগকে যেন অন্যজগতের কোন ভৌতিক তরণীর মত
দেখাইতে লাগিল।

ক্ষণকাল পরে সান্ধ্য নীরবতা বিদীর্ণ করিয়া ভাস্কো-ডা-গামার জাহাজ
হইতে দামামা ও তুর্থ্য বাজিয়া উঠিল।

সূর্য্য তখন সমুদ্রপারে অস্তমিত হইয়া অন্য কোন্ নূতন গগনে উদ্ভিত
হইয়াছে।

মরণ ভোমরা

বড়দিনের ছুটি শেষ হইতে আর দেৱী নাই। গত কয় দিন হইতে ‘পুছিয়’ বাতাস দিয়া দুৰ্জ্জয় শীত পড়িয়াছে। সন্ধ্যার পর আমরা মাত্র তিনজন ক্লাবের সভা চারিদিকের দরজা-জানালা বন্ধ করিয়া দিয়া চিম্নীর প্ৰগনে আগুনের সম্মুখে বসিয়াছিলাম। বাহিরের আকাশে ছেঁড়া ছেঁড়া মেঘ ও প্রবল বায়ু মিলিয়া একটা দুৰ্যোগ-সৃষ্টির চেষ্টা করিতেছিল।

অমূল্য বলিল—“আজ আর কেউ আসছে না, চল, বাড়ী ফেরা যাক। তিন জনে ভূতের মত ব’সে থেকে কোনও লাভ নেই—চার জন হলেও না হয় বুজ্ খেলা যেত।”

বরদা গুণিতনেত্রে আগুনের পানে চাহিয়া বসিয়াছিল, কতকটা যেন অশ্রুমনস্কভাবেই বলিল,—“সেবারে এই ডিসেম্বর মাসে কসৌলী গিয়েছিলুম—বাপ! কি শীত! মাথার ঘিলু পর্যন্ত জ’মে যাবার উপক্রম। পালিয়েই আস্তুম—যদি না একটা ভারী আশ্চর্য্য ব্যাপার ঘটে সব ওলট্-পালট্ ক’রে দিত।—আচ্ছা, কত বড় গঙ্গাফড়িং তোমরা দেখেছ বল দেখি?”

অমূল্য বলিল,—“হঁ, আষাঢ়ে গল্প ফাঁদবার মতলব। ওসব চালাকী চলবে না বরদা, আমি উঠলুম।”

আমি জিজ্ঞাসা করিলাম,—“কসৌলী গিয়েছিলে কেন?”

বরদা বলিল,—“কুকুরে কামড়েছিল; সেই কথাই ত—”

অমূল্য বলিল,—“জানি, সে বিষ এখনও তোমার শরীর থেকে বেরোয় নি। আমি আর এখানে থাকছি না, তোমার গঙ্গাফড়িং নিয়ে তুমি থাক।”

অমূল্য উঠিয়া পড়িল, শালখানা ভাল করিয়া গায়ে জড়াইয়া ঘোমটার মত করিয়া মাথায় দিয়া দ্বারের দিকে অগ্রসর হইল।

দ্বার বন্ধ ছিল, ঠেলা দিয়া খুলিয়াই অমূল্য চমকিয়া বলিয়া উঠিল—
“কে রে!”

—“মশায়, আস্তে পারি কি?”

অপরিচিত কণ্ঠস্বরে ফিরিয়া দেখিলাম, ওভারকোট ও মস্কি ক্যাপে সর্ব্ব অবয়ব আচ্ছন্ন করিয়া একটি লোক দ্বারের সম্মুখে দাঁড়াইয়া আছে। মুখচোখ কিছুই দেখা গেল না, শুধু ব্যালান্কাভা ও ওভারকোটের কলারের অন্তরালে একজোড়া কাল গৌফের আভাস পাওয়া গেল মাত্র।

অমূল্য জিজ্ঞাসা করিল, “কি চান?”

লোকটি বলিল, “এইটো কি বাঙালীদের ক্লাব?”

বরদা আহ্বান করিয়া বলিল, “হ্যাঁ, আসুন, ভেতরে এসে বসুন।
অমূল্য, দরজাটা ভেজিয়ে দিয়ে এসো হে, ঠাণ্ডা হাওয়া আসছে।”

লোকটি ঘরে আসিয়া প্রথমে মস্কি ক্যাপ ও পরে ওভারকোট খুলিয়া চেয়ারের পিঠের উপর রাখিল; তখন প্রকাণ্ড খোলার ভিতর হইতে অতি ক্ষুদ্র শামকের মত তাহার চেহারাখানা প্রকাশ হইয়া পড়িল। মানুষ যে এত শীর্ণ হইয়াও বাঁচিয়া থাকিতে পারে, তাহা এই লোকটিকে না দেখিয়া ধারণা করা কঠিন। বয়স বোধ করি পঁয়ত্রিশ ছত্রিশের বেশী নয়, কিন্তু কোনও দুরারোগ্য ব্যাধি বা মানসিক দুশ্চিন্তা তাহার অন্তরিশয় ক্ষীণ শরীরটির প্রত্যেক অবয়বে যেন জরার ছাপ মারিয়া দিয়াছে। মাংসহীন মুখের উপর ঘনকৃষ্ণ একজোড়া গৌফ মুখখানাকে আরও শুষ্ক শ্রীহীন করিয়া তুলিয়াছে। কপালে গভীর কালো রেখা—মুখের রং ক্যাকাশে পীতবর্ণ। মাথার দুই পাশে বড় বড় একজোড়া কাণ যেন পাখা মেলিয়া উড়িবার উপক্রম করিতেছে। তাহার মুখের সমস্ত প্রত্যঙ্গই মৃত বলিয়া মনে হয়—কেবল কালিমাবেষ্টিত বড় বড় দুইটা চক্ষু যেন দেহের শেষ প্রাণশক্তিটুকু হরণ করিয়া জল-জল করিয়া জলিতেছে।

অজীর্ণ, মালেরিয়া প্রভৃতি ব্যাধির তাড়ায় যাহারা শীতকালে স্বজলা বাংলা দেশের মায়া কাটাইয়া পশ্চিমে বেড়াইতে আসেন, তাঁহাদের মধ্যে এই ধরনের চেহারা দুই একটা যে দেখি নাই এমন নহ। বুঝিলাম, ইনিও একজন স্বাস্থ্যান্বেষী বায়ুভুক্ জীব। মনে মনে ভাবিলাম, কেবলমাত্র মৃৎপেরের জলহাওয়া এই কক্ষালে প্রাণ-প্রতিষ্ঠা করিতে পারিবে কি? ঘোর সন্দেহ হইল।

অমূল্য জিজ্ঞাসা করিল, “আপনি কি ক্লাবের কোনো সভ্যকে খুঁজছেন?”

লোকটি একবার আমাদের তিন জনের মুখের দিকে চাহিয়া দেখিল, তাহার গৌফ-জোড়া নড়িয়া উঠিল। তারপর অদ্ভুত রকমের একটা হাসি হাসিয়া বলিল,—“তা হতেও পারে, এখনও ঠিক বলতে পারছি না।”

আমরা অবাক হইয়া রহিলাম। লোকটি পুনশ্চ বলিল,—“আমি এ সহরে নবাগত। আজ তিনদিন হ’ল এসেছি—ডাক বাংলায় আছি। কিন্তু একদিন বাঙালীর সঙ্গে কথা না কয়ে হাঁপিয়ে উঠেছি, মশায়। আজ সন্ধ্যাবেলা বেয়ারার কাছে খবর পেলুম, এখানে বাঙালীদের একটা ক্লাব আছে, তাই খোঁজ করতে করতে এসে হাজির হয়েছি। আর থাকতে পারলুম না।”

আমি বলিলাম, “বেশ করেছেন। যতদিন থাকেন, নিয়মিত আদ্যবেন, আমরা খুব খুসী হব। তা—স্বাস্থ্য উপলক্ষে এখানে আসা হয়েছে বুঝি?”

লোকটি বলিল “না, স্বাস্থ্য ত আমার বেশ ভালই।”—কিছুক্ষণ চুপ করিয়া থাকিয়া হঠাৎ তাহার উজ্জ্বল চক্ষু দুইটা তুলিয়া বলিল—“সে জন্ত নয়, মশায়; মৃত্যু আমাকে তাড়া ক’রে নিয়ে বেড়াচ্ছে। তাই ভারতবর্ষময় ছুটোছুটি ক’রে বেড়াচ্ছি; কিন্তু রেহাই নেই। যেখানেই

মাই, মৃত্যু আমার পিছনে লেগে আছে। মনে ভাবি, আর বাঙালীর সঙ্গে দেখা করব না ; কিন্তু পারি না, প্রাণ হাঁপিয়ে ওঠে।”

কথাটা খাপছাড়া ঠেকিল, কিন্তু তবু মৃত্যু যে তাহাকে তাড়া করিয়াছে এবং অচিরে ধরিয়া ফেলিবে, সে বিষয়ে অন্ততঃ আমার মনে কোনও সন্দেহ ছিল না। তথাপি তাহাকে সান্ত্বনা দিবার অভিপ্রায়ে বলিলাম, “এখানকার জলহাওয়া খুব ভাল, কিছু দিন থাকুন, নিশ্চয় সেরে উঠবেন।”

লোকটি পকেট হইতে একটা চামড়ার সিগার-কেস বাহির করিয়া বলিল, “ধূমপাত্রা করেন কি?”—বলিয়া তিনটা ভীষণদর্শন সিগার আমাদের তিন জনকে দিয়া একটা নিজে ধরাইয়া টানিতে আরম্ভ করিল। আমরা নির্বাক হইয়া তাহার মুখেরদিকে চাহিয়া রহিলাম। এই শরীরের উপর এইরূপ বিকটাকৃতি বিষাক্ত কড়া সিগার টানিয়া লোকটা কয় দিন বাঁচিবে ?

আমাদের মুখের প্রতি কিন্তু তাহার নজর ছিল, সে ঈষৎ হাসিয়া বলিল, “আপনারা ভুল করছেন। আমি দেখতে একটু রোগা বটে, কিন্তু আমার শরীরে কোনও রোগ নেই। ধরুন ত আমার পাঞ্জা।”—এই বলিয়া কাঠির মত অঙ্গুলিযুক্ত কঙ্কালসার হাতখানা আমার দিকে বাড়াইয়া দিল।

পাগল না কি ? আমি তাড়াতাড়ি বলিলাম, “না, না, সে কথা বলি নি। আমি বল্ছিলুম—”

“ধরুন পাঞ্জা—”লোকটার চক্ষু ছুটা ধক্-ধক্ করিয়া জলিয়া উঠিল। আমরা মনে মনে প্রমাদ গণিলাম ; কোথা হইতে একটা উন্মাদ আসিয়া জুটিল ! আমরা পরস্পর মুখ-তাকাতাকি করিতেছি দেখিয়া লোকটা নাছোড়বান্দা হইয়া বলিল, “আপনারা ভাবছেন, রোগা বলে আমার

গায়ে জোর নেই। ভুল! ভুল! পাঞ্জায় গামা পালোয়ানও আমাকে হারাতে পারে না। ধরুন পাঞ্জা।”

কি করি, নিরুপায় হইয়াই তাহার পাঞ্জা ধরিল্যাম। নিজের দৈহিক শক্তি সম্বন্ধে ভাল ধারণাই ছিল ভয় হইল, বুঝি একটু চাপ দিলেই ঐ প্যাকাটির মত আঙ্গুলগুলো মট্-মট্ করিয়া ভাঙিয়া যাইবে। কিন্তু তাহার হাতে হাত দিয়াই বুঝিলাম, সে আশঙ্কা অমূলক। তাহার আঙ্গুলগুলো ইস্পাতের তারের মত আমার আঙ্গুলগুলোকে জড়াইয়া ধরিল। আমি যতই বলপ্রয়োগ করি তাহার কজ্জি ততই লোহার মত শক্ত হইতে থাকে। আমার কপালে বিন্দু বিন্দু ঘাম দেখা দিল! চাহিয়া দেখিলাম, আমার প্রতিদ্বন্দ্বীর মুখ নিষ্কিরকার, দাঁতে সিগার চাপিয়া স্বচ্ছন্দে ধূম উর্দগরণ করিতেছে।

ক্রমে আমার হাত অসাড় হইয়া আসিতে লাগিল। তারপর সবিস্ময়ে দেখিলাম, হাতখানা অজ্ঞাতসারে ঘুরিয়া যাইতেছে।

আমার কজ্জির কাছে মট্ করিয়া একটা শব্দ হইল। “ব্যান্! কাবার!” বলিয়া লোকটা পাঞ্জা ছাড়িয়া দিল। আমি স্তম্ভিতভাবে অবশ হাতখানা তুলিয়া বসিয়া রহিলাম।

খানিকক্ষণ কেহ কোনও কথা কহিল না, লোকটা অর্ধমুদিতনেত্রে সিগার টানিতে লাগিল।

অবশেষে অমূল্য জিজ্ঞাসা করিল, “মশায়ের নামটি কি?”

সে বলিল,—“ভূতনাথ সিকদার। দেখলেন ত, যা বললুম সত্যি কি না? রোগ আমার শরীরে নেই মশায়, রোগ এইখানে।” বলিয়া নিজের কপালে তর্জনী ঠেকাইল।

বরদা নিজের চেয়ারখানা ভূতনাথ সিকদারের পাশ হইতে একটু সরাইয়া লইয়া বলিল,—“আপনি যে অদ্ভুত শক্তির পরিচয় দিলেন, তা

ত চোখে দেখেও বিশ্বাস হচ্ছে না ; ভোজবাজী ব'লে মনে হচ্ছে । কিন্তু শরীর যদি আপনার নীরোগই হয়, তবে আপনি এত রোগা কেন ? মাথার কি কোনও অস্থ আছে ?”

ভূতনাথ সিকদার বলিল, “মাথার অস্থ নেই, অস্থ আমার কপালের, ভাগ্যের । বলছি ত, মৃত্যু আমাকে তাড়া ক’রে নিয়ে বেড়াচ্ছে ।”

বরদা বলিল, “কথাটা আর একটু খোলসা ক’রে না বললে ঠিক বুঝতে পারছি না ।”

সিকদার চুরুটে তিন চারটা টান দিয়া যেন কি চিন্তা করিল, শেষে বলিল, “আচ্ছা, বলছি, কিন্তু এ কথা শোনবার পর আর আপনারা আমার মুখদর্শন করিতে চাইবেন না । এই ভয়েই ত দেশদেশান্তরে পালিয়ে বেড়াচ্ছি—বাঙালীর ছায়া মাড়াতে চাই না । কিন্তু শেষ পর্য্যন্ত পেরে উঠি না । আপনারা আমায় মাফ করবেন, আমি একটা মহা অলক্ষণ, যাদের সঙ্গে মিশি, তাদেরই অমঙ্গল হয় ।”

তাহার কথাগুলি এমন একটা অবসর করণ রেশ রাখিয়া গেল যে’ কিছু না বুঝিয়াও আমার হৃদয় সহানুভূতিতে ভরিয়া গেল । হয় ত লোকটি জীবনে অনেক দুঃখশোক পাইয়াছে, তাই মাথাটা কিছু খারাপ হইয়া গিয়াছে—মনে করে, যাহার সহিত কথা কহিবে তাহারই অমঙ্গল ঘটিবে । আমার এক দূর-সম্পর্কীয়া পিসীমার এইরূপ হইয়াছিল । এক বৎসরের মধ্যে স্বামী, তিন পুত্র ও সাতটি নাতি-নাতনী হারাইয়া তিনি প্রায় পাগল হইয়া গিয়াছিলেন, সর্বদা চোখে কাপড় বাধিয়া বসিয়া থাকিতেন, বলিতেন—আমি কাহারও মুখ দেখিব না, আমার দৃষ্টি যাহার উপর পড়িবে, সে আর বাঁচিবে না । ভূতনাথ সিকদারেরও হয় ত সেই রকম কিছু হইয়া থাকিবে ।

আমি বলিলাম, “তা হোক, আপনি বলুন। ও সব অলক্ষণ-কুলক্ষণ আমরা মানি না।”

সিকদার বলিল, “আপনাদের তরুণ বয়স, ও সব না মানাই স্বাভাবিক। ভূত-প্রেত, পরকাল, হৃষ্মদেহ এ সব আপনাদের মানতে চলেছি না, কিন্তু আসন্ন দুর্ঘটনা যে আগে থাকতে মানুষের জীবনে ছায়াপাত করে, এ কথাও কি আপনারা স্বীকার করেন না?”

আমরা চুপ করিয়া রহিলাম। সিকদার বলিতে লাগিল, “তবে ব্যাপারটা গোড়া থেকেই বলি। আমার জীবন কেন যে মল্লয়াসমাজ থেকে একটা উদ্ধ্বাস পলায়ন হয়ে দাঁড়িয়েছে, তা শুনলে আপনারা হয় ত আমাকে পাগল মনে করবেন; কিন্তু বাস্তবিক আমি পাগল নই, আপনাদের মত সহজ মানুষ। পাঁচ জনের সঙ্গে মিলে মিশে, হেসে-কৈঁদে সাধারণ মানুষের মত জীবন কাটাতে চাই; কিন্তু পারি না। কেন পারি না, জানেন? ভয়! দারুণ ভয়ে আমি কারুর সঙ্গে মিশতে পারি না। একটা মহা আতঙ্ক সব সময় আমাকে গ্রাস ক’রে আছে। যখন একলা থাকি বেশ থাকি, কিন্তু আপনারাই বলুন ত, মানুষ একলা সঙ্গিহীনভাবে কত দিন থাকতে পারে? তাই মাঝে মাঝে ছুটে বেরিয়ে পড়তে হয়।”

“আমি বিবাহ করি নি, কেন করি নি তা সহজেই বুঝতে পারবেন। বাপ-মা অনেক দিন গত হয়েছেন, আত্মীয়স্বজনও এখন বড় কেউ নেই, চিৎপুর রোডের পৈতৃক বাড়ীখানা এখনও বিক্রী করি নি, টাকাও যথেষ্ট আছে, কিন্তু তবু একটা সৃষ্টিছাড়া অন্ধকার ধূমকেতুর মত কেবল শূন্যের মাঝখানে ছুটে বেড়াচ্ছি—কেন?”

“যখন আমার ষোলো বছর বয়স, তখন এক দিন গ্রীষ্মের দুপুরবেলা তিন জন নম্রবয়স্ক বন্ধুর সঙ্গে আমি আনাদের বাড়ীর তে-তলায় একটা

ঘরে ব'সে তাস খেলছিলুম। সেই দিনটা হচ্ছে আমার জীবনের একটা অভিশাপ। স্কুলে গরমের ছুটি হয়ে গেছে, রোজই আমাদের এই রকম খেলা বসে। তে-তল্লার এই ঘরটি দিব্যি নিরিবিলি, চীংপুর রোডের চীংকার সেখান পর্য্যন্ত পৌঁছায় না, শুধু মাঝে মাঝে ট্রামের ঢং ঢং শব্দ শোনা যায়। সে দিন আমরা চার জন নিবিষ্টমনে ব'সে খেলছি, এমন সময় খোলা জানালা দিয়ে একটা কালো ভোমরা ঘরে ঢুকে আমাদের ঘিরে ভনভন ক'রে ঘুরতে লাগল। খেলায় এত তন্ময় ছিলাম যে প্রথমটা লক্ষ্যই করি নি, কিন্তু সেটা যখন মাথার চারিদিকে ঘুরপাক খেতে আরম্ভ করলে, তখন আমরা চার জনেই উঠে তাকে তাড়াবার চেষ্টা করতে লাগলাম। কিন্তু সেও কিছুতেই যাবে না; পাখা দিয়ে—ব্যাডমিন্টনের ব্যাট দিয়ে যতই তাকে মাঝবার চেষ্টা করি, সেও ততই আমাদের লক্ষ্য এড়িয়ে কখনও নীচুতে, কখনও প্রায় কড়িকাঠের কাছে উঠে ঘুরতে থাকে। আমরা যেই আবার খেলতে বসি, অমনই আমাদের কাণের কাছে এসে ভোঁ ভোঁ শব্দ ক'রে উড়তে আরম্ভ করে।

“প্রায় আধ ঘণ্টা তার পিছনে লেগে থাকবার পর যখন আমরা হ্যরাণ হয়ে পড়েছি, তখন, ভোমরাটা ভণ্ণ করে এসে একবার আমাদের মাথার চারিদিকে চক্র দিয়ে নিজে থেকেই জানালা দিয়ে বেরিয়ে গেল। বাইরের তপ্ত বাতাসে তার ক্রুদ্ধ গুঞ্জন ক্রমে ক্ষীণ হয়ে মিলিয়ে গেল।

“গোপাল বললে—‘দেখ ভাই, আশ্চর্য্য ভোমরা। একবার আমি ব্যাডমিন্টন ব্যাট দিয়ে মাঝলুম, ঠিক মনে হ’ল ভোমরাটা তাঁতের ভেতর দিয়ে গ’লে গেল।’

“বীরেন বললে—‘দূর! অত বড় ভোমরা কখনও অতটুকু ফাঁক দিয়ে গলতে পারে?’

“হরিপদ বললে—‘কিন্তু এই কলকাতা সহরে ভোমরা এল কোথেকে ভাই ? কাছে-পিঠে কোথাও বাগানও ত নেই !’

“সত্যি ত, ভোমরা এল কোথেকে ? আমরা নন্দারকম আঁচ-আন্দাজ করতে লাগলুম, কিন্তু কোনটাই বেশ লাগসৈ হ’ল না। তখন আমাদের বয়স কম, ভোমরা কোথা থেকে এল, এ সমস্যা নিয়ে বেশী মাথা ঘামালুম না। কিন্তু ভোমরাটাকে মন থেকে সম্পূর্ণ ঝেড়ে ফেলতেও পারলুম না।

“পরদিন ছপ্পুরে গোপাল তাস খেলতে এল না। তিন জনে খেলা ভাল জমল না, সারা ছপ্পুর গল্প ক’রে আর গোপালকে গালাগাল দিয়ে কাটিয়ে দিলুম। „

“গোপাল গ্রে ষ্টিটে থাকত। বিকেলবেলা তার বাড়ী গিয়ে দেখলুম, সে বিছানায় শুয়ে আছে, মাথায় বরফ দেওয়া হচ্ছে। আমায় দেখে চিন্তে পারলে কি না বোঝা গেল না,—চোখের দৃষ্টি ঘোলাটে লাল। শুধু একবার গেঁড়িয়ে গেঁড়িয়ে কি একটা কথা বললে—মনে হ’ল যেন বললে—ভোমরা !

“তার চারিদিকে ডাক্তার আর বাড়ীর লোক ভিড় করেছিল ; কিন্তু কাউকে জিজ্ঞাসা করতে পারলুম না, গোপালের কি হয়েছে। পরে শুনেছিলুম—সর্দিগর্শ্ব। সান্-স্ট্রোক।

“আমি চুপি চুপি চোরের মত বাড়ী ফিরে এলুম ; তার সেই অস্পষ্ট কথাটা আমার মাথার মধ্যে কেবলই গুমরে গুমরে উঠতে লাগল—
“ভোমরা ! ভোমরা !

“পরদিন গোপাল মারা গেল। সেই থেকে, কি ক’রে জানি না, আমার মনে গের্গে গেল যে, সেই ভোমরাটা ছিল মৃত্যুর দূত। গোপালের দিন যে ‘ফুরিয়ে এসেছে, এই খবরটা সে আমাদের দিতে এসেছিল। „

“তারপর থেকে এই কুড়ি বছরের মধ্যে কতবার ভোমরা দেখেছি জানেন?—তিন’শ একুশবার। আর, একবারও আমার ভোমরা দেখা নিফল হয় নি।”

নির্দোষিত সিগারটা আগুনের মধ্যে ফেলিয়া দিয়া সিকদার আর একটা সিগার ধরাইল। আমরা নিস্তব্ধ হইয়া বসিয়া রহিলাম।

সিকদার বলিল, “প্রথম প্রথম মনে হ’ত, বুঝি আমার মনের ভুল। কিন্তু তা নয়—ভোমরাটাকে সকলেই দেখতে পায় এবং দেখার তিনদিনের মধ্যে যারা দেখেছে, তাদের মধ্যে একজনের মৃত্যু অনিবার্য। বাবা মারা যাবার আগে ভোমরা দেখলুম,—মা’র বেলাতেও দেখা পেলুম।

“ক্রমে মানুষের সঙ্গ আমার কাছে ভয়াবহ হয়ে উঠল—সর্বদাই আতঙ্ক, কি জানি কখন ভোমরা দেখে ফেলি। হয় ত পাঁচ জন বন্ধু-বান্ধব মিলে গল্প করছি, হঠাৎ ভোমরা দেখা দিলেন। ছুম ক’রে বৃকের মধ্যে হাতুড়ির ঘা পড়ল। আমার এই স্বস্থ সবল বন্ধুদের মধ্যে একজনের মেয়াদ ফুরিয়েছে—তিন দিনের মধ্যে তাঁকে যেতে হবে।

“একটা উৎকট কৌতূহল হ’ত; জানতে ইচ্ছা করত, এদের মধ্যে কাকে ভোমরা নোটিশ দিয়ে গেল। মনে মনে আন্দাজ করবার চেষ্টা করতুম—এবার কার পালা। কিন্তু আন্দাজ ঠিক হ’ত না। ভোমরার মৃত্যু-পরোয়ানার মধ্যে ঐটুকুই ছিল কৌতুক—কার উপর সমন জারি ক’রে গেল, শেষ পর্য্যন্ত বোঝা যেত না।

“একবারকার ঘটনা বলি। বর্ধমানের আমার বাড়ী গিয়েছি; আমার অনেকগুলি ছেলে-মেয়ে। পৌছনোর পরদিন সকালবেলা আমরা সকলে মিলে বারান্দায় ব’সে চা খাচ্ছি, এমন সময় ভোমরার আবির্ভাব হ’ল। আমার বৃকের ভেতরটা ধড়ফড় ক’রে উঠল। সুবী ব’লে আমার একটা বছর দশেকের মেয়ে দেয়ালের ধারে ব’সে চা তৈরী করছিল,

ভোমরাটা উড়তে উড়তে দেয়ালে ঠোকর খেয়ে টপ্ ক'রে পড়ল একেবারে স্ববীর মাথায়। স্ববী হাউমাউ ক'রে উঠে দাঁড়াতেই জলন্ত ষ্টোভটা উন্টে গিয়ে তার কাপড়ে আগুন ধ'রে গেল। ভোমরা ভেঁ ক'রে উড়ে পালাল।

“আমরা পাঁচ জনে মিলে স্ববীর কাপড়ের আগুন নেবালুম বটে, কিন্তু তার পা ছুটো বলসে শাদা হয়ে গেল। ডাক্তার এসে গুয়ুপত্রেয় ব্যবস্থা ক'রে ব'লে গেলেন—সিরিয়ান্ কিছু নয়, খুব বেঁচে গেছে।

“আমি মনে মনে বললুম—বেঁচে মোটেই যায় নি,—এ ভোমরার নোটিশ, বার্থ হবার নয়। ঘা থেকে সেপ্টিক্, তার পরেই সাফ্।

“হুপুরবেলা স্ববী'র জ্বর এল। সন্ধ্যার সময় আমি একটা ছুতো ক'রে উদ্ধ্বাসে বর্ধমান ছেড়ে পালালুম। স্ববীটা বড় ভাল মেয়ে ছিল, মামাত ভাইবোনের মতো তাকেই সবচেয়ে বেশী ভালবাসতুম।

“বাড়ী ফিরে এসে কাউকে কিছু বললুম না। যথাসময় টেলিগ্রাম এল—স্ববীর কিছু হয় নি, মামা হঠাৎ হার্ট্ ফেল্ ক'রে মারা গেছেন।

“ভোমরার অভিসন্ধি বোঝবার চেষ্টা করেছিলুম, তাই সে আমার সঙ্গে একটু ইয়াকি ক'রে গেল।

“আমার মনের অবস্থাটা একবার ভেবে দেখুন,—সর্বদা যেন মৃত্যুর দূতকে সঙ্গে ক'রে নিয়ে বেড়াচ্ছি। অনেক ভেবে ভেবে একটা মংলব ঠিক করলুম,—দিনের বেলা যতদূর সম্ভব একলা থাকতুম, রাত্তিরে বাড়ী থেকে বার হতুম। মনের ভাবটা এই যে, রাত্তিরে ত আর ভোমরা আসতে পারবে না!

“কিন্তু আমার ফন্দি খটল না। দিন-রাত্রি নির্বিচারে ভোমরা আসতে লাগল—রাত্তিরে কাণামাছির মত টাউরি খেতে খেতে আসে, আবার টাউরি খেতে খেতে চ'লে যায়।

“আমার মানসিক অবস্থা ক্রমে লোকের দৃষ্টি আকর্ষণ করতে লাগল, আত্মীয়-স্বজন, বন্ধু-বান্ধব সকলেই জিজ্ঞাসা করে, তুই অমন কুনো হয়ে যাচ্চিস কেন? ছেহারাটাও দিনদিন ভুতে পাওয়া গোছে, হয়ে যাচ্ছে। হয়েছে কি?”

“আমি চুপ ক’রে থাকি—কি বলব? সত্যি কথা কিছুতেই মুখ ফুটে বলতে পারি না।

“অতঃপর বাবা-মা মারা যাবার পর থেকে এই নিরুদ্দেশ যাত্রা শুরু হয়েছে। মানুষের কাছ থেকে পালিয়ে পালিয়ে বেড়াচ্ছি, কিন্তু মৃত্যু-দূত আমার সঙ্গ ছাড়ে না। এক এক সময় হাত যোড় ক’রে ডাকি, মরণ ভোমরা! তুমি এবার আমাকে নাও, এই দুঃসহ শাস্তি থেকে আমাকে নিষ্কৃতি দাও।—কিন্তু আমার প্রার্থনা মঞ্জুর হয় না। এ সংসারে কেবল আমিই যেন অমর, আর সকলের মৃত্যুর পরোয়ানা বয়ে বেড়াচ্ছি।”

সুকদারের কণ্ঠস্বর একটা গভীর নিরাশার মধ্যে মিলাইয়া গেল। তাহার কথাগুলো ঘরের মধ্যে যেন একটা অবাস্তব হৃৎস্পন্দের জাল বুনিয়া দিয়াছিল। আমরা আগুনের দিকে তাকাইয়া মোহাচ্ছন্নের মত বসিয়া রহিলাম।

কিছুক্ষণ পরে অমূল্য জিজ্ঞাসা করিল,—“আপনি” শেষ কবে মরণ ভোমরা দেখেছেন?”

“সুকদার চোখের উপর দিয়া ডানহাতখানা একবার চালাইয়া বলিল, “সাত দিন আগে, আগ্রায়। তাজ দেখতে গিয়েছিলুম, সেখানে একটি বাঙালী দম্পতির সঙ্গে দেখা হ’ল। স্বামী স্ত্রী দুজনে মিলে তাজ দেখতে এসেছে—ছেলেমানুষ, নবপ্রণয়ী। প্রণয়ের মহাতীর্থে নিজেদের সম্মিলিত ভালবাসা বোধ হয় নিবেদন করতে এসেছিল। তার পর...ভোমরা... সেই রাত্রেই আগ্রা ছেড়ে চ’লে এলুম।”

চার জনেরই সিগার নিভিয়া গিয়াছিল, পুনশ্চ ধরাইয়া নিঃশব্দে টানিতে লাগিলাম।

মিনিট পনের সকলেই চুপচাপ।

হঠাৎ সিকদার বলিল, “একটু গরম বোধ হচ্ছে না? জানালাটা খুলে দিতে পারি?”

বন্ধ ঘরে সিগারের কটু ধোঁয়া ও আগুনের উত্তাপে সত্যিই দম বন্ধ হইবার উপক্রম হইয়াছিল। আমরা ঘাড় নাড়িয়া সম্মতি দিতেই সিকদার উঠিয়া পশ্চিমদিকের জানালাটা খুলিয়া দিল।

বরদা আমাদের কাণে কাণে বলিল, “একেবারে বন্ধ পাগল—মনোম্যানিয়াক্। ওর চোখের চাউনি দেখছ?”

সিকদার জানালা খুলিয়া দিতেই একটা এলোমেলো কনকনে হাওয়া ঘরে ঢুকিয়া আমাদের উত্তপ্ত মুখের উপর যেন ঠাণ্ডা হাত বুলাইয়া দিল। টেবিলের উপর আলোটা নিব-নিব হইয়া আবার জ্বলিয়া উঠিল।

সিকদার ফিরিয়া আসিয়া চেয়ারে বসিয়াছে, এমন সময়—

ভন্—

ও কিসের শব্দ? চারি জনই চেয়ারের উপর সোজা শব্দ হইয়া বসিলাম।

পরক্ষণেই খোলা জানালা দিয়া একটা কালো কুচকুচে ভেঁগিয়া পাথার শব্দে আমাদের মগজ ভরিয়া দিয়া ঘরের মধ্যে ঢুকিয়া পড়িল। মজ্জমস্তকের মত আমরা তাহার দিকে তাকাইয়া রহিলাম।

ভোমরা টেবিলের উপরের বাতিটাকে একবার প্রদক্ষিণ করিল; তার পর সোঁ করিয়া উপরে উঠিয়া গিয়া ছাদে বাধা পাইয়া টপ করিয়া মেঝেয় পড়িয়া গেল। কিছুক্ষণ তাহার গুঞ্জন নিস্তব্ধ।

আবার ভন্ করিয়া শব্দ হইল। ভোমরা মেঝে হইতে উঠিয়া একবার বিদ্যাহুগে ঘরময় উড়িয়া বেড়াইল। তার পর আমাদের কাণের পাশ দিয়া ছুটিয়া গিয়ণ জানালা দিয়া বাহির হইয়া গেল। তাহার গুঞ্জন ক্ষীণ হইতে ক্ষীণতর হইয়া অবশেষে মিলাইয়া গেল।

সিকদার উঠিয়া দাঁড়াইল, তাহার চোখ দুটা পাগলের মত। প্রায় চীৎকার করিয়া শ্বলিল—“ক্ষমা করুন, ক্ষমা করুন—আমি একটা অভিসম্পাত। আর কখনও আমার দেখা পাবেন না।”—বলিয়া ওভারকোট ও টুপী ফেলিয়াই ঝড়ের মত ঘর হইতে বাহির হইয়া গেল।

আমরা তিন বন্ধু বিহ্বল জিজ্ঞাস্বভাবে পরস্পরের মুখের পানে চাহিলাম। বৃকের ভিতর তোলপাড় করিতে লাগিল।

তিন দিনের মধ্যে কাহাকে যাইতে হইবে ?

চুয়া-চন্দন

এক দিন গ্রীষ্মের শেষভাগে, সূর্য্য মধ্যাকাশে আরোহণ করিতে তখনও দণ্ড তিন-চার বাকি আছে, এমন সময় নবদ্বীপের স্নানঘাটে এক কৌতুকপ্রদ অভিনয় চলিতেছিল।

ভাগীরথীর পূর্ব্বতটে নবদ্বীপ। স্নানের ঘাটও অতি বিস্তৃত—এক গঙ্গাঘাটে লক্ষ লোক স্নান করে। ঘাটের সারি সারি পৈঠাগুলি যেমন উত্তর-দক্ষিণে বহুদূর পর্য্যন্ত প্রসারিত, তেমনি প্রত্যেকটি পৈঠা প্রায় সে-কালের সাধারণ রাজপথের মত চওড়া। গ্রীষ্মের প্রথরতায় জল শুকাইয়া প্রায় সব পৈঠাই কাহির হইয়া পড়িয়াছে—ছু'এক ধাপ নাগিলেই নদীর কাদা পায়ে ঠেকে। স্নানের ঘাট যেখানে শেষ হইয়াছে, সেখান হইতে বাঁধানো থেয়াঘাট আরম্ভ। তথায় থেয়ার নৌকা, জেলে ডিক্কি, দুই-একটা হাজার-মণী মহাজনী ভড় বাঁদা আছে। নৌকাগুলির ভিতরে দৈনিক রন্ধনকাষা চলিতেছে,—ছৈ ভেদ করিয়া মুছ মুছ ধূম উঠিত হইতেছে।

বহুজনা কীর্ণ স্নান-ঘাটে ব্যস্ততার অন্ত নাই। আজ কৃষ্ণ চতুর্দশী। ঘাটের জনতাকে সমগ্রভাবে দর্শন করিলে মনে হয়, মুণ্ডিতশীর্ষ উপবীত-ধারী ব্রাহ্মণ ও প্রোট-বৃদ্ধা নারীর সংখ্যাই বেশী! ছেলে-ছোকরার দলও নেহাৎ কম নয়; তাহারা সাঁতার কাটিতেছে, জল তোলপাড় করিতেছে। নারীদের স্নানের জন্ত কোনও পৃথক ব্যবস্থা নাই, যে যেখানে পাইতেছে সেখানেই স্নান করিতেছে। তরুণী বধূরা ঘোমটায় মুখ ঢাকিয়া টুপ টুপ ডুব দিতেছে। পদ্মা প্রথা বলিয়া কিছু নাই বটে, তবু অবগুণ্ঠন দ্বারা শালীনতা-রক্ষার একটা চেষ্টা আছে; যদিও সে চেষ্টা তল্প-সংলগ্ন সিন্ধবস্ত্রে বিশেষ মর্য্যাদা পাইতেছে ন্দ। সেকালে বাঙালী মেয়েদের দেহলাবণ্য গোপন করিবার সংস্কার বড় বেশী প্রবল ছিল না; গৃহস্থ কন্যাদের কাঁচুলি পরিবার রীতিও প্রচলিত হয় নাই।

যে যুগের কথা বলিতেছি, তাহা আজ হইতে চারি শতাব্দীরও অধিককাল হইল অতীত হইয়াছে। সম্ভবতঃ আমাদের উদ্ধৃত্তন পঞ্চদশ পুরুষ সে সময় জীবিত ছিলেন। তখন বাঙলার ঘোর দুর্দিন যাইতেছিল। রাজশক্তি পাঠানের হাতে; ধর্ম ও সমাজের বন্ধন বহু যুগের অবহেলায় গলিত রজ্জ্ব-বন্ধনের দ্বায় থসিয়া পড়িতেছে। দেশও যেমন অরাজক, সমাজও তেমনি বহুরাজক। কেহ কাহারও শাসন মানে না। মৃত বৌদ্ধধর্মের শবনির্গলিত তন্ত্রবাদের সহিত শাক্ত ও শৈব মতবাদ মিশ্রিত হইয়া যে বীভৎস বামাচার উদ্ভূত হইয়াছে—তাহাই আকর্ষণ পান করিয়া বাঙালী অন্ধ-মত্ততায় অধঃপথের পানে স্থলিতপদে অগ্রসর হইয়া চলিয়াছে। সহজিয়া সাধনার নামে যে উচ্ছৃঙ্খল অনাচার চলিয়াছে, তাহার কোনও নিষেধ নাই। কে কাহাকে নিষেধ করিবে? যাহারা শক্তিমান, তাহারাই উচ্ছৃঙ্খলতায় অগ্রবর্তী। দাতৃকাসাধন পঞ্চমকার উদ্দাম নৃত্যে আসর দখল করিয়া আছে। প্রকৃত মন্ত্রযন্ত্রের চর্চা দেশ হইতে যেন উঠিয়া গিয়াছে।

তখনও স্মার্ত্ত রঘুনন্দন আচারকে ধর্মের নিগূঢ় বন্ধনে বাঁধিয়া সমাজের শোধন-সংস্কার আরম্ভ করেন নাই। কাণভট্ট রঘুনাথ মিথিলা জয় করিয়া ফিরিয়াছেন বটে, কিন্তু নবদ্বীপে সরস্বতীর পীঠ দৃঢ়ভাবে প্রতিষ্ঠিত হয় নাই। নদের নিমাই তখনও ব্যাকরণের টোলে ছাত্র পড়াইতেছেন ও নন্দাপ্রকার 'ছেলেমানুষী' করিতেছেন। তখনও সেই হরিচরণশ্রুত প্রেমের বত্তা আসে নাই—বাঙালীর ক্লেদকলুষিত চিত্তের বহু শতাব্দী সঞ্চিত মলামাটী সেই পূত প্রবাহে ধৌত হইয়া যায় নাই।

১৪২৬ শকাব্দর প্রারম্ভে এক কৃষ্ণ চতুর্দশীর পূর্বাহ্নে বাঙলার কেন্দ্র নবদ্বীপের ঘাটে কি হইতেছিল, তাহাই লইয়া এই আখ্যায়িকার আরম্ভ।

ঘাটে যে সকলেই স্নান করিতেছে, তাহা নয়। এক পাশে সারি সারি নাপিত বসিয়া গিয়াছে; বহু ভট্টাচার্য্য গোসাই গলা বাড়াইয়া ক্ষৌরী হইতেছেন। বৃক্শের গোলাকৃতি চাতুলে একদল উলঙ্গপ্রায় পণ্ডিত দেহে সবেগে তৈলমর্দন করিতে করিতে ততোধিক বেগে তর্ক করিতেছেন। বাসুদেব সার্কভৌম মিথিলা হইতে সর্ববিজ্ঞার পারঙ্গম হইয়া ফিরিয়া আসিবার পর হইতে নবদ্বীপে বিজ্ঞাচর্চার সূত্রপাত হইয়াছিল। কিন্তু বিজ্ঞা তখনও হৃদয়ে আসন স্থাপন করেন নাই; তাই বাঙালী পণ্ডিতের মুখের দাপট কিছু বেশী ছিল। শাস্ত্রীয় তর্ক অনেক সময় অঁচড়া-কাইড়িতে পরিসমাপ্তি লাভ করিত।

তৈল-মসৃণ পণ্ডিতদের তর্কও ন্যায়শাস্ত্রের সীমানা ছাড়াইয়া অরাজকতার দেশে প্রবেশ করিবার উপক্রম করিতেছিল। এক জন অতি গৌরবান্বিত যুবা—বয়স বিশ বছরের বেশী নয়—তর্ক বাধাইয়া দিয়া, পাশে দাঁড়াইয়া তাহাদের বিতণ্ডা শুনিতেছিল ও মুহুঃ মুহুঃ হাস্য করিতেছিল। তাহার ঈশদর্শন আয়ত চক্ষু হইতে যেন তীক্ষ্ণ বুদ্ধি, পাণ্ডিত্যের অভিমান ও কৌতুক এক সঙ্গে ফরিয়া পড়িতেছিল।

জলের কিনারায় বসিয়া কেহ কেহ পায়ে ঝাঝা ঘষিতেছিল। নারীরা বস্ত্রাবরণের মধ্যে ক্ষার-খেল দিয়া গাত্র মার্জনা করিতেছিল। কয়েক জন বর্ষীয়ান ব্রাহ্মণ আবক্ষ জলে নাগিয়া পূর্বমুখ হইয়া আফ্রিক করিতেছিলেন।

এই সময় দক্ষিণদিকে গঙ্গার বাঁকের উপর দুইখানি বড় সামুদ্রিক নোকা পালের ভরে উজ্জান ঠেলিয়া ধীরে ধীরে নবদ্বীপের ঘাটের দিকে অগ্রসর হইতেছিল—অধিকাংশ স্নানার্থীর দৃষ্টি সেই দিকেই নিবদ্ধ ছিল। সমুদ্রযাত্রী বাণিজ্য তরীদের দেশে ফিরিবার সময় উপস্থিত হইয়াছে; প্রতি সপ্তাহেই দুটি একটি করিয়া ফিরিতেছিল।

ক্রমে নৌকা ছুটি খেয়ার ঘাটে গিয়া ভিড়িল। মধুকর ডিম্বার ছাদের উপর একজন যুবা দাঁড়াইয়া পরম আগ্রহের সহিত ঘাটের দৃশ্য দেখিতেছিল; পাল নুমাইবার সঙ্গে সঙ্গে সেও তীরে অবতরণ করিবার জন্ত ছাদ হইতে নামিয়া গেল।

বড় নৌকা ঘাটের নিকট দিয়া যাইবার ফলে জলে ঢেউ উঠিয়া ঘাটে আঘাত করিতে আরম্ভ করিয়াছিল; অনেক ছেলে-ছোকরা কোমরে গামছা বাঁধিয়া ঢেউ খাইবার জন্ত জলে নামিয়াছিল। ঢেউয়ের মধ্যে বহু সম্ভরণকারী বালকের হস্তপদসঞ্চালনে ঘাট আলোড়িত হইয়া উঠিয়াছিল।

হঠাৎ তীর হইতে একটা ‘গেল গেল’ রব উঠিল। যে গোরকান্তি সুবাটি এতক্ষণ দাঁড়াইয়া তর্করত পণ্ডিতদের রঙ্গ দেখিতেছিল, সে দুই লাফে জলের কিনারায় আসিয়া জিজ্ঞাসা করিল,—“কি হয়েছে?”

কয়েক জন সমস্বরে উত্তর দিল,—“কানা-গোসাই এতক্ষণ জলে দাঁড়িয়ে আফিক করছিলেন, হঠাৎ তাঁকে আর দেখা যাচ্ছে না। ভাবে ভোলা মানুষ, হয় ত নৌকার ঢেউ লেগে তলিয়ে গেছেন।”

যুবা কোমরে গামছা বাঁধিতে বাঁধিতে শুনিতেছিল, আদেশের স্বরে কহিল,—“তোমরা কেউ জলে নেমো না, তা হ’লে গুণ্ডগোল হবে। আমি দেখছি।” বলিয়া সে জলে ঝাঁপাইয়া পড়িল।

‘গ্রীষ্মকালে’ ঘাটে স্নান করা ভাবে-ভোলা মানুষদের পক্ষে সর্বদা নিরাপদ নয়। কারণ, জলের মধ্যে দুই ধাপ সিঁড়ি নামিয়াই শেষ হইয়াছে—তার পর কাদা। এখানে বুক পর্যন্ত জলে বেশ যাওয়া যায়, কিন্তু আর এক পা অগ্রসর হইলেই একবারে ডুবজল। যুবক জলে ঝাঁপ দিয়া কয়েক হাত সাঁতার কাটিয়া গেল, তার পর অর্ধে জলে গিয়া ডুব দিল।

কিছুক্ষণ তাহার আর কোনও চিহ্ন নাই। ঘাটের ধারে কাতার দিয়া লোক দাঁড়াইয়া দেখিতেছে। সকলের মুখেই উদ্বেগ ও আশঙ্কার ছায়া। কয়েক জন প্রোটা স্ত্রীলোক ক্রন্দন-করণ স্বরে হা-ভুতাশ করিতে আরম্ভ করিয়া দিল।

পঞ্চাশ গণিতে যতক্ষণ সময় লাগে, ততক্ষণ পরে যুবকের মাথা জলের উপর জাগিয়া উঠিল। সকলে হৃৎকানি করিয়া উঠিল—কিন্তু পরক্ষণেই আবার নীরব হইল। যুবক নিমজ্জিত ব্যক্তিকে খুঁজিয়া পায় নাই, সে বারকয়েক স্বদীর্ঘ নিশ্বাস টানিয়া আবার ডুব দিল।

এবারও সমধিক কাল ডুবিয়া থাকিয়া সে আবার উঠিল; একবার মজোরে মস্তক সঞ্চালন করিয়া এক হাতে সাতার কাটিয়া তীরের দিকে অগ্রসর হইল।

সকলে সচীংকারে প্রশ্ন করিল,—“পেয়েছ ? পেয়েছ ?”

যুবক ইঁপাইতে ইঁপাইতে বলিল,—“বলতে পারি না। তবে এক মুঠো টিকি পেয়েছি।”

যুবক যখন তীরে আসিয়া উঠিয়া দাঁড়াইল, তখন সকলে বিস্মিত হইয়া দেখিল, তাহার বামমুষ্টি এক গুচ্ছ পরিপুষ্ট শিখা দৃঢ়ভাবে ধরিয়া আছে এবং নিমজ্জিত পণ্ডিতের দেহসমেত সুগু উক্ত শিখার সহিত সংলগ্ন হইয়া আছে।

কিয়ৎকাল শুশ্রূষার পর পণ্ডিতের চৈতন্য হইল। তিনি কিছু জল পান করিয়াছিলেন, তাহা উৎক্ষিপ্ত হইবার পর চক্ষু মেলিয়া চাহিলেন। যুবক সহাস্ত-কণ্ঠে জিজ্ঞাসা করিল, “শিরোমণি মশায়, বলুন দেখি বেঁচে আছেন না ম’রে গেছেন? আপনার নব্য ত্রাণশাস্ত্র কি বলে?”

শিরোমণি একচক্ষু দ্বারা কিছুক্ষণ ফ্যাল ফ্যাল করিয়া চাহিয়া থাকিয়া ক্ষীণকণ্ঠে কহিলেন,—“কে—নিপাতনে সিদ্ধ? ডুবে গিয়েছিলুম—না?”

তুমি বাঁচালে?” যুবককে শিরোমণি মহাশয় ‘নিপাতনে সিদ্ধ’ বলিয়া ডাকিতেন। একটু ব্যাকরণের খোঁচাও ছিল; কুটতর্কে অপরাধেয় শক্তির জন্য সমাদরমিশ্রিত স্নেহও ছিল।

নিপাতনে সিদ্ধ হাসিয়া বলিল,—“বাঁচাতে পেরেছি কি না, সেই কথাই ত জিজ্ঞাসা করছি। যদি বেঁচে থাকেন, ত্রাণের প্রমাণ দিন।”

কাণভট্ট ধীরে ধীরে উঠিয়া বসিলেন। এইমাত্র মৃত্যুর মুখ হইতে ফিরিয়া আসিয়াছেন—শরীরে বল নাই; কিন্তু তাঁহার এক চক্ষুতে প্রাণময় হাসি ফুটিয়া উঠিল; তিনি বলিলেন,—“প্রমাণ নিশ্চয়োজন। আমি বেঁচে আছি—এ কথা স্বয়ংসিদ্ধ। আমি বেঁচে নেই, এ কথা যে বলে, সে তৎক্ষণাৎ প্রমাণ ক’রে দেয় যে, সে বেঁচে আছে। বাজীকর যত কৌশলী হোক, নিজের স্বন্ধে আরোহণ করতে অক্ষম; মানুষ তেমনি নিজেকে অস্বীকার করতে পারে না।”

নৈয়ায়িকের কথায় সকলে হাসিয়া উঠিল। নিপাতনে সিদ্ধ বলিল,—“যাক, তা হ’লে নিশ্চিত হওয়া গেল।—এখন উঠতে পারবেন কি?”

শিরোমণি তাহার হাত ধরিয়া দাঁড়াইলেন, বলিলেন,—“হঠাৎ হাতে পায়ে কেমন খিল ধ’রে গিয়েছিল। নিপাতন, তুমিই জল থেকে টেনে তুলেছ—না?”

নিপাতন বলিল,—“উহু। আপনাকে টেনে তুলেছে আপনার প্রচণ্ড পাণ্ডিত্যের বিজয়-নিশান।”

“সে কি?”

“আপনার নধর শিখাটিই আপনার প্রাণদাতা। ওটি না থাকলে কিছুতেই টেনে তুলতে পারতাম না।”

“জ্যাঠা ছেলে।”

“আপনার পৈতে ছুঁয়ে বলছি—সত্যি কথা।—কিন্তু সে যাঁ হোক, একলা বাড়ী ফিরতে পারবেন ত ?”

“পারব, এখন বেশ স্বস্থ বোধ করছি”—তার পর তাহার হাত ধরিয়া বলিলেন,—“বিশ্বস্তর, এত দিন জানতাম তুমি নিপাতনেই সিদ্ধ, কিন্তু এখন দেখছি প্রাণদানেও তুমি কম পটু নও। আশীর্বাদ করি, এমন ভাবে মজ্জমানকে উদ্ধার করেই যেন তোমার জীবন সার্থক হয়।”

নিপাতন হাসিয়া বলিল,—“কি সৰ্কুনাশ ! শিরোমণি মশাই, ও আশীর্বাদ করবেন না। তা হ’লে আমার ব্যাকরণ টোলের কি দশা হবে ?”

ও দিকে নৌকার মালিক যুবকটি এ সব ব্যাপার কিছুই জানিতে পারে নাই। সে নগর-ভ্রমণের উপযুক্ত সাজসজ্জা করিয়া ঘাটে নামিল। স্বান-ঘাটের দিকে দৃষ্টি পড়িতেই সে থমকিয়া দাঁড়াইয়া পড়িল। দেখিল, এক অতি গৌরবান্বিত সুপুরুষ যুবা এক জন মধ্যবয়স্ক একচক্ষু ব্যক্তির সহিত দাঁড়াইয়া কথা কহিতেছে। এই গৌরব যুবকের অপূর্ণ দেহসৌষ্ঠব দেখিয়া সে মুগ্ধ হইয়া গেল। সে পৃথিবীর অনেক দেশ দেখিয়াছে ; সিংহল, কোচিন, সুমাত্রা, যবদ্বীপ—কোথাও যাইতে তাহার বাকি নাই। কিন্তু এমন অপূর্ণ তেজোদীপ্ত পুরুষমূর্তি আর কখনও দেখে নাই।

একজন জেলে মাঝি নিজের ক্ষুদ্র ডিক্কীতে বসিয়া জাল বুনিতেছিল, যুবক তাহাকে জিজ্ঞাসা করিল,—“বাপু, ঐ লোকটি কে জান ?”

জেলে একবার চোখ তুলিয়া বলিল,—“ঐ উনি ? উনি নিমাই পণ্ডিত।”

যুবক • ভাবিল—পণ্ডিত ! এত অল্পবয়সে পণ্ডিত ! যুবকের নিজের

পাণ্ডিত্যের সহিত কোনও সুবাদ ছিল না। সে বেণের ছেলে, বুদ্ধির বলেই সাত সাগর চষিয়া সোণাদানা আহরণ করিয়া আনিয়াছে। সে আর একবার নিমাই পণ্ডিতের অনিন্দ্য দেহকান্তির প্রতি দৃষ্টিপাত করিয়া কষ্টচিন্তে নগর পরিদর্শনে বাহির হইল।

২

বেণের ছেলের নাম চন্দনদাস। বেশ সুশ্রী চোখে-লাগা চেহারা ; বয়স একুশ বাইশ। বুদ্ধিমান, বাকপট, বিনয়ী—বেণের ছেলের যত প্রকার গুণ থাকা দরকার, সবই আছে ; বরং দেশ-বিদেশে ঘুরিয়া নানাজাতীয় লোকের সহিত মিশিয়া আরও পরিমার্জিত হইয়াছে। বেশভূষাও ঘরবাসী বাঙালী হইতে পৃথক। পায়ে সিংহলী চটি, পরিধানে চাঁপা রঙের রেশমী শ্রুতি মালসাট করিয়া পরা ; স্কন্ধে উত্তরীয়। দুই কাণে হীরার লবঙ্গ ; মাথার কোঁকড়া চুল কাঁধ পর্যন্ত পড়িয়াছে—মাঝখানে সিঁথি। গলায় সোনাগ হার বণিকপুত্রের জাতি-পরিচয় দিতেছে।

চন্দনদাস অগ্রদ্বীপের প্রসিদ্ধ সওদাগর রূপচাঁদ সাধুর পুত্র। রূপচাঁদ সাধুর বয়স হইয়াছে, তাই এবার নিজে না গিয়া উপযুক্ত পুত্রকে বাণিজ্যে পাঠাইয়াছিলেন। এক বৎসর নয় মাস পরে ছেলে বিলক্ষণ ছ'পয়সা লাভ করিয়া দেশে ফিরিতেছে। বহুদিন একাদিক্রমে নৌকা চালাইয়া মাঝি-মাল্লারা ক্লান্ত ; তাই একদিনের জন্ত চন্দনদাস নবদ্বীপে নৌকা বাধিয়াছে। কাল প্রভাতেই আবার গৃহাতিমুখে যাত্রা করিবে।

চন্দনদাস হরষিত-মনে গঙ্গাঘাটের পথ ধরিয়া নগর দর্শনে চলিল। সে-সময় নবদ্বীপের সমৃদ্ধির বিশেষ খ্যাতি ছিল। পথে পথে নাটশালা,

পাঠশালা, চূর্ণ-বিলেপিত দেউল, প্রতি গৃহচূড়ায় বিচিত্র খাতু-কলস, প্রতি ঘারে কারু-খচিত কপাট ; বাজারের এক বিপণিতে লক্ষ তক্ষার সওদা কেনা যায় । পথগুলি সন্ধীর্ণ বটে, কিন্তু তাহাতে নগরশ্রী আরও ঘনীভূত হইয়াছে । রাজপথে বহু লোকের ব্যস্ত যাতায়াত নগরকে সজীব ও প্রাণবন্ত করিয়া তুলিয়াছে ।

অনায়াস-মস্তুরপদে চন্দনদাস চারিদিকে চাহিতে চাহিতে চলিয়াছিল ; কিছুদূর যাইবার পর একটি দ্বিনিম দেখিয়া ইহাং তাহার বাইশ বছরের মুণ্ড ঘুরিয়া গেল ; সে পথের মাঝখানেই মস্তমূন্ধবৎ দাঁড়াইয়া পড়িল । বেচারী চন্দনদাস সাত সাগর পাড়ি দিয়াছে, কিন্তু সে বিদ্যাপতির কাব্য পড়ে নাই—‘মেঘমাল সঞ্চে তড়িতলতা জলু হৃদয়ে শেল দেই গেল’ এরূপ ব্যাপার যে সম্ভবপর, তাহা সে জানিত না । বিদ্যাপতি জানা থাকিলে হয় ত ভাবিতে পারিত—

অপরূপ পেপলু রামা

কনকলতা অব-

লসনে উয়ল

হরিণহীন হিমদামা ।

কিন্তু চন্দনদাস কাব্যরসবঞ্চিত বেণের ছেলে, আশ্চর্য্যতভাবে ইা করিয়া তাকাইয়া রহিল ! প্রভাতে সে কাহার মুখ দেখিয়া উঠিয়াছিল কে জানে, কিন্তু আজ তাহার স্মন্দর মুখ দেখিবার পালা ।

যাহাকে দেখিয়া চন্দনদাসের মুণ্ড ঘুরিয়া গিয়াছিল, সে মেয়েটি এক জন বয়স্কা সহচরীর সঙ্গে ঘাটে স্নান করিতে যাইতেছিল । পূর্ণবৌবনা ষোড়শী—তাহার স্নপের বর্ণনা করিতে গিয়া হতাশ হইতে হয় । বৈষ্ণব রসসাহিত্য নিঙড়াইয়া এই স্নপের একটা কাঠামো খাড়া করা যাইতে পারে ; হয় ত এমনই কোনও গোরোচনা গোরী নবীনার নববিকশিত রূপ দেখিয়া প্রেমিক বৈষ্ণব কবি তাহার রাই কমলিনীকে গড়িয়াছিলেন,

কে বলিতে পারে? মেয়েটির প্রতি পদক্ষেপে দর্শকের হৃৎকমল ছলিয়া ছলিয়া উঠে, যেন হৃৎকমলের উপর পা ফেলিয়া সে চলিয়াছে। তাহার মন্দির নয়নের অপাঙ্গদৃষ্টিতে মনের মধ্যে মধুর মাদকতা উদ্গুথিত হইয়া উঠে।

কিন্তু এত রূপ সত্ত্বেও মেয়েটির মুখখানি স্নান, যেন তাহার উপর কালো মেঘের ছায়া পড়িয়াছে। চোখ দুটি অবনত করিয়া ধীরপদে সে চলিয়াছে; তৈলসিক্ত চুলগুলি পিঠের উপর ছড়ানো; পরণে আটপোরে রাঙাপাড় সাদী। দেহে একখানিও গহনা নাই, এমন কি, নাকে বেসর কাণে ছল পযাস্ত নাই। কেবল দুই হাতে দু'গাছি শঙ্খ।

মেয়েটির সঙ্গে যে সহচরী রহিয়াছে, তাহাকে সহচরী না বলিয়া প্রতিহারী বলিলেই ভাল হয়। সে যেন চারিদিক্ হইতে তাহাকে আগলাইয়া চলিয়াছে। তাহাকে দেখিলেই বুঝা যায়, বিগত-যৌবনা ভ্রষ্টা স্ত্রীলোক। আঁট-সাঁট দোহারা গঠন, গোলাকৃতি মুখ, কলহপ্রিয় বড় বড় দুটা চোখ যেন সর্বদাই ঘুরিতেছে।

চন্দনদাস হাঁ করিয়া পথের মধ্যস্থলে দাঁড়াইয়া রহিল, মেয়েটি তাহার পাশ দিয়া চলিয়া গেল। পাশ দিয়া যাইবার সময় একবার চকিতের ন্যায় চোখ তুলিল, আবার তৎক্ষণাৎ মাথা হেঁট করিল। সঙ্গিনী স্ত্রীলোকটা কট্‌মট্‌ করিয়া চন্দনদাসের পানে তাকাইল, তাহার আত্মবিশ্বস্ত বিহ্বলতার জন্য যেন কিছু বলিবে মনে করিল। কিন্তু চন্দনদাসের বিদেশীর মত সাজ-সজ্জা দেখিয়া কিছু না বলিয়া সমস্ত দেহের একটা স্বেয়গীম্বলভ ভঙ্গী করিয়া চলিয়া গেল।

চন্দনদাসও অমনই ফিরিল। তাহার ভ্রমের কথা আর মনে ছিল না, সে একদৃষ্টে মেয়েটির দিকে তাকাইয়া রহিল। মেয়েটিও কয়েক পা গিয়া একবার ঘাড় বাঁকাইয়া পিছু ফিরিয়া চাহিল। 'গেলি কামিনী,

গজছ গামিনী, বিহসি পালটা নেহারি’—চন্দনদাসের যেটুকু সর্বনাশ হইতে বাকি ছিল, তাহাও এবার হইয়া গেল।

সেও গঙ্গাঘাটের দিকে ফিরিল; অগ্রবর্ত্তিনী স্নানার্থিনীদের দৃষ্টি-বহির্ভূত হইতে না দিয়া তাহাদের পিছু পিছু চলিল।

ক্রমে তাহারা ঘাটের সম্মুখে পৌঁছিল। এখানে চন্দনদাস আবার নিমাই পণ্ডিতকে দেখিতে পাইল। তিনি স্নান শেষ করিয়া বোধ হয় গৃহে ফিরিতেছিলেন; ভিজা গামছা গায়ে জড়ানো। চন্দনদাস লক্ষ্য করিল, মেয়েটির প্রতি দৃষ্টি পড়িতেই নিমাই পণ্ডিতের যুখে একটা ক্ষুদ্র কারুণ্যের ভাব দেখা দিয়াই মিলাইয়া গেল। তিনি অতৃপ্তিকে মুগ্ধ ফিরাইয়া দ্রুতপদে প্রস্থান করিলেন।

অতঃপর স্ত্রীলোক দুইটা ঘাটে গিয়া স্নান করিল। চন্দনদাস একটু আড়ালে থাকিয়া চোরা চাহনিতে দেখিল। চন্দনদাস দুঃস্থ নয়,—“অসংশয়ঃ ক্ষত্রপরিগ্রহক্ষমা” তাহার মনে আসিল না; কিন্তু নানা ক্ষুদ্র ক্ষুদ্র কারণে তাহার ধারণা জন্মিল যে, মেয়েটা বেণের গেয়ে, তাহার স্বজাতি। কিন্তু একটা কথা সে কিছুতেই বুঝিতে পারিল না, এত বয়স পর্য্যন্ত মেয়েটি অনুচ্চ কেন? বিধবা নয়, হাতের শঙ্খ ও রাঙা পাড় সাড়ী তাহার প্রমাণ। তবে যোলা সতের বছরের গেয়ে বাঙালা দেশে অবিবাহিত থাকে কি করিয়া?

কিন্তু সে যাহা হউক, স্নান সারিয়া তাহারা যখন ফিরিয়া চলিল, তখন সেও তাহাদের পিছু লইল।

চন্দনদাসের ব্যবহারটা বর্ত্তমানকালে কিছু বর্বরোচিত বোধ হইতে পারে। কিন্তু এ কালের কুটি দিয়া সে কালের শিষ্টাচার বিচার করা সর্বথা নিরাপদ নয়। তা ছাড়া, উপস্থিত ক্ষেত্রে শিষ্টাচারের স্বল্প অনুশাসন মনিয়া চলিবার মত হৃদয়স্তের অবস্থা চন্দনদাসের ছিল না।

তাহার কাঁচা হৃদয়টুকু একেবারেই অবশ হইয়া পড়িয়াছিল। বিশেষ দোষ দেওয়াও যায় না। অল্পস্বপ্ন অবস্থায় পড়িয়া সে কালের ঠাকুর-দেবতারাও কিরূপ বিহ্বল বে-এক্টিয়ার হইয়া পড়িতেন, তাহা ত ভক্ত কবিগণ লিপিবদ্ধ করিয়াই গিয়াছেন। —“এ ধনি কে কহ বটে!”

মোট কথা, চন্দনদাস তাহার মন-চোরা মেয়েটির পশ্চাৎ পশ্চাৎ চলিল। এ পথ হইতে ও পথে কয়েকটা মোড় ফিরিয়া প্রায় একপোয়া পথ অতিক্রম করিবার পর মেয়েটি এক গলির মধ্যে প্রবেশ করিল। চন্দনদাস দেখিল, পাড়াটা অপেক্ষাকৃত গরীব বেণে-পাড়া। অধিকাংশ বাড়ীর খড়ের বা খোলার চাল।

গলির মধ্যে কিছুদূর গিয়া মেয়েটি এক ক্ষুদ্র পাকা বাড়ীর দালানে উঠিয়া অদৃশ্য হইয়া গেল। বাড়ীটা পাকা বটে, কিন্তু অতিশয় জীর্ণ ও শ্রীহীন। বাড়ীর সম্মুখীন হইয়া চন্দনদাস দেখিল, দালানের উপর একটি ক্ষুদ্র বেণের দোকান। আদা, মরিচ, হলুদ, লঙ্কা ছোট ছোট ধামিতে সাজানো আছে; এক জন বৃদ্ধা স্ত্রীলোক বেসাতি করিতেছে। দালানের পশ্চাদ্ভাগে একটি দ্বার, উহাই অন্তরে প্রবেশ করিবার পথ। চন্দনদাস বুঝিল, ঐ পথেই মেয়েটি ও তাহার সঙ্গিনী অন্তরে প্রবেশ করিয়াছে।

চন্দনদাস বড় সমস্যায় পড়িল। সে কোন মতেই স্থির করিয়া ইহাদের অনুসরণ করে নাই, গুণের নোকার শ্রায় অদৃশ্য রজ্জুবন্ধন তাহাকে টানিয়া আনিয়াছে। কিন্তু এখন সে কি করিবে? কেবলমাত্র মেয়েটির বাড়ী দেখিয়া ফিরিয়া যাইবে? চন্দনদাস বাড়ীর সম্মুখ দিয়া কয়েকবার অলসভাবে যাতায়াত করিয়া কর্তব্য স্থির করিয়া লইল। তাহার হঠাৎ মনে পড়িয়া গেল, তাহার মা তাহাকে নবদ্বীপ হইতে ভাল চুয়া কিনিয়া আনিতে বলিয়াছিলেন। সে কথা সে ভুলে নাই, আজ মগর-ভ্রমণের

সময় কিনিয়া লইবে স্থির করিয়াছিল। কিন্তু চুয়া কিনিবার অছিল। এমনভাবে সদ্যবহার করিবার কথা এতক্ষণ তাহার মনেই আসে নাই।

সে দৃঢ়পদে দোকানের সম্মুখীন হইল : মিঠা হাসিয়া বুড়ীকে জিজ্ঞাসা করিল, “ই্যাগো ভাল মানুষের মেয়ে, তোমার দোকানে ভাল চুয়া আছে ?”

• ৩

যে বৃদ্ধা বেসম্ভতি করিতেছিল, তাহার দেহ-যষ্টিতে বিন্দুমাত্র রস না থাকিলেও প্রাণটা তাজা ও সরস ছিল। চন্দনদাসকে বাড়ীর সম্মুখে অকারণ ঘুরঘুর করিতে দেখিয়া বুড়ী এই অনিশ্চিত ঘোরা-ঘুরির গূঢ় কারণটি ধরিয়া ফেলিয়াছিল এবং মনে মনে একটু আমোদ অনুভব করিতেছিল। পাড়ার কোনও চ্যাংড়া ছোড়া হইলে বুড়ী মুখ ছাড়িত ; কিন্তু এই কান্তিমান স্বদর্শন ছেনেটির বিদেশীর মত সাজ-পোষাক দেখিয়া সে একটু আকৃষ্ট হইয়াছিল।

চন্দনদাসের প্রশ্নের উত্তরে সে বলিল, “আছে বৈ কি বাছা। এসো, বোসো।”

চন্দনদাসও তাই চায়, সে দালানে উঠিয়া জলচৌকির উপর চাপিয়া বসিল। জিজ্ঞাসা করিল,—ই্যা গা, তোমাদের বাড়ীতে কি পুরুষমানুষ নেই ? তুমি নিজে বেসম্ভতি করছ যে ?”

বৃদ্ধা নিশ্বাস ফেলিয়া বলিল,—“সে কথা আর বোলো না বাছা। একটা ব্যাটাছেলে ঘরে থাকলে কি আজ আমাদের এমন খোঁয়ার হয় ?”—তারপর কথা পান্টাইয়া বলিল,—“তা ই্যা বাছা, তোমাকে ত আগে কখনও দেখিনি, নদের লোক নও বুঝি ?”

চন্দনদাস বলিল,—না, আমার বাড়ী অগ্রদ্বীপ।”

বুড়ী বলিল—“ও—তাই। কথায় বার্তায় যেন বেণের ছেলে ব’লে মনে হচ্ছে।”

চন্দনদাস তখন জাতি-পরিচয় দিল, নিজের ও পিতার নাম উল্লেখ করিল। বুড়ী ছুঁদণ্ড বসিয়া গল্প করিবার লোক পায় না, সে আহ্লাদে গদ-গদ হইয়া বলিল,—“ও মা, তুমি ত আমাদের ঘরের ছেলে গো—স্বজাত। আহা যেমন সোনার কান্তিকের মত চেহারা, তেমন মা’র কোল জুড়ে বেঁচে থাক।—কোথায় বিয়ে-থা করেছ?”

চন্দনদাস কহিল,—“তের বছর বয়সে বিয়ে হয়েছিল আমি, এক বছর পরেই বৌ ম’রে যায়। তারপর আর বিয়ে করিনি।”

বুড়ী একটু বিমনা হইল; তার পর উৎসুক ভাবে নানা কথা জিজ্ঞাসা করিতে লাগিল।

চন্দনদাস কথাপ্রসঙ্গে বলিল,—“সমুদ্রে গিয়েছিলাম আমি, ছ’বছর পরে দেশে ফিরছি। তা ভাবলাম, নদেয় একদিন থেকে যাই; মা’র বরাত আছে চুয়া কেনবার, চুয়া কেনাও হবে, একটু জিরেণ দেওয়াও হবে।”

বুড়ী বলিল,—“তা বেশ করেছ বাবা, ভাগ্যিস এসেছিলে তাই ত অমন চাঁদমুখখানি দেখতে পেলাম—” বুড়ী একটা নিশ্বাস ফেলিল। তাহার প্রাণের ভিতরটা হায় হায় করিয়া উঠিল। আহা, যদি সম্ভব হইত!

চন্দনদাস এতক্ষণ ফাঁক খুঁজিতেছিল, জিজ্ঞাসা করিল,—“আমি, তোমার আপনার জন কি কেউ নেই?”

“একটি নাতনী আছে, আর সব ম’রে হেজে গেছে। পোড়া-কপালী ছুঁড়ীর কপাল!” বলিয়া বুড়ী আঁচলে চোখ মুছিল।

“নাতনী !”—চন্দনদাস সচকিত হইয়া উঠিল ; তবে বুড়ী নাতনীকেই সে দেখিয়াছে।—“তবে তুমি বুড়ো মানুষ দোকান দেখ কেন ? সে দেখতে পারে না ?”

বুড়ী উদাস আশাহীন স্বরে বলিল,—“সে অনেক কথা, বাছা। আমাদের ছুংখের কাহিনী কাউকে বলবার নয়। সমাজ আমাদের বিনা দোষে জাতে ঠেলেছে, মুখ তুলে চাইবার কেউ নেই। আর কাকেই বা দোষ দেব, সব দোষ ঐ হতভাগীর কপালের। এমন রূপ নিয়ে জন্মেছিল, ঐ রূপই ওর শত্রুর।”

চন্দনদাসের কৌতূহল ও উত্তেজনা বাড়িয়াই চলিয়াছিল। সে সাগ্রহে প্রশ্ন করিল,—“কি ব্যাপার আয়ি ? সব কথা খুলেই বল না।”

বুড়ী কিন্তু রাজি হইল না, বলিল,—“কি হবে বাবা আমাদের লজ্জার কথা শুনে ? কিছু ত করতে পারবে না, কেবল মনে ছুংখ পাবে।”

“কে বললে, কিছু পারব না ?”

“না বাবা, সে কেউ পারবে না।—আহা ! সোণার প্রতিমা আমার কালই জলে ভাসিয়ে দিতে হবে রে—” বলিয়া বুড়ী হঠাৎ মুখে কাপড় চাপা দিয়া কাঁদিয়া উঠিল।

চন্দনদাস বুড়ীর হাত চাপিয়া ধরিয়া বলিল,—“আয়ি, আমি বেণের ছেলে, তোর গা ছুঁয়ে বলছি, মানুষের যা সাধ্য আমি তা করব। তোর নাতনীর কি বিপদ বল্ !”

বুড়ী উত্তর দিবার পূর্বেই, বোধ করি তাহার ক্রন্দনের শব্দে আকৃষ্ট হইয়া সেই বিগতযৌবনা গ্রহরিণী বাহির হইয়া আসিল, কর্কশ-কণ্ঠে জিজ্ঞাসা করিল—“কাঁদছিস কেন রে, বুড়ী ? কি হয়েছে ?”

বুড়ী বিলক্ষণ বুদ্ধিমতি, তাড়াতাড়ি চোখ মুছিয়া আমতা আমতা

করিয়া বলিল,—“কিছু নয় রে চাপা—অমনি। এই ছেলেটি দূর-সম্পর্কে আমার নাতি হয়, অনেক দিন পরে দেখলুম—তাই—”

চাপা চন্দনদাসের দিকে ফিরিল, বৃহৎ স্ববর্তুল চক্ষু তাহার মুখের উপর স্থাপন করিয়া বুড়ীর উদ্দেশে বলিল,—“হু—নাতি!—তোরা নাতি আছে, আগে কখনও বলিস নি ত?”

বুড়ী কম্পিতস্বরে বলিল,—“বললুম না দূর-সম্পর্কে। আমার পিসতুত বোনের—”

চাপা বলিল,—“বুঝেছি”—তারপর চন্দনদাসকে প্রশ্ন করিল,—“তোমাকে আজ পথে দেখেছি না?”

চন্দনদাস সটান মিথ্যাকথা বলিল,—“কৈ, না! আমার ত মনে পড়ছে না!”

চাপা তীক্ষ্ণ-চক্ষুতে আরও কিছুক্ষণ চন্দনদাসকে নিরীক্ষণ করিল, শেষে মুখে একটু হাসি আনিয়া বলিল,—“তবে আমারই ভুল। বুড়ী, তুই তা হ’লে তোরা নাতির সঙ্গে কথা ক’—আমি একটু পাড়া বেড়িয়ে আসি। তোরা নাতি আজ এখানে থাকবে ত? দেখিস, ছেড়ে দিস্নি যেন, এমন রসের নাতি কালেভদ্রে পাওয়া যায়।” বলিয়া চোখ ঘুরাইয়া বাহিরের দিকে প্রস্থান করিল।

চাপা দৃষ্টিবহির্ভূত হইয়া গেলে চন্দনদাস জিজ্ঞাসা করিল,—“এটি কে?”

বুড়ীর তখনও হৃৎকম্প দূর হয় নাই, সে বলিল,—“ও মাগী যমের দূত। বাবা, এমন ভয় হয়েছিল—এখনি টু’টি টিপে ধরত। তুই যা দাদা, আর এখানে থাকিস নি। ওরে, তুই আমাদের কি ভাল করবি, ভগবান্ আমাদের তুলে গেছেন। তুই এখান থেকে পালো, শেষে কি মায়ের নিধি বেঘোরে প্রাণ দিবি?”

চন্দনদাস বলিল,—“সে কি ঠানদি, নাতিকি কি এমনি করেই তাড়াতে হয়? একটা পান পর্যন্ত দিতে নেই। তা ছাড়া চুয়া কিনতে এসেছি, চুয়া না দিয়েই তাড়িয়ে দিচ্ছিস? তুই কেমন বেণের মেয়ে?”

বুড়ী এবার হাসিয়া ফেলিল। এই ছেলোটর মুখের কথা যতই সে শুনিতেছিল, ততই তাহার মন ভিজিতেছিল। তাহার প্রাণের একান্তে বিদলিত মুহমান আশা একটু মাথা তুলিল। তবে, কি এই শেষ সময়ে ভগবান্ মুখ তুলিয়া চাহিলেন?

বুড়ী মনে ভাবিল,—যা হয় তা হয়, একবার শেষ চেষ্টা করিয়া দেখিব। কে বলিতে পারে, হয়ত অভাগিনীর ভাগ্যে চরম দুর্গতি বিধাতা লেখেন নাই; নচেৎ নিরাশার গাঢ় অন্ধকারের মধ্যে এই অপরিচিত বন্ধু কোথা হইতে আসিয়া জুটিল?

তখন বুড়ী সঙ্কল্প স্থির করিয়া বলিল,—“ও মা, সত্যি ত! চুয়ার কথা মনেই ছিল না। তা দেব দাদা—কিন্তু বড় দানী জিনিষ, দাম দিতে পারবে ত?”

“দাম কত?”

“জীবন যৌবন মন প্রাণ সব দিলেও সে জিনিষের দাম হয় না।”

চন্দনদাস একটু অবাক হইল, কিন্তু হারিবার পাত্র সে নয়, বলিল,—“আচ্ছা, আগে জিনিষ দেখি।”

“এই যে দেখাই। ওলো ও চুয়া, একবার এ দিকে আয়, ত দিদি।”

চন্দনদাস তড়িৎস্পৃষ্টের মত চমকিয়া উঠিল। তবে মেরোটর নাম চুয়া! আর সে চুয়া কিনিতে এখানে আসিয়াছে। এ কি দৈব যোগাযোগ!

“কি বলছ ঠানদি”—বলিতে বলিতে চুয়া অন্দরের দরজার সম্মুখে আসিয়া দাঁড়াইল। চন্দনদাসকে দেখিয়া সে চমকিয়া বুকের উপর হাত রাখিল। চন্দনদাস সেই দিকেই তাকাইয়াছিল, দেখিল, চুয়ার কুমুদের মত

গাল ছুটিতে কে যেন কাঁচা সিঁদূর ছড়াইয়া দিল। তার পর ম্রিয়মাণ লজ্জায় তাহার চোখছুটি ধীরে ধীরে নত হইয়া পড়িল। চন্দনদাস বুঝিল, চুয়া তাহাকে চিনিতে পারিয়াছে; পথের ক্ষণিক-দেখা মুখ পাশ্বে ভুলে নাই।

বুড়ী বলিল,—“চুয়া, অতিথি এসেছে; একটু মিষ্টি মুখ করা, পাণ দে।”

চুয়া মুখ তুলিল না, আন্তে আন্তে চন্দনদাসের সতৃষ্ণ চক্ষুর সম্মুখ হইতে সরিয়া গেল।

কিছুক্ষণ কোনও কথা হইল না। চন্দনদাস দ্বারের দিকেই তাকাইয়া রহিল। শেষে বুড়ী বলিল,—“আমার চুয়াকে দেখলে?”

“দেখলাম—আগেও যে দেখিয়াছে, তাহা আর, চন্দনদাস ভাঙিল না। বুড়ীও সে দিক্ দিয়া গেল না, বলিল—“কেমন মনে হ’ল?”

“মনে হ’ল—” সহসা চন্দনদাস বুড়ীর দিকে বুঁকিয়া ব্যগ্রকণ্ঠে বলিয়া উঠিল,—“ঠান্দি, চুয়ার কি বিপদ, আমায় বল। কেন তোমাদের সবাই জাতে ঠেলেছে? ওর এখনও বিয়ে হয়নি কেন?”

দ্বারের নিকট হইতে জবাব আসিল,—“কি হবে তোমার শুনে?”

এক হাতে ফুল-কাঁসার ছোট রেকাবির উপর চারখানি বাতাসা ও দুটি পাণ, অগ্নি হাতে জলের ঘটি লইয়া চুয়া ফিরিয়া আসিয়াছে। চন্দনদাসের শেষ কথাগুলি সে শুনিতে পাইয়াছিল; শুনিয়া লজ্জায় ধিকারে তাহার মন ভরিয়া উঠিয়াছিল। কেন এই অপরিচিত যুবকের এত কৌতূহল? তাহাকে বলিয়াই বা লাভ কি?—চুয়া রেকাবি ও ঘটি চন্দনদাসের সম্মুখে নামাইয়া আরক্ত-মুখে তীব্র অধীর স্বরে বলিল,—“কে তুমি? কোথা থেকে এসেছ? কি হবে তোমার আমাদের কথা শুনে?”

ক্ষণকালের জন্ত চন্দনদাস বিস্ময়ে হতবাক হইয়া রহিল; তার পর উঠিয়া দাঁড়াইয়া চুয়ার নুখের উপর চোখ রাখিয়া শাস্ত সংযত স্বরে বলিল,—“চুয়া, আমি তোমার স্বজাতি; আমার বাড়ী, অগ্রদ্বীপ।

নবদ্বীপের ঘাটে আমার ডিঙ্গা বাঁধা আছে। তোমার কি বিপদ, আমি জানি না; কিন্তু আমি যদি তোমার সাহায্য করতে চাই, আমার সাহায্য কি নেবে না?”

চুয়ার মুখ হইতে সমস্ত রক্ত নামিয়া গিয়া মুণ্ডখানা সাদা হইয়া গেল। তাহার চোখে পরিত্রাণের ব্যাকুল আকাঙ্ক্ষা ও ক্ষণ-বিস্ফারিত আশার আলো ফুটিয়া উঠিল। কয়েক মুহূর্তের জন্ত তাহার মুখ দিয়া কথা বাহির হইল না। তার পর সে রুদ্ধস্বরে বলিয়া উঠিল,—“কেন আমাকে মিছে আশা দিচ্ছ?” বলিয়া দাঁতে ঠোঁট চাপিয়া দ্রুতপদে প্রস্থান করিল।

৪

চন্দনদাস বসিয়া পড়িল। কিয়ৎকাল বসিয়া থাকিয়া অগতমনস্কভাবে একখানা বাতাসা তুলিয়া লইয়া মুখে দিল; তার পর আলগোছে ঘটির জল গলায় ঢালিয়া জলপান করিল। শেষে পাণছটি মুখে পুরিয়া বুড়ীর দিকে তাকাইয়া মুহূর্তান্তে বলিল,—“ঠান্দি, এনার তোমার গল্প বল।”

“বলব, কিন্তু তুমি আগে একটা কথা দাও।”

“কি ?”

“তুমি ওকে উদ্ধার করবে?”

“করব। অন্ততঃ প্রাণপণে চেষ্টা করব।”

“বেশ, উদ্ধার করা মানে ওকে এ দেশ থেকে নিয়ে পালাতে হবে। পারবে?”

“পারব—খুব পারব।”

“ভাল, কিন্তু তার পর?”

“তার পর কি?”

বুড়ী একটু দ্বিধা করিল; শেষে বলিল,—“কিছু মনে করো না, সব কথা স্পষ্ট ক’রে বলাই ভাল। তুমি জোয়ান ছেলে, চুয়াও যুবতী মেয়ে, তুমি ওকে চুরি ক’রে নিয়ে যাবে। তার পর?”

চন্দনদাস জিজ্ঞাসুর্নৈত্রে চাহিয়া রহিল।

বুড়ী তখন স্পষ্ট করিয়া বলিল,—“ওকে বিয়ে করতে পারবে?”

চন্দনদাসের চোখের সম্মুখে যেন একটু নৃতন আলো জ্বলিয়া উঠিল; সে উদ্ভাসিত-মুখে বলিল,—“পারব।”

“তোমার বাপ-মা—”

“তঁারা আমার কথায় অমত করবেন না।”

বৃদ্ধা কম্পিত স্বরে বলিল,—“বৈঁচে থাকো দাদা, তুমি বড় ভাল ছেলে। কিন্তু ছুঁড়ীর যা কপাল—”

বুড়ী তখন চুয়ার কাহিনী বলিতে আরম্ভ করিল। চন্দনদাস করতলে কপোল রাখিয়া শুনিতে লাগিল। শুনিতে শুনিতে সে টের পাইল, চুয়া কখন চুপি চুপি আসিয়া দ্বারের পাশে দাঁড়াইয়াছে।

চুয়ার বাপের নাম কাঞ্চনদাস। বেগেদের মধ্যে সে বেশ সঙ্গতিপন্ন গৃহস্থ ছিল। চুয়ার বয়স যখন সাত বৎসর, তখন কাঞ্চনদাস বাণিজ্যের জন্য নৌকা সাজাইয়া সমুদ্রযাত্রা করিল। কাঞ্চনদাসের নৌকা গঙ্গার বাঁকে অদৃশ্য হইয়া গেল—আর ফিরিল না। সংবাদ আসিল, নৌকাডুবি হইয়া কাঞ্চনদাস মারা গিয়াছে।

এই ঘটনার এক বৎসর পরে চুয়ার মাও মরিল। তখন বুড়ী ছাড়া চুয়াকে দেখিবার আর কেহ রহিল না। বুড়ী কাঞ্চনদাসের মাসী—আট বছর বয়স হইতে সে হাতে করিয়া চুয়াকে মাহুষ করিয়াছে।

নৌকাডুবিতে কাঞ্চনদাসের সমস্ত সম্পত্তিই ভরা-ডুবি হইয়াছিল;

কেবল এই ভদ্রাসনটি বাঁচিয়াছিল। বুড়ী দোকান করিয়া কষ্টে শংসার চালাইতে লাগিল।

এই ভাবে বৎসরাধিক কাল কাটিল। চুয়ার বয়স যখন দশ বছর, তখন এক গৃহস্থের ছেলের সঙ্গে তার বিবাহের সন্ধ হইল।

এই সময় এক দিন জমিদারের ভ্রাতুষ্পুত্র ঘোড়ায় চড়িয়া এই পথ দিয়া যাইতেছিল। চুয়াকে বাড়ীর সম্মুখে থেলা করিতে দেখিয়া সে ঘোড়া হইতে নামিল। দুর্দান্ত জমিদারের মহাপাষাণ্ড ভাইপো মাধবের নাম শুনিয়া দেশের লোক ত দূরের কথা, কাঞ্চী সাহেব পর্যন্ত থর থর করিয়া কাঁপে। রাজার শাসন—সমাজের শাসন কিছুই সে মানে না। জাতিতে ব্রাহ্মণ হইলে কি হয়, স্বভাব তার চণ্ডালের মত। সে দশ বছরের চুয়াকে চিবুক তুলিয়া ধরিয়া দেখিল, তার পর বাড়ীতে আসিয়া তাহার পরিচয় জিজ্ঞাসা করিল। বুড়ী ভয়ে ভয়ে পরিচয় দিল। শুনিয়া মাধব বলিল, এ মেয়ের বিবাহ দেওয়া হইবে না, ইহাকে দৈবকার্যের জ্ঞান মানত করিতে হইবে। ষোল বছর বয়স পর্যন্ত মেয়ে কুমারী থাকিবে, তার পর মাধব আসিয়া তাহাকে লইয়া যাইবে। তান্ত্রিক সাধনায় উত্তরসাধিকার স্থান অধিকার করিয়া কণ্ঠার ষোল বছরের কৌমাৰ্য্য সার্থক হইবে। সাধক—স্বয়ং মাধব। •

এই ছকুমজারি করিয়া মাধব প্রস্থান করিল। বাড়ীতে কান্নাকাটি পড়িয়া গেল; তান্ত্রিক সাধনার গুঢ় মৰ্ম্মার্থ বুঝিতে কাহারও বাকি রহিল না। বণিক-সমাজ মাধবের বিরুদ্ধে কিছু করিতে সাহস করিল না, তাহারা চুয়াকে জাতিচ্যুত করিল। বিবাহও ভাঙিয়া গেল।

ক্রমে চুয়ার বয়স বাড়িতে লাগিল—বারো বছর বয়স হইল। বুড়ী দেশে কাহারও নিকট সাহায্য না পাইয়া শেষে চুয়াকে লইয়া দেশ ছাড়িয়া পলাইবার মতলব করিল। কিন্তু বুড়ীর হাতে পয়সা কম, আত্মীয়বন্ধুরও

একান্ত অভাব। তাহার মতলব সিদ্ধ হইল না; মাধবের কাণে সংবাদ গেল।

মাধব আসিয়া বুড়ীকে পদাঘাত মৃষ্টাঘাত দ্বারা শাসন করিল; তার পর চুয়াকে পাহারা দিবার জন্ত চাঁপাকে পাঠাইয়া দিল। নাপিত-কণ্ঠা চাঁপা চুয়ার অভিভাবিকাপদে অধিষ্ঠিত হইল। চাঁপা বয়সকালে তান্ত্রিক সাধন-ভজন করিয়াছিল, এখন যৌবনান্তে ধর্ম্মকর্ম্ম ত্যাগ করিয়াছে। সে চুয়া ও বুড়ীর উপর কড়া নজর রাখিতে লাগিল।

এইভাবে চারি বৎসর কাটিয়াছে; কয়েক দিন আগে মাধব আসিয়াছিল। সে চুয়াকে দেখিয়া গিয়াছে এবং বলিয়া গিয়াছে যে, আগামী অমাবস্তার রাত্রিতেই চুয়াকে দৈবকার্য্যে উৎসর্গ করিতে হইবে—সে জন্ত যেন সে প্রস্তুত থাকে। অল্পষ্টানের বাহাতে কোনও ক্রটি না হয়, এ জন্ত মাধব নিজেই সমস্ত বিধান দিয়া গিয়াছে। অমাবস্তার সন্ধ্যার সময় চুয়া গঙ্গার ঘাটে গিয়া স্নান করিবে; স্নানান্তে রক্তবস্ত্র, জবামালা ও রক্তচন্দনের ফোঁটা পরিয়া ঘাট হইতে একেবারে সাধনস্থলে অর্থাৎ মাধবের উদ্যানবাটিকায় উপস্থিত হইবে। সঙ্গে ঢাক-ঢোল ইত্যাদি বাজিতে বাজিতে যাইবে। মাধব এইরূপ শাস্ত্রীয় ব্যবস্থা দিয়া চলিয়া যাইবার পর পাঁচ দিন কাটিয়া গিয়াছে। আজ ৩৬৫ চতুর্দশী—কাল অমাবস্তা।

গল্প শেষ করিয়া বুড়ী কাদিতে কাদিতে বলিল,—“দাদা, সব কথা তোমায় বললুম। এখন দেখ যদি মেয়েটাকে উদ্ধার করতে পার। তুমি ছাড়া ওর আর গতি নেই।”

গল্প শুনিতে শুনিতে চন্দনদাসের বৃকের ভিতরটা জ্বালা করিতেছিল, ঐ দানব-প্রকৃতি লোকটার বিরুদ্ধে ক্রোধ ও আক্রোশ অগ্নিশিখার মত তাহার দেহকে দাহ করিতেছিল। সে দাঁতে দাঁতে চাপিয়া বলিয়া উঠিল,

—“আমি যদি চুয়াকে বিয়ে ক’রে কাল আমার নৌকায় তুলে দেশে নিয়ে যাই—কে কি করতে পারে?”

দ্বারের আড়ালে চুয়ার বুক ছুঁ ছুঁ করিয়া উঠিল। কিন্তু বুড়ী মাথা নাড়িয়া ক্ষুব্ধস্বরে বলিল,—“তা হয় না দাদা! চাঁপা রাক্ষসী আছে—সে কখনই হ’তে দেব না।”

চন্দনদাস বলিল,—“চাঁপাকে সোণায় মূড়ে দেব। তাতে রাজি না হয়, মুখে কাপড় বেঁধে ঘরে বন্ধ ক’রে রাখব।”

বুড়ী কাঁপিতে লাগিল, এতখানি দুঃসাহস তাহার পক্ষে কল্পনা করাও দুষ্কর। কিন্তু বুড়ীর প্রাণে আশা জাগিয়াছিল, আশা একবার জাগিলে সহজে মরিতে চায় না। তবু বুড়ী কাঁপিতে কাঁপিতে বলিল,—“সে যেন হ’ল, কিন্তু বিয়ে হবে কি ক’রে? বিয়ে দেবে কে?”

“কেন—নদেয় কি পুরুত নেই?”

বুঝা মাথা নাড়িয়া বলিল,—“তুমি মাথবকে জানো না। তার ভয়ে কোনও বামন রাজি হবে না।”

চন্দনদাস আশ্চর্য্য হইয়া বলিল,—“এখানকার বামনরা এত ভীকু?”

“কার ঘাড়ে দশটা মাথা আছে দাদা যে, জগিদারের ভাইপো’র শত্রুতা করবে? তবে—শুনেছি, জগমাথ ঠাকুরের ছেলে নিমাই পণ্ডিত বড় ডাকাবুকো ছেলে, কাউকে ভয় করেন না। বয়স কম কিনা!—কিন্তু তিনি কি রাজি হবেন?”

চন্দনদাস মহা উৎসাহে দাঁড়াইয়া উঠিয়া বলিল,—“ভাল মনে করিয়ে দিচ্ছে, ঠানদি,—নিমাই পণ্ডিতই উপযুক্ত লোক। তাঁকে আমি আজ গঙ্গাঘাটে দেখেছি; ঠিক দেবতার মত চেহারা—তিনি নিশ্চয় রাজি হবেন।—ঠানদি, আমি এখন তাঁর খোঁজে চললাম, ওবেলা সব ঠিক ক’রে আবার আসব। তখন—”

“কিন্তু তিনি যদি রাজি না হন?”

চন্দনদাস চিন্তা করিল,—“যদি রাজি না হন —! তিনি রাজি হোন বা না হোন, রাজিতে কোনও সময় আমি আসবই।—নাই বা হ’ল বিয়ে? আজ রাজিতে চুয়াকে চুরি ক’রে নিয়ে যাব। তারপর দেশে গিয়ে বিয়ে করব—কি বল?”

বুড়ীর মুখে আশঙ্কার ছায়া পড়িল। চন্দনদাসের যে কোনও ছুরভিসন্ধি নাই, তাহা সে অন্তরে বুঝিতেছিল; কিন্তু তবু—চন্দনদাস একেবারে অপরিচিত। সেও যে একজন ধূর্ত প্রবঞ্চক নয়, তাহা বুড়ি কি করিয়া জানিবে? বারবার দাগা পাইয়া বুড়ীর মন বড় সন্দিগ্ধ হইয়া উঠিয়াছিল। সে ইতস্ততঃ করিতে লাগিল।

এই সময় চুয়া দরজার আড়াল হইতে বাহির হইয়া আসিল। সংশয় সঙ্কেচ করিবার তাহার আর সময় ছিল না। এক দিকে অবশ্যস্তাবী সর্বনাশ, অত্য়দিকে সম্ভাবনা। চুয়া সজল চক্ষু চন্দনদাসের মুখের উপর রাখিয়া কম্পিতকণ্ঠে কহিল,—“তুমি আজ রাজিতে এসো। নিমাই পণ্ডিত যদি রাজি না হন, তবু, তোমার ধর্মের ওপর বিশ্বাস ক’রে আমি তোমার সঙ্গে যাব।”

চন্দনদাসের বুক নাচিয়া উঠিল। সে আনন্দের উচ্ছ্বাসে কি বলিতে যাইতেছিল—এমন সময় বাধা পড়িল।

৫

গলির মধ্যে দ্রুত অশ্বখুর-ধ্বনি শুনা গেল। চুয়া একটা আর্ন্ত চীৎকার গলার মধ্যে রোধ করিয়া ছুটিয়া পলাইয়া গিয়া ঘরে দরজা বন্ধ করিয়া

দিল। বুড়ী থরথর করিয়া কাঁপিয়া দুই হাঁটুর মধ্যে মুখ জুড়িয়া বসিয়া পড়িল।

পরক্ষণেই এক জন অশাক্রান্ত ব্যক্তি বাড়ীর সম্মুখে আসিয়া ঘোড়া থামাইল। লোকটার গায়ে লালরঙের কোর্তা, কোমরে তরবারি, মাথায় পাগ নাই, ঝাঁকড়া রুক্ষ চুল কাঁধ পর্যন্ত পড়িয়াছে; কপালে প্রকাণ্ড একটা সিন্দুরের ফোঁটা। ফোঁটার নীচে বিশাল ভাঁটার মত চোখ দুটাও প্রায় অল্পরূপ রক্তবর্ণ। মুখে ঘনকৃষ্ণ গোঁফ এবং গালে গালপাট্টা। বয়স বোধ করি পঁয়তাল্লিশ।

এই ভীষণাকৃতি লোকটার মুখের প্রতি অবয়বে যেন জীবনব্যাপী দুষ্কৃতি ও পাপ পঙ্কিল রেখায় অঙ্কিত হইয়া আছে। এমন দুষ্কার্য্য নাই—যাহা সে করে নাই; এমন মহাপাতক নাই—যাহা সে করিতে পারে না। একটা ঘুণার শিহরণ চন্দনদাসের দেহের উপর দিয়া বহিয়া গেল; সে চিনিলা, ইনিই জমিদারের দুর্দান্ত ভ্রাতুষ্পুত্র মাধব।

মাধব একলাফে ঘোড়া হইতে নামিয়া ঘোড়া ছাড়িয়া দিয়া দালানের উপর উঠিল। সম্মুখেই চন্দনদাস; রক্তচক্ষু দ্বারা আপাদ-মস্তক তাহাকে নিরীক্ষণ করিয়া স্বভাবকর্কশ ভয়ঙ্কর স্বরে মাধব প্রশ্ন করিল—“তুই কে?”

চন্দনদাসের ইচ্ছা হইল, মাধবের দম্ভফীত পৈশাচিক মুখে একটা লাথি মারে; কিন্তু সে তাহা করিল না। তাহার মাথার মধ্যে বিছাতের মত চিন্তাকার্য্য চলিতেছিল। মাধবের অভাবনীয় আবির্ভাবে তাহার সমস্ত মতলব পণ্ড হইয়া গিয়াছিল; সে ভাবিতেছিল, এ অবস্থায় কি করিলে সব দিক্ রক্ষা হয়? মাধবের সঙ্গে একটা গুণ্ডগোল বাধাইলে লাভ হইবে না, বরং বিশেষ অনিষ্টের সম্ভাবনা। উপস্থিত ক্ষেত্রে কোনও হাঙ্গামা না করিয়া অপমৃত হওয়াই সুবিবেচনার কাজ। অথচ এই পাষণ্ডটার মুখ দেখিলে ও কথা শুনিলে মেজাজ ঠিক রাখা দুষ্কর। চুয়ার

সর্বনাশ করিবার জন্তই এই নরপশু তাহাকে ছয় বৎসর জিয়াইয়া রাখিয়াছে, ভাবিতে চন্দনদাসের চোখের দৃষ্টি পর্য্যন্ত রক্তাভ হইয়া উঠিল।

তবু সে যথাসাধ্য আত্মদমন করিয়া মাধবের কথার উত্তর দিল, বলিল, “সে খোঁজে তোমার দরকার কি?”

মাধব একটা অকথ্য গালি দিয়া বলিল, “তুই এখানে কি চাস?”

চন্দনদাস আরু ধৈর্য্য রক্ষা করিতে পারিল না, তাহার মাথায় খুন চাপিয়া গেল। সে প্রত্যুত্তরে মাধবের নাসিকায় বজ্রসম কিল বসাইয়া দিয়া বলিল, “এই চাই।”

এই নিরীহ-দর্শন যুবকের নিকট হইতে মাধব এত বড় দুঃসাহসিক কার্য্য একবারে প্রত্যাশা করে নাই, সে সরিষার ফুল দেখিয়া মাটিতে বসিয়া পড়িল।

চন্দনদাস দেখিল, আর বিলম্ব করা সমীচীন নয়; সে নিরস্ত, মাধবের কোমরে তরবারি রহিয়াছে। ঘোড়াটা সম্মুখেই দাঁড়াইয়াছিল, সে দালান হইতে লাফ দিয়া তাহার পিঠে চড়িয়া বসিল। এই সময় মাধব ষণ্ডের মত গর্জন করিয়া কোমর হইতে তরবারি বাহির করিয়া উঠিয়া দাঁড়াইল। কিন্তু তাহার নাগালে পৌছিবার পূর্বেই চন্দনদাস তেজী ঘোড়ার পেট ছুই পায়ে চাপিয়া ধরিয়া সবেগে ঘোড়া ছুটাইয়া দিল।

৬

কেহ কেহ লুকাইয়া পাপাচরণ করে। কিন্তু ধর্ম্ম ও সমাজের বিরুদ্ধে বিদ্রোহ করিয়া পাশবিক বলে প্রকাশভাবে পাপানুষ্ঠান করিতে যাহারা অভ্যস্ত, তাহাদের অপরাধ-ক্লাস্ত জীবনে এমন অবস্থা আসে, যখন কেবল মাত্র রমণীর সর্বনাশ করিয়া আর তাহারা তৃপ্তি পায় না। তখন তাহারা

পাপাচারের সহিত ধর্মের ভণ্ডামি মিশাইয়া তাহাদের ছদ্মার্থের মধ্যে এক প্রকার নূতন রস ও বিলাসিতা সঞ্চারের চেষ্টা করে। মাধব এই শ্রেণীর পাপী।

চন্দনদাস তাহারই ঘোড়ায় চড়িয়া তাহাকে ফাঁকি দিয়া পলায়ন করিবার পর মাধব নিষ্ফল আক্রোশে আর কাহাকেও সম্মুখে না পাইয়া বুড়ীকে ধরিল; বুড়ীর চুলের মুঠি ধরিয়া তলোয়ার দিয়া তাহাকে কাটিতে উদ্যত হইল। কিন্তু কাটিতে গিয়া তাহার মনে হইল, বুড়ীকে মারিলে হয় ত সেই ধুষ্ট যুবকের পরিচয় অজ্ঞাত রহিয়া যাইবে। কিন্তু খাইয়া কিল চুরি করিবার লোক মাধব নয়; তখনও তাহার নাকের রক্তে গোঁফ ভাসিয়া যাইতেছিল। সে বুড়ীর চুল ধরিয়া টানিতে টানিতে ভিতরে লইয়া চলিল।

আঙ্গিনার মাঝখানে বুড়ীকে আছড়াইয়া ফেলিয়া তাহার শীর্ণ হাতে একটা মোচড় দিয়া মাধব বলিল, “হারামজাদি বুড়ী, ও ছোঁড়া তোর কে বল।”

পূর্বেই বলিয়াছি, বুড়ী বুদ্ধিমতী; তাই ভয়ে প্রাণ শুকাইয়া গেলেও তাহার চিন্তা করিবার শক্তি ছিল। সে বুঝিয়াছিল, কোনও কথা না বলিলেও প্রাণ যাইবে এবং ষড়যন্ত্র প্রকাশ করিয়া ফেলিলেও প্রাণ যাইবে; সুতরাং মধ্যপথ অবলম্বন করাই যুক্তি। সর্বনাশ উপস্থিত হইলে পণ্ডিতগণ অর্ধেক ত্যাগ করেন, বুড়িও তেমনই ষড়যন্ত্রের অংশটা বাদ দিয়া আর সব সত্য কথা বলিবে স্থির করিল। তাহাতে আর কিছু না হউক, মাধবের হাতে প্রাণটা বাঁচিয়া যাইতে পারে।

বুড়ী তখন অকপটে চন্দনদাসের যতটা পরিচয় জানিতে পারিয়াছিল, তাহা মাধবের গোচর করিল। চাপা পাছে অনর্থক হান্ধামা করে, এই ভয়ে মিছামিছি চন্দনদাসকে নাতি বলিয়া পরিচিত করিয়াছিল, তাহাও

স্বীকার করিল। কাদিতে কাদিতে, অনেক মাথার দিব্য চোখের দিব্য দিয়া বলিল যে, চন্দনদাসকে সে পূর্বে কখনও দেখে নাই, আজ প্রথম সে তাহার দোকানে আসিয়া মিষ্ট কথায় তাহার সহিত আলাপ করিতে আরম্ভ করে। তাহার কোনও ছুরভিসন্ধি ছিল কি না, তাহাও বুড়ির অজ্ঞাত।

চাঁপা মাধবের বাড়ীতে খবর দিতে গিয়াছিল, এতক্ষণে এক ঝাঁক পাইক সঙ্গে লইয়া পদব্রজে ফিরিল। পাইকদের হাতে সড়কী, ঢাল; জাতিতে তেঁতুলে বাগ্‌দী। ইহাদেরই বাহুবলে মাধব দেশটাকে সম্ভ্রান্ত করিয়া রাখিয়াছিল। প্রভু ও ভৃত্যে অধস্তাভেদ ছাড়া প্রকৃতিগত পার্থক্য বিশেষ ছিল না।

বুড়ীকে নানা প্রশ্ন করিয়া শেষে বোধ হয় মাধব তাহার গল্প বিশ্বাস করিল। চাঁপা বাহা বলিল, তাহাতে বুড়ীর কথা সমর্থিত হইল। তা ছাড়া মাধবের রক্তচক্ষুর সম্মুখে বুড়ি মিথ্যা কথা বলিবে, ইহাও দান্তিক মাধব বিশ্বাস করিতে পারে না। সে এদিক-ওদিক তাকাইয়া বলিল, “তোরা নাতিনী কোথায়?”

বুড়ি বলিল, “ঘরেই আছে বাবা।”

মাধব চাঁপাকে হুকুম করিল, “দেখে আয়।”

চাঁপা দেখিয়া আসিয়া বলিল, চুয়া ঘরেই আছে বটে।

মাধবের তখন বিশ্বাস জন্মিল, চুয়া সম্বন্ধে ভয়ের কোনও কারণ নাই। তবু সে দুইজনে পাইককে বুড়ীর বাড়ী পাহারা দিবার জন্ত নিযুক্ত করিল, বলিল,—“কাল সন্ধ্যা পর্য্যন্ত এ বাড়ীতে কাউকে ঢুকতে দিবিবে। যদি কেউ ঢুকতে চায়, তার গলায় সড়কি দিবি।” এইরূপে বাড়ীর স্বব্যবস্থা করিয়া মাধব বাহিরে আসিল। এই সময় একবার তাহার মনে হইল, আর বুধা দেবী না করিয়া আজই চুয়াকে নিজের প্রমোদ-উত্থানে টানিয়া লইয়া যায়। কিন্তু তাহা হইলে এত বৎসর ধরিয়া যে চরম বিলাসিতার

আয়োজন করিয়াছে, তাহা ব্যর্থ হইয়া যাইবে। মাধব নিরস্ত হইল ! তৎপরিবর্তে যে স্পন্দিত বেণের ছেলেটা তাহার গায়ে হাত তুলিতে সাহস করিয়াছে, তাহার নৌকা লুঠ করিয়া তাহাকে নিজের চক্ষুর সম্মুখে কোমর পর্যন্ত মাটিতে পুঁতিয়া কুকুর দিয়া থাওয়াইবার আয়োজনে দিনটা সদায় করিতে মনস্থ করিল। এটাও একটা মন্দ বিলাসিতা নয়।

বাহিরে আসিয়া মাধব তাহার সর্দার পাইককে বলিল,—“বদন, তুই তুই দশ জন পাইক নিয়ে গঙ্গাঘাটে যা। সেখানে চন্দনদাস বেণের নৌকা আটক কর। আমি যাচ্ছি।” • বলিয়া আর এক জন পাইককে ঘোড়া আনিতে পাঠাইল।

বদন সর্দার ওভুর আজ্ঞা শিরোধার্য্য করিয়া যখন ঘাটে পৌঁছিল, তখন চন্দনদাসের নৌকা দুখানি ভাগীরথীর বক্ষে শুভ্র পাল উড়াইয়া উজান বাহিয়া চলিয়াছে ; বহুপদবিশিষ্ট বিরাট জল-পতঙ্গের মত তাহাদের দাঁড়গুলি যেন গঙ্গার উপর তালে তালে পা ফেলিতেছে।

৭

ওদিকে চন্দনদাস তীরবেগে ঘোড়া ছুটাইয়া দিয়াছিল। দ্বিপ্রহর অতীত হইয়া গিয়াছে, পথে লোকজন কম। চন্দনদাস দাবমান ঘোড়ার পিঠে বসিয়া চিন্তা করিতেছিল—এখন কর্তব্য কি ? প্রথমতঃ চুয়াকে রক্ষা করিতে হইবে। মাধবের নাকে কিল মারার ফলে তাহার ক্রোধ কোণ পথ লইবে, অনুমান করা কঠিন ; মাধব চুয়ার কথা ভুলিয়া তাহার প্রতি দাবমান হইতে পারে ; তাহাতে চুয়া কিছুক্ষণের জগ্ন রক্ষা পাইবে। দ্বিতীয়তঃ তাহার নৌকা বাঁচাইতে হইবে। ক্রোধাক্ত মাধব প্রথমে

তাহাকেই ধরিতে আসিবে ; তখন তাহার অমূল্য পণ্য ও সোনাদানায় বোঝাই নৌকা লুপ্তিত হইবে। মাধব রেয়াং করিবে না।

ঘাটে পৌছবার পূর্বেই চন্দনদাস কর্তব্য স্থির করিয়া ফেলিল। অশ্বখ-শাখায় ঘোড়া বাঁধিয়া সে দ্রুতপদে নৌকায় গিয়া উঠিল ; দেখিল, মাঝি-মাল্লারা আহার করিতে বসিয়াছে। চন্দনদাস সর্দার মাঝিকে ডাকিয়া পাঠাইয়া বলিল,—“এখনি নৌকা খুলতে হবে।”

হতবুদ্ধি মাঝি বলিল,—“এখনি ? কিন্তু—”

“শোনো, তর্ক করবার সময় নেই। এই দণ্ডে নৌকা খোলো—পাল আর দাঁড় দুই লাগাও। আজ সন্ধ্যা পর্য্যন্ত যতদূর সম্ভব উজান বেয়ে যাবে, তারপর গাঙ্গের মাঝখানে নোঙ্গর ফেলবে। আমি যতদিন না ফিরি সেইখানে অপেক্ষা করবে। বুঝলে ?”

“আপনি সঙ্গে যাবেন না ?”

“না। এখন যাও, আর দেরী করো না। যতদিন আমি না ফিরি, সাবধানে নৌকা পাহারা দিও।”

‘যে আজ্ঞা’ বলিয়া প্রাচীন মাঝি চলিয়া গেল। মুহূর্ত্ত পরে দুই নৌকার মাঝি-মাল্লার হাঁকডাক ও পালতোলার হুড়াহুড়ি আরম্ভ হইল। এই অবকাশে চন্দনদাস নৌকার পশ্চাতে মাণিকভাণ্ডারে গিয়া কিছু জিনিষ সংগ্রহ করিয়া লইল। প্রথমে সিন্দুক হইতে মোহর-ভরা একটা সর্পাকৃতি লম্বা থলি বাহির করিয়া কোমরে জড়াইয়া লইল। যে কার্য্যে যাইতেছে, তাহাতে কত অর্থের প্রয়োজন কিছুই স্থিরতা নাই ; অথচ বোঝা বাড়াইলে চলিবে না। চন্দনদাস ভাবিয়া চিন্তিয়া একছড়া মহামূল্য সিংহলী মুক্তার হার গলায় পরিয়া লইল। যদি মোহরে না কুলায়, হার বিক্রয় করিলে যথেষ্ট অর্থ পাওয়া যাইবে।

এ ছাড়া আরও দুইটা জিনিষ চন্দনদাস সঙ্গে লইল। একটা ইম্পাতের

উপর সোনার কাছ করা ছোট ছোরা; এটি সে কোচিনে এক আরব বণিকের নিকট কিনিয়াছিল। দ্বিতীয়,—এক কাফির উপহার একটি লোহার কঁটা। কৃষ্ণবর্ণ দ্বিভুজ লোহার কঁটা, সেকালে সৌখীন স্ত্রী পুরুষ এইরূপ কঁটা চুলে পরিত। এই কঁটার বিশেষত্ব এই যে, ইহার তীক্ষ্ণ অগ্রভাগ শরীরের কোনও অংশে ফুটিলে তিনবার নিশ্বাস ফেলিতে যতক্ষণ সময় লাগে, ততক্ষণের মধ্যে মৃত্যু হইবে। চন্দনদাস কঁটার সূক্ষ্মাগ্র সোনার খাপে ঢাকিয়া সাবধানে নিজের চুলের মধ্যে গুঁজিয়া লইল।

নৌকা হইতে নামিয়া চন্দনদাস নগরের ভিতর দিয়া আবাব হাটিয়া চলিল। বাঁ-বাঁ দিগ্রহর, আশে-পাশে দোকানের মধ্যে দোকানী নিদ্রালু; মধ্যাকাশ হইতে সূর্য্যদেব প্রথর রোদ্ভু ঢালিয়া দিতেছেন। গাছ-পালা পর্য্যন্ত নিঝুম হইয়া পড়িয়াছে; মানুষ গৃহতলের ছায়ায় আশ্রয় লইয়াছে।

কিছুদূর যাইবার পর একটা মোড়ের মাথায় পৌঁছিয়া চন্দনদাস এবার কোন পথে যাইবে ভাবিতেছে, এমন সময় তাহার চোখে পড়িল, একটা নয়-দশ বছরের কটিবাস পরিহিত শীর্ণকায় বালক প্রচণ্ড মার্ত্তগুণ-ময়ূগ সম্পূর্ণ উপেক্ষা করিয়া পথের মধ্যে একাকী ডাঙাগুলি খেলিতেছে। চন্দনদাস হাতছানি দিয়া তাহাকে ডাকিল। বালক ক্রীড়ায় বিরাম না দিয়া, যষ্টির আঘাতে ক্ষুদ্র কাষ্ঠখণ্ডটিকে চন্দনদাসের দিকে তাড়িত করিতে করিতে তাহার সম্মুখে আসিয়া উপস্থিত হইল। তারপর প্রবীণের মত তীক্ষ্ণদৃষ্টিতে চন্দনদাসের বেশভূষা নিরীক্ষণ করিয়া বলিল,—“সওদাগর! সমুদ্রের থেকে আসছ—ত্যা: ?”,

বালকের ভাষা ও বাকপ্রণালী অতি অদ্ভুত—আমরা তাহা সরল ও সহজ-বোধ্য করিয়া দিলাম।

চন্দনদাস বলিল,—“হঁ।। নিমাই পণ্ডিতের বাড়ী কোথায় জানিস্ ?”

বালক বলিল,—“হিঃ—জানি।”

“আমাকে সেখানে নিয়ে চল।”

বালকের ধূর্ত মুখে একটু হাসি দেখা দিল, সে এক চক্ষু মুদিত করিয়া বলিল,—“ডাংগুলি খেলছি যে।

“পয়সা দেব।”

আকর্ষণ দস্তবিকাশ করিয়া বালক হাত পাতিল,—“আগে দাও।”

চন্দনদাস তাহাকে একটা কপর্দক দিল, তখন সে আবার ডাংগুলি খেলিতে খেলিতে পথ দেখাইয়া লইয়া চলিল।

বেশীদূর যাইতে হইল না ; নিম্নবৃক্ষচিহ্নিত একটা বাড়ী যষ্টি-নির্দেশে দেখাইয়া দিয়া বালক প্রস্থান করিতেছিল; চন্দনদাস তাহাকে ফিরিয়া ডাকিল, বলিল,—“তুই যদি আর একটা কাজ করতে পারিস্, তোকে চারটে পয়সা দেব।”

“কি ?”

“কাঞ্চন বেণের বাড়ী জানিস্ ?”

বালকের চক্ষু উজ্জ্বল হইল,—“চুয়া ? মাধায়ের কৈ নাহ ? জানি।—হি হি !”

চন্দনদাসের ইচ্ছা হইল, অকালপক ছোড়ার গালে একটা চপেটাঘাত করে ; কিন্তু সে কষ্টে ক্রোধ সম্বরণ করিয়া বলিল,—“হঁ্যা চুয়া। শোন, তার বাড়ীর সামনে দিয়ে বাবি, কাউকে কিছু জিজ্ঞাসা করবি না, কেবল দেখে আসবি, সেখানে কি হচ্ছে। পারবি ?”

বালক বলিল,—“হিঃ—পয়সা দাও।”

চন্দনদাস মাথা নাড়িয়া বলিল,—“না, আগে থবর নিয়ে আসবি, তবে পয়সা পাবি। আমি এইখানেই থাকব।”

বালক আকৃষ্ট করিয়া মনে মনে গবেষণা করিল, চন্দনদাসকে বিশ্বাস করা যাইতে পারে কি না ? শেষে ঘাড় নাড়িয়া সম্মতি জানাইয়া পূর্ববৎ ডাঙুলি খেলিতে খেলিতে প্রস্থান করিল।

চন্দনদাস তখন নিমাই পণ্ডিতের গৃহে শ্রবণ করিল। সম্মুখেই টোলের আটচালা ; ছাত্ররা কেহ নাই, নিমাই পণ্ডিত একাকী বসিয়া আছেন। তাঁহার কোলে তুলটের একখানি নূতন পুঁথি ; পাশে লেখনী ও মসীপাত্র। চন্দনদাসের পদশব্দে নিমাই পণ্ডিত মুখ তুলিলেন ; প্রশান্ত বিশাল চক্ষু হইতে শাও-চিত্তাজনিত স্প্রাচ্ছন্নতা দূর করিয়া জিজ্ঞাসা করিলেন,—“ক্যুকে চান ?”

চন্দনদাস বলিল,—“নিমাই পণ্ডিতকে।”

“আমিই নিমাই পণ্ডিত।”

পাছুকা খুলিয়া চন্দনদাস গিয়া নিমাই পণ্ডিতকে প্রণাম করিল। নিমাই পণ্ডিত বয়সে তাহার অপেক্ষা ছোট হইলেও ব্রাহ্মণ। তুলসী পাতার ছোট বড় নাই।

নিমাই পণ্ডিত প্রণাম গ্রহণ করিয়া বলিলেন,—“দেখেছি ব’লে মনে হুজে—আপনিই কি আজ তুমি নৌকা নিয়ে সমুদ্রযাত্রা থেকে ফিরেছেন ?”

চন্দনদাস বিনীতভাবে বলিল,—“আজ্ঞা হা, আমিই।”

নিমাই পণ্ডিত হাসিয়া বলিলেন,—“আজ আপনার নৌকার ডেউয়ে নবদ্বীপের একটি অমূল্য রত্ন ভেসে যাচ্ছিল, অনেক কষ্টে রক্ষা করা গিয়েছে। যা হোক, আপনি—?”

চন্দনদাস নিজের পরিচয় দিয়া শেষে করযোড়ে বলিল,—“আপনি ব্রাহ্মণ এবং মহাপণ্ডিত, আনাকে ‘আপনি’ সম্বোধন করলে আমার অপরাধ হয়।”

নিমাই পণ্ডিত বলিলেন,—“বেশ, কি ব্যাপার বল ত?”

চন্দনদাস বলিল,—“একটা কাজে আপনার সাহায্য চাইতে এসেছি। নবদ্বীপে কাউকে আমি চিনি না, কেবল আপনার নাম শুনেছি। শুনেছি, আপনি শুধু অর্পরাজ্যে পণ্ডিত নন, সংকার্য্য করবার সাহসও আপনার অধিতীয়। আমাকে সাহায্য করবেন কি?”

নিমাই পণ্ডিত, বুঝিলেন, বণিকতনয় আজ গুরুতর কোনও কাজ আদায় করিতে আসিয়াছে, মৃদুহাস্তে বলিলেন,—“তোমার নম্রতা আর বিনয় দেখে ভয় হচ্ছে। যা হোক, প্রস্তাবটা কি শুনি।”

চন্দনদাসও হাসিল; বুঝিল, নিমাই পণ্ডিতকে মিষ্ট চাটুকথায় বিগলিত করা চলিবেনা, তাঁহার সহিত অকপট ব্যবহার করাই শ্রেয়ঃ। সে ক্ষণেক চিন্তা করিয়া বলিল,—“আপনি কাঞ্চনবেণের মেয়ে চুয়াকে জানেন?”

নিমাই পণ্ডিত তীক্ষ্ণদৃষ্টিতে চন্দনদাসের মুখের পানে চাহিলেন। তাঁহার মুখ ঈষৎ গম্ভীর হইল, বলিলেন,—“জানি। চুয়ার কথা নবদ্বীপে সকলেই জানে।”

চন্দনদাস বলিয়া উঠিল,—“তবু তাকে উদ্ধারের চেষ্টা কেউ করে না।

নিমাই পণ্ডিত স্থির হইয়া রহিলেন, কোনও উত্তর দিইলেন না।

চন্দনদাস তখন বলিল, “আমি চুয়াকে বিয়ে করতে চাই। আপনি সহায় হবেন কি?”

নিমাই পণ্ডিত বিস্মিত হইলেন। কিছুক্ষণ স্তব্ধ থাকিয়া কোল হইতে পুঁথি নামাইয়া ধীরে ধীরে বলিলেন, “কিন্তু চুয়া সম্বন্ধে সব কথা তুমি জান কি?”

“যা জানি, আপনাকে বলছি”—এই বলিয়া ‘আজ নৌকা হইতে নামিবার পর এ পর্য্যন্ত যাহা যাহা ঘটিয়াছিল সমস্ত সবিস্তারে বর্ণনা

করিল ; শেষে কহিল, “এই নির্দোষ পুরীতে চুয়া যেমন একা, আমি ও তেননি একা। এখন আপনি যদি সাহায্য করেন, তবেই কিছু করতে পারি। নচেৎ একটি বালিকার সর্বনাশ হয়।”

নিমাই পণ্ডিত ভ্রু কুঞ্চিত করিয়া চিন্তামগ্ন হইলেন।

এই সময় সেই বালক ডাংগুলি হস্তে ফিরিয়া আসিল। চন্দনদাস সাগ্রহে তাহাকে কাছে ডাকিতেই সে বলিল, “চুয়ার ষাড়ীর সামনে ছোটো পাক ব’সে আছে ; যে যাচ্ছে, তারে হুকি দিচ্ছে।”

“আর কি দেখলি ?”

“চুয়া আর তার ঠান্ডি ঘরে আছে। চাপা নাপতিনী বুড়ীর সঙ্গে কোঁদল করছে।”

“আর কিছু ?”

“আর মাথাই চন্দন বেণের ডিঙী লুঠ করতে গেছে। পরসা দাও।”

খুসী হইয়া চন্দনদাস বালককে চার পরসার স্থলে দু’গুণা দিল। ঈর্ষ বালক তীক্ষ্ণবরে একবার “উ—” বলিয়া উল্লাস জ্ঞাপন পূর্বক ডাংগুলি খেলিতে খেলিতে প্রস্থান করিল।

বালককে বিদায় করিয়া চন্দনদাস নিমাই পণ্ডিতের দিকে ফিরিতেই তিনি উদ্দীপ্তকণ্ঠে বলিয়া উঠিলেন, “আমি তোমাকে সাহায্য করব। তোমার উত্তম প্রশংসনীয় ; আমরা গাঁয়ের লোক বা করিনি, তুমি বিদেশী তাই করতে চাও। তোমার স্বার্থ আছে জানি কিন্তু তাতে তোমার ম’হব্বের কিছু মাত্র হানি হয় না ; আমি কি করতে পারি বল।”

চন্দনদাস বলিল, “তা আমিও জানি না। আপাততঃ পরামর্শ দিতে পারেন।”

“বেশ, এস, পরামর্শ করা যাক। মাধব যে রকম দুর্দ্ধর্ষ পাষণ্ড, তার বিরুদ্ধে বলপ্রয়োগে কোনও ফল হবে না। আমার মনে হয়—”

চন্দনদাস বলিল, “একটি নিবেদন আছে। আমার বড় চুষা পেয়েছে ; ব্রাহ্মণবাড়ী একটু পাদোদক পেতে পারি ?”

নিমাই সচকিত হইয়া বলিলেন, “তুমি এখনও আহার করনি ?”

চন্দনদাস হাসিয়া বলিল, “না, কেবল চুয়ার দেওয়া একখানি বাতাস খেয়েছি।”

“কি আশ্চর্য্য! এতক্ষণ বলনি কেন ? দাঁড়াও, আমি দেখি” বলিয়া খড়ম পরিয়া স্বরিতে অন্তর প্রবেশ করিলেন।

বেলা তখন তৃতীয় প্রহর। বিষ্ণুপ্রিয়া দেবী ভূতা পরিজন সকলকে খাওয়াইয়া নিজে আহারে বসিতে যাইতেছিলেন, নিমাই গিয়া বলিলেন, “এক জন অতিথি এসেছে। খেতে দিতে পাববে ?”

বিষ্ণুপ্রিয়া ঘাড় নাড়িয়া বলিলেন, “পারব।” তার পর ক্ষিপ্রহস্তে দালানে জল-ছড়া দিয়া পিড়ি পাতিয়া নিজের অন্নবাজন অতিথির জন্য ধরিয়া দিয়া স্বামীর মুখের পানে চাহিলেন।

নিমাই দাঁড়াইয়া দেখিতেছিলেন, স্মিতমুখে চন্দনদাসকে ডাকিতে গেলেন। এই নীরব কৰ্ম্মপরায়ণা অনাদৃতা বধুটি ক্ষণকালের জন্য নিমাই পণ্ডিতের মন হইতে লক্ষ্মীদেবীর স্মৃতি মুছিয়া দিল।

অতঃপর চন্দনদাস পরিতোষপূর্ব্বক ব্রাহ্মণগৃহে প্রসাদ পাইল।

৮

পরামর্শ স্থির করিতে অপরাহ্ন গড়াইয়া গেল। যে সকল ছাত্র টোলে পড়িতে আসিল, নিমাই পণ্ডিত তাহাদের ফিরাইয়া দিলেন।

সকল স্থির করিয়া নিমাই বলিলেন, “এ ছাড়া আর ত কোনও উপায় দেখি না। তৃতীয় ব্যক্তিকে দলে টানতে ভয় করে ; কথাটা জানাজানি

হয়ে যদি মাধবের কাণে ওঠে, তা হ'লে আর কোনও ভরসা থাকবে না।”

চন্দনদাস জিজ্ঞাসা করিল, “এদেশের মাঝি-মাল্লাদের বিশ্বাস করা যেতে পারে?”

“অন্য ব্যাপারে বিশ্বাস করা যায়, কিন্তু যে ব্যাপারে মাধব আছে, তাতে কাউকে বিশ্বাস করা চলে না। যুগাফরে আমাদের মতলব টের পেলে তারা আমাদেরই মাধবের হাতে ধরিয়ে দেবে।”

“তা হ'লে—”

নিমাই হাসিয়া বলিলেন,—“ই্যা, মাঝি-মাল্লার কাজ আমাদেরই কবুতে হবে। কাণভট্টের অশীর্ষদ দেখছি এরি মধ্যে ফলতে আরম্ভ করেছে।”

চন্দনদাস বলিল,—“চুয়াকে খবর আমি দেব। শেষ রাত্রির দিকে পাইকরা দুমিয়ে পড়বে—সেই উপযুক্ত সময়। কি বলেন?”

“ই্যা। তুমি তোমার নৌকা পাঠিয়ে দিয়ে বড় বুদ্ধিমানের কাজ করেছ। মাধব নিশ্চিন্ত থাকবে, হয় ত রাত্রিতে চুয়ার বাড়ীতে পাহারা না থাকতে পারে।”

“অতটা ভরসা করি না। যা হোক দেখা যাক।”

সন্ধ্যার প্রাক্কালে দুই জন বাহির হইলেন। ব্রাহ্মণপল্লী হইতে অনেকটা উত্তরে গঙ্গাতীরে নৌ-কর সূত্রধরদের বাস। সেখানে উপস্থিত হইয়া দুই জনে দেখিলেন, রাশি রাশি শুপীকৃত শাল, পিয়াল, সেগুণ, জাকুল কাঠের প্রাকারের মধ্যে ছোট বড় নানাবিধ নৌকা তৈয়ার হইতেছে। কোনটির কঙ্কালনাত্র গঠিত হইয়াছে, কোনটি পাটাতনে শোভিত হইয়া পূর্ণাঙ্গ হইয়া উঠিতেছে। বড় বড় বজরা—পঞ্চাশ দাঁড়ের নৌকা—কাহারও হালধর-মুখ, কেহ বা ময়ূর-পঙ্কী, কেহ বা হংসমুখী। আবার ক্ষুদ্রকায় ডিঙ্গী, সঙ্গীর্ণদেহ ছিপও আছে। কোনটি সম্পূর্ণ হইয়াছে, কোনটি এখনও অসম্পূর্ণ।

ছুই জনে অনেক নৌকা দেখিয়া শেষে একটি ছোট ডিঙ্গী পছন্দ করিলেন। ডিঙ্গীর সুন্দর গঠন, আড়াই হাত চওড়া, আট হাত লম্বা—শোলার মত হালকা। মাত্র চারি জন লোক তাহাতে বসিতে পারে।

নিমাই পণ্ডিত ছুতারকে জিজ্ঞাসা করিলেন, “দাম কত?”

ছুতার কিন্তু ডিঙ্গী বেচিতে রাজি হইল না; বলিল, ফরমাসী ডিঙ্গী।

চন্দনদাস জিজ্ঞাসা করিল,—“এ ডিঙ্গীর জন্ত কত দাম পাবে?”

ছুতার একটু বাড়াইয়া বলিল;—“তিন তঞ্চ।”

চন্দনদাস শনিঃশব্দে তাহার হাতে এক মোহর দিল। ছুতার স্বপ্নেও এত মূল্য কল্পনা করে নাই, সে কিছুক্ষণ হতবাক থাকিয়া ‘মহানন্দে ডিঙ্গীর মালিকত্ব চন্দনদাসকে সমর্পণ করিল।

ডিঙ্গী তৎক্ষণাৎ গঙ্গার জলে ভাসানো হইল। নিমাই পণ্ডিত ও চন্দনদাস তাহাতে আরোহণ করিয়া ছুই জোড়া দাঁড় হাতে লইলেন। দাঁড়ের আশ্রিতে ডিঙ্গী জ্যা-মুক্ত তীরের মত জলের উপর ছুটিয়া গেল।

কিছুক্ষণ গঙ্গাবক্ষে দাঁড় টানিয়া উভয়ে দেখিলেন, ডিঙ্গী নির্দোষ ও অতি সহজে নিয়ন্ত্রণযোগ্য। ছুই জনে সন্তুষ্ট হইয়া তীরে ফিরিলেন। তার পর নৌকা ছুতারের তত্ত্বাবধানে রাখিয়া নিমাই পণ্ডিত বলিলেন,—“কাল বৈকালে আমি এসে ডিঙ্গী নিয়ে যাব।”

ছুতার আহ্লাদে এক দিনের জন্ত নৌকা রাখিতে সম্মত হইল।

অতঃপর নিমাই পণ্ডিত গৃহে প্রত্যাবর্তন করিলেন। চন্দনদাসের তখনও কাজ শেষ হয় নাই, সে গঙ্গার ধার দিয়া ঘাটের দিকে চলিল।

যে ঘাটে দ্বিপ্রহরে নৌকা বাধিয়াছিল, সেই ঘাটে যখন উপস্থিত হইল, তখন সন্ধ্যার ছায়া ঘনীভূত হইয়া আসিতেছে। ঘাটে কয়েকটি ক্ষুদ্র ডিঙ্গী বাধা ছিল; চন্দনদাস কয়েক জন মাঝিকে ডাকিয়া জিজ্ঞাসা করিল,—“বাপু, তোমরা জেলে ত?”

“আজ্ঞে, কর্তা।”

“তোমাদের মোড়ল কে?”

একজন বৃদ্ধ গোছের জেলে বলিল,—“আজ্ঞে কর্তা, আমি মোড়ল। আমার নাম শিবদাস।”

“বেশ। তোমার সঙ্গে আমি কিছু কারবার করতে চাই। এখানে যত জেলে আছে, সবাই তোমার অধীন ত?”

“আজ্ঞে।”

“কত জেলে ডিঙ্গী তোমাদের আছে?”

“তা—ত্রিশ চল্লিশখানা হবে।”

“বেশ। শোনো; তোমাদের যত ছেলে ডিঙ্গি আছে, সব আমি ভাড়া করলাম। তোমরা জেলে-মাঝির দল কাল বেলা তিন পহরের সময় বেরবে; বেরিয়ে সটান স্রোতের মুখে দক্ষিণে গিয়ে শান্তিপুরের ঘাটে নৌকা বাঁধবে। তারপর সেখানে আমার জন্তে অপেক্ষা করবে। সন্ধ্যা পর্যন্ত আমি যদি না যাই, তা হ’লে আবার ফিরে আসবে।—বুঝলে?”

“বুঝলাম কর্তা। কিন্তু কাজটা কি, তা ত এখনও জানতে পারিনি।”

“কাজের কথা শান্তিপুরের ঘাটে জানতে পাববে। কেমন, রাজি আছ?”

“আজ্ঞে, গররাজি নই। কিন্তু ধরুন, শান্তিপুরের ঘাটে যদি আপনার দেখা না পাই?”

“বলেছি ত, তা হ’লে ফিরে আসবে।”

“কিন্তু আমাদের যাওয়া, আসা যে তা হ’লে না-হক হররানি হয়, কর্তা। আপনাকে তখন পাব কোথায়? আপনাকে ত চিনি না।”

চন্দনদাস হাসিয়া বলিল,—“তা হলেও তোমাদের লোকসান হবে না।

তোমাদের অর্ধেক ভাড়া আমি আগাম দিয়ে যাব। সব নৌকা শান্তিপুরে যাওয়া আসার জন্তে কত ভাড়া লাগবে?”

শিবদাস মোড়ল বিবেচনা করিয়া বলিল,—“আজ্ঞে, দশটি তঞ্চার কমে হবে না।”

চন্দনদাস একটু ব্যবসাদারী করিল। কারণ, এক কথায় রাজি হইয়া গেলে জেলেরা কিছু সন্দেহ করিতে পারে। কিছুক্ষণ কসামাজার পর নয় তঞ্চা ভাড়া ধাৰ্য্য হইল। চন্দনদাস পাচ তঞ্চা শিবদাস মোড়লের হাতে দিয়া বলিল,—“এই নাও। কিছু কথার মড়চড় যেন না হয়।”

“আজ্ঞে”—শিবদাস মুদ্রা গণিয়া লইল—“আপনি নিশ্চিন্দ থাকুন কৰ্ত্তা, ঠিক সময়ে আমরা শান্তিপুরের ঘাটে হাজির থাকব—”

“সব ডিঙ্গি নিয়ে যাবে, একখানাও বাদ না পড়ে।”

“আজ্ঞে, একখানাও বাদ পড়বে না।”

এইরূপে নবদ্বীপ হইতে সমস্ত ডিঙ্গি তফাৎ করিবার বন্দোবস্ত করিয়া চন্দনদাস কতকটা নিশ্চিত্তমনে নিমাই পণ্ডিতের গৃহে ফিরিল সেইখানেই তাহার রাত্রিতে থাকিবার ব্যবস্থা হইয়াছিল।

৯

রাত্রি তিন প্রহরে, চুয়ার বাড়ীর দালানে পাঁচ ছই জন বসিয়া বসিয়াই ঘুমাইয়া পড়িয়াছিল। একজন দেয়ালে ঠেস দিয়া পদযুগল প্রসারিত করিয়া দিয়াছিল। দ্বিতীয় ব্যক্তি ঘুমের ঘোরে কখন কাৎ হইয়া পড়িয়াছিল; তাহার নাসারন্ধ্র হইতে কামারের হাপরের মত এক প্রকার শব্দ নির্গত হইতেছিল।

চারিদিকে গাঢ় অন্ধকার; কিন্তু অন্ধকারে চক্ষু অভ্যস্ত হইলে কিছু

কিছু দেখা যায়। চন্দনদাস নিঃশব্দে ছায়ার মত দালানে আসিয়া দাঁড়াইল। তাহার বাঁ হাতে সেই ক্ষুদ্র ছোরা। কিয়ৎকাল মূর্তির মত দাঁড়াইয়া সেই পাইকের নাসিকাস্থানি শুনিল, তারপর দালানের গাটতর অন্ধকারের ভিতর তাহার চক্ষু বস্তু নির্বাচন করিতে আরম্ভ করিল।

যে পাইকটা বসিয়া বসিয়া ঘুমাইতেছে, তাহার পদদ্বয় ঠিক দরজায় সম্মুখে প্রসারিত; ভিতরে প্রবেশ করিতে হইলে তাহাকে লঙ্ঘন করিয়া যাইতে হইবে। তা ছাড়া দরজার কবাট ভেজানো রহিয়াছে, ভিতর হইতে অর্গলবদ্ধ কি না, বুঝা যাইতেছে না। চন্দনদাস ধীরে ধীরে অতি সন্তর্পণে হাত বাড়াইয়া কবাট একটু ঠেলিল। মরিচা-পর্য্যাপ্ত হাঁস-কলে ছুঁচার ডাকের মত শব্দ হইল। দরজা ঝমং খুলিল।

হাঁস-কলের শব্দে পাইকের হাপর হঠাৎ বন্ধ হইল। চন্দনদাস স্পন্দিত-বক্ষে ছোরা দৃঢ়মুষ্টিতে পরিয়া দাঁড়াইয়া রহিল। কিন্তু পাইক জাগিল না, আবার তাহার নাক ডাকিয়া উঠিল।

চন্দনদাস তখন আবার কবাট একটু ঠেলিল, কবাট খুলিয়া গেল। এবারও একটু শব্দ হইল বটে, কিন্তু কেহ জাগিল না। তখন চন্দনদাস ইষ্টদেবতার নাম স্মরণ করিয়া নিঃশব্দে পাইকের পদযুগল লঙ্ঘন করিয়া ভিতরে প্রবেশ করিল।

আঙ্গিনায় উপস্থিত হইয়া চন্দনদাস চারিদিকে চাহিল। সম্মুখে কয়েকটা ঘর অক্ষুটভাবে দেখা যাইতেছে। কিন্তু কোন ঘরে চুয়া ঘুমাইতেছে? চাঁপাও বাড়ীতে আছে; চুয়াকে খুঁজিতে গিয়া যদি চাঁপ জাগিয়া উঠে, তবেই সর্বনাশ। চন্দনদাস কি করিবে ভাবিতেছে, এমন সময় তাহার হাতে মৃদু স্পর্শ হইল।

চন্দনদাস চমকিয়া উঠিয়া অজ্ঞাতসারেই ছোরা তুলিল। এই সময় তাহার কাণের কাছে মৃদুশব্দ হইল—“এসেছ?”

চুয়া ! কোমরে ছোরা রাখিয়া চন্দনদাস দুই হাতে চুয়ার হাত ধরিল, বলিল,—“চুয়া ! এসেছি ।”

চুয়ার নিখাসের মত মৃদু চাপা স্বর থর থর করিয়া কাঁপিতে লাগিল ; সে বলিল,—“তুনি আসবে বলেছিলে, তাই আমি তোমার জন্তে সারারাত জেগে আছি ।”

অন্য সময় কথাগুলি অভিসারিকার প্রণয়বাণীর মত শুনাইত ; কিন্তু বিপদের মাঝখানে দাঁড়াইয়াও চন্দনদাসের মনে হইল, এত মধুর শব্দসমষ্টি সে আর কখনও শুনে নাই । চুয়ার মুখস্থানি দেখিবার জন্য তাহার প্রাণে উদ্দমনীয় আঁকাঙ্ক্ষা জাগিতে লাগিল । অথচ অন্ধকারে কিছুই দেখা যায় না । চন্দনদাস চুয়ার কাণে কাণে বলিল,—“চুয়া, একটা আলো জ্বালতে পারো না ? তোমাকে বড় দেখতে ইচ্ছে হচ্ছে ।”

দু’জনে অন্ধকারে হাত ধরাধরি করিয়া দাঁড়াইয়া ছিল, চুয়া ক্ষণকাল চিন্তা করিয়া বলিল,—“আচ্ছা, এস”—বলিয়া হাত ধরিয়া লইয়া চলিল ।

চন্দনদাস তেমনই মৃদুকণ্ঠে জিজ্ঞাসা করিল,—“চাপা কোথায় ?”

“বুঝ্ছে ।”

“ঠান্দি ?”

“ঠান্দিও ঘুমিয়ে পড়েছে !”

গোহালের মত একটা পরিত্যক্ত ঘরে লইয়া গিয়া চুয়া চক্‌মকি ঠুকিয়া আলো জ্বালিল । তখন প্রদীপের ক্ষীণ আলোকে চুয়ার মুখ দেখিয়া চন্দনদাস চমকিয়া উঠিল । চোখদুটি জবাফুলের মত লাল, চোখের কোলে কালি পড়িয়াছে ; আশা, আশঙ্কা ও তীব্রোৎকণ্ঠার দ্বন্দ্ব চুয়ার অল্পপম রূপ যেন ছিঁড়িয়া ভাঙিয়া একাকার হইয়া গিয়াছে ।

চন্দনদাসের বুকে বেদনার শূল বিঁধিল, সে বাঁপ্পাকুলকণ্ঠে বলিয়া উঠিল,—“চুয়া !”

চুয়া মাটিতে বসিয়া পড়িয়া কাদিতে লাগিল ; রোদনরুদ্ধ স্বরে বলিল,—“তোমার নৌকা চ’লে গেছে শুনে এত ভয় হয়েছিল—”

চন্দনদাস চুয়ার পাশে বসিয়া আদর্শকণ্ঠে বলিল,—“চুয়া আর ভয় নেই। তোমার উদ্ধারের সমস্ত ব্যবস্থা করেছি।”

চুয়া চোখ মুছিয়া মুখ তুলিল,—“কি ?”

চন্দনদাস বলিল,—“বল্ছি। আগে বল দেখি, তুমি সাতার কাটতে জানো ?”

অবসাদভরা স্বরে চুয়া বলিল,—“জানি। তাই ত ডুবে মরতে পারিনি। কতবার সে চেষ্টা করেছি।”

চন্দনদাসের ইচ্ছা হইল, চুয়াকে বৃকে জড়াইয়া লইয়া সাহসনা দেয়। কিন্তু সে লোভ সম্বরণ করিল, বলিল,—“ও কথা ভুলে যাও! চুয়া, বৃকে সাহস আনো। আমি এসেছি দেখেও তোমার সাহস হয় না ?”

চুয়া কেবল তাহার কালিমালিপ্স চোখদুটি তুলিয়া চন্দনদাসের মুখের পানে চাহিয়া রহিল ; হয় ত নিজের একান্ত নির্ভরশীলতার কথা প্রকাশ করিয়া বলিতে চাহিল, কিন্তু বলিতে পারিল না। চন্দনদাস তখন সংক্ষেপে প্রাজ্ঞলভাবে উদ্ধারের উপায় বিবৃত করিয়া বলিল ; চুয়া ব্যগ্র বিস্ময়িতমনে শুনিла। শুনিতে শুনিতে তাহার চোখ দুটি জল গুড়াইয়া পড়িতে লাগিল।

চন্দনদাসের বিবৃতি শেষ হইলে চুয়া কিছুক্ষণ হেঁটমুখে নীরব হইয়া রহিল। লজ্জা করিবার সে অবকাশ পায় নাই, হৃদয়ের তুমুল আন্দোলনের মধ্যে এই তরুণ উদ্ধারকর্তাটিকে সে যে কি দৃষ্টিতে দেখিয়াছে তাহা নিজেই জানিতে পারে নাই। তাই উদ্ধারের আশা যখন তাহার সংশয়ময় চিন্তিত আগুনের মত জলিয়া উঠিল, তখন সে আর আশ্বসম্বরণ

করিতে পারিল না, চন্দনদাসের পায়ের উপর আছাড়িয়া পড়িল। ছুই হাতে পা জড়াইয়া কাঁদিয়া কহিল,—“একটা কথা বল।”

চন্দনদাস চুয়ার মুখ তুলিয়া ধরিবার চেষ্টা করিতে করিতে বলিল,—
“চুয়া, চুয়া, কি কথা?”

“বল, আমায় বিয়ে করবে? তুমি আমায় প্রবঞ্চনা করছ না?”

চন্দনদাস জোর করিয়া চুয়ার মুখ তুলিয়া তাহার চোখের উপর চোখ রাখিয়া বলিল,—“চুয়া, আমার মা’র নামে শপথ করছি, তোমাকে যদি বিয়ে না করি, যদি আমার মনে অন্য কোনও অভিসন্ধি থাকে, তবে আমি কুলাঙ্গার।”

চুয়ার মাথা আবার মাটিতে লুটাইয়া পড়িল। তার পর সে চোখ মুছিয়া উঠিয়া বসিল; বলিল,—“তবে আমাকে এখনই নিয়ে যাচ্ছ না কেন?”

চন্দনদাসের ইচ্ছা হইতোছিল, এখনই এই কারাগার হইতে চুয়াকে মুক্ত করিয়া লইয়া পলায়ন করে। কিন্তু স্ববুদ্ধি নিষেধ করিল। রাত্রি শেষ হইয়া আসিতেছে, ধরা পড়িবার সম্ভাবনা বড় বেশী। সে মাথা নাড়িয়া বলিল,—“না—এখন ভরসা হয় না। বাড়ীর দোরে পাহারা—যদি ওরা জেগে ওঠে—; কিন্তু আমার এখানে আর থাকা বোধ হয় নিরাপদ নয়—চাঁপার ঘুম ভাঙতে পারে।” বলিয়া চন্দনদাস অনিচ্ছা ভরে উঠিয়া দাঁড়াইল।

চুয়ার মনে আবার ভয় প্রবেশ করিল। সম্মুখে সমস্ত দিন পড়িয়া আছে; কি জানি কি হয়! সে ভয়-কাতর চক্ষু ছুটি তুলিয়া বলিল,—
“যাচ্ছ?—কিন্তু—”

“কোনও ভয় নেই, চুয়া।”

“কিন্তু—যদি বিঘ্ন হয়—,যদি—একটা জিনিষ দিতে পারবে?”

“কি?”

“একটু বিব। যদি কিছু বিব হয়—”

চন্দনদাস কিছুক্ষণ শব্দ হইয়া দাঁড়াইয়া রহিল, তারপর ধীরে ধীরে নিজের চুল হইতে সেই কাঁটা বাহির করিয়া দিল। গাঢ়স্বরে বলিল,—“চুয়া, যদি দেখ কোনও আশা নেই তবেই ব্যবহার কোরো, তার আগে নয়।” বলিয়া কাঁটার ভয়ঙ্কর কাখাকারিতা বুঝাইয়া দিল।

এতক্ষণে চুয়ার মুখে হাসি দেখা দিল। সে উঠিয়া দাঁড়াইয়া প্রোঙ্কল চক্ষে বলিল,—“আর আমি ভয় করি না।”

চন্দনদাসের মুখে কিছু হাসির প্রতিবিম্ব পড়িল না। সে চুয়ার হুই হাত লইয়া নিজের শুরুর উপর রাখিয়া বলিল,—“চুয়া—”

বাক্যটু চন্দনদাস ইহার অধিক আর কথা খুঁজিয়া পাইল না।

চুয়া অশ্রু-আর্দ্র হাসিমুখ একবার চন্দনদাসের বকের উপর রাখিল, অশ্রুটস্বরে কহিল,—“চুয়া নয়—চুয়া বোঁ। এঁট আনাদের বিয়ে।”

ঘরের বাহিরে আসিবার পর একটা কথা চন্দনদাসের মনে পড়িল। সে বলিল,—“ঠান্দি’র কথা ভুলে গিয়েছিলাম। তাকে বোলো—কাল সন্ধ্যার পর বাড়ী থেকে পালিয়ে যেন নিমাই পণ্ডিতের বাড়ীতে যায়। সেখানে ছ’এক দিন লুকিয়ে থাকবে, তারপর আমি তাকে নিয়ে যাবার ব্যবস্থা করব।”

গ্রীষ্মের ত্রিশ রাত্রি তখন শেষ হইয়া আসিতেছে। কাক-কোকিল জাকে নাই, কিন্তু বাতাসে আসন্ন প্রভাতের স্পর্শ লাগিয়া আছে। পূর্বাকাশে শুকতারা দপ্ দপ্ করিয়া জ্বলিতেছে।

আগ্নিনায় দাঁড়াইয়া চন্দনদাস আর একবার চুয়ার হুই হাত নিজের বকে চাপিয়া লইল। তারপর যে ভাবে আসিয়াছিল, সেই ভাবে ছায়ামূর্তির মত বাহির হইয়া গেল।

পাইক হুই জন শেষ রাত্রির গভীর ঘুম ঘুমাইতে লাগিল।

অমাবস্তার সংশয়গূর্ণ দিবস ধীরে ধীরে ক্ষয় হইয়া আসিল। অপ্রত্যাশিত কিছু ঘটিল না। কেবল দ্বিপ্রহরে মাধব চুয়ার গৃহে আসিয়া তদারক করিয়া গেল ও জানাইয়া গেল যে, তাহার প্রদত্ত শাস্ত্রীয়-বিধান যেন যথাযথ পালিত হয়।

এখানে চাপার কাজ শেষ হইয়াছিল; মাধবের অন্তর্গতি পাইয়া সে প্রমোদ-উচ্চানে পূজার আয়োজন করিতে গেল।

সায়াকে নবদ্বীপের ঘাটে স্নানার্থীর বিশেষ ভিড় ছিল না। দুই চারি জন নারী গা ধুইয়া যাইতেছিল, কেহ কেহ কলসে ভরিয়া গঙ্গাজল লইয়া যাইতেছিল। পুরুষের সংখ্যা অল্প। কেবল এক জন পুরুষ অধীরভাবে সোপানের উপর পদচারণ করিতেছিল ও মাঝে মাঝে স্থির হইয়া উৎকর্ণভাবে কি ভূনিতেছিল। তাহার গলায় মুক্তাহার বিন্ধিত—অনুথা সাধারণ বাঙালীর বেশ। বলা বাহুল্য, সে চন্দনদাস।

ক্রমে সূর্য্য নদীর পরপারে অন্তর্মিত হইল। নিদাঘকালের দ্রুত সন্ধ্যা যেন পক্ষ বিস্তার করিয়া আসিয়া ভাগীরথীর জলে ধূসর ছায়া বিছাইয়া দিল। পাশে নোকাঘাট নির্জ্জন ও নিস্তব্ধ। জেলে ডিঙ্গি একটিও নাই। দুই একখামি স্থলকলেবর মহাজনী কিস্তি নিঃসঙ্গ অসহায়ভাবে বিস্তীর্ণ ঘাটে লাগিয়া আছে।

গঙ্গাবক্ষেও নোকা নাই। কেবল দূরে উত্তরে একটা ক্ষুদ্র ডিঙ্গী স্রোতের মুখে ভাসিয়া আসিতেছে। অস্পষ্ট আলোকে মনে হয়, একটি লোক দাঁড় ধরিয়া তাহাতে বসিয়া আছে।

ক্রমে ডিঙ্গী মাঝগঙ্গা দিয়া ঘাটের সম্মুখীন হইল; কিন্তু ঘাটের

নিকটে আসিল না, গঙ্গাবক্ষে স্থির হইয়া রহিল। নৌকাজুত ব্যক্তিমাঝে মাঝে দাঁড় টানিয়া নৌকা ভাসিয়া যাইতে দিল না।

চন্দনদাস চুচস্থিতমুখে অধীরপূর্বে ঘুরিতে ঘুরিতে হঠাৎ থমকিয়া দাঁড়াইয়া পড়িল—ঐ আসিতেছে। পথে দূরাগত বাজোত্তম শুনা গেল। চন্দনদাস একবার গঙ্গাবক্ষস্থ ডিক্কীর দিকে তাকাইল, তারপর স্পন্দিতবক্ষে একটা গোলাকার বুরুজের উপর গিয়া বসিল।

বাজোত্তম ক্রমশঃ কাছে আসিতে লাগিল। মহারোলে কঁাসর-ঘণ্টা শিঙা-ঢোল বাজিতেছে। তাহার দৈবিক বজ্র বহু স্ত্রীপুত্রস্ব বালক জুটিয়াছিল, তাহাদের কলরব সেই সঙ্গে মিশিয়া কোলাহল তুমুল হইয়া উঠিয়াছে।

ঘাটের শীর্ষে আসিয়া কোলাহল থামিল; বাজনা বন্ধ হইল। চন্দনদাস দেখিল, কৌতূহলী জনতাকে দ্বিধা বিভক্ত করিয়া দুই সারি ঢাল-সড়কীধারী পাইক নামিয়া আসিতেছে। তাহাদের দুই সারির মধ্যস্থলে যুক্তকেশা জবামালা পরিহিতা চুয়া। চন্দনদাসও কৌতূহলী দর্শকের মত দাঁড়াইয়া উঠিয়া এই বিচিত্র শোভাযাত্রা দেখিতে লাগিল।

পাইকগণ সদন্তে অস্ত্র আফালন করিয়া দর্শকদের ঠেলিয়া সরাইয়া দিয়া ঘাটের দিকে নামিতে আরম্ভ করিল। তাহাদের মধ্যবর্তিনী চুয়া মস্তুরপদে এদিক ওদিক চাহিতে চাহিতে সোপান অবরোহণ করিতে লাগিল।

তারপর চন্দনদাসের সঙ্গে তাহার চোখাচোখি হইল। নিমেষের দৃষ্টি-বিনিময়ে যে ইঙ্গিত খেলিয়া গেল, আর কেহ তাহা দেখিল না।

বুরুজের পাশ দিয়া যাইবার সময় চন্দনদাস অগ্রগামী পাইককে উল্লেখ্যে জিজ্ঞাসা করিল,—“হ্যাঁ সর্দার, এ তোমাদের কিসের মিছিল?”

বদন সর্দার প্রস্ফুটকারীর দিকে অকুটি করিয়া তাকাইল, তাহার গলায় দোহুল্যমান মুক্তার হার দেখিল, তারপর রুচস্বরে কহিল,—“তোমার অত খবরে দরকার কি?”

চন্দনদাস মুখে বিনীতভাব প্রকাশ করিয়া বলিল,—“না না, তাই জিজ্ঞাসা করছি।” মনে মনে বলিল,—“মালিক আর চাকরের রা দেখি একই রকম। দাঁড়াও, তোমার মুণ্ডপাতের ব্যবস্থা করছি।”

পরবর্তী পাইকগণ সকলেই চোখ পাকাইয়া চন্দনদাসের দিকে তাকাইল; তাহার গলার লোভনীয় মুক্তাহার কাহারও দৃষ্টি এড়াইল না। দুর্দান্ত প্রভুর উচ্ছ্বল ভূতা—হারছড়া কাড়িয়া লইবার জন্য সকলেরই হাত নিশপিশ করিতে লাগিল।

জলের কিনারায় গিয়া পাইকের দল থামিল। চুয়া সোপান হইতে নুঁকিয়া গম্বাজল মাথায় দিল; তাহার ঠোঁট ছুটি অব্যক্ত প্রার্থনায় একটু নড়িল। তারপর সে ধীরে ধীরে জলে অবতরণ করিল। প্রথমে এক হাঁট, ক্রমে এক কোমর, শেষে বুক পর্যন্ত জলে গিয়া দাঁড়াইল। গলার মালা জলে ভাসাইয়া দিয়া ডুব দিল।

পাইকেরা কিনারায় কেহ বসিয়া কেহ দাঁড়াইয়া গল্প করিতে করিতে গৌকে মোচড় দিতে লাগিল।

এই সময় একটি ক্ষুদ্র ব্যাপার ঘটিল। চন্দনদাস ইতিমধ্যে বুরুজ হইতে নামিয়া পাইকদের পিছনে আসিয়া দাঁড়াইয়াছিল; হঠাৎ ব্যাকুলস্বরে বলিয়া উঠিল, “ঐ যাঃ।”

একজন পাইক ফিরিয়া দেখিল, চন্দনদাসের গলার মুক্তাহার ছিঁড়িয়া গিয়াছে এবং মুক্তাগুলি স্রুতা হইতে ঝড়ঝড় করিয়া ঘাটের শাণের উপর ঝরিয়া পড়িতেছে। সে লাফাইয়া আসিয়া মুক্তা কুড়াইতে লাগিল। তাহাকে মুক্তা কুড়াইতে দেখিয়া বাকি কয় জন পাইক হড়মুড় করিয়া

আসিয়া পড়িল। মুক্তার হরির লুট—এমন স্বেযোগ বড় ঘটে না। সকলে কাড়াকাড়ি করিয়া মুক্তা চূনিতে লাগিল, খেলা থাইয়া চন্দনদাস বাহিরে ছিটকাইয়া পড়িল।

পাইকেরা মুক্তা কুড়াইতেছে, দর্শকেরা তাহাদের ঘিরিয়া লুকচক্ষে দেখিতেছে। কেহ লক্ষ্য করিল না যে, এই অবকাশে চন্দনদাস গঙ্গায় নামিল। চুয়া তখন সাতার দিতে আরম্ভ করিয়াছে।

চুয়া ও চন্দনদাস পাশাপাশি সাতার কাটিয়া চলিল। অন্ধকার হইয়া আসিয়াছে; তাহাদের কালো মাথা ছুটী কেবল জলের উপর দেখা যাইতেছে। চুয়া চন্দনদাসের পানে তাকাইল, তাহার সিরু মুখের উজ্জ্বলিত হাসি চন্দনদাসকে প্রস্তুত করিল।

তাহারা যখন ঘাট হইতে প্রায় চল্লিশ হাত গিয়াছে, তখন ঘাটে একটা হৈ-হৈ শব্দ উঠিল। তারপর “ধর ধর পানালো পানালো—” কয়েক জন পাইক জলে লাফাইয়া পড়িল; কয়েক জন নৌকার সন্ধানে ছুটিল। কিন্তু নৌকা কোথায়? বদন সন্ধার বাঁড়ের মত চেঁচাইতে লাগিল।

গঙ্গার বুকে যে ছোট ডিঙ্গি ভাসিতেছিল, তাহা ক্রমে নিকটবর্তী হইতে লাগিল। চন্দনদাস বলিল, “চুয়া, যদি ইনিযে প’ড়ে থাকে, আমার কাঁধ ধর।”

চুয়া বলিল, “না, আমি পারবো।”

চন্দনদাস পিছু কিরিয়া দেখিল, যে পাইকগুলা জলে ঝাঁপ দিয়াছিল, তাহারা সজোরে সাতারিয়া আসিতেছে। কিন্তু তাহারা এখনও অনেক দূরে, নৌকা সম্মুখেই। কয়েক মূহূর্ত্ত পরে ছ’জনে একসঙ্গে গিয়া নৌকার কানা ধরিল।

নিমাই পণ্ডিত দাঁড় ছাড়িয়া চুয়াকে ধরিয়া নৌকায় তুলিলেন। চন্দনদাস তাহার পরে উঠিল।

যে পাইকটা সর্বাগ্রে আসিতেছিল, সে প্রায় বিশ হাতের মধ্যে আসিয়া পড়িয়াছিল। সে হাত তুলিয়া ভাঙা গলায় চীৎকার করিয়া কি একটা বলিল। প্রত্যুত্তরে চন্দনদাস উচ্চ হাসিয়া ছ'খানা দাঁড় হাতে তুলিয়া লইল। নিমাই পণ্ডিতও দাঁড় হাতে লইলেন।

দুই জনে একসঙ্গে দাঁড় জলে ডুবাইয়া টানিলেন। প্রদোষের ছায়ালোকে ক্ষুদ্র ভিক্ষী পাখীর মত উড়িয়া চলিল।

১১

নবদ্বীপ হইতে পাঁচ ক্রোশ উত্তরে গঙ্গাবক্ষে চন্দনদাসের দুই সমুদ্রতরী নোঙর করা ছিল। অন্ধকারে তাহাদের একচাপ গাঢ়তর অন্ধকারের মত দেখাইতেছিল।

রাত্রি এক প্রহরকালে ক্ষুদ্র নৌকা গিয়া চন্দনদাসের মধুকর ভিঙ্গার গায়ে ভিড়িল। মাঝিরা সজাগ ও সতর্ক ছিল; মুহূর্ত্তমধ্যে সকলে বড় নৌকায় উঠিলেন।

নিমাই পণ্ডিত বলিলেন, “আমার কাজ ত শেষ হ'ল, আমি এবার ফিরি।”

চন্দনদাস হাত যোড় করিয়া বলিল, “ঠাকুর, এত দয়া করলেন, একটু বিজ্ঞাম ক'রে যান।”

নৌকায় দুইটি কুঠুরী, একটা মাণিকভাণ্ডার অপরটা চন্দনদাসের শয়নকক্ষ। শয়নকক্ষের মেঝের রঙ্গীন পল্লব সূতীর আস্তরণ। ঘরে দীপ জলিতেছিল; সকলে তাহাতে প্রবেশ করিলেন। চুয়া এক কোণে জড়-সড় হইয়া অর্দ্ধশত বসন গায়ে জড়াইয়া দাঁড়াইল। চন্দনদাস তাড়াতাড়ি পেঁটারি হইতে নিজের একখানা ক্ষৌমবস্ত্র বাহির

করিয়া চুয়ার গায়ে ফেলিয়া দিল। চুয়া কাপড় লইয়া পাশের ঘরে গেল।

নিমাই পণ্ডিত আন্তরণের উপর আসন গ্রহণ করিয়াছিলেন ; চুয়া প্রশ্ন করিলে চন্দনদাস চুপি চুপি বলিল,—“ঠাকুর, বিয়েটা আজ রাতেই দিয়ে দিলে ভাল হয়।”

নিমাই হাসিয়া বলিলেন,—“এত তাড়া কিসের ? বাড়ী গিয়ে বিয়ে কোরো।”

চন্দনদাস ভারি ভাল মানুষের মত বলিল,—“না ঠাকুর, চুয়া যদি কিছু মনে করে ?—তা ছাড়া, নৌকায় একটি বৈ শোবার ঘর নেই।”

নিমাই বলিলেন,—“কিছু বিয়ে দিই কি ক’রে ? উপকরণ কে ?”

“ঠাকুর, আপনি পণ্ডিতমানুষ, সামান্য পুরুত ত নন। আপনি ইচ্ছে করলে শুধু-হাতেই বিয়ে দিতে পারেন।”

নিমাই স্মিতমুখে চিন্তা করিয়া বলিলেন,—“মন্দ কথা নয়। তুমি কন্যাকে হরণ ক’রে এনেছ, স্ততরাং তোমাদের রাক্ষস-বিবাহ হ’তে পারে। রাক্ষস-বিবাহে কোনও অস্বচ্ছন্দ্যের দরকার নেই।”

চন্দনদাস মহা উল্লাসে উঠিয়া গিয়া চুয়ার হাত ধরিয়া লইয়া আসিল ; বলিল,—“চুয়া, ঠাকুর এখনই আমাদের বিয়ে দেবেন।”

পট্টাশ্বরপরিহিতা চুয়া নত-নয়নে রহিল। নিমাই হাসিতে হাসিতে বলিলেন,—“চন্দনদাস নাছোড়বান্দা, আজই বিয়ে ক’রে তবে ছাড়বে”— চুয়ার মুখে অরুণরাগ দেখিয়া বুঝিলেন তাহার অমত নাই, বলিলেন,— “বেশ। ফুলের মালা ত হবে না, ছ’ছড়া হার যোগাড় কর।”

১

পুলকিত চন্দনদাস মাণিকভাণ্ডার হইতে দুগাছা মুক্তার মালা বাহির করিয়া দিল। তখন বিবাহ-ক্রিয়া আরম্ভ হইল।

নিমাই একটা হার চুয়ার হাতে দিয়া বলিলেন,—“হৃৎনে হৃৎনের
গলায় দাও।”

উভয়ে মালা বদল করিল।

নিমাই বলিলেন,—“ঈশ্বর সাক্ষী ক’রে গঙ্গার বৃকের উপর
ব্রাহ্মণ-সাক্ষাতে আজ তোমরা স্বামি-স্ত্রী হলে। আশীর্বাদ করি, তোমাদের
মঙ্গল হোক।”

উভয়ে নতজানু হইয়া ভক্তিপূত-চিত্তে এই দেবকল্প তরুণ ব্রাহ্মণের
পদধূলি লইল।

তারপর উঠিয়া চন্দনদাস বলিল,—“ঠাকুর, এ বিয়ে লোকে
মন্বে ত?”

নিমাই পণ্ডিতের নাসা স্ফুরিত হইল, তিনি গম্ভীরত্বেরে বলিলেন,—
“নিমাই পণ্ডিত যে বিয়ের পুরুত, সে-বিয়ে অমান্য করে কে?”

চন্দনদাস তখন নিমাই পণ্ডিতের পদতলে একমুঠি মোহর রাখিয়া
বলিল,—“দেবতা, আপনার দক্ষিণা।”

নিমাই এইবার হাসিয়া উঠিলেন, বলিলেন,—“ঐটি পারব না।—যাক
আজ উঠলাম। বুড়ীকে নিয়ে যাবার ব্যবস্থা শীঘ্র কোরো।
আর, বাড়ী গিয়ে যথারীতি লৌকিক বিবাহ ক’রে। অধিকন্তু ন
দোষায়।”

“তা করব। কিন্তু ঠাকুর, আপনি ক্লান্ত, পাচ-ছয় ক্রোশ দাড় টেনে
এসেছেন, আজ রাত্রিটা নৌকায় কাটিয়ে গেলে হ’ত না?”

“না—আজই আমায় ফিরতে হবে। রাত্রিতে না ফিরলে মা চিন্তিত
হবেন। তা ছাড়া, তোমার নৌকায় ত, একটা বৈ ঘর নেই।” বলিয়া
স্বহৃৎ হাসিলেন।

চন্দনদাস একটু লজ্জিত হইল।

তারপর সেই মসীকৃত অমাবস্তার মধ্যযামে নিমাই পণ্ডিত ডিঙ্গীতে উঠিয়া একাকী নবদ্বীপের পানে ফিরিয়া চলিলেন। যতক্ষণ তাঁহার দাঁড়ের শব্দ শুনা গেল, চুয়া ও চন্দন যোড়হস্তে তক্ষতচিহ্নে নৌকার পাশে দাঁড়াইয়া বাহিরের দিকে তাকাইয়া রহিল।

—শেষ—

শ্রীশরদ্দিন্দু বন্দ্যোপাধ্যায় প্রণীত

জাতিস্মরণ

[অতীত ভারতের গৌরবময় যুগের বিস্ময়কর গল্প-কাহিনী]

...প্রাগৈতিহাসিক যুগ, বৌদ্ধযুগ ও চন্দ্রগুপ্তের কথা লইয়া লেখক তিনটি উপাখ্যান রচনা করিয়াছেন, ...লেখকের রচনাভঙ্গি সুন্দর, গল্প বলিবার কৌশল তাঁহার আছে, ঐতিহাসিক আধাড়াওয়াও তিনি সৃষ্টি করিতে পারেন; কুর মন্তব্য-চরিত্র আঁকিতে তাঁহার হাত কাঁপে না। ... তিনি যে শক্তিমান লেখক, তাহা স্বীকার করিতে হইবে। শরদ্দিন্দুবাবু ইতিহাসের কঙ্কাল প্রাণ-প্রতিষ্ঠা করিতে পারিয়াছেন। —‘প্রবাসী’

The book first draws our attention by the uniqueness of the subject. The author who is already well-known as a powerful storyteller in the realm of modern Bengali literature, has in this book, carried us back to the dim, old past of India, the India of our dreams that we cannot visualise through the dry Pages of history.

Mr. Banerjee with considerable command over language breathes life into the dry bones of history, and his characters live and talk vibrating with life and emotion.

—Amrita Bazar Patrika.

—দেড় টাকা—

পি সি সরকার এণ্ড কোং লিঃ

শ্রীশরদিন্দু বন্দ্যোপাধ্যায় প্রণীত ব্যোমকেশের ডায়েরী ব্যোমকেশের কাহিনী

[বাংলাভাষার সর্বশ্রেষ্ঠ মৌলিক ডিটেক্টিভ গল্পের বই]

‘ব্যোমকেশের ডায়েরী’ পড়িয়া তাঁহারা আনন্দলাভ করিয়াছেন, উহার দ্বিতীয়খণ্ড পড়িয়া তাঁহারা আরও মুগ্ধ হইবেন। অভিনব ঘটনা সৃষ্টির দ্বারা রহস্যজালের উদ্ঘাটনে লেখক সিদ্ধহস্ত, তাঁহার কলাকুশলী হস্তে চরিত্রগুলি উজ্জ্বল হইয়া ফুটিয়াছে। চোরাবালির, রহস্য-সমাপানে অথবা ধনী করালীবাবুর মৃত্যুর কারণ নির্ধারণে যে অদ্ভুত বুদ্ধির তীক্ষ্ণতা গ্রন্থকার নিপিচাতুষ্যে ফুটাইয়া তুলিয়াছেন, তাহা বাস্তবিকই পাঠকের বিশ্বাস উৎপাদন করে। উল্লেখ্য ডিটেক্টিভ গল্প বাংলাভাষায় নিতান্ত বিরল; গ্রন্থকারের এই শ্রেণীর আখ্যায়িকা সেই অভাব পূর্ণ করিবে।

—‘প্রবাসী’

শরদিন্দু বাবুর ডিটেক্টিভ গল্পের অভিনবত্বের দাবী বড় স্বল্প নয়; ব্যোমকেশের কাহিনীতেও তাঁর লেখার উৎকর্ষ বজায় রেখেছেন।...একটু আশ্চর্যের কথা যে বাংলা ডিটেক্টিভ গল্পরচনায় এ পণাগী এতদিন অল্পস্বত হয়নি। এ প্রণালী অল্পসরণে প্রথম যশলাভের কৃতিত্ব শরদিন্দু বাবুর যোগ্যতাপেই প্রাপ্য; অধিকন্তু তাঁর ভাষা সুন্দর ও বাহুল্য বর্জিত।...ব্যোমকেশ ও তার বন্ধু, Sherlock Holmes ও Watson এর মত বাংলা ডিটেক্টিভ উপন্যাসে স্থায়িত্ব লাভ করবে আশা করা অত্যাশ হ’বেনা।

—‘পরিচয়’

প্রতিখণ্ড দেড়টাকা

পি সি সরকার এণ্ড কোং লিঃ

